

清史研究

天地会

(三)

中国人民大学清史研究所
中国第一历史档案馆 合编

中国人民大学出版社

清史资料丛刊

天地会

(三)

中国人民大学清史研究所 合编
中国第一历史档案馆

中国人民大学出版社

天 地 会

(三)

中国人民大学清史研究所 合编
中国第一历史档案馆

*

中国人民大学出版社出版
(北京西郊海淀路39号)
外文印刷厂印刷
(北京西郊车公庄西路19号)
新华书店北京发行所发行

*

开本：850×1168毫米32开 印张：15.5 插页2

1982年12月第1版 1982年12月第1次印刷

字数：343,000 册数：6,500

统一书号：11011·97 定价：2.10元

7067/100

目 录

渝江西巡抚何裕城复奏米石何时运至海口装运……………（ 1 ）

乾隆五十二年七月初二日

渝钦差湖广总督常青等确查廖东胡番实情……………（ 2 ）

乾隆五十二年七月初三日

大学士和珅奏审讯廖东等情片……………（ 3 ）

附：审讯廖东等人供词笔录

乾隆五十二年七月初三日

钦差湖广总督常青等奏连次打仗等情折……………（ 8 ）

乾隆五十二年七月初四日批

钦差湖广总督常青奏收容凤山等地溃兵折……………（ 10 ）

乾隆五十二年七月初四日批

福建陆路提督柴大纪奏大排竹接仗及恒瑞等率兵抵台
折……………（ 12 ）

乾隆五十二年七月初四日批

福建台湾镇总兵柴大纪奏历次处死林爽文军人众折……………（ 13 ）

附：被处死者名单

乾隆五十二年七月初四日批

渝钦差湖广总督常青等加紧巡防各口岸并速奏筹办情
形……………（ 18 ）

乾隆五十二年七月初四日

山东巡抚觉罗长麟奏筹办闽省硝斤折……………（ 21 ）

乾隆五十二年七月初四日批

渝钦差湖广总督常青相机进取并晓谕民人粮米即源源
接济……………（ 22 ）

乾隆五十二年七月初五日

浙江巡抚琅玕等奏遵旨挑派满兵赴闽折·····	(24)
乾隆五十二年七月初五日批	
闽浙总督李侍尧奏麻豆社等处失陷折·····	(26)
乾隆五十二年七月初十日批	
闽浙总督李侍尧奏委员将金娘等解京片·····	(27)
乾隆五十二年七月初十日批	
谕钦差湖广总督常青等集中兵力打通粮道捉拿首要·····	(28)
乾隆五十二年七月初十日	
谕四川总督保宁等续备川米三十万石迅速运闽·····	(33)
乾隆五十二年七月初十日	
钦差湖广总督常青奏南北两路连日接战折·····	(34)
乾隆五十二年七月十二日批	
谕钦差湖广总督常青无须再查廖东等事·····	(37)
乾隆五十二年七月十二日	
钦差湖广总督常青等奏请恩赏打仗出力人员折·····	(40)
乾隆五十二年七月十三日批	
钦差湖广总督常青奏诸罗盐水等处战况折·····	(42)
乾隆五十二年七月十三日批	
闽浙总督李侍尧奏续派兵船护饷及预行料理战船折·····	(44)
乾隆五十二年七月十三日批	
闽浙总督李侍尧奏蓝元枚作战情形及续买花布运台片·····	(45)
乾隆五十二年七月十三日批	
闽浙总督李侍尧奏闽省额兵不敷应用请予酌补折·····	(46)
乾隆五十二年七月十三日批	
谕钦差湖广总督常青等剿抚兼施广为募兵·····	(47)
乾隆五十二年七月十三日	
闽浙总督李侍尧奏闽省存营鸟枪半属不堪使用折·····	(51)
乾隆五十二年七月十三日批	
谕内阁柴大纪奋勇出力著授为参赞·····	(52)
乾隆五十二年七月十三日	
钦差协办大学士福康安奏接奉谕旨驰赴行在折·····	(52)

乾隆五十二年七月十三日批

谕内阁著户部酌拨银一百万两解闽…………… (53)

乾隆五十二年七月十三日

福建水师提督蓝元枚奏鹿港兵力不敷酌请添兵折…………… (54)

乾隆五十二年七月十五日批

福建水师提督蓝元枚奏近日战况片…………… (55)

乾隆五十二年七月十五日批

福建水师提督蓝元枚奏赴彰化攻杀情形片…………… (56)

乾隆五十二年七月十五日批

谕钦差湖广总督常青等南北夹攻切勿株守…………… (58)

乾隆五十二年七月十五日

谕闽浙总督李侍尧妥速募兵并令澎湖弁兵就近渡台…………… (63)

乾隆五十二年七月十六日

两广总督孙士毅奏遵旨添派征兵催趲赴台折…………… (64)

乾隆五十二年七月十七日批

谕两广总督孙士毅再速拨兵一千名赴闽…………… (65)

乾隆五十二年七月十七日

闽浙总督李侍尧奏调兵赴台折…………… (66)

乾隆五十二年七月十八日批

谕钦差湖广总督常青等切勿株守分兵零星打仗…………… (68)

乾隆五十二年七月十八日

江西巡抚何裕城奏准札调拨火药业已解闽折…………… (70)

乾隆五十二年七月十八日批

钦差湖广总督常青等奏加派官兵应援诸罗折…………… (70)

乾隆五十二年七月二十日批

钦差湖广总督常青等奏山猪毛战况片…………… (72)

乾隆五十二年七月二十日批

谕钦差湖广总督常青等将剿捕及会同柴大纪合攻之处

速奏…………… (73)

乾隆五十二年七月二十日

谕大学士阿桂阅看常青等折据实复奏…………… (76)

乾隆五十二年七月二十日

两广总督孙士毅奏奉旨调兵赴闽折…………… (77)

乾隆五十二年七月二十日批

谕内閣沿海各口岸密緝逸逃天地会众不得扰累商船…………… (79)

乾隆五十二年七月二十日

谕钦差湖广总督常青等勿再因循贻误自干重咎…………… (80)

乾隆五十二年七月二十一日

谕闽浙总督李侍尧复奏更换常青是否适宜…………… (82)

乾隆五十二年七月二十一日

广州将军存泰等奏挑选驻防官兵赶紧起程赴台折…………… (84)

乾隆五十二年七月二十三日批

广东巡抚图萨布奏慎密办理沿海口岸巡查事宜片…………… (85)

乾隆五十二年七月二十三日批

谕闽浙总督李侍尧等巡緝毋得滋扰商贩…………… (86)

乾隆五十二年七月二十三日

谕闽浙总督李侍尧等将广东庄民留营甚为错谬…………… (87)

乾隆五十二年七月二十四日

闽浙总督李侍尧奏台湾府库银两无存请拨银以济兵饷
折…………… (88)

乾隆五十二年七月二十四日批

谕闽浙总督李侍尧用兵之际诸事宜严…………… (89)

乾隆五十二年七月二十四日

谕浙江巡抚琅玕查封孙景燧家产以抵官项…………… (90)

乾隆五十二年七月二十四日

闽浙总督李侍尧奏请于漳泉二府募兵折…………… (91)

乾隆五十二年七月二十五日批

闽浙总督李侍尧奏陆续调兵赴台片…………… (93)

乾隆五十二年七月二十五日批

谕钦差湖广总督常青等将近日是否会攻速奏…………… (94)

乾隆五十二年七月二十六日

谕闽浙总督李侍尧等赈济漳泉二府以收民心…………… (95)

乾隆五十二年七月二十六日

钦差湖广总督常青等奏进攻南潭等情折…………… (96)

乾隆五十二年七月二十七日批

钦差湖广总督常青奏请再行添兵赴台折…………… (99)

乾隆五十二年七月二十七日批

钦差湖广总督常青等奏连日拨兵应援诸罗并严防窜逸
折…………… (101)

乾隆五十二年七月二十七日批

谕钦差湖广总督常青等速奏近日战况…………… (103)

乾隆五十二年七月二十七日

谕钦差湖广总督常青等务宜悉心筹划设法前进…………… (107)

乾隆五十二年七月二十八日

福建巡抚徐嗣曾奏照料调兵配渡及饬属赶运军需折…………… (108)

乾隆五十二年七月二十八日批

谕闽浙总督李侍尧速奏招抚及调兵作战情形…………… (110)

乾隆五十二年七月二十九日

大学士阿桂复奏增兵及令福康安先行通筹全局折…………… (112)

乾隆五十二年七月二十九日批

福建水师提督蓝元枚复奏筹划进攻事宜折…………… (114)

乾隆五十二年八月初一日批

福建水师提督蓝元枚奏诸罗周围战情片…………… (116)

乾隆五十二年八月初一日批

福建水师提督蓝元枚奏大肚溪战情片…………… (117)

乾隆五十二年八月初一日批

谕钦差湖广总督常青等应南北夹攻速报战情…………… (117)

乾隆五十二年八月初一日

闽浙总督李侍尧奏台地近日情形折…………… (120)

乾隆五十二年八月初一日批

闽浙总督李侍尧奏前审廖东情形折…………… (121)

乾隆五十二年八月初一日批

谕闽浙总督李侍尧嗣后有查询诬误案件不必咨询常青… (123)

乾隆五十二年八月初一日

大学士和珅奏进呈金娘等人口供片……………（124）

附：审讯金娘等人供词笔录

乾隆五十二年八月初一日

大学士和珅奏续奏金娘等人口供片……………（128）

附：审讯金娘等人供词笔录

乾隆五十二年八月初一日

大学士和珅等奏审拟金娘等人片……………（130）

附：审讯杨章等人供词笔录

乾隆五十二年八月初二日

福建陆路提督柴大纪奏麻豆庄等处战况折……………（132）

乾隆五十二年八月初二日批

福建陆路提督柴大纪奏鹿港等处堵御情形折……………（134）

乾隆五十二年八月初二日批

浙闽总督李侍尧等查察柴大纪文报何以迟延并速奏

近况……………（136）

乾隆五十二年八月初二日

渝四川总督保宁等挑选屯练降番赴闽……………（137）

乾隆五十二年八月初二日

渝署湖广总督舒常等挑选官兵听候调遣……………（138）

乾隆五十二年八月初二日

渝内阁授福康安为将军督办军务常青来京陛见……………（139）

乾隆五十二年八月初二日

军机处为调赴台湾听福康安差遣事给江南狼山镇总兵

袁国璜札文……………（140）

乾隆五十二年八月初二日

渝钦差湖广总督常青不可因福康安赴台督办心怀疑惧…（141）

乾隆五十二年八月初二日

大学士和珅等奏恒瑞奏折人所述台湾战况片……………（142）

乾隆五十二年八月初三日

署湖广总督舒常等奏酌拨湖南仓谷赴闽折……………（144）

乾隆五十二年八月初三日批

闽浙总督李侍尧奏官兵直抵诸罗折……………（146）

乾隆五十二年八月初五日批

谕钦差协办大学士福康安等庄大田有潜逃之信应乘机

奋力进击……………（147）

乾隆五十二年八月初五日

大学士和珅等奏遵旨询问常青赍折差弁李文斌情形片…（150）

乾隆五十二年八月初六日

谕湖广总督常青亲统官兵长驱北路捉拿林爽文等……………（151）

乾隆五十二年八月初六日

闽省总督李侍尧奏遵旨将运米接济及缓征钱粮出示晓

谕折……………（153）

乾隆五十二年八月初八日批

闽浙总督李侍尧奏续调兵丁分拨情形片……………（155）

乾隆五十二年八月初八日批

闽浙总督李侍尧奏粮船于洋面被劫情形折……………（156）

乾隆五十二年八月初八日批

谕钦差协办大学士福康安从严审办洋面抢劫粮船案……………（157）

乾隆五十二年八月初八日

钦差协办大学士福康安奏起程往台办理军务折……………（159）

乾隆五十二年八月初九日批

钦差湖广总督常青等奏南潭打仗得胜折……………（161）

乾隆五十二年八月初九日批

钦差湖广总督常青等奏应援官兵已抵诸罗折……………（163）

附：陈妈球等供单

乾隆五十二年八月初九日批

福建水师提督蓝元枚奏西螺战况折……………（166）

乾隆五十二年八月初九日批

两广总督孙士毅奏林爽文军在大里代筑城折……………（168）

乾隆五十二年八月初九日批

- 谕钦差协办大学士福康安等务须跟踪追剿庄大田……………（169）
乾隆五十二年八月初九日
- 谕钦差大学士阿桂阅看折谕详悉复奏……………（174）
乾隆五十二年八月初九日
- 谕钦差湖广总督常青等将陈妈球等就地正法……………（175）
乾隆五十二年八月初九日
- 两广总督孙士毅奏招募兵丁以备调遣折……………（175）
乾隆五十二年八月初九日批
- 闽浙总督李侍尧奏遵旨募兵及派兵赴鹿耳门折……………（177）
乾隆五十二年八月十一日批
- 闽浙总督李侍尧奏飭令蓝元枚进兵大里杙斗六门片……（179）
乾隆五十二年八月十一日批
- 谕钦差大学士福康安等乘庄大田军涣散之势妥为招抚…（180）
乾隆五十二年八月十一日
- 钦差湖广总督常青等奏军中偶染暑湿等情折……………（182）
乾隆五十二年八月十二日批
- 钦差湖广总督常青等奏应援官兵抵诸罗后并无信息片…（184）
乾隆五十二年八月十二日批
- 谕钦差大学士阿桂等严行申饬常青蓝元枚……………（185）
乾隆五十二年八月十二日
- 福建巡抚徐嗣曾奏浙省满兵过竣及料理添兵赴淡水等
情折……………（188）
乾隆五十二年八月十五日批
- 闽浙总督李侍尧奏拨兵配渡及增募营兵折……………（191）
乾隆五十二年八月十五日批
- 闽浙总督李侍尧奏多解米石赴台以资招抚折……………（192）
乾隆五十二年八月十五日批
- 谕钦差协办大学士福康安等令蓝元枚速与徐鼎士夹攻
大里杙……………（194）
乾隆五十二年八月十五日
- 福建水师提督蓝元枚奏派员前往沿海村庄晓谕民人折…（197）

乾隆五十二年八月十七日批

谕钦差协办大学士福康安等星速赴台并令蓝元枚会攻

大里杙…………… (199)

乾隆五十二年八月十七日

参赞蓝元枚等复奏查询任承恩所供打仗情形折…………… (201)

乾隆五十二年八月十七日批

谕留京办事王大臣等提讯任承恩何以捏词谎供…………… (202)

乾隆五十二年八月十七日

永琅奏诘问任承恩捏词谎供折…………… (203)

(批文日期缺)

大学士和珅等奏审拟彭喜赖树片…………… (204)

附：审讯彭喜赖树供词笔录

乾隆五十二年八月十八日

浙江巡抚琅玕奏酌拨本省盐课银赴闽备用片…………… (207)

乾隆五十二年八月十八日批

闽浙总督李侍尧奏止须添派海兰察等赴台折…………… (208)

乾隆五十二年八月十九日批

谕钦差湖广总督常青与蓝元枚夹攻林爽文…………… (210)

乾隆五十二年八月十九日

谕钦差湖广总督常青等速奏近况…………… (212)

乾隆五十二年八月二十日

谕钦差协办大学士福康安等星速渡台以期迅奏肤功…………… (214)

乾隆五十二年八月二十一日

湖南巡抚浦霖奏挑备官兵候调赴闽折…………… (216)

乾隆五十二年八月二十一日批

钦差湖广总督常青等奏接据诸罗文报再请添兵折…………… (217)

乾隆五十二年八月二十一日批

谕钦差湖广总督常青切勿株守府城…………… (221)

乾隆五十二年八月二十二日

大学士阿桂复奏台湾剿捕事宜管见折…………… (223)

乾隆五十二年八月二十二日批

- 大学士阿桂复奏进攻大里杙等管见片……………（225）
乾隆五十二年八月二十二日批
- 钦差湖广总督常青奏近日战况及诸罗被困等情折……………（227）
乾隆五十二年八月二十三日批
- 闽浙总督李侍尧奏增兵接济诸罗折……………（230）
乾隆五十二年八月二十三日批
- 谕钦差协办大学士福康安等南北夹攻切勿株守分兵……………（231）
乾隆五十二年八月二十三日
- 两广总督孙士毅奏张破脸狗供出之赵明德等情折……………（237）
乾隆五十二年八月二十三日批
- 大学士和珅等奏常青处有兵四千名片……………（237）
乾隆五十二年八月二十三日
- 成都将军鄂辉等奏遵旨调派番练筹酌办理折……………（237）
乾隆五十二年八月二十三日批
- 成都将军鄂辉等奏请赴台片……………（239）
乾隆五十二年八月二十三日批
- 两广总督孙士毅奏闽省所需火药可在粤配制报销片……………（239）
乾隆五十二年八月二十四日批
- 两广总督孙士毅奏续调官兵全数出境折……………（240）
乾隆五十二年八月二十四日批
- 两广总督孙士毅奏遵旨拨粤海关银二十万两解闽片……………（241）
乾隆五十二年八月二十四日批
- 钦差协办大学士福康安奏途次拆阅常青奏折筹酌缘由
折……………（242）
乾隆五十二年八月二十四日批
- 钦差协办大学士福康安奏札知李侍尧速备马匹送台片…（245）
乾隆五十二年八月二十四日批
- 钦差协办大学士福康安奏请调贵州湖广等省兵迅速赴
闽片……………（245）
乾隆五十二年八月二十四日批
- 谕钦差协办大学士福康安等不可先存畏怯之意……………（246）

- 乾隆五十二年八月二十四日
 贵州巡抚李庆棠奏遵旨预挑战兵二千赴闽折……………（249）
 乾隆五十二年八月二十四日批
 谕钦差协办大学士福康安无庸疑惧奋勇直前……………（250）
 乾隆五十二年八月二十五日
 谕钦差大学士阿桂阅看折谕复奏所见……………（254）
 乾隆五十二年八月二十五日
 闽浙总督李侍尧奏募兵及添造军械等情折……………（255）
 乾隆五十二年八月二十五日批
 谕钦差协办大学士福康安等江西兵毋庸再调……………（256）
 乾隆五十二年八月二十六日
 谕钦差协办大学士福康安等已令保成续调黔兵二千赴
 闽听调……………（258）
 乾隆五十二年八月二十六日
 谕钦差协办大学士福康安等应于炮手后紧接短兵……………（260）
 乾隆五十二年八月二十六日
 两广总督孙士毅奏续调广西兵三千名赴台折……………（262）
 乾隆五十二年八月二十六日批
 两广总督孙士毅奏续拨粤兵一千名赴闽片……………（263）
 乾隆五十二年八月二十六日批
 谕贵州提督保成等所调黔兵二千即速赴闽省……………（264）
 乾隆五十二年八月二十六日
 谕提督柴大纪应以保存师旅为要不必拘泥死守孤城……………（265）
 乾隆五十二年八月二十七日
 云贵总督富纲奏预备黔省赴闽官兵事宜折……………（267）
 乾隆五十二年八月二十九日批
 闽浙总督李侍尧奏闽省夫船雇价等情折……………（269）
 乾隆五十二年九月初二日批
 闽浙总督李侍尧奏查明台湾无着库项缘由折……………（271）
 乾隆五十二年九月初二日批
 闽浙总督李侍尧奏察看北淡水情形及拨兵接应徐鼎士

- 折…………… (273)
乾隆五十二年九月初二日批
- 谕闽浙总督李侍尧闽省夫船雇价等皆系细事无庸过虑… (275)
乾隆五十二年九月初二日
- 两广总督孙士毅奏续调粤兵一千名速赴诸罗接应折… (277)
乾隆五十二年九月初四日批
- 谕闽浙两广督臣备调兵丁即行停止调往…………… (278)
乾隆五十二年九月初四日
- 谕杭州将军宝琳查办逃兵之父以示惩警…………… (279)
乾隆五十二年九月初四日
- 福建水师提督蓝元枚奏预备往攻斗六门折…………… (280)
乾隆五十二年九月初五日批
- 福建水师提督蓝元枚奏晓谕各社番民片…………… (282)
乾隆五十二年九月初五日批
- 谕钦差协办大学士福康安等严行申飭蓝元枚…………… (283)
乾隆五十二年九月初五日
- 福建水师提督蓝元枚因病奏请革职片…………… (285)
乾隆五十二年九月初六日批
- 谕钦差协办大学士福康安等蓝元枚患病应火速渡台…… (287)
乾隆五十二年九月初六日
- 谕福建提督蓝元枚安心调养不可泄露患病信息…………… (290)
乾隆五十二年九月初七日
- 谕钦差协办大学士福康安等着李化龙署水师提督…………… (291)
乾隆五十二年九月初七日
- 福建陆路提督柴大纪奏打仗获胜等情折…………… (293)
乾隆五十二年九月初七日批
- 钦差湖广总督常青奏俟援兵到后再往接应诸罗片…………… (295)
乾隆五十二年九月初七日批
- 福建陆路提督柴大纪奏诸罗打仗得胜折…………… (296)
乾隆五十二年九月初七日批
- 闽浙总督李侍尧奏蓝元枚身故飞檄李化龙等筹办攻剿

- 折…………… (300)
乾隆五十二年九月初七日批
- 谕钦差协办大学士福康安等应策励将弁奋勇前进…………… (302)
乾隆五十二年九月初七日
- 谕内阁赏为首之诸罗城绅民以官职并再蠲免台湾府明年钱粮…………… (305)
乾隆五十二年九月初七日
- 谕内阁赏蓝元枚太子太保并赐银一千两…………… (306)
乾隆五十二年九月初七日
- 大学士阿桂奏请宽福康安过急之咎折…………… (306)
乾隆五十二年九月初七日批
- 谕钦差大学士阿桂所见甚合机宜已令福康安迅赴鹿港… (308)
乾隆五十二年九月初七日
- 福建按察使李永祺奏遵旨到台办理军需折…………… (309)
乾隆五十二年九月初七日批
- 谕钦差协办大学士福康安当到鹿港鼓勇前进并令常青往攻南路…………… (310)
乾隆五十二年九月初八日
- 谕钦差协办大学士福康安等严办劫船者并招徕投诚乘势进击…………… (312)
乾隆五十二年九月初八日
- 钦差湖广总督常青等奏台湾府知府杨廷桦病故暂委杨廷理署理片…………… (315)
乾隆五十二年九月初九日批
- 谕内阁将杨廷理补授台湾府知府…………… (315)
乾隆五十二年九月初九日
- 福建汀州镇总兵普吉保奏请速派大员会同办理折…………… (316)
乾隆五十二年九月初九日批
- 钦差湖广总督常青奏亲统官兵前赴诸罗折…………… (317)
乾隆五十二年九月初九日批

谕钦差协办大学士福康安等抵诸罗后即长驱深入……………（320）

乾隆五十二年九月初九日

谕留京办事王大臣等将本旨及蓝元枚遗折给黄仕简阅

看命其回奏……………（322）

乾隆五十二年九月初十日

谕钦差协办大学士福康安等鹿仔草等处留兵未可轻撤…（323）

乾隆五十二年九月十一日

钦差湖广总督常青奏府城诸罗等处情形折……………（326）

乾隆五十二年九月十一日批

钦差湖广总督常青奏拨兵应援诸罗等情折……………（329）

乾隆五十二年九月十一日批

谕钦差协办大学士福康安查询常青恒瑞处置纰缪等情…（330）

乾隆五十二年九月十二日

钦差协办大学士福康安奏即赴台湾申明军纪折……………（332）

乾隆五十二年九月十二日批

谕钦差协办大学士福康安等速解诸罗之围……………（334）

乾隆五十二年九月十二日

闽浙总督李侍尧奏蔡攀龙等应援诸罗折……………（337）

乾隆五十二年九月十四日批

谕钦差协办大学士福康安等坚持定见奋勇直前……………（339）

乾隆五十二年九月十四日

广西巡抚孙永清奏官兵三千名起程赴台折……………（341）

乾隆五十二年九月十四日批

广西巡抚孙永清奏咨调各兵宽备火药片……………（342）

乾隆五十二年九月十四日批

闽浙总督李侍尧奏请赴台兵丁加给盐菜银折……………（343）

乾隆五十二年九月十四日批

钦差湖广总督常青奏复令广东庄义民回庄折……………（344）

乾隆五十二年九月十四日批

谕钦差湖广总督常青令山猪毛广东民人仍回军营……………（345）

乾隆五十二年九月十四日

- 谕钦差协办大学士福康安等查处魏大斌被截兵溃一事… (347)
乾隆五十二年九月十五日
- 大学士和珅奏黄仕简等赴台带兵情形及台湾现有兵力
片…………… (349)
乾隆五十二年九月十六日
- 谕钦差协办大学士福康安等一抵鹿港即奋力进兵………… (349)
乾隆五十二年九月十六日
- 谕钦差协办大学士福康安等将魏大斌革职蔡攀龙等分
别奖赏…………… (351)
乾隆五十二年九月十七日
- 闽浙总督李侍尧奏据报诸罗解围折…………… (354)
乾隆五十二年九月十七日批
- 谕新调福建水师提督柴大纪等将如何筹划进兵速奏………… (355)
乾隆五十二年九月十八日
- 福建汀州镇总兵普吉保奏候李化龙到鹿港即进攻西螺
斗六门折…………… (357)
乾隆五十二年九月十九日批
- 大学士和珅奏询问常青恒瑞赍折差弁片…………… (358)
乾隆五十二年九月十九日
- 谕钦差协办大学士福康安等抵鹿港后即乘机进攻大里
杙…………… (359)
乾隆五十二年九月十九日
- 闽浙总督李侍尧奏普吉保进兵斗六门折…………… (360)
乾隆五十二年九月二十三日批
- 闽浙总督李侍尧奏柴大纪奏折屡次迟延缘由折…………… (361)
乾隆五十二年九月二十三日批
- 谕钦差协办大学士福康安等速将近况驰奏…………… (363)
乾隆五十二年九月二十三日
- 闽浙总督李侍尧奏台湾近况折…………… (365)
乾隆五十二年九月二十七日批
- 谕钦差协办大学士福康安等以直捣大里杙为妥…………… (366)

乾隆五十二年九月二十七日

谕钦差大学士阿桂阅看折谕并据实具奏…………… (370)

乾隆五十二年九月二十八日

福建陆路提督柴大纪奏水堀头等处道路被截断片…………… (370)

乾隆五十二年九月二十八日批

署福建陆路提督柴大纪奏林爽文攻打诸罗等情折…………… (371)

乾隆五十二年九月二十八日批

谕钦差协办大学士福康安等应慎重处理出力绅民情事… (375)

乾隆五十二年九月二十八日

谕钦差协办大学士福康安等宜首尾夹攻直捣大里杙…………… (377)

乾隆五十二年九月二十八日

参赞恒瑞奏鹿仔草失陷将守将董秉璘等降革折…………… (380)

乾隆五十二年九月二十八日批

署福建陆路提督柴大纪奏近日诸罗战况折…………… (381)

乾隆五十二年九月二十八日批

谕钦差协办大学士福康安等将因何延时到厦等情驰奏… (383)

乾隆五十二年九月二十九日

谕钦差协办大学士福康安等严缉海口以防林爽文等逃
逸洋面…………… (385)

乾隆五十二年九月三十日

谕钦差协办大学士福康安速奏因何行走迟缓及各处近
日战况…………… (386)

乾隆五十二年十月初二日

谕内阁授成都将军鄂辉为参赞大臣令其赴台进剿…………… (388)

乾隆五十二年十月初四日

谕闽浙总督李侍尧奏查挖林爽文祖坟情形…………… (389)

乾隆五十二年十月初四日

谕钦差协办大学士福康安迅速渡台沿途搜剿确保通道… (389)

乾隆五十二年十月初四日

谕户部于邻近福建各省内调拨银三百万两以备军需…………… (394)

乾隆五十二年十月初四日

谕钦差大学士阿桂阅看福康安奏折复奏所见·····	(395)
乾隆五十二年十月初四日	
谕两广闽浙等省督抚催令援台官兵趲程前进·····	(396)
乾隆五十二年十月初四日	
闽浙总督李侍尧奏请再拨军需银两折·····	(396)
乾隆五十二年十月初四日批	
闽浙总督李侍尧奏拟派臬司李永祺赴鹿港料理军需等情折·····	(397)
乾隆五十二年十月初四日批	
钦差协办大学士福康安奏抵厦门酌定赴鹿港进剿折·····	(399)
乾隆五十二年十月初四日批	
谕钦差协办大学士福康安等将招抚谕旨刊刻眷黄遍行张贴·····	(402)
乾隆五十二年十月初五日	
谕钦差湖广总督常青等速奏现况·····	(403)
乾隆五十二年十月初六日	
谕钦差协办大学士福康安抵台后即领兵进击·····	(405)
乾隆五十二年十月初七日	
钦差协办大学士福康安等复奏筹办军务折·····	(408)
乾隆五十二年十月初七日批	
大学士阿桂遵旨复奏筹划台湾军务折·····	(410)
乾隆五十二年十月初七日批	
两广总督孙士毅奏赴台兵丁棉衣等项于途被劫片·····	(412)
乾隆五十二年十月初八日批	
谕闽浙总督李侍尧实力查拿劫持运台军需物品者·····	(413)
乾隆五十二年十月初八日	
大学士和珅奏黄仕简任承恩依律拟斩立决折·····	(414)
乾隆五十二年十月初九日批	
参赞恒瑞奏盐水港进退两难折·····	(416)
乾隆五十二年十月十四日批	
谕钦差协办大学士福康安盐水港官军失利待大兵到齐	

- 再作行动…………… (417)
乾隆五十二年十月十四日
- 谕署湖广总督舒常等调湖南兵赴台增援…………… (420)
乾隆五十二年十月十四日
- 谕钦差协办大学士福康安必须厚集兵力并注意招抚…………… (421)
乾隆五十二年十月十五日
- 钦差协办大学士福康安奏到台之后拟各路大举进攻折… (424)
乾隆五十二年十月十六日批
- 闽浙总督李侍尧奏调派满兵及密访林爽文祖坟折…………… (426)
乾隆五十二年十月十六日批
- 谕钦差协办大学士福康安等应集兵先救诸罗…………… (427)
乾隆五十二年十月十六日
- 谕钦差协办大学士福康安严防林爽文军从海口逃走…………… (430)
乾隆五十二年十月十七日
- 谕钦差协办大学士福康安等预筹台湾善后事宜…………… (432)
乾隆五十二年十月十九日
- 谕钦差协办大学士福康安留心察查兵丁功过并速报军
情…………… (435)
乾隆五十二年十月二十一日
- 谕内阁普吉保收复笨港应予奖赏并通谕大兵即日进军… (436)
乾隆五十二年十月二十三日
- 福建汀州镇总兵普吉保奏攻克笨港折…………… (438)
乾隆五十二年十月二十三日批
- 闽浙总督李侍尧奏台湾现况及备船配渡折…………… (439)
乾隆五十二年十月二十三日批
- 谕内阁议恤在台阵亡之总兵贵林等人…………… (441)
乾隆五十二年十月二十三日
- 谕钦差协办大学士福康安等抵台后相机进军…………… (442)
乾隆五十二年十月二十三日
- 谕钦差协办大学士福康安于大担门等候各路官兵同渡… (444)
乾隆五十二年十月二十四日

- 广东左翼总兵李化龙奏到台及与普吉保会商攻战折……（446）
乾隆五十二年十月二十五日批
- 闽浙总督李侍尧奏严密防察出海各港口折……（448）
乾隆五十二年十月二十五日批
- 谕钦差协办大学士福康安嘉奖普吉保等并速奏近日战况……（449）
乾隆五十二年十月二十五日
- 福建汀州镇总兵普吉保奏调集官兵进剿诸罗折……（451）
乾隆五十二年十月二十五日批
- 广东左翼镇总兵李化龙奏柴坑仔等处战况折……（452）
乾隆五十二年十月二十六日批
- 福建汀州镇总兵普吉保奏元长庄一带战况折……（454）
乾隆五十二年十月二十六日批
- 福建汀州镇总兵普吉保奏二林地方战况片……（455）
乾隆五十二年十月二十六日批
- 谕钦差协办大学士福康安等当乘胜会合各路鼓勇直前……（456）
乾隆五十二年十月二十六日
- 署湖广总督舒常奏遵旨调兵二千赴闽折……（458）
乾隆五十二年十月二十六日批
- 钦差湖广总督常青奏魏大斌等救援诸罗失利折……（460）
乾隆五十二年十月二十七日批
- 湖广总督常青奏庄大田约林爽文三弟同攻府城片……（462）
乾隆五十二年十月二十七日批
- 钦差湖广总督常青奏再派官兵接应诸罗等情折……（463）
乾隆五十二年十月二十七日批
- 谕钦差湖广总督常青仍留台湾效力恒瑞回京候旨……（464）
乾隆五十二年十月二十七日
- 闽浙总督李侍尧奏台湾近况及福康安等开洋日期折……（468）
乾隆五十二年十月二十九日批
- 谕钦差协办大学士福康安等抵台后即速行会攻……（469）
乾隆五十二年十月二十九日

諭江西巡抚何裕城复奏米石

何时运至海口装运

乾隆五十二年七月初二日 台湾档

大学士和，字寄江西巡抚何、江苏巡抚闵，乾隆五十二年七月初二日奉上谕：

据闵鹾元复奏，前准何裕城咨查海运情形，并无运米实在数目。当将江西省由苏分运之米计若干石，及苏省现办海运情形，飞咨何裕城，令其迅速咨复，以便预备。旋据李世杰札会，江西省拨运闽米，已酌定八万石，来上海过载起运。当即飞飭松太道，并移会浙省一体加紧凑备船只应用等语。江西运闽米石，何裕城自应查明陆运海运何路近便，即令于何路迅速运闽。前检查旧案，既有改由海运较为便捷之案，即当一面飞咨李世杰等预备海船，一面即将米石先行运至海口等候，以便装载起运，何必待江南咨复始行起拨，又不将运米实在数目咨明，以致江南难以预备船只，往返札商，有稽时日。且据闵鹾元奏，江省拨运闽米，因上海等处海船不敷装载，仍移会浙省一体雇备等语。是江省海船亦属短少，但现在事已办定，只可会同浙省一体加紧筹备，以便迅速运闽。至何裕城于军务要需，并不权事之轻重缓急，互相推诿，殊属非是，著再行申飭。仍著将此项米石，究于何日运至海口装载起运之处，据实复奏。将此传谕何裕城，并谕闵鹾元知之。

钦此。遵旨寄信前来。

谕钦差湖广总督常青等确查廖东胡番实情

乾隆五十二年七月初三日 台湾档

大学士和，字寄钦差湖广总督将军常，闽浙总督李、提督参赞蓝、提督柴，乾隆五十二年七月初三日奉上谕：

昨据福建委员解到贼匪廖东等四犯，当经朕亲加讯问，并令军机大臣隔别严审。该犯等捏情狡饰，坚不吐认从贼实情。惟连清水只认为贼目王周载测字，曾经许封伪巡检，阮赞亦只供称向开米店，贼到店中抢劫时，曾代为煮粥，并收受黑旗，许封千总，并未招集人众等供。连清水既代为测字，又受伪封巡检，阮赞收受贼人黑旗，许封千总，自必为之招集党羽，从贼尚有为据。业将该二犯先行正法。至廖东、胡番二犯，一供系义民挟嫌诬害，一供系兵役误拿，均属一面之词，殊难凭信。若此时即将该二犯一并办理，不足以服其心。且从前获犯时，柴大纪或因军务惶惚，未遑审讯，而解到常青、李侍尧处，何以亦未讯取确供？从前该将军等所奏各折内，均未详晰声叙，实亦无从指质，得其真情。著传谕该将军等，即将该二犯如何被拿，如何供认，并将现在该犯等所供各情节确实严查，据实复奏。再，前奏林爽文手下，并有蓄发亲丁千余名。今见廖东等头发甚长，虽据供被拿时系在正二月间，为时已久，未能剃头发所致。但四五月之间，亦不至发长如许，恐系狡饰，是否从前被获时即系久已蓄养之处，著一并查明，据实复奏。所有廖东等供词，并著抄寄阅看。至常青、李侍尧于二十五日奏到各折后，迄今又阅七日，朕盼望军报，宵旰靡宁。前已谕令该将军等，每隔四五日奏报一

次。连日常青等，在彼如何相机进剿，打仗得胜之处，何以未据续奏？再，柴大纪自回诸罗县城堵御贼匪，于五月二十八日奏到后，已阅月余，并无消息，朕心日切悬注。已节次谕令常青等，一得柴大纪打仗情形，即行驰奏。并令蓝元枚等，将梗阻道路之贼匪，先行剿散，以通信息。又以李侍尧驻扎泉州，见闻切近，一得地方官禀报，即行加紧驰奏。数日以来，均未据奏及，殊深廑念。著传谕常青、李侍尧、蓝元枚、柴大纪等，即将近日如何督率弁兵，定于何路进剿，及屯聚贼匪于何日剿散，诸罗、彰化道路是否不至梗阻，及柴大纪在县城堵御，曾否连获胜仗各情形，迅速加紧驰奏，以慰悬望。将此由六百里加紧传谕知之。

钦此。遵旨寄信前来。

大学士和坤奏审讯廖东等情片

附：审讯廖东等人供词笔录

乾隆五十二年七月初三日 台湾档

臣等遵旨复将廖东等四犯，逐一隔别严加鞫问，并加一跪链脑箍。该犯坚执前供，狡赖支饰。除连清水代贼测字图利，阮赞收执黑旗，容留贼匪，在店吃饭，该二犯从贼情节已属有据，应俟明日，即请旨即行处斩，以申国法。其廖东、胡番二犯，供词狡赖。谨遵旨，拟写询问常青等寄信谕旨进呈。俟复奏到日，再行审拟严办。所有诘讯该四犯供词，一并缮录进呈。谨奏。

乾隆五十二年七月初三日奉旨：知道了。钦此。

附：审讯廖东等四人供词笔录

诘问廖东：你说王守等原是天地会内人，因你曾经奉官要拿过他们，后来他们做了义民，就把你冤屈。那义民原是帮助官兵出力与贼打仗的。你既是好人，如何不做义民，帮助官兵呢？你说王守们，从前本是天地会人，尚然知道改悔，做了义民，替官兵出力，你当诸罗县衙役，是在官的人，尤该帮同拿贼，如何反被义民拿住？那义民又为何不赖别人，独要赖你？可见你的话，都是撒谎了，还有何辨（辩）呢？

据供：那当义民的人，是要到府里报名，领得腰牌，才能做得。我何尝不想做义民，帮助拿贼，因我住的馒头庄地方，离府城有五六十里，沿路贼匪众多，不敢前往府城报名。我又是本县衙役，贼人见了官人，就要杀害，所以害怕，总没敢上府城。不料今年正月十八日，因柴总兵在番社地方经过，我前往迎接，就有义民王守、吴天保、王仕金们，原是天地会内人，因上年我曾经奉官要拿过他们，不料他们做了义民，就赖说我是贼党，不由分辩，解到柴总兵营里，转解府监。那时柴总兵营内并府城，都有贼来攻扰，官府没上（工）夫问供。到四月十三日，解往省城，众官府讯问时，我也将这话供过的。况说我是护驾大将军，我若果然从了贼，做了大将军，手下必有许多伙党，如何就只拿住我一人呢？如今说我是大将军，在台湾审讯时，并没有人可以质证。实是冤屈，求详情。

诘问：你说义民挟嫌，把这黄旗栽你，说你是护驾大将军，难道义民预先做这旗号，有心赖你不成？这黄旗究竟是那里来的？况那日拿你的时候，还有贼徒陈模、黄启等一同拿住。那陈

模、黄启等，必定是你手下人，这都是你对证，你如何还说没有伙党呢？

据供：义民王守等拿我的时候，见他们已有这面旗，就赖说是我身边搜出来的。是否他们预先做就，我不知道。那时他们还拉着红马一匹，也说是我的。这马原是义民吴天保，两三年前用二十八个番钱，向社番通事买来的。我充当本县衙役，那社番是我该管，所以知道。如何赖说是我的马？至陈模、黄启是什么人，我并没见过。实不知道。是实。

诘问：你既说并未从贼，你此时如此受罪，这都是林爽文、庄大田等害你的，你自然恨他们，就该把他们的虚实谋计，从实供出，方见得你不是贼党，再，地方官平时做官，究竟有无刻剥激变之处，你断无不知，详晰供来。

据供：我因林爽文等滋事不法，害我受罪，我如何还肯隐瞒？他们做的事，诡诈得很，百姓们只知道他们焚烧抢劫，至如何设谋使计，实在不能知道。这地方官如何刻簿（薄）百姓，我身充衙役时，常服侍本官，是最知道的，却并不曾见有甚么刻簿（薄）的事。如何激成这事，我实在不知道。不敢谎供。

诘问阮赞：你说贼人到你的店吃饭，给你一面黑旗，叫你招集些人，你那时若果不肯从贼，就该报官禀首，那贼人如何独把黑旗给你，要你招人？难道贼人到各店吃饭，都有黑旗给各店户，叫他们招集人众吗？可见这就是你从贼的实据了。还有何辨（辩）呢？再，你既留贼人在店吃饭，他们的实在情形，你自然是知道的。据你说，如今你们受罪，都恨林爽文、庄大田，是他们害你的。他们的实在情形，你此时就该实说出来。至你们地方官平日有无刻簿（薄）你们之处，亦从实说来。

据供：贼人到我们店内吃饭，那时店内的人，也有逃走的，

也有走不脱的，各自救命，那里还能到官禀报。至他们拿一面黑旗，叫我招人，我那时若不接他的，就没有性命了，所以只得随口应允。至别店内曾否给有黑旗，我不能知道。贼人在我店内吃饭时，是有旗给我的。我是个做小本生意的人，如何能替贼人招集人众？我若果有从贼的事，现今如何倒肯自己供出贼人给我旗的事？求详情。至林爽文等一伙人，到我店内来吃饭，我那时逃走不出，拿了他的旗子，实在怕极了，那里知道他的实在情形？如今虽恨死他们，实在说不出他的虚实来。至我那里地方官都是好的，并没有刻簿（薄）我们处，如何敢诬赖他？

诘问胡番：你说遇见义民，盘诘搜出番银，致被冤赖。你当诸罗县贴写，既是在官人役，如何不做义民，帮同官兵打仗，反被义民盘诘？可见你本是形迹可疑。况你说你家已被贼抢劫，你如何手边还有番钱十三个？这番钱又是那里来的？再，你既说并未从贼，此时受罪，却是林爽文、庄大田害你的，你自然恨他们，你就该将他们如何起意谋反，如何纠约抗拒，及地方官如何刻簿（薄）激变之处，从实供出，方见你不是贼党。快逐一据实供来。

据供：投充义民，帮同打仗，须得强壮，有些力气，才能报名充当。我是个做贴写的，平时并不知贼打仗的事。我当了书办，是以未曾充做义民。至番钱系我避难时，我母亲分给我们兄妹二人，存留身边，以做盘费。逃后未曾用完，回到城内，尚余剩十三个，实不是从贼抢劫来的。我家还有年老的母亲，若从了贼，我就该连我母亲，一同随去。又，柴总兵业已回到诸罗，我若从了贼，岂肯回到城中，自投罗网呢？求详情。至林爽文、庄大田他们谋反，害我被拿受罪，我心中实在恨他们。若他们做的事，我有知道的，此时受这样罪，还肯替他们隐瞒，不实说吗？实在因

我未从贼，不能知道他们动静，叫我如何供出。就是地方官，若有刻簿（薄）百姓的事，我系衙门书办，岂有不知道的？我细细想来，这诸罗县官府，实在并不见有刻剥招冤的事。所供是实。

诘问连清水：你既知道王周载从了贼匪庄大田，做北门大将军，你若并没从贼，你那时就该到官禀首，如何反替贼人测字，又说测这字是好的？明系你叫他与官兵打仗。况王周载既叫你测字，他们那里究竟有多少人，虚实光景，岂有不告诉你的？你还不一一实供吗？再，地方官平日有无刻簿（薄）你们的事，你趁这时候，正好说了，据实供来。

据供：王周载叫我测字的时候，凤山正被贼攻扰。府城离凤山又有八十多里，沿路多有贼众拦截，我一人如何能到官禀首？我平日替人测字，不过二三十文不等。因王周载告诉我说，他已从了庄大田，做了北门大将军，所以替他测字，随口说是好的，诓他要了五百大钱，原不过贪图多得钱文。那时王周载只问是他要出阵好也不好，并没告诉过他那里有多少人。他们虚实光景，我既没跟他，也不敢向他细问。至我平日，就在凤山县衙门口测字，知县汤太爷待百姓是极好的，我素所知道，不敢诬赖，是实。

诘问廖东并反复开导胡番：你既充当书办衙役，你与你们本官，都是通同一气，自然说他是好的。且你们但系衙门中人，明知说了地方官不好，就露出你们是从贼的了，所以如此躲避。现在，连清水、阮赞俱拟正法。你们若再不肯实供，此时也不过暂缓须臾之死。将来问明将军、总督，将你们从贼实情奏来，不但将你们正法，连你们父母妻子俱要正法。你此时还不实供吗？

又据廖东、胡番供：我们充当书办衙役，官府的好歹，原不能瞒我们的。他如果做官不好，我在此受如此严行（刑），还肯

替他隐瞒吗？我如果从了贼，就说本官好，也是无用，不过隐瞒这一时，将来总有人指证，亦不能抵赖的。只求问明将军、总督，倘我们实有从贼打仗的事，就将我家属尽行正法，我们死亦无怨的。

钦差湖广总督常青等奏连次打仗等情折

乾隆五十二年七月初四日批 军录

臣常青、臣恒瑞跪奏，为连次杀贼，并严防水陆口岸情形，恭折奏闻事。

窃照官兵自六月初一至初五等日打仗，经臣等于初六日具奏在案。乃贼匪等屡次失利，尚敢生心窥伺。臣等带同委翼长官福、乌什哈达等，预为酌筹，相度地势，设卡安瞭，令前后左右营盘，联络贯串，声息相通。因天气溽润，恐有大雨，并饬营中齐备雨具，务将枪炮、火门、火绳、火药遮盖掩护，以防贼人乘间侵犯。初八日丑刻下雨，至卯刻骤雨如注，果有贼匪三千余人，三路直扑大营，臣等令侍卫章京乌什哈达等八员，分派带队。总兵梁朝桂、副将官福、贵林、谢廷选，参将特克什布等，各带本队官兵，协领海星阿、色普星额带领满兵，俱各奋勇争先，冒雨进战。枪炮打死贼五六十人。（朱批：三千人中所杀不及十分之一，不为快也。）至巳刻雨止，地皆泥泞，又有续到贼匪接应，约有五、六千人，并力来攻。官兵鼓勇迎杀，贼犹抵死不退。侍卫、镇将、官兵等施放排枪，乘势压下，贼方败走。夺获行营炮一尊，枪刀等械十余件。是日兵丁并无阵亡，惟外委王必佐受有枪伤，又受伤兵一名。初十日贼人复来攻营，又分贼二

千余人攻小南门之桶盘栈。臣等一面派拨在营将弁，分路截杀，一面飞飭副将丁朝雄等，齐赴桶盘栈堵御。台湾道永福等在城调度防护，并同知杨廷理带领义民，随后接应，两处打仗，枪炮打死贼一百余人，夺获贼械二十余件，阵亡兵丁三名。至午刻贼俱败退。当查出力有功以及伤亡弁兵、义民，俱照例赏恤注册。

再，臣等于初十日接据台湾道永福、副将丁朝雄会禀：据安平水师署游击黄鸣凤（朱批：即可以参将用。）禀称，带领本营弁兵及义民，在鹿耳门内外洋面巡缉。初七日巡至卓加海面，了见贼艘八只，随率弁兵、义民追擒。贼船驶逃入港，登岸奔逃。署游击立带把总李光显等追捕。时有肖垅等庄义民陈聪等，率众协同官兵杀贼二十二人，其余逃窜，贼船寮尽行焚灭。（朱批：好。）合将割取耳朵、发辫禀缴等情。该道等验明情由，会禀前来。臣等复查是实，当将该将弁等记功，以待奖擢。义民陈聪等各赏银牌，仍飭该将弁等实力哨捕，加紧巡防，毋使海洋内外少滋匪孽。又，查南北沿海各港小口，俱可通运粮食，如凤山之东港，已被贼人占据，近复于诸罗之笨港、盐水港往来骚扰。（朱批：此最要，早有旨谕。蓝元枚尚未奏到。尔等会商，务先肃清此贼，勉之，亦有旨催蓝元枚矣。）粮食不通郡城，米价渐昂，每石钱三千二三百文。该道永福现在设法调剂，且防范海洋面，保守郡城。臣等酌量各处，分兵四、五百名并义民数百名，前往剿御。仍知会蓝元枚，会同柴大纪就近速派弁兵，齐赴守御，务使港口常通，（朱批：是。）则米粮不致腾贵。至贼伙虽众，臣等察看，一有变动，即乘势疾击，亦不敢待添调之兵，致失机宜。（朱批：是，勉为之。然总当持重，毋忽。）除此路官兵剿贼，经蓝元枚、柴大纪等自行陈奏外，所有臣等打仗防御港口各情形，谨合词恭折具奏，伏祈皇上睿鉴。谨奏。

乾隆五十二年六月十三日。

乾隆五十二年七月初四日奉朱批：即有旨谕。钦此。

钦差湖广总督常青奏收容凤山等地溃兵折

乾隆五十二年七月初四日批 军录

将军湖广总督臣常青、参赞福州将军臣恒瑞跪奏，为钦遵谕旨，恭折复奏事。

窃臣于六月初八日奉到谕旨：贼匪侵犯府城，常青连得胜仗，南路尽可放心。惟北路鹿港一带，恐兵势单薄，已令蓝元枚速赴鹿港，其未到以前，有无剿杀打仗情形，各行迅速据实奏闻等因。钦此。又奉到谕旨：柴大纪始终奋勉出力，著交部议叙。阵亡受伤弁兵，俱著该部查明照例赏恤。其随同柴大纪打仗出力之武举陈宗器、黄奠邦，亦著常青酌量奖赏具奏等因。钦此。又奉到谕旨：现在审讯贼伙林家齐，有林爽文事势穷蹙，欲逃往内山，常青先趁此时悬立赏格，并广行出示，应派能事将领，带兵于内山要隘处，严密防堵。至凤山溃回兵，仍自行投到，随同官兵打仗，尚有一线可原，自可贷以一死，令其带罪图功等因。钦此。又奉到谕旨：林家齐供林爽文作事全仗族弟林泮主谋，并有军师陈奉先及董姓等，该犯等皆系紧要逆贼，擒获后即应派员解京等因。钦此。又捧（奉）到恩赏奶饼各一匣，遵即传齐军营出力之将备官员，按照分给。臣等率同各官望阙叩头谢恩，另折具奏。查北路贼匪侵扰诸罗、鹿港，柴大纪屡战克捷，普吉保于任承恩解任之后，亦能防御无虞，其随同柴大纪打仗出力之武举黄奠邦、陈宗器，洵堪嘉奖。又如鹿仔港募集义民之林湊等，前同

陈邦光克县获犯，仍随官兵在港防守，均属事同一例，容臣等查明伊等本身履历，酌量应加职衔，奏请赏给，并此外南北各路尚有倡率义勇，实能捍卫地方者，俟确查请奖，伊等既保身家，又得叨荷恩荣，自必倍加踊跃。至临阵伤亡者，其官兵已蒙谕部，而民番又分别加优，臣等惟仰体皇仁，妥为赏恤，俾各仰戴鸿慈，邀恩格外，咸知感激思奋。其凤山溃兵已回者八百余名，尚有未回者一千一百余名，臣等谨遵旨先行存记，俟事竣查办。现在柴大纪处溃回兵五百余名，查系前此诸罗被陷失散之兵，今自行投到，复蒙圣恩贷以一死，令其带罪图功。该兵丁等自愿奋勇向前，争思报效，是柴大纪处收回兵五百余名，又前经添派参将潘韬带兵一千一百余名，共有兵三千五百余名，兵势较前稍振。又该镇拿获解交黄仕简之张淡等十二犯内，林洗、谢蒲、吴道三名，因供情未确，暂令监禁。其审明实系匪伙之张淡、黄润、胡炎、张力、王沈、周春、杨辅、王玉、周文等九名，经臣常青复讯无异，已于三月二十一日正法，于四月初三日缮单附片奏明在案。嗣经审明林洗亦系匪伙，又于四月廿一日正法。惟谢蒲、吴道二名，讯系迫胁随行，旋即逃出，交该道府飭县照例另办。又武举黄奠邦所获之吴聪即吴映一犯，亦系解交黄仕简审究。查该犯虽系伪先锋，因患病沉重，恐致幸逃显戮，是以黄仕简即将该犯于就地正法。惟查大里杙贼巢距内山不远，贼首林爽文逃奔之时，势必窜入藏匿，臣等恪遵训示机宜，密檄蓝元枚及各镇将，预筹堵截，并设法先行晓谕生番，奖以花红布匹，以及务获伪军师谋主各要犯，即速解京究办外，缘奉谕旨，理合恭折复奏，伏祈皇上睿鉴。谨奏。

乾隆五十二年六月十三日。

乾隆五十二年七月初四日奉朱批：知道了。钦此。

福建陆路提督柴大纪奏大排竹接仗及

恒瑞等率兵抵台折

乾隆五十二年七月初四日批 军录

署福建陆路提督台湾镇总兵官奴才柴大纪谨奏，为奏闻事。

本年五月初九日申刻，查得诸罗县南边大排竹地方，有贼匪千余，复图肆扰。奴才即于初十日黎明，亲率南澳游击李隆，镇标把总蔡开祥、罗勇各官兵，并署诸罗县陈良翼，带同武举黄奠邦，生员吴正兰，监生温协和、李百川、张洪度等各义民，一齐驰至大排竹。果见贼众聚集山上，奴才即督令官兵、义民奋勇上山围拿，连放枪炮。贼匪俱向山后奔逃，官兵义民复勇往追杀。贼被枪炮打死者约数十人。赶至窠仔厝，贼皆四散逃窜。又值大雨如注，鸣金收军。查点官兵义民，俱无损伤。生擒贼匪郑瑞、王雕、陈奇弁、林浚、钟攀、石麟、赖应、林投、廖明等九犯，发交署诸罗县陈良翼，严加究办。兹据署诸罗县陈良翼稟称：讯过郑瑞等九犯，俱各从贼打仗不讳，并无受有伪职及充当贼目等情前来。奴才随即再加复讯，实与前供无异。于五月十九日将郑瑞等九犯，押赴市曹，恭请王命，在地正法，枭首示众。

除通报将军督抚提督外，再查得参赞镇闽将军臣恒瑞带领驻防满兵一千名，于本月十九日到台湾府。参赞提督臣蓝元枚带领浙兵二千名，已由蚶江登舟，日内即可抵鹿仔港，兵力厚集，克期兴师由南而北，并力剿捕，自可一举蕲事。奴才惟有益加奋励，务擒首犯，以正国法，而快人心。合将搜捕贼匪正法日期，由驿六百里驰奏，伏乞皇上睿鉴。谨奏。

乾隆五十二年五月二十三日。

乾隆五十二年七月初四日奉朱批：盼汝之折，至废寝食，览奏略慰，余有旨谕。钦此。

福建台湾镇总兵柴大纪奏历次处死

林爽文军人众折

附：被处死者名单

乾隆五十二年七月初四日批 军录

奴才柴大纪谨奏，为前后获匪正法日期，恭折汇奏事。

窃本年五月二十一日，承准总督臣李侍尧照会内开，据台湾镇报称，三月二十九日，贼匪数万分路来攻诸罗城外营盘，经督官兵义民，分头堵御，枪炮打死贼匪甚多。生擒蔡瑞、雷泉、颜洪、刘连、陈喜、江友、林盆、邹节、洪才、黄彩、肖光明等十一犯，发交署诸罗县陈良翼申明，供认从贼攻城及营盘打仗不讳，并无受有伪职伪札情事。复查无异，于四月初三日恭请王命，将该犯等押赴较场，就地正法枭首等由。据此查蔡瑞等十一犯，既据申明，已经就地正法，该镇即应自行具折，一面奏闻，一面报名查考。该镇即便遵照查明前后正法各犯，一并具奏办理，毋得迟误等因。承准此奴才随查上年十一月二十九日，逆匪林爽文纠众谋叛，占县犯郡，奴才统率官兵，扎营盐埕桥堵御。自十二月初九日起，叠次与贼打仗。及本年正月十七日，统兵剿捕北路。二十二日克复诸罗县城。至四月止，凡有打仗搜捕前后获匪，除解郡审办外，其余匪伙申明在地正法，及伤重身死戮尸，并正法退逃不法兵丁各等犯，除节次恭折奏报外，尚有正法各犯

未经具奏者，理合逐一开列各犯名单，填注正法日期各缘由，由驿六百里驰奏，伏乞皇上睿鉴。谨奏。

乾隆五十二年五月二十三日。

乾隆五十二年七月初四日奉朱批：已有旨了。钦此。

附：被处死者名单

柴大纪于七月初四日奏到正法各犯名单：

乾隆五十一年十二月初九日在盐埕桥拿获奸细三名：

吕 审 邱子罕 王 昆

以上三犯随时正法。

十二月十八日在大道官搜获奸细二名：

陈老二 林保保

以上二犯随时正法。

十二月二十四日在大穆降搜获贼匪三名：

康 魁 蔡 祐 张朝宗

以上三犯随时正法。

十二月二十六日在盐埕桥打仗生获贼匪三名：

林大兴 钟士定 黄 禹

以上三犯随时正法。

乾隆五十二年正月十九日在下茄董拿获贼匪六名：

王 鉴 李 显 陈天柱 洪 招

陈 光 张 勋

以上六犯随时正法。

正月二十一日在外三部竹打仗生获贼匪二十一名：

廖 东 该犯正月二十九日解赴郡城审办。

陈 模	黄 启	吴 章	蔡 里
刘 杰	赖天足	赖 淡	陈 就
杨 登	李 聪	张 海	(即张元)
赵生桂	郑郡海	(即郑华)	

以上十三犯俱正月二十九日正法。

张盛祖	王 成	黄 使	郑 环
吴 松	郑 房	邱 彪	

以上七犯俱伤重身死戮尸。

正月二十二日克复诸罗打仗生擒贼匪八十三名：

侯 辰	该犯正月二十九日解赴郡城审办。		
林 老	张 牛	留 娘	陈 围
严 心	李 奠	黄 水	许 怀
陈 成	柯妈生	赖 烈	(即胡盛)
陈 运	刘 程	(即刘棋)	许 腾
陈 全	张 法	陈 较	陈 应
许 溪	林子盛	刘 六	邱 玉
陈 教	林 海	董 镇	郑天送
黄 姻	庄 全	卢 维	陈 祖
李 孝	(即李颢)	王 章	谢 训
王 孝	吴 奇	林 教	郭 全
陈 通	翁送来	林 珀	王 泰
陈 定	辜开章	林 邦	(即林新)
宋 山	陈 祐	(即陈天柱)	洪 周
姚 友	黄元钦	陈 扶	邱 朝
郑 番	吴 嵩	黄 赛	许 汉
黄 玉	赖天助	王 守	卢 杞

汪 袂	王 九	王 悞	蔡 叔
蔡 杜	黄 成	陈凤经	曾 生
张 泽	魏 可	(即罗奎)	谢 璧
蒋渊辉			

以上七十一犯俱正月二十九日正法。

郑 音	张 鹤	邓 钵	黄 载
张 合	张 德	郑 印	林开张
黄 才	陈 足	李 佃	

以上十一犯俱伤重身死戮尸。

正月二十四五六七等日搜捕拿获贼匪四十八名：

阮 赞	张清先	吴 聪	(即吴映)
-----	-----	-----	-------

以上三犯俱正月二十九日解赴郡城审办。

陈 勇	魏 沈	林 池	张石宗
赖 和	方 快	江 兴	薛 朝
魏 远	苏 梅	邓 佛	叶 阮
黄 开	何 兴	林 标	王 外
王 来	罗 样	赖 二	李 熖
赖 琰	潘 貌	李 宪	林再生
陈继祖	王 洪	沈 庵	何 掌
黄 助	蒋 全	林 云	黄 凤
李 琪	陈 筹	韩 绉	林 绍
阮 套	林振水	辜 捷	萧 扶
刘 正	陈 洋	林 水	何 铺
郑 全			

以上四十五犯俱二月初二日正法。

正月二十八及二月初二等日搜捕获匪十名：

林 兴 林天助 黄阿查 叶 灶
林 返 林妈赐 涂 喜 陈 驴
杨 炎 吴 通

以上十犯俱二月初四日正法。

二月初四日搜捕拿获贼匪八名：

林 通 郑 傅 王 相 郑 顺
李 怀 周 堆 何 贵 高 红

以上八犯俱二月初八日正法。

二月初六日在过沟仔庄拿获贼匪九名：

何东山 吴 后 柯 番 苏 饶
许 魁 李 礼 戴 朝 林光爰
陈 荃

以上九犯俱二月初十日正法。

三月十一日在辘子庄拿获贼匪四名：

杨 陈 魏 富 陈 祐 刘 立

以上四犯俱三月二十五日正法。

三月二十日在麻豆庄拿获贼匪二名：

王 官 蔡 印

以上二犯俱三月二十五日正法。

乾隆五十一年十二月十三日正法从贼兵丁一名：

镇标中营 林 香

十二月十八日正法退逃兵丁二名：

镇标右营 刘进升 镇标中营 张其荣

十二月十九日正法从贼兵丁一名：

城守左军 詹 升

又正法退逃兵丁一名：

诸罗
左营 吴仲祈

十二月二十五日正法退逃兵丁二名：

镇标 宋振英 镇标 刘永德
中营 右营

十二月二十六日正法军前退缩兵丁二名：

镇标 陈成金 徐 高
右营

乾隆五十二年正月初二日正法放贼走脱兵丁一名：

镇标
中营 潘国兴

谕钦差湖广总督常青等加紧巡防

各口岸并速奏筹办情形

乾隆五十二年七月初四日 台湾档

大学士和，字寄钦差湖广总督将军常、闽浙总督李、福建水师提督参赞蓝、陆路提督柴，乾隆五十二年七月初四日奉上谕：

据常青等奏连次杀贼并严防口岸情形一折内称，六月初八日，贼匪三千余人，乘雨直扑大营。初十日，贼匪二千余人，又攻小南门之桶盘栈，经常青派令乌什哈达等，及将备带领满汉兵丁、义民冒雨进战，鼓勇迎杀，两次打死贼一百五六十人，贼俱败退等语。朕连日盼望捷音，甚为悬切。今阅常青等奏到情形，是伊等尚在府城外扎营驻守。因贼匪乘雨攻营盘，督兵堵御，杀死贼匪仅一百余人，不及十分之一，尚未能乘机进剿。此次添调各兵，计粤省预备在潮州先行调拨兵二千，及李侍尧挑备提督等标兵二千，此时已均可前抵台湾。此外添调兵丁，尚需时日，常

青等断无坐待株守之理。如遇有可进之机，即应就现在陆续已到之兵，相度机宜，乘势疾击。前曾谕令该将军等，于广东及本省先调兵四千到后，或将随征兵内之疲弱者挑出数百名，派令添守郡城，常青等统领侍卫、章京、将备，径往南潭擒拿贼首庄大田。设余贼奔救，即可聚而歼戮。该将军接奉前旨后，是否即行派拨，直趋南潭？若察看情形，可以如此办理，业已遵旨前往，固属甚善。但南路贼匪，潜藏分踞，屯聚甚多。现据常青等奏，附近营盘一带，贼人因值骤雨，即乘间分路侵犯。是其鬼蜮伎俩，出没无定，甚为狡狴。若因常青等统兵前往南潭，贼匪即纠合伙党，绕截后路，亦不可不虑。该将军等务须加意防范，可派奋勉将弁断后，使我兵首尾相应，不致被其抄袭方好。固不可坐失机宜，尤应加意持重，此为最要。

又据奏，游击黄鸣凤带领弁兵、义民，在鹿耳门洋面巡缉，了见贼船八只，随率兵民追捕，杀贼二十二人，余匪逃窜，贼船贼寮尽行焚灭。又诸罗之笨港、盐水港及凤山之东港，俱有贼人往来骚扰，现在设法防范，仍知会蓝元枚会同柴大纪，一体派兵守御等语。此事最为紧要。前据李侍尧奏，诸罗笨港被贼焚烧，已拨派缙船分驻鹿耳门鹿港等处。复有旨谕令常青、蓝元枚于沿海一带各隘口，派员把守，并将笨港等处贼匪，先速行剿除，打通道路，毋使贼匪得以乘间滋扰。今鹿耳门等处，果有贼船骚扰之事，业经官兵、义民追捕剿杀，余匪弃船奔逃，自应严飭官兵于各口岸梭织往来，巡查防范，毋致稍有疏虞。其游击黄鸣凤巡缉认真，即可以参将擢用。

至蓝元枚接奉前旨，如何设法剿散，分路防堵，尚未据该参赞奏及。又蓝元枚前奏称，大甲溪岸里社有义民熟番颇知义理，不肯从贼，业经密差干弁，由海道前往晓谕义民，鼓励番众，令

其攻迫贼巢，以分贼势。如果声势得以联络，蓝元枚即可率兵攻击大里杙之南等语，自属极好机会。所差干弁曾否已有回信？该处义民熟番，既不肯从贼，经该参赞差弁晓谕鼓励，自当听从前往，攻逼贼巢。蓝元枚于何时带兵直趋大里杙之南，相机攻击，亦未据该参赞续奏。著蓝元枚即将晓谕义民熟番后，如何订期前往大里杙南面，率兵攻击，及沿海口岸作何筹办堵御之处，一并迅速复奏。又据柴大纪奏，五月初九日，回至诸罗后，初十日督率官兵、义民，堵剿贼匪，杀贼数十人，余匪逃窜，及拿获贼匪讯明正法各折，柴大纪自前次奏报后，已阅月余，总未据有奏到，甚为廑念。续据蓝元枚、李侍尧等奏，彰化贼匪时刻窥伺鹿港，而诸罗、安溪寮等庄，被贼焚烧，诸罗、彰化道路不通，文报阻隔。而柴大纪并无消息，朕日夕盼望，为之寝食俱废。今阅该督所奏堵杀贼匪情形，系在蓝元枚等六月初四日奏报以前之事。至拿获贼匪，申明正法一折，更非紧要。且贼匪攻扰诸罗，据奏动称千万，而官兵剿杀仅止数十人，总未见大加剿洗贼寇，是何缘故？其余匪是屯聚各处或遁往山寮之处，柴大纪均未分晰奏及。著柴大纪务将该处近日贼匪窜扰，及打仗攻剿，并道路是否不致梗阻各情形，隔七、八日即行随时驰奏，毋再延缓。至柴大纪此折于五月二十三日拜发，何以直至七月初四日方奏到，计四十余日之久？并著李侍尧查明是否系内地驿站何处迟误，抑系海洋阻风之处，据实复奏。

将此由六百里加紧各传谕知之，仍著常青将现在作何派拨调度，是否已赴南潭擒拿贼目庄大田，及后路贼匪作何堵截防范，蓝元枚于通海各隘口，曾否将屯聚贼匪剿散肃清，诸罗、彰化道路不至阻隔，及与常青如何会商进剿之处，一并迅速驰奏，朕昕夕盼望捷音之至。

钦此。遵旨寄信前来。

山东巡抚觉罗长麟奏筹办闽省硝斤折

乾隆五十二年七月初四日批 军录

山东巡抚臣觉罗长麟跪奏，为筹办闽省硝斤，请旨先由东省委员代行解办，恭折奏闻事。

切照闽省每年额用军硝，向例闽省委员赍银到东，由藩司转发产硝州县采买，交闽省委员收兑煎湍，定限十个月办竣，起运回闽。查乾隆五十一年东省应办闽硝，今春依限办竣。臣于到任后，即严催闽省委员雇船起运，并因时值各闸蓄水，当经札会河臣蓝第锡专差员弁，于硝船到闸，随时启板放行，昼夜催趲出境，计此时早为押运到闽。至五十二年额办闽硝十七万一千八百余斤，臣于闽省委员何茹连到东之日，即飭令藩司发价采买，严催各州县上紧交兑，现已煎湍八万余斤。切里（窃思）闽省正当需用之时，若拘泥向例，必待十七万一千八百余斤全数煎湍，始行起运，未免稽迟。臣现拟飭委山东省新城县知县王国鉴，将业经煎湍之八万余斤，先行雇船，代为解赴闽省应用，其未经办完之八万余斤，仍勒限严催，七月内可以扫数煎湍完竣，即催闽省委员装运回闽。正在筹办间，接准闽浙督臣李侍尧知会，五十三年额硝业经奏明，在山东省预行采买十万斤等因，移咨前来。臣与藩司缪其吉再三详商，此项硝斤，既经预行采办，自应赶紧煎湍运往应用。若俟闽省委员赍银到东，始行采办，未免有需时日，不若先由东省藩库，先行垫支银两，给发产硝州县，克期采买齐全，并委东省知县一员，代为设厂收兑，雇匠煎湍，勒限八

月内，照数办竣。如彼时闽省委员到东，即令领硝回闽，所带闽省硝价，兑交司库归款。倘闽省委员届期未能赶到，臣即专员代为押运赴闽，以期迅速。其垫发银两，即于司库现存备公项下动支。查系暂行垫办，指日可以归款，毋庸按部核销。所有筹办闽省硝斤委员代行解办缘由，除咨明闽省督抚外，理合恭折奏闻，伏乞皇上睿鉴。谨奏。

乾隆五十二年六月二十六日。

乾隆五十二年七月初四日奉朱批：如此方是，知道了。钦此。

谕钦差湖广总督常青相机进取并

晓谕民人粮米即源源接济

乾隆五十二年七月初五日 台湾档

大学士和，字寄钦差湖广总督将军常、闽浙总督李、福建水师提督参赞蓝、陆路提督柴、福建巡抚徐，乾隆五十二年七月初五日奉上谕：

昨据常青等奏，连次杀贼，并严防口岸情形，及柴大纪奏在诸罗堵剿贼匪各折，已降旨指示一切机宜，并令该将军如何相机筹办之处，迅速复奏矣。朕盼望军报，日夕忧勤，无时或释。

今日偶阅通鉴辑览，见魏司马懿破襄平一事，懿以公孙渊使其将，率步骑数万屯辽队围堑二十余里，乃欲以老弱攻之，正堕其计。且贼大众在此，其巢穴空虚，若直至襄平，可期必破，遂多张旗帜，欲出其南，牵缀敌势，乃潜济水出^①其北，直趋襄平，遂大

① 《钦定平定台湾纪略》（稿本）卷二十四为“水师”。

破之。此乃兵家声东击西之法。因思台湾贼匪，四处蔓延，若纷纷堵御，处处剿杀，则兵分势单，疲于应接，转恐不能得力。若常青等于郡城外扎营处所，派拨疑兵，虚张声势，佯欲与贼牵缀相持，而该将军统领精锐，带同侍卫、章京、将备等，或乘夜轻骑，直趋南潭，擒拿贼目庄大田，使之猝不及备。蓝元枚亦派奋勉将备，于鹿亦虚张声势，堵御附近一带屯聚贼匪，而该参赞率领弁兵，会同大甲溪义民熟番，前捣大里杙贼巢，攻其无备。如此乘虚进剿，出其不意，使贼匪仓皇失措，首尾不能相顾，众伙自必惊疑溃散，是亦捣穴擒渠之一策。虽朕在数千里之外悬揣运筹，但兵家虚实互用，古人屡有出奇制胜，以少击众者，原不可不随机应变，以防株守力疲也。著传谕常青、蓝元枚察看情形，如可相机进取，竟即当照此办理，不可坐失时机，以期迅速集事。

至柴大纪昨日奏到各折，系与普吉保在大埔林会商进攻，闻有贼匪滋扰诸罗之信，回城堵御之后拜发者，此后又杳无信息。现在该处贼匪，虽经官兵剿杀，为数无多，及余匪是否尚屯聚各处，或仍循往山寨，仍潜出攻扰，柴大纪并未详晰奏及。即前次该提督与普吉保会面后，因闻贼匪滋扰县城之信，带兵回城堵御各情节，止据普吉保前奏声叙，亦未据柴大纪于折内奏明。且该提督于五月二十三日拜折后，距今又四十余日，自必与贼匪连次接仗。其如何堵剿得胜情形，并未据续有奏报，甚为悬念。著柴大纪迅速驰奏。

又蓝元枚自六月二十五日奏到各折后，距其前次发折，亦已阅一月之久。近日该处作何调度，有无打仗得胜，及大甲溪义民熟番，曾否定期进攻，该参赞于何时前赴大里杙之南，会兵攻击之处，亦著蓝元枚随时加紧驰奏。

至李侍尧前奏，未经调用漳州有眷属兵二千，札询蓝元枚，

即派令前往。当经谕令该督，不必俟其回信，即行派往。此项兵丁究于何时由蚶江配渡，此时想已前抵鹿港。又粤省派调兵丁，前据孙士毅奏，于六月十三日可入闽境，此时计已早抵厦门。李侍尧于何时派拨配渡，前赴常青军前之处，亦尚未奏到，令朕何以情？著该督即行具奏，并将常青、蓝元枚、柴大纪近剿贼情形，一得地方官禀报，速行驰奏，以慰廑注。

本日又据徐嗣曾奏，漳州府属，仅于五月中旬得阵雨数次，泉州于五月十六日得微雨一阵，均未沾透，田禾间有黄萎，现在率属虔祷等语。漳泉一带，既经缺雨，田禾黄萎，小民秋收失望，恐米价更有增昂，甚关紧要。前因闽省需用米石，已早经降旨，令浙江、江西采办三十余万石，江南备办十万石。又谕保宁将川米备办二十万石，由川江迅速运至江南，交李世杰等一并运闽省，共计有米六十余万石。现在各该省陆续起运，源源到闽，足资接济。前已谕李侍尧，将各省办米数十万石运闽接济之处，宜先令闽人知之，以安其心。著再传谕徐嗣曾，即将浙江、江南、江西、四川运米共六十余万石，即日全数运到，军民口食有资，详晰出示，俾各属通行晓谕，市价不至踊贵，方为妥善。仍著李侍尧、徐嗣曾，将漳泉二府，于何日续得透雨，秋收不致歉薄之处，一并迅速具奏。将此由六百里加紧各传谕知之。

钦此。遵旨寄信前来。

浙江巡抚琅玕等奏遵旨挑派满兵赴闽折

乾隆五十二年七月初五日批 军录

臣宝琳、臣琅玕跪奏，为遵旨挑派满兵赴闽缘由，恭折复

奏事。

窃臣于六月二十五日钦奏上谕：据常青等奏请添派官兵，著宝琳、琅玕于浙省杭州驻防满兵内挑选一千名，乍浦驻防满兵内挑选五百名，等因。钦此。

臣等查台匪猖獗，现在所有兵丁不敷痛剿，钦奉谕旨，派调浙省驻防满兵，令升授江宁将军、乍浦副都统永庆带领前往，自应迅速赴闽，以期早蒞事。查永庆已于十八日交印前赴新任，臣等当即飞咨，于文到之日，令其星驰来浙，遵旨带兵前往。并飞咨署乍浦副都统舒楞额，即于满营内挑选精壮兵五百名，拣派协领等官十员带领，即日起程来省。臣等随于本日立即传齐八旗满兵，会同逐加挑选，择其汉仗高大，年力强壮者，派定前锋兵一百六十名，鸟枪兵四百四十名，弓箭兵四百名，共足一千名。并派协领二员，佐领四员，防御四员，骁骑校十员，分行管带。该兵等均以满州世仆，受恩深重，无不奋勇争先，告求前往。乃选派足数，未经入挑者，犹纷纷跪求，情愿出力，甚有满州义勇气概。（朱批：好！）所有杭州满兵一千名，乍浦满兵五百名，臣等酌定以二百五十名为一起，共分作六起，间日行走，以免前途障路拥挤。一切军装、火药、铅弹、器械，俱令裹带足数。粮饷等项，按数给发，所需船只，臣琅玕当飭连夜赶紧备办。兹头起官兵已于二十六日午刻起程，臣等亲至江干督送。各兵等俱欢欣踊跃，登舟开行。其余各起，按日前进。其乍浦满兵，臣琅玕已派委嘉兴府知府郑交泰驰往，会同理事、同知，并派出领兵之员照料护送来省，以便接续起程。计末起官兵起程之前，永庆自可到省。倘不能如期赶上，臣宝琳即先行督催前进，俟永庆前途赶到接替，臣宝琳再行回省。

至各兵自杭起程，经过水路各站，臣琅玕已飞飭该府县，各

于本境内地方照料安办，并令在省司道，带同委员按起轮流弹压护送。其江山、西安一带陆路，尤为紧要。臣琅玕前因闽省知会，有请调京兵之信。先经委令杭嘉湖道清泰前往，酌量筹备尖宿各事宜。兹即飞飭令其会同金衢严道玉德在彼妥办，护送出境，均可不致迟误。领兵各官军所需用马匹，俱令其各自带往。其入闽省交界，应行接办事宜，已飞咨督臣李侍尧、福建抚臣徐嗣曾转飭备办。臣等仍严飭带兵各官，沿途加紧遄行，不得稍有稽滞。此次仰赖皇上圣漠广远，于粤、浙两省就近调拨，为期迅速，兵力即已厚集，自可合势，奋勇痛加剿捕，以申国宪而靖海疆。所有钦奉谕旨挑选驻防满兵赴闽起程缘由，臣等仅合同恭折驰奏，伏乞皇上睿鉴。谨奏。

乾隆五十二年六月二十七日。

乾隆五十二年七月初五日奉朱批：知道了。钦此。

闽浙总督李侍尧奏麻豆社等处失陷折

乾隆五十二年七月初十日批 军录

闽浙总督臣李侍尧跪奏，为奏闻事。

窃臣于本月十一、十二等日，将台地情形及笨港被贼占据缘由，业经具奏在案。兹臣因料理各兵配渡，来至厦门。连日又接台湾同知吴元琪等禀称：府城米粮向恃北路之麻豆社、笨港及南路之东港、竹仔港等处沿海贩运，来府城济用，前中麻豆社、笨港已被贼攻占，近日东港、竹仔港又为贼匪张基光、邓理所据，以致南北两路无米到城，而避难来郡者又多，艰于觅食，最为急务。海边小船并有被贼押去者，现在副将丁朝雄酌派官兵并挑义

民四百，用船四十余只，在沿海一带巡拿等语。与常青所奏大约相同，而更为详细。又据知府杨廷桦稟称：柴大纪在诸罗屡次打仗，最为贼所畏，近因分兵往救盐水港等处，兵力益单。诸罗县陈良翼现在稟请将军派兵往援等语。

看此情形，台湾贼匪更觉滋扰，府城既有难民纷集，自不得暂为周恤。适有续办薯干十万斤，将解鹿港，臣随饬拨四万斤分解府城，并札该道府设厂，将薯干和米煮赈，善为抚恤，毋致失所。

至臣所预调在泉厦弹压之本省兵二千名，内驻扎厦门之一千名，已于本月十三日随常青之子侍卫希明放洋。驻扎泉州之一千名，亦已催来，于十五日放洋，计此时俱已早到台湾。其两广督臣孙士毅遣来粤兵二千，亦于十五、六、七、八等日到厦，今于二十四日一齐开驾。查常青等与贼相持，竟有不能分兵之势。此四千兵一到，当可先令驱剿东港等处之贼，使粮路疏通，则府城人心先定，即可相度事机，大举剿除矣！所有官兵开洋日期，及近日台地情形，谨缮折驰奏，伏乞皇上睿鉴。谨奏。

乾隆五十二年六月二十五日。

乾隆五十二年七月初十日奉朱批：正为此焦心盼望，即有旨谕。汝所奏亦略迟矣！钦此。

闽浙总督李侍尧奏委员将金娘等解京片

乾隆五十二年七月初十日批（军录）

再，常青拿获之番妇金娘，及贼匪林红、王坑郎、杨章四犯，于六月初六日解到泉州。臣当即委员起解赴京外，兹又据驻

扎淡水之副将徐鼎士，并同知徐梦麟拿解彭喜、赖树二犯前来。据禀称：彭喜原系澎湖守备，因军政革职。从前署北淡水都司时，即与林小文相识。革职回籍后，上年十一月仍赴淡水，向林小文索讨旧欠，值贼匪肆扰，遂入贼党，在白石湖山教贼聚石在山，掷打官兵，因贼散被擒。其赖树一犯，系听从林小文纠约入会，竖旗聚众，伪称北路大将军。在新庄街抗拒官兵，逃后被获等语。臣督同司道等复讯无异。查彭喜曾任守备，被革后胆敢从贼，为之设计，（朱批：可恨。）拾石掷抵官兵。赖树被纠入会，得受伪职，率众与官兵相抗，均属罪大恶极，应解刑部。已于本月二十日委员将二犯解京，合并附奏。

乾隆五十二年六月二十五日。

同日^①奉朱批：览。钦此。

谕钦差湖广总督常青等集中兵力 打通粮道捉拿首要

乾隆五十二年七月初十日 台湾档

大学士和，字寄钦差湖广总督将军常、闽浙总督李、水师提督参赞蓝、陆路提督柴，乾隆五十二年七月初十日奉上谕：

据李侍尧奏台湾情形及官兵开洋日期一折，内称据台湾同知禀报，北路之麻豆社、笨港及南路之东港、竹仔港，被贼匪张基光、邓理所踞，南北两路无米到城，避难来郡民人，艰于觅食，海边小船，被贼押去，现在副将丁朝雄挑派官兵义民，在沿海一

^① 指乾隆五十二年七月初十日。

带巡拿等语。北路之麻豆社、笨港，南路之东港、竹仔港等处，为府城贩运粮米通衢，今为贼匪占据，以致南北两路无米到城，难民民人艰于觅食，不可急为设法剿除。前屡经谕令常青，此次添调兵丁到彼，尚需时日，断无株守坐待之理。该将军或舍南趋北，会合蓝元枚等，直捣大里杙贼巢，或酌派兵丁，添守府城，常青竟带领侍卫、章京等，率兵直往南潭擒拿贼目庄大田。该将军接奉前旨，未知作何筹办，定往何路进剿。现在贼匪将南北两路运米社港占据，并押去海边小船，虽经副将丁朝雄等挑派官兵义民，前往巡拿，究恐不能痛加剿戮。此时常青，或已亲自领兵，前往南潭等处进剿，或与贼相持，不能分身，何不于镇将内，如蔡攀龙之奋勇可恃者，酌派一员，令同侍卫、章京一二人，带领官兵，径往麻豆社、笨港等处，先将占据社港贼匪，悉力歼除，俾道路肃清，贩运米粮不致阻隔。仍飭该副将丁朝雄等，务须督率兵民，在沿海一带，实力巡拿海边船只，不使贼匪抢占，粮路得通，此为最要。

台湾府城及鹿港二处，不但官兵云集，居民稠密，即外来贸易及避难人等，不可胜计，且粮饷、火药等项，俱在该二处存贮，关系甚重。节据常青、李侍尧等奏报，贼匪林爽文、庄大田等，分遣伙党，屯聚要隘，焚毁村庄，自府城至诸罗鹿港等处，道路梗塞，文报不通，柴薪难得。今麻豆社、笨港等处，又有贼匪占据，滋扰粮运实为可虑。此时常青、蓝元枚，竟当督领将军兵丁，速将屯聚要隘之贼首贼目，先行剿杀歼除，打通道路为急务。此等贼匪蜂屯蚁聚，四处蔓延侵扰，多系胁从，其实贼首贼目不过数人。该将军等若能将其渠魁擒获，设法招抚余党，其余附从伙匪，自可不攻而溃。且贼首林爽文与其有名贼目，各负一隅，而分遣其党羽四处滋扰，使官兵分路堵御，疲于应接，而贼匪转得

暇逸。此乃贼人奸狡之计，宾主之势较然，该将军等不可为其所愚。正当乘其不备，出奇制胜，歼厥渠魁，使余匪望风奔溃。断无贼匪东至，则于东路堵御，贼匪西至，又于西路堵御，以一兵抵御一贼之理。况贼众即束手待戮，按数骈诛，亦非一时可了。岂贼匪有十余万，亦将以官兵十余万应之耶？该将军等此时杀贼，转在其次，总当会合兵力，聚于一处，以歼擒首逆及有名贼目为要。且贼目中，如王芬、高文麟等，亦曾经官兵擒戮，现在如庄大田、陈泮、吴领等，皆系有名头人，不可不先行诛擒，以解散其党羽。若徒事纷纷堵御，零星打仗，转至官兵疲于奔命。稍延一日，则师老一日，而转与贼人以暇，俾得生心乘隙，恐官兵日久力疲，致有挫失，更属不成事体。该将军等不可不虑也。

至台湾府城难民纷集，急需口粮接济，现据李侍尧奏，已拨番薯四万斤解往，此项番薯即可得用，该督等即应劝谕百姓，乘时广为布种，于小民口食，更为有神。

又据李侍尧奏，接据杨廷桦禀报，称柴大纪在诸罗屡次打仗，最为贼人所畏惮。今因分兵往救盐水港等处，兵力单弱，诸罗县知县禀请将军派兵往援等语。柴大纪驻守诸罗，屡被贼匪攻扰，俱经率领兵民，奋力杀退，为贼匪素所畏惮。今因分兵往盐水港等处救援，兵力单弱，自应添兵驻守。但常青处，现在正当相机进剿，难以分兵往援，且道路阻隔，亦属缓不济急。朕意蓝元枚现驻鹿港，距诸罗较近，且该处现已派拨兵丁，即可到。蓝元枚前奏，差弁约会大甲溪义民熟番，前往大里杙之南，合兵攻剿。若声势不能联络，未经前往，此时蓝元枚，或令普吉保，驻守鹿港，该参赞先带兵数千，前往诸罗，帮助柴大纪，更可保护无虞，会合剿杀。著谕蓝元枚，即将是否可以如此办理之处，相度情形，随宜酌办。务使柴大纪处兵势壮盛，不致稍有疏虞，

亦不可有顾彼失此之虑，方为妥善。至现在笨港、麻豆社等处有贼匪占踞，将运米道路梗阻，蓝元枚亦应派拨将弁，带兵前往该处，奋力剿散，打通粮路为要。

再，据李侍尧奏，预备在泉厦之兵二千，内一千名已于六月十三日，随常青之子希明放洋。其一千名，亦于十五日配渡。粤省先到兵二千，于二十四日一齐开驾等语。此次添调官兵共计一万一千名，前已谕令李侍尧将九千名拨往常青军前，二千名派赴蓝元枚处。续据李侍尧奏，预备漳州兵，未经调用者二千名，亦有旨令该督即行派往蓝元枚处。此项漳州兵，究于何日配渡开洋前赴鹿港？此外应拨蓝元枚兵二千，李侍尧是否即将漳州兵抵数，抑于前派一万一千兵内再拨二千前赴鹿港，现在蓝元枚处是否拨兵四千名前往，并著李侍尧详悉速行复奏。

至柴大纪处前日奏到之折，系五月二十三日拜发，距今将及五旬，其何筹办堵杀，打仗得胜，及分兵盐水港救援情形，均未据该提督续行奏报，甚为廛念。又，蓝元枚前奏，差弁往大甲溪等处，晓谕义民熟番，攻逼贼巢，该参赞亲往大里杙之南，率兵进剿，所差该弁自己得有回信。蓝元枚究于何时前往大里杙会合攻剿之处，已有半月之久，未据该参赞奏报，著蓝元枚、柴大纪即将近日如何筹办进剿情形，以六百里加紧迅速驰奏。至李侍尧自前月二十五日奏到各折后，相隔半月，始据续有此奏报，已觉略迟，乃又用五百里驰递，该督或欲省驿马之力，抑以为用六百里虑朕心烦宁，不知朕盼望军报，宵旰靡宁，何以迟缓若此！嗣后如有此等关系军务者，仍由六百里驰奏。若得官兵打仗得胜捷音，即用六百里加紧驰奏，以慰悬注，毋得仍前延缓。

至闽省向藉台湾米石，今该处被贼滋扰，不能播种，而内地漳泉又复缺雨，是内外均资接济，所需米石必多，前已令浙江、江

西、江南、四川等省，共运米六十余万石，并令李侍尧先行晓谕该处百姓，以安其心。本日又降旨，谕令川省于前运二十万石外，再办米三万石，由江南接续运闽，自可陆续运到。并著李侍尧再将川省现又办运米三十万石，将来源源接运，闽省军民口食无虞缺乏之处，广为晓示。并著常青、蓝元枚等一体晓谕兵民，亦可安心，踊跃从事。

再，台湾府本年应征钱粮，已有旨豁免。至漳泉二府，前据徐嗣曾奏，春夏缺少雨泽，田禾黄萎，恐致歉收，且该处有过兵运粮等事，亦应酌量加恩。但此时已过征收之期，其业经完纳者，自未便给还，且恐徒为州县吏胥肥橐，即可置之不论。若尚未普行征齐，李侍尧即可一面传旨出示缓征，一面据实复奏。

再，据李侍尧奏称，副将徐鼎士拿获彭喜、赖树二犯，解到审讯一节。彭喜系参革守备，胆敢从贼抗拒官兵，实属可恶。著该督等即查明该犯家属，问拟缘坐。至赖树一犯，据供听从林小文纠约入会，竖旗聚众，受贼北路大将军伪职，与官兵相抗。该二犯既经从贼，自有党伙，何以容易即被拿获？将来解京审讯，恐又如廖东等之狡供不认，亦未可定。并著李侍尧将彭喜、赖树如何被获实情，一并查明具奏。将此由六百里加紧各传谕知之。仍著常青、蓝元枚等将近日攻剿情形，及定于何路进兵，并运米道路如何派员前往剿散廓清之处，迅速加紧复奏。朕日夕盼望捷音之至。

钦此。遵旨寄信前来。

諭四川總督保寧等續備川米

三十萬石迅速運閩

乾隆五十二年七月初十日 台灣檔

大學士和，字寄四川總督保、兩江總督李、江蘇巡撫閔，乾隆五十二年七月初十日奉上諭：

前因閩省軍需需用糧米甚多，已諭令保寧將川米備辦二十萬石，即由川江迅速運至江南，交李世杰等委員運赴閩省，以濟急需。但現在台灣軍務尚未告竣，一切兵食及平糶撫恤等事，在在急需，不妨多為儲備。川省素為產米之區，連歲收成豐稔，積儲較裕。著傳諭保寧，再行采買米三十萬石，如或市糧不敷采辦，即于附近川江各州縣常社倉內，碾動谷石，以足三十萬之數，接續運赴江南，交李世杰等一併委員運往閩省，以資接濟。其碾動倉谷，不妨暇時買補。至此次運閩米數，需用海船較多，著傳諭李世杰、閔鶚元，將海舡一項寬為預備。俟前次川米二十萬石抵江起運後，所有續辦米石，一經運到江省，即接續配舡起運，以期迅速抵閩，毋誤要需。將此由六百里傳諭保寧、李世杰、閔鶚元，並諭李侍堯知之。

欽此。遵旨寄信前來。

钦差湖广总督常青奏南北两路连日接战折

乾隆五十二年七月十二日批 军录

将军湖广总督臣常青、参赞福州将军臣恒瑞跪奏，为接据诸罗会禀，拨兵赴援，恭折奏闻事。

窃臣等初八、初十等日，连次杀贼，并严防口岸，于十三日具奏。旋于拜折后，奉到谕旨：李侍尧奏台湾换班兵丁，请暂缓更换等因。钦此。又奉到谕旨：柴大纪折内有武举陈宗器等，著查明拔补千总，等因。钦此。钦遵各到臣。查军需粮饷，经督臣李侍尧筹拨运解，俱各妥速充裕。其打仗出力之武举、义民等，现在查取伊等本身履历，酌量应加拔擢之处，即行奏请恩赏，以示鼓励。至现署诸罗县陈良翼，原系诸罗县知县，于乾隆五十年推升云南嵩明州知州，缘亲老呈请终养，业已卸事，因病尚未回籍，是以令该员代理县事。现值防护县城，该员正当暂缓乌私，力图报效。惟查贼匪充斥，官兵尚未深入长驱。

臣等正深焦急，兹于十四日戌刻，接据署提臣柴大纪、署诸罗县陈良翼会禀：逆匪自麻豆庄杀散以后，复纠合大武垵、哆啰囑各匪，意欲攻踞盐水港，以绝县城粮饷，以收不攻自破之利。刻下诸邑四处，皆为贼匪把截。惟盐水港一路可通郡城，为我命脉攸关，必需保固。现在安兵一千余名，拨游击杨起麟统领驻扎。又拨千总陈邦材带兵二百名，驻防鹿仔草，与盐水港犄角。初五、初七等日，连败贼匪。初九日探得贼匪攻鹿仔草，随派游击李隆带领队伍义民一千三百名，前往夹攻。迨行至竹仔脚、大崙田洋，该处离鹿仔草十余里，忽遇贼匪约八、九千。从左右庄

内蜂拥而出。随飭兵丁施放枪炮，打裂大炮一门。贼人愈杀愈多，四面逼近，兵民奋勇鏖战。自辰至未，枪炮毙贼约五、六百人，官兵义民亦多有损伤。适游击邱能成巡哨回至该处，枪炮轰击其后，贼始退散，收兵回县。查点兵民有百余人尚未归伍，军装亦有遗失，统容查明另报。查贼势猖獗，驻县之兵，除拨驻盐水港、鹿仔草两处，余兵只一千五、六百名，已为单薄，且义民亦分守盐水港、鹿仔草，县城空虚，实为可虑。乞发大兵三千名，多带枪炮，速来诸罗，以安累卵。或由船至盐水港亦好。随又据派往盐水港之杨起麟禀称：游击同守备黄象新昼夜督兵固守。兹闻笨港汛于本月初一日被贼攻陷，焚烧各庄。初十日又攻围鹿仔草。查鹿仔草离盐水港止隔十数里，于初五、初七、初九、十一连日分路围攻盐水港。游击等竭力杀败贼匪，但盐水港附近四围庄社，皆被贼陷。惟存盐水港〔一〕街之地^①，兵力甚单。兼以连日打仗，药铅存剩无几。若差往诸罗运解，路经贼巢，恐有疏虞。请速拨兵一千名，并火药大小铅子应用各等情前来。臣等伏查笨港、盐水港皆系诸罗至郡水陆要路，今游击杨起麟禀内，有笨港汛于初一日被贼攻陷之语。何以柴大纪等并无文报？恐系该游击得自听闻，未尽确实。但细阅柴大纪等会禀，派令游击李隆带领兵民，尚未及与现驻盐水港之游击杨起麟会合夹攻，已于中途竹仔脚等处遇贼交战，枪炮毙贼虽多，而兵民军械俱有损失，并虑县城空虚，专差星夜间道告急，自属立等赴援。臣等本欲于各港口酌拨兵四、五百名，同义民前往防御，今看此情形，恐兵少于事无济，（朱批：是尔等重兵应即往，速清此路。）当即派令总兵魏大斌、副将詹殷擢、都司刘振唐、守备姚

① 《钦定平定台湾纪略》（稿本）卷二十四为“一街之地”。

国泰等带兵一千五百名，饬同知杨廷理备齐船只，即于十五日黎明上船开行。并令该总兵等探听盐水港，如尚有贼围扰，即协力进攻。（朱批：好。）如贼已退，即竟赴诸罗与柴大纪商同堵剿，（朱批：是。）即确查笨港有无失事，迅速驰报。如笨港有失，则府城往北海道贼人又将于水道作梗。（朱批：此所关最要，尤应速清此路，不必向南擒庄大田，中贼人牵掣之计。）而一切粮食、货物、商贾难行，殊有关系。且凤山之东港，在鹿耳门之左，已为贼占。诸罗之笨港，在鹿耳门之右，又为贼扰。则现在鹿耳门一口，尤宜加意严防，臣等已派拨官兵防御，至盐水港在诸罗之南，府城之北，距府城不过五、六十里。今贼众围攻盐水港，固意在诸罗，而实则觊觎府城。（朱批：知此，则尔等往灭，此则为要矣！）现在扎营府城以南，自初十日贼人败退之后，伏莽潜藏。至十三、十五等日，有贼千余屡次来扰，官兵迎击，即又奔逃。（朱批：此乃贼之奸计，牵掣尔等不动，彼得以分路为寇，断粮道耳！）臣等料其诡计，希冀官军大众深入穷追，迨去府既远，不惟妄想绕出官军之后，而盐水港等处之贼，自北趋郡，必更肆无忌惮。且鹿耳门一口，左右有贼，又当时时兼顾。臣等再四筹划，现在营盘实有未可移动，率行轻进之势，（朱批：不可向南，竟宜向北，清盐水港等处贼耳！）臣等前请添兵，当已咨会督臣孙士毅，如潮州有挑备之兵，即先发二千名前来，犹未据咨复。（朱批：想此时已到台湾矣。）现已接据督臣李侍尧来咨，业将预先调到本省兵二千名，饬带领之参游等员，由厦门配渡，计日可到，实能先事调度。臣等惟有相机剿捕，仍照料郡城南北两面，以及鹿耳门要口，并知会蓝元枚、柴大纪等，务于各该处用心防范。所有据稟拨兵赴援，现在贼势缘由，谨先合词恭折奏闻，伏祈皇上睿鉴。谨奏。

乾隆五十二年六月十六日。

乾隆五十二年七月十二日奉朱批：即有旨諭。欽此。

諭欽差湖廣總督常青無須再查廖東等事

乾隆五十二年七月十二日 台灣檔

大學士和，字寄欽差湖廣總督將軍常、閩浙總督李、福建水師提督參贊藍、陸路提督柴、兩廣總督孫，乾隆五十二年七月十二日奉上諭：

據常青等奏，接准諸羅會稟派兵赴援一折，內稱據諸羅縣稟報，賊匪自麻豆庄殺散，復糾合大武壠等處賊匪，欲攻踞鹽水港，以絕糧餉。現撥游击楊起麟，帶兵一千余名，駐扎鹽水港。千總陈邦材，帶兵二百名，駐防鹿仔草，初五、初七等日連敗賊匪，初九日又于鹿仔草遇賊，兵民鏖戰，槍炮打死賊五六百人。但駐縣之兵，除撥駐鹽水港、鹿仔草兩處，余兵只一千五六百名，且義民亦分守鹽水港、鹿仔草，县城空虚，請發兵往援。又據游击楊起麟稟報，賊匪于初五、初七等日，分路圍攻鹽水港，該處兵力甚單，火药無多，亦請撥兵往救等因。當即派總兵魏大斌等，帶兵一千五百名，于十五日上船開行，并令該總兵探听鹽水港。如尚有賊圍扰，即協力進攻，如賊已退，即徑赴諸羅等語。已于折內詳晰批示矣。

昨據李侍堯奏，北路之麻豆社、笨港，南路之東港、竹子港，被賊匪張基光、邓理占踞，南北兩路無米到城。已有旨諭該將軍等指示一切机宜矣。今閱常青等奏到之折，与李侍堯昨奏，大略相同。惟麻豆社，柴大紀則稱殺散，李侍堯則稱被賊踞，不

知何故不同。又盐水港，在诸罗之南，笨港在诸罗之北，皆为运粮要路。今俱有贼匪抢占，以绝粮饷，诸罗势甚迫急，所关甚重。看来贼人狡计，竟系因大兵俱在府城、诸罗一路，兵势单薄，故作窥伺府城，以牵缀官兵，使常青等不能远离该处营盘，而其意实欲断我粮道，攻逼诸罗县城。若诸罗有失，则台湾府城势更孤悬，四面受敌，大有关系。前曾有旨令常青等或舍南趋北，直攻大里杙贼巢，或竟往南潭，擒拿贼目庄大田，今看此情形，该将军等不必向南，竟宜先往北路，将笨港、盐水港一路廓清，方不堕贼人牵缀之计。常青此时或于总兵副将内，择其奋勇可恃者，酌派一员，令其固守营盘，仍作为进南路之势，牵缀贼匪，使其不敢攻犯府城，而常青等竟拣选精锐，亲自带领同侍卫、章京、将备等数人，直趋北路，前至诸罗，会同柴大纪，并力擒渠捣穴。或分派劲旅，将盐水港屯占贼匪，悉力歼除，打通粮路。此为上策。蓝元枚昨已有旨，令其察看情形，或派普吉保驻守鹿港，该参赞带兵前往诸罗，帮助柴大纪。今诸罗被贼攻扰，兵单势孤，蓝元枚亦应急往援应。该参赞自当即令普吉保协同将备，留兵固守鹿港。蓝元枚即带兵前往盐水港，剿杀贼匪后，自南而北，星赴诸罗，接应柴大纪，与常青会合一处。或能先将笨港一带屯聚贼匪乘势扫除，更为妥善。常青自驻扎府城，未能进剿，而现在营盘又未能移动，岂有被贼牵缀株守，坐视柴大纪受困之理？况府城前未添官兵之时，已能保固无虞，今计粤闽先渡之兵四千早到，若派勇干大员在彼固守，常青即领兵前往北路，自可无他虞。如此庶不至为贼所牵缀，以致师老力疲。而柴大纪处，得此两路兵力接应，盐水港、笨港道路肃清，米粮通运，南北声势联络，人心自定，似于进剿机宜，极为得力。著常青、蓝元枚酌量情形，迅速筹办。一面办理，一面奏闻，断不可坐失

事机。

再，用兵之道，全在先声夺人。现在添调兵丁不为不多，即日陆续前抵台湾府城及鹿港，兵势自当日盛。但常青等不妨再行晓谕军民，以此次添调官兵之外，现又有旨于广东及福建本省添调兵数万，接续前进，俾军民等心胆益壮，兵气益为振作，且使贼人闻之亦不敢肆意鸱张。此以先声后实之一法。仍著李侍尧、孙士毅广为召募数万，多多益善，以备调遣。

再，台湾府城官兵粮饷、火药等项，存贮甚多，关系极为紧要。常青于带兵前往盐水港等处进剿时，除将战守官兵应用粮饷、火药普行酌量散给，随身携带外，所余粮饷、火药，若仍贮积府城，该处系编竹为城，非坚城深池可比，恐易生贼人窥伺之心，不可不虑。莫若竟将所余粮饷火药酌量留存，以备守城之用，可不至短缺外，其余悉行携带随行，即使府城万一稍有不虞，亦只系空城，贼人一无所获，亦不能久占，并著该将军酌筹妥办。但此事该将军等须密之又密，只可暗为派拨，不得稍露风声，使军民闻之心中摇动，转多未便，此为最要。

至凤山之东港为贼占据，于鹿耳门甚有关系。现已据常青派拨官兵前往防御，但恐该处官兵未能分身，恐尚不能歼除净尽，著李侍尧于内地总兵副将内奋勇者，拣派一员，带兵一二千，前往剿除占据东港之贼匪，打通粮路，更可得力。

总之，贼匪奸狡，屯聚南路，四出滋扰，故为觊觎府城，而其意实系牵缀官兵，欲专注诸罗一处。现在南北两路声势阻隔，全恃诸罗联络。该将军、参赞，不可不将盐水港、笨港先行肃清，杀散贼匪，打通粮路，会合柴大纪，以为进剿之计。断不可过于瞻顾，转为贼所牵掣，以致旷日持久，堕其术中，此为最要。

又，据常青等奏，同知杨廷理屡次带领义民，打仗出力，杨

世纶随营办理一切要件，颇为奋勉，请量加鼓励等语。杨廷理、杨世纶俱著赏戴花翎。俟军务告竣，再行送部引见，以示鼓励。

再，前次解到贼匪廖东等四犯，内连清水、阮赞二犯，业经审明从贼，即行正法。其廖东、胡番二犯因屡次讯供，坚称系被义民挟嫌诬害，兵役误拿，而于从贼一节，狡展不认，曾降旨令该将军等查明所供情节，奏到再行办理。今思此等匪犯，若非从贼为逆，何致被拿？岂可因其一时狡赖，复往军营查询，此办失于检点矣。况现在剿捕贼匪，正在查拿匪犯之时，若因其狡展之词，又向兵民查询，恐兵民不无顾忌，转致遇有贼匪，不敢轻拿，大为未便。且廖东曾受伪职，胡番系诸罗县贴写，被义民拿获，自属贼匪党恶无疑。除已降旨，将该二犯即行正法外，著传谕常青等，竟无须查询此事。不但兵丁等不须向其究问，而义民等更不必再行传询，以致心存顾忌，转使贼匪得以漏网。将此由六百里加紧各传谕知之，仍著常青、蓝元枚、柴大纪将近日如何筹办进剿，及盐水港、笨港等处曾否剿散贼匪，粮路得通之处，迅速加紧驰奏。李侍尧一得地方官禀报官兵打仗信息，及浙粤添调兵丁于何时陆续到齐配渡放洋之处，一并随时驰奏，以慰悬注。

钦此。遵旨寄信前来。

钦差湖广总督常青等奏请恩赏

打仗出力人员折

乾隆五十二年七月十三日批

《钦定平定台湾纪略》（稿本）卷二十五

常青、恒瑞同奏言。贼匪侵扰诸罗之盐水港等处，臣等当派

总兵魏大斌等带兵一千五百名应援，拒南路贼匪，闻知郡北一带有贼，已分派官兵前往，胆敢于十八日卯刻纠伙约七、八千围绕大营三面。又有贼三、四千攻犯府城小南门外桶盘栈营盘。该道府协同副、参等员弁在城守御，并派拨兵民出战。臣等率同侍卫乌什哈达等，带领满汉官兵出营，分路迎击。贼众正与桶盘栈营盘对阵。乌什哈达等所带官兵横冲贼队，奋勇争先，枪炮齐发。贼尚拼死抵敌，官兵以排枪直压，贼始败走。追杀六、七里，俱向竹箐深密处窜逸，其大营三面之贼，有章京岱森宝等七员，总兵梁朝桂、副将蔡攀龙、参将特克什布等，俱各奋勇督战，大小炮、排枪、弓箭施放得宜。至午刻，贼人大败，共计枪炮毙贼约三百余人，杀死数十人，割献首级二十一颗，耳记、发辫七个，夺获贼械二十余件。受伤外委郭振龙一名，兵丁九名，义民九名，阵亡义民四名，当即分别注册，照例赏恤。臣等查此日等仗，乌什哈达奋勇倍常，岱森宝等带队勇往，又委翼长、副将官福战阵勇往，调拨官兵，晓畅军旅，深有机宜，且昼夜勤慎，实为营中出色之员，在金川军营已赏戴花翎。其副将贵林临阵打仗，身先士卒，以及同知杨廷理带领义勇，倡率有方，该二员现在奖以花翎。又外委王国志，亦能管带义民，打仗甚属勤勉，超补千总实缺，并奖以蓝翎。至总兵魏大斌等，自十五日带兵由水道前赴诸罗、盐水港，前已有官兵防御，今魏大斌带兵前往，谅必通知柴大纪，但尚未据回报。臣等已飞札蓝元枚、柴大纪，即约会魏大斌协力剿贼，固守诸罗，迅速驰报。再，台湾道永福身系满洲，办事认真，节次亲带义勇剿贼，终始勇往，且深得民心，劝谕义勇输诚尽力，洵属得力人员，合无仰恳圣恩，赏戴花翎，以示鼓励。

（发文日期不详。）

钦差湖广总督常青奏诸罗

盐水等处战况折

乾隆五十二年七月十三日批 军录

臣常青、臣恒瑞跪奏，为钦奉谕旨，并堵剿贼匪得有胜仗，恭折具奏，仰祈圣鉴事。

窃臣等于六月十八日奉到谕旨：林爽文所住之大里杙庄，毛竹围墙，当以火攻为上，等因。钦此。又奉谕旨：柴大纪若能将林爽文擒获，其功甚大，益当勉力，以邀懋赏，等因。钦此。又奉谕旨：柴大纪赍折把总郑士胜称，该督奖劝义民乡勇，共知踊跃，实属可嘉。已明降谕旨，将常青交部从优议叙，等因。钦此。又奉谕旨：将来剿捕事竣，柴大纪屡著劳绩，自应立即实授提督，等因。钦此。钦遵各到臣。伏念臣常青未能速歼丑逆，夙夜靡宁。兹复蒙恩优叙，益深感悚。谨望阙叩头谢恩，另折具奏。查贼匪侵扰诸罗之盐水港等处，臣等当派总兵魏大斌等带兵一千五百名应援去后。随于郡城内外堆卡，水陆口岸各处营盘，飭令官兵预备严防。詎南路贼匪闻知郡北一带有贼，已分派官兵前往，胆敢于十八日卯刻纠伙约七、八千，围绕大营三面。又有贼三、四千攻犯府城小南门外桶盘栈营盘。该道府协同副参等员弁在城守御，并拨派兵民出战。臣等率同侍卫乌什哈达，副将官福、贵林，协领海星阿等，带领满汉官兵出营，分路迎击贼众。正与桶盘栈营盘对阵，乌什哈达等所带官兵横冲贼队，奋勇争先，枪炮齐发，贼尚拚死抵敌。官兵以排枪直压，贼始败走，追杀六、七里，俱向竹箐深密处窜逸。其大营三面之贼，有章京岱森宝等

七员，总兵梁朝桂、副将蔡攀龙、参将特克什布等，俱各奋勇督战。大小炮、排枪、弓箭施放得宜，至午刻贼人大败。共计枪炮毙贼约三百余人，杀死数十人，割献首级二十一顆，耳记发辮七个，夺获贼械二十余件。受伤外委郭振龙一名，兵丁九名，义民九名，阵亡义民四名，当即分别注册，照例赏恤。臣等查本日打仗，乌什哈达奋勇倍常，岱森宝等带队勇往，委翼长副将官福战阵勇往调拨官兵晓畅军旅，深有机宜。且昼夜勤慎，实为营中出色之员。（朱批：原皆我满洲得用。）在金川军营，已赏戴花翎。其副将贵林临阵打仗，身先士卒，以及同知杨廷理带领义勇，倡率有方，该二员奖以花翎。又外委王国志亦能管带义民打仗，甚属勤勉，超补千总实缺，并奖以蓝翎。（朱批：好。）该员等皆感激圣恩，益思报效。至总兵魏大斌等自十五日带兵由水道前赴诸罗、盐水港。前已有官兵防御，今魏大斌带兵前往，谅必通知柴大纪，但尚未据回报。臣等已飞札蓝元枚、柴大纪，加意严防。即约会魏大斌协力剿贼，固守诸罗，迅速驰报。再，柴大纪赍折把总郑士胜遵旨拔补千总，其随同柴大纪堵御贼匪之游击杨起麟、林光玉、邱能成，武举黄奠邦、陈宗器等，现在确查，再行奏请恩恩奖擢议叙。至将来事竣，臣常青会同督臣李侍尧保奏堪胜提督之总兵。查参历任道府，严究会匪各事宜，均遵奉谕旨办理。现在添调闽粤兵各二千名，接续配渡前来。臣等惟有相机可进，即统领官兵前往，随时奏报外，所有奉到谕旨并堵杀贼匪缘由，谨合词恭折具奏，伏祈皇上睿鉴。谨奏。

乾隆五十二年六月二十三日。

乾隆五十二年七月十三日奉朱批：即有旨谕。钦此。

闽浙总督李侍尧奏续派兵船护饷及

预行料理战船折

乾隆五十二年七月十三日批 军录

闽浙总督臣李侍尧跪奏，为奏明事。

窃臣因诸罗之笨港被贼攻占，恐其掠取船只，在海面窥伺内地解运粮饷各船，是以即派拨赶缙船二只，每船配炮六尊，鸟枪兵一百名，令备弁带领，一驻鹿耳门，一驻鹿仔港，预为防范，业于本月十二日具奏在案。兹接常青抄录奏稿，知会到臣，内称凤山之东港，在鹿耳门之左，已为贼占。诸罗之笨港，在鹿耳门之右，若又为贼扰，则现在鹿耳门尤宜严防等语。看此情形，则臣前所派缙船二只，枪兵二百名分驻两处，似尚觉单薄。今查水师提标缙船各船，已无可调。枪兵除调赴台湾，所余有限。臣随飞飭海坛、金门二镇，调取缙船各一只，并向沿海各营凑拨枪兵二百名，照前分配每船一百名。若如常青所奏，似宜全数追往鹿耳门。但笨港距鹿仔港较近，则鹿仔港饷路亦不可不严防，是以仍令此二船分往鹿耳门、鹿仔港两处协力防范。如有贼船出扰，即行截杀，庶粮饷到彼，不至疏虞。至内地沿海各营额设战船，尤当预为整理。无如因循日久，按册则有数可稽，而船泊海边不为随时煇洗收拾，多不适用。其入厂修造者，又辄经年累月，不能上紧完工。目下惟有先就可用之船，亟飭修整完固。其在厂修造之船，一并勒限，严催迅速报竣，庶为有备，不至周章。所有臣续派兵船护饷，及预行料理战船缘由，谨缮折驰奏，伏乞皇上睿鉴。谨奏。

乾隆五十二年六月二十九日。

乾隆五十二年七月十三日奉朱批：正虑及此，昨已有旨，汝先事妥办，可嘉之至。钦此。

闽浙总督李侍尧奏蓝元枚作战情形

及续买花布运台片

乾隆五十二年七月十三日批 军录

再：本月二十八日据蚶江通判陈惇稟称，有林源盛船自鹿仔港回至蚶江。询据称：蓝提督于六月十五日带兵民往大肚溪剿贼，义民涉水过溪，与贼打仗，互有杀伤。又闻十六日牛骂头各庄义民，带同熟番共数千人，杀至大肚溪，焚烧贼庄，杀死贼匪甚多。蓝提督亦拨兵民前往接应等语。查蓝元枚前奏有遣人往大甲等社联络番社之语，今牛骂头义民同熟番攻贼，想即系蓝元枚遣人纠约。查前奉谕旨：番人最喜花红布匹，应酌量奖赏，以收其用。臣当即采买色布色绢四千余匹，分解府城、鹿仔港两处。今蓝元枚联络番社，正可得用。臣拟再行酌买解往，以备接续应用。（朱批：好。）至北淡水一路据副将徐鼎士、游击易连、同知徐梦麟等稟称，招抚难民，俱已归庄。幸得时雨，晚稻大半布种。（朱批：更慰。）惟贼首吴沙盘踞三貂，恃其地险，尚在窜伏。现在设法购线、剿捕等语。是北淡水一路尚属宁贴，合并附奏。

乾隆五十二年六月二十九日。

乾隆五十二年七月十三日奉朱批：览奏稍慰。钦此。

闽浙总督李侍尧奏闽省额兵

不敷应用请予酌补折

乾隆五十二年七月十三日批 军录

闽浙总督臣李侍尧跪奏，为酌补营兵以备缓急事。

窃照闽省额兵除戍守台湾一万二千余名外，上年调往剿匪一万一千余名，本年三月调往澎湖五百名，昨因将军常青奏请添兵，又调往二千名，兼有班满应回及派往换班而俱留在军营者八百余名，所余本省水路各营兵丁，实属不敷应用。现因贼匪未殄，漳泉一带声息相通，亦应有兵弹压防范。除漳州镇兵外，其余各营无可复调，且现在派拨舢舨船往鹿耳门鹿仔港防护粮饷。又本省及江浙等省运赴泉厦之米，俱由海道行走，亦在在需兵护送。即陆路运解饷银、火药、铅弹等项，无处不需兵押送。臣再四思维，不得不量为募补，查台湾戍兵经上年贼匪滋扰，多有伤亡散失。本年凤山再失，兵丁无著者又一千二三百名，曾屡奉谕旨，速行募补，前以未得何营何人所出之缺，是以稍迟。及接水师中军守备王天植造报缺额四百六十余名，当即奏明，将旧戍兵之缺，由内地各原营募补。其新调征兵有缺，由军营将余丁及义民内挑补在案。第王天植所造祇就现在府城各营，而南北两路无从查造者，更当数倍。若俟其一一查到，始行补额，现在内地营伍殊觉空虚，应先约略募补，以资差防，而备缓急。查水师提镇协所辖各营及陆路提标兴化、长福、省城、福宁所辖各营，均系沿海要地，应请照调往轮戍。台湾兵数无论是否伤亡散失，先挑补十分之三，其汀邵延建各营，挑补十分之二。所有粮饷即按名支

给，俟剿匪事竣后，统于伤亡散失截旷银粮补款，约略计算亦足敷归补。如此则兵饷不致多糜，（朱批：即多用，亦所弗惜矣。）而现在内地海疆得添募新兵及时操练，可以资守御而裕巡防矣。臣就内地现在情形，有不得不酌补之势，不敢拘泥有缺方补之例，除一面檄飭各营遵照募补及时训练外，谨缮折驰奏。伏乞皇上睿鉴。谨奏。

乾隆五十二年六月二十九日。

乾隆五十二年七月十三日奉朱批：昨已有旨，汝所办正好，已有旨矣。钦此。

谕钦差湖广总督常青等剿抚兼施广为募兵

乾隆五十二年七月十三日 台湾档

大学士和，字寄钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年七月十三日奉上谕：

据常青等奏，南路贼匪闻知郡城一带有贼，已分派官兵前往，于六月十八日，纠约伙匪七、八千，围绕大营三面。又有贼三、四千，攻犯府城小南门外桶盘栈营盘。经常青率同乌什哈达、官福、贵林等分路迎击，追杀六、七里，贼人向竹箐窜逸。其大营三面之贼，经岱森宝及将备等奋勇督战，贼人大败，共计枪炮毙贼三百余人，杀死数十人。当将打仗守城出力之副将贵林、同知杨廷理，奖以花翎。外委王国志超补千总，并奖以蓝翎等语。所办好。已于折内批示。

昨据常青奏到派兵赴援诸罗各情形，因思贼人见大兵俱在府

城，诸罗单弱，故作窥伺府城，以牵缀官兵，其意实欲攻逼诸罗。是以谕令常青等，于总兵副将内酌派一员，固守营盘。该将军竟拣选精锐，直趋北路，前往诸罗，会合柴大纪，或分派劲旅，将盐水港占据之贼匪悉力歼除，打通粮路。并谕蓝元枚，令普吉保固守鹿港，该参赞带兵往盐水港剿杀贼匪，星赴诸罗，接应柴大纪，与常青会合一处，以为擒渠捣穴之计。今常青奏，南路贼匪纠伙围绕大营，攻犯府城，是贼匪欲将官兵牵缀，意欲攻掠府城，狡黠显然。虽经常青等率领官兵分路剿杀，仅毙贼三百余人，不为快意。余匪仍由竹箐深密之处窜匿，尚不能痛加剿戮净尽。是常青等在府城外结营株守无益，竟当遵照前旨，酌量留将备守城，直趋北路，会合攻剿为是。

同日又据李侍尧奏，按蚶江通判禀报，蓝元枚于六月十五日，带领兵民往大肚溪剿贼，义民涉水过溪，与贼打仗。又牛骂头各庄义民，带同熟番数千人，杀至大肚溪，焚烧贼庄，蓝元枚亦拨兵民接应。北淡水一路，副将徐鼎士等招抚难民，俱已归庄，幸得时雨，晓（晚）稻大半布种。北淡水一路，尚属宁贴等语。难民既已归耕，不但可资口食，亦免去而为匪。批览之下，深为欣慰。看来蓝元枚处纠集义民熟番，会合夹攻，声势联络，较为得手。若令普吉保留兵固守鹿港，自可无虞。该参赞竟率领官兵，将笨港、盐水港等处屯占贼匪，次第歼除，廓清道路，由北而南，前赴诸罗接应柴大纪，而常青则由南而北，两路迎击，会集诸罗，与柴大纪、蓝元枚合兵一处，似于冲坚扫穴机宜，较为得力。惟是南路贼匪四处屯聚，固系牵缀官兵，亦欲觊觎府城。现在将军、参赞俱在一处，府城外所立营盘，自属宽阔。若常青带领官兵前往北路，府城及营盘兵力较分，营盘宽敞，照应不易，或贼匪乘间围绕攻犯，不可不虑。常青应于起身时，先将各

路营盘酌量收小，以便随时堵御，可保无虞。然此皆朕于数千里外思虑所及，随宜指示，但究系遥度情形，用兵机宜，倏忽变换，其是否可以如此办理之处，惟在该将军等悉心筹划，随机应变。总以如何办理得有便宜，即计定而行，不必过于拘泥遵旨也。

至现在贼势虽觉鸱张，究属乌合之众，全在设法解散离间，使其贼众互相猜疑，不攻自溃。若以一兵御一贼，则如闻大里杙、水沙连等处，竟有贼十余万，岂亦将以十余万官兵应之耶？况如此贼众，即束手就戮，亦非一时可了。若零星打仗，每次杀贼数十百人，何日始能竣事？前已节次谕令常青等，晓谕附从贼匪民人，令其投诚归伍，各安耕种。但恐该民人等未能尽皆晓谕，常青等此时竟当刊刻誊黄。以逆首林爽文等罪大恶极，于光天化日之下肆行不法，固属罪不容诛。至附从百姓，皆系国家良民，多有被贼用威迫胁，烧毁村庄，不得不隐忍听从。但伊等践土食毛，身被深仁渥泽，皆国家所养赤子，具有天良，何至甘心从贼。况贼匪势虽猖獗，止系一时乌合，现在于广东、浙江及福建本省，添调满汉官兵云集；又续于各省调拨劲兵数万，陆续前抵台湾；且于江浙、江西、湖广、四川等省，拨运米数百万石，帑项数百万金，源源接运；兵粮、火药富足宽余，即日大兵四集，么魔小丑，不过苟延残喘，自当指日歼除。伊等若执迷不悟，必至玉石俱焚，悔将何及？此时又何所顾忌，而不及早悔罪自新乎？为此通行晓谕所有附从民人等，各宜猛省。若能将贼首及有名头目擒缚献出，不但无罪，而且有功，即当予以重赏。并照从前投出之庄锡舍，赏给官职，得邀顶戴之荣。即不能擒缚贼匪，如果自行投出，归农入伍，无论曾经从贼与否，皆属于民，不特免其治罪，仍当奖赏伊等，既可保全身家性命，且得安业归

耕，粮食入伍。如此割切开导，令各处遍贴誊黄，或射入贼巢，通行晓谕，则从贼民人，自当纷纷投出。不但贼党可以解散，且使贼众彼此自相猜疑，生心内溃。官兵多得一人，贼党即少一人，于剿捕实属不战可胜之良策。常青、蓝元枚接奉此旨，即当妥速办理。一面仍奋勉攻击，不可坐视。如此剿抚互用，可期得力。

又据李侍尧奏酌补营兵一折，请分别提镇各营所辖，挑补十分之三、十分之二等语。所办未免拘泥。前已屡经有旨，令该督广行招募，多多益善，不必拘定额数。如恐经费不敷，即行奏请，再行拨解应用。现在正须多兵接应之时，内地亦当操防备用。李侍尧竟应设法招募，愈多愈妙。如果募得多兵，既可备拨军营，以助声势，即内地巡防调拨，亦为宽裕。著李侍尧接奉此旨，即广行添募，毋庸拘定原额。并著常青、蓝元枚，各就台湾处所，一体迅速招募。除义民乡勇尽可入伍外，即曾经被贼胁迫附从者，一经应募，不妨即令充伍，不必以曾经从贼过为区别，疑而不用，庶营伍愈为充实，贼党益见解散。

至蓝元枚自前月二十五日奏到后，至今尚未据续奏。想该参赞正在纠集义民熟番，合力攻剿，甚为得手，是以未暇陈奏。然朕则盼望捷音甚急。应将该处近日如何相机进剿，打仗得胜之处，并著蓝元枚速行驰奏，朕心昕夕盼望。柴大纪分兵救援盐水港，曾否将屯聚贼匪剿散，及常青如何筹办，定于何路会合进剿之处，并著随时加紧驰奏，以慰廑注。将此由六百里加紧各传谕知之。

钦此。遵旨寄信前来。

闽浙总督李侍尧奏闽省存营鸟枪

半属不堪使用折

乾隆五十二年七月十三日批 军录

闽浙总督臣李侍尧跪奏，为参奏事。

窃照鸟枪一项最为行军利器，案查闽省各营鸟枪，自乾隆四十二年起，赴台班兵及巡洋弁兵，有沉失共八百八杆，并有年久枪筒浇薄，膛口宽大，火机、火门销蚀，不堪适用者，共六千四百六十八杆。经前督臣雅德莅任后查明，即严飭各营修造，惟督标业经造补外，其余各营，因公费逐年支用无存，飭司议款修制，又因司库无项可动，遂至迁延日久，至今尚未补造。现这各营节次调兵前往台湾剿匪后，所有堪用之鸟枪，多已带往。其存营者，半属不堪。设或需用，贻误匪浅。查各营鸟枪沉失损坏，至七千余杆之多，又延至十年之久，竟不补造。理合据实参奏，请旨将历任之提、镇、将、备，交部分别严加议处，仍着落赔补。但俟追出银两后，始行制办，又致稽延时日。应请先行动项上紧修造，所有动用银两，容臣查明，各该员在任久暂，枪数多寡，分别追赔。（朱批：甚是。）至台匪滋事后所有军前节次遗失之鸟枪，约有二、三千杆，亦请先行动项制造，将来仍于各该营公费内撙节办理，陆续归款。是否有当，伏乞皇上睿鉴训示。谨奏。

乾隆五十二年六月二十九日。

乾隆五十二年七月十三日奉朱批：知道了。钦此。

谕内阁柴大纪奋勇出力著授为参赞

乾隆五十二年七月十三日 台湾档

乾隆五十二年七月十三日内阁奉上谕：福建陆路提督署台湾镇总兵柴大纪，自剿捕逆匪以来，督率官兵义民奋勇杀贼，一切调度深合机宜。著授为参赞，协同将军常青等悉心筹办，以期迅奏肤功。钦此。

钦差协办大学士福康安奏接

奉谕旨驰赴行在折

乾隆五十二年七月十三日批 军录

臣福康安跪奏，为恭折复奏，仰祈圣鉴事。

窃臣于六月二十七日，在横城堡接见哈萨木，二十八日照看起程，即回赴宁夏缘由，业经恭折驰奏在案。嗣臣查阅宁夏镇标营伍兼看渠工，初二日途次接奉廷寄谕旨：以台湾逆匪尚未剿除，令臣驰赴行在，预备差遣，并抄录廷寄粤东闽浙将军督抚诸臣谕旨，及常青、蓝元枚等奏折寄臣阅看。臣伏念逆匪林爽文等敢于光天化日之下，纠伙滋扰，抗拒官兵，罪大恶极，实堪发指。但究系么磨小丑，岂能久肆鸱张。因前此领兵提镇观望貽误，现在飭调官兵，又因远隔重洋，一时未能齐集，不免稍稍藏事，致烦宵旰焦劳，臣实不胜愤急。今臣阅常青等奏报情形，虽贼伙蚁聚较多，而官兵仍屡有克捷，果能遵奉睿谟，相机调度，奋勇歼擒，或

此时业经告蒞，亦未可定。就使匪徒凭险恃众，尚延残喘，今已添调多兵，指日云集，协力剿捕，自必克期竣事，上慰圣怀。至臣受恩深重，倍应奋勉出力，图报涓埃。前在京时即值台湾滋事，彼时贼匪情形未为猖獗，计其较易歼除，是以未敢奏请。迨出京回任以来，时时询访探听，又接阅邸抄，自常青渡台后，钦遵指授机宜办理，颇似得手，正在颺盼成功，兹复有添兵之请，仰廛宸衷。臣更当竭力奋勉，稍效犬马。唯念臣年轻识浅，未经历练，前在军营仰赖圣主福庇，禀承睿训周详，幸免貽误，实不敢自信能娴军旅。今接奉谕旨，弥切兢惶，惟有加紧趲程行走，驰赴行在，期于早得瞻仰天颜，恳求训示。惟是甘省民情愚蠢，易于生疑，见臣匆遽遽行，恐致摇惑。是以臣于迅速之中，仍示以镇静之意，（朱批：是。）钦遵圣谕，将此事秘不宜露，只称奉旨令于万寿圣节之前，赶至热河，以补扈从木兰，是以急急起程。俟途间接遇勒保交篆，将甘省地方情形详悉告知，倍道星驰前进，计日即可瞻觐慈颜，或届期尚未蒞事，所有一切机宜，面奉圣明指示，驰赴军营，勉竭愚弩，实力实心，相机督办，谨将臣在途接奉谕旨迅速行走缘由，先行恭折由驿六百里复奏，伏乞皇上睿鉴。谨奏。

乾隆五十二年七月初三日。

乾隆五十二年七月十三日奉朱批：亦不必过于急驰，余俟面见后有旨。钦此。

谕内阁著户部酌拨银一百万两解闽

乾隆五十二年七月十三日 台湾档

乾隆五十二年七月十三日内阁奉上谕：台湾现在剿捕贼匪，

尚未竣事，所有军需一切费用繁多，著户部于附近邻省内，酌拨银一百万两，令该督抚等派员解赴闽省，交与该督等存贮备用。钦此。

福建水师提督蓝元枚奏鹿港

兵力不敷酌请添兵折

乾隆五十二年七月十五日批 军录

奴才蓝元枚跪奏，为酌筹鹿港情形，恳请添兵，仰祈圣鉴事。

窃奴才筹度鹿港一切情形，业于六月初四日恭折奏闻在案。现在鹿港民情，经奴才再三晓谕，所有义民人等，俱皆感奋，各愿随从官兵守御进剿。但鹿港四面受敌，而贼匪恃众负隅，竟敢屡来侵扰。本月初五日，贼匪数千来犯二林庄。十一日贼匪数千分路来犯埤头、茄冬沟等庄。见官兵义民赶到应援，随即散去。如此出没无常，防备恐难周密。（朱批：但言防备，何时得灭贼，究以大力灭首为是，有旨令常青带兵北来，尔等会商，擒灭首林爽文，则其余易于办理，勉为之。）又彰化、淡水交界之大甲溪、岸里社，系在大里杙之北，现亦被贼攻扰，若彼处一失，贼匪便可长驱，直至竹塹，断绝上游粮道。据熟番义民来报，奴才拨护游击潘国材等，带陆提标并延平等营兵六百名，由海道前去堵御，并饬副将徐鼎士酌拨官兵，协同守御，兼牵缀贼势，以为诸罗声援。奴才筹计兵力，除不服水土患病各兵外，仅敷堵御应援。而诸罗、府城道路阻隔，若贼匪四面来侵，必须分路痛加追杀，兵力未免不敷，况鹿港最为要地，尤当计出万全，合无仰恳

皇上天恩，再调福建兵二千名，广东兵三千名（朱批：已有旨了）前来鹿港，以备剿捕。再，将军臣常青现在台湾府城，道路阻隔，不能会銜。奴才谨将兵力不敷，恳请添兵缘由，恭折具奏，伏乞皇上睿鉴。谨奏。

乾隆五十二年七月初三日。

乾隆五十二年七月十五日奉朱批：即有旨谕。钦此。

福建水师提督蓝元枚奏近日战况片

乾隆五十二年七月十五日批 军录

奴才蓝元枚跪奏。

奴才接据镇臣普吉保报，先于四月二十六日奉将军常青调令，带兵一千名前赴诸罗、大埔林地方，与镇臣柴大纪订期会攻斗六门贼匪。因到地探闻贼首林爽文回彰化，又据鹿港营盘副将林天洛等具禀，四月二十八日辰刻，贼匪数万分路围攻鹿港、马鸣山营盘。经该副将等督兵堵御，施放枪炮，中毙贼匪多名，割获首级五颗，夺获炮械多件。又据护参将马元勋禀称，同日辰刻有贼众万余，拥攻埔心，官兵分路迎敌，施放枪炮，打死贼匪甚多，割取辫子八个，夺获半斩刀、长枪等械。查有福协左军千总林孝龙，把总陈镐带兵追赶，（朱批：此二人何往？）不意贼匪埋伏沟内，突然拥出，冲击队伍，各官兵御敌，至杀退贼匪，查明阵亡兵丁七名，失去行营炮二位，鸟枪四杆，腰刀七口，并称贼势汹涌，普吉保随与柴大纪会商，一面具禀将军臣常青，一面撤兵起程，各回保守地方。续又据副将林天洛禀报，五月初一日，贼匪复出肆扰，官兵奋力堵杀，枪炮伤毙贼匪甚多，并夺获

鞭炮、钩镰、长枪、竹钟，生获贼犯王力、廖应魁、邱永，押交彰化县审讯等情。普吉保随撤兵，兼程于五月初六日回港。奴才查普吉保撤兵，仍回鹿港，经业稟请将军臣常青核奏，是以奴才前次折内未经附奏。兹镇臣普吉保接承将军臣常青札开，护参将马元勋不能预防之处，姑念从前颇属奋勇，暂饬记过，并加申饬。又生擒贼匪王力等三犯，经县讯明确，应送奴才蓝元枚审明正法。奴才查贼犯王力先据彰化县知县宋学灝详报，该犯刀伤深重，审明后即经病故，其邱永，廖应魁二犯，经奴才复讯，并未受贼伪职，供认随贼打仗不讳，当恭请王命正法示众。奴才合将据报及办理情形附片奏闻。

乾隆五十二年六月十三日。

同日^①奉朱批：览。钦此。

福建水师提督蓝元枚奏赴彰化攻杀情形片

乾隆五十二年七月十五日批 军录

奴才蓝元枚跪奏，为遵旨复奏事。

六月十八日奉到上谕：蓝元枚抵鹿仔港，当会合普吉保整顿兵力，将斗六门、大武陇等处贼匪搜捕净尽，以便常青由南路统兵而来，遄行无阻，等因。钦此。钦遵。窃照奴才于五月初七日配船，二十日到鹿港，访知贼匪聚集柴坑仔、大武郡一带，离马鸣山营盘十五里，离鹿港二十五里，势甚猖獗。奴才随于二十四日亲带官兵至彰化北门，遇贼攻杀，追至柴坑仔、大武郡、渡船

^① 指乾隆五十二年七月十五日。

头，将三庄贼巢烧毁。枪炮打毙贼匪约五六百人，生擒贼匪二人，并获大炮、鸟枪、挑刀。所有攻剿情形，业于二十五日奏闻在案。嗣又探闻自五月初七日起，贼匪陆续焚抢诸罗县属沿海之安溪寮、龙船窝、铁线桥等庄，计二十余里，以致诸罗、彰化道路阻隔。六月初五、十一等日，贼匪数千来犯彰化属之二林、埤头等庄，经官兵杀退。但鹿港四面受敌，兵力未免不敷，仰恳皇上天恩，再调福建兵二千名、广东兵三千名，以备剿杀。（朱批：即有旨发兵，但到尚须时，此际岂可坐待！）业于六月初四、十三等日将调度及恳请添兵情形，恭折具奏在案。奴才又闻六月初九、初十等日，贼匪专攻罗属之鹿仔草庄。查鹿港至斗六门六十余里，至诸罗九十余里，沿途皆有贼匪屯聚，又兼东螺溪、西螺溪一带，溪水涨满，官兵未能直达。奴才是以亲率官兵，由鹿仔厝及中寮二路攻杀大肚、王田等贼庄。枪炮打死贼匪约五、六十人（朱批：汝等每称贼即有数万，所杀每不盈百，何足慰朕怀耶？）官兵俱无伤损，惟乡勇淹毙二名，被伤刀炮八名，业经奴才酌量赏恤。侦探诸罗贼匪于十七、十八等日陆续赶回，保守大肚溪，谅此时诸罗贼势自应减少。奴才现在整顿兵力，一面遣人由海道持扎密商柴大纪，定有日期，奴才即亲带官兵，由东螺、西螺、土库等处攻杀，至斗六门会剿贼匪。（朱批：此举是略见奋勇。勉为之。）奴才荷蒙皇上逾格殊恩，授为参赞，惟有奋不顾身，剿尽首伙逆贼，俾获稍酬高厚于万一。所有奴才调度剿贼情形，理合恭折复奏，伏乞皇上睿鉴。谨奏。

乾隆五十二年六月十九日。

乾隆五十二年七月十五日奉朱批：即有旨谕。钦此。

諭欽差湖廣總督常青等南北夾攻切勿株守

乾隆五十二年七月十五日 台灣檔

大學士和，字寄欽差湖廣總督將軍常、閩浙總督李、福建水師提督參贊藍、陸路提督參贊柴、兩廣總督孫，乾隆五十二年七月十五日奉上諭：

據藍元枚奏酌籌鹿港情形，懇請添兵一折，內稱賊匪于六月初五、十一等日，屢次侵擾鹿港之二林、埤头等庄，防备恐難周密。又彰化、淡水交界之大甲溪、岸里社，現亦被賊攻擾，已撥護游擊潘國材等帶兵六百名，由海道前往堵御，并飭副將徐鼎士酌撥官兵，協同守御，以為諸羅聲援。現存鹿港兵丁不夠進剿，請再調福建兵二千名、廣東兵三千名，接濟鹿港等語，已于折內批示矣。昨據常青等奏到南路賊匪攻擾情形，已指示一切機宜，令該將軍、參贊等，不必株守一处，相機會合進剿。今據藍元枚所奏，淡水一带，亦有賊滋擾。若大甲溪等处有失，則賊匪便可直至竹塹，斷絕上游糧道。現經藍元枚派撥官兵前往堵御，而鹿港既分兵力，益覺單弱，自應添兵接應。前已有旨，令李侍堯將添調廣東、浙江滿漢兵一万一千名內，撥粵兵二千名與藍元枚。又據李侍堯奏，預備漳州有眷屬兵二千，未經調用。亦有旨，令該督派赴鹿港，是添調兵丁已有四千。藍元枚此次發折時，想尚未接到前旨。其閩粵兵四千，此時自己陸續前抵鹿港。今該參贊既請添兵五千，著孫士毅再于廣東挑撥兵一千名，速赴閩省。再，漳泉一带，今歲缺雨，收成歉薄，民人不無失業。并著李侍堯即于漳泉等处，速行招募兵一千，既可接濟調撥，而失業貧民又得

食粮充伍，不至为匪。合之前调粤省应拨鹿港兵二千，及漳州兵二千，已共有六千名。李侍尧酌量情形，如现在添调粤兵一千，先到厦门，即将粤兵先行拨赴蓝元枚处。若漳泉召募之兵，于粤兵未到之前，业经招募齐集，即将募兵一千，拨往鹿港应用。总以何处兵丁先得，即以一千名先尽蓝元枚，以足所请添兵五千之数。其余一千，若由鹿港再赴淡水接应徐鼎士，未免迂远。著李侍尧即由五虎门配渡，竟赴淡水，接济徐鼎士。所有此次续调粤省兵一千，并著传谕孙士毅，妥协派拨，愈速愈妙。再，据蓝元枚奏，四月二十六日，即探闻逆首林爽文潜回彰化。今据蓝元枚奏称，鹿港四面皆有贼众滋扰，而彰化、淡水交界大甲溪等处，又有贼屯聚。昨常青又奏，贼众在桶盘栈等处围绕大营，实有不能移动之势等语。看来，贼匪南北四出扰攘，意在牵缀官兵。而常青、蓝元枚等堕其术中，竟有应接不暇之势。从来用兵之道，合则势盛，分则势弱。今贼首林爽文、贼目庄大田等，明知重兵俱在常青、蓝元枚两处。而林爽文则牵缀北路，贼目庄大田牵缀南路，令其伙党匪众，四出焚劫滋扰，使我兵分投堵御，奔走不暇，贼匪得以乘间蹈隙，将南北两路紧要各港社隘口，任意抢占，往来无忌，使官兵道路阻隔，信息不通，而贼势转得联络。狡计显然。乃常青等为其所愚，止知结营自守，分兵防备，遇贼匪击东应东，击西应西。譬之奕棋，使贼人著著占先，通联一气，而官兵止办接应，并无制胜之策，转致纷纷抵御，疲于奔命。若似此与贼相持，即使贼匪不能侵軼，而我兵亦不能进取，株守坐待，何时方可竣事？朕意此时南路凤山，不过一隅，常青等又不能往南进取，只驻守城外跬步之地，纷纷堵御，必致师劳力疲。况计此时前调之兵早到，常青等趁此生力官军，竟应遵照前旨，于镇将中，如梁朝桂、蔡攀龙之奋勇可恃者，令其会同道府，固守营盘

府城，牵缀贼势，自足抵御无虞。该将军等究宜统领大兵，带同侍卫、章京、将备等，舍南趋北，与柴大纪会合，蓝元枚亦应令普吉保留守鹿港，该参赞即带兵由北而南，前往诸罗，与常青、柴大纪会合一处，使我官兵声势联络，军威壮盛。其间阻隔屯聚贼众，即可顺便乘势剿杀，使南北道路相通。侦探林爽文现在何处，即以大兵全力前往搜捕。但能将渠魁擒获，则其余贼目，如庄大田、陈泮、吴领等，自无难迎刃而解，势成破竹。即使林爽文穷蹙窜入内山，而贼目匪伙失其首逆，势必纷纷奔溃。彼时我兵将贼党痛加剿洗，乘此得胜兵威，再向生番令其献出。想逆首林爽文，即有翼亦无可遁也。此乃擒渠制胜之策，该将军等当勉力，相机筹办，不可坐失事机。前此黄仕简、任承恩即以因循观望，以致老师糜饷。今常青等亦不免为贼牵缀，徒事因循。若再旷日持久，必致师老力疲，何时始能集事？况如该将军等所办，分投堵御，止知自守，即与以百万之师，而零星派拨，处处分防抵御，亦总不能得力。断不可不急思变计改图，以期出奇制胜。况现在添调各兵，俱系生力，正当乘其新到锐气，及锋而用。若再因循，又致疲弱，仍与不添无异。且与贼人以暇，令其生心，殊为失策。常青、蓝元枚于统兵前赴诸罗时，若能将被贼占据通海各港社要隘处所攻得，不妨酌留将弁，带兵驻守。总应以全力会合一处，捣穴擒渠，此为最要。至常青等，如带领官兵前往北路，兵力较分，且台湾府城系编竹为垣，难于捍卫，应遵前旨，将营盘酌量收小，妥设防卡，便于照应，更可期保固无虞。

又节次降旨，令常青、蓝元枚，各就近于台湾鹿港等处，广为招募。毋论从贼与否，一经应募，投到即令食粮充伍。此固为增添兵力，解散贼党之计。但贼匪狡狴异常，其自行投到者，难以

尽信，不可不留心防备。其中如有家属尚在内地，及随营打仗一二次，察其情形，实能出力者，方可信用。若乍行投到，并无根绊者，不可轻信。当择素能管束兵丁之将，备令其统辖，或分隶各营，令官兵暗中箝束，庶可免肘腋之患。此为最要。该将军等务须随时稽察，设法防范。

至北淡水一路，现既有贼匪滋扰，蓝元枚应飭令副将徐鼎士，加意堵御，奋力剿杀，毋致稍有疏虞。再，蓝元枚前次差弁，纠约大甲溪等处义民熟番，合攻贼巢，自己早得回信，何总未据该参赞奏及？又据蓝元枚奏，前次贼匪攻扰埔心庄时，有千总林孝龙、把总陈镐，带兵追赶，被贼匪埋伏沟内，突出冲击，经官兵抵御，杀退贼匪等语。其林孝龙、陈镐二人，究在何处，是否回营，抑系阵亡，则宜恩恤，折内未经叙明。并著蓝元枚查明具奏。再，现在贼匪四出滋扰，沿海口岸俱有贼船潜伏，内地解往台湾等处粮米、饷银、火药、铅弹等项，及渡台接应兵丁，关系最为紧要。并著李侍尧严飭文武委员，加意小心防范。并令沿海巡查各员弁实力巡察侦缉，勿致藉寇兵而资盗粮，方为妥善。

本日未刻，又据蓝元枚奏到六月十九日拜发一折，内称六月初九、初十等日，贼匪专攻诸罗之鹿仔草庄。又鹿港至斗六门六十余里，至诸罗九十余里，沿途皆有贼匪屯聚。蓝元枚亲率官兵，由鹿仔厝攻杀大肚、王田等贼庄，枪炮打死贼匪约五、六十人。侦察诸罗贼匪，于十七、八等日，赶回保守大肚溪。现在札商柴大纪，定有日期，即亲带官兵，由东螺、西螺等处攻杀。至斗六门会剿贼匪等语，亦于折内批示。该参赞所请添兵五千名，现已有旨如数发往，但到彼尚需时日。蓝元枚此时岂有株守坐待之理？况该参赞等每次所奏，动称贼有数万，而所杀之贼，不满百人，并不能

痛加剿戮，何足以慰朕怀？今蓝元枚侦探诸罗贼匪已陆续赶回保守大肚溪，是此时诸罗贼势已为少减。蓝元枚约会柴大纪订期亲带官兵，直趋斗六门奋力攻剿。此举略见奋勇，自应如此办理。至常青亦应遵照前旨，于镇将内酌派奋勇可恃者，会同道府，留兵驻守，将府城营盘防守事宜料理妥协，竟统领大兵，自南而北，径赴诸罗，会同柴大纪夹攻斗六门。该处既有蓝元枚一路为之先驱，且柴大纪接到蓝元枚札会，自必带兵前赴斗六门会剿。彼时常青、蓝元枚、柴大纪合兵一处，声威壮盛，即应将屯聚各要隘之贼匪，悉力歼除，擒拿贼首林爽文，则其余贼匪自必奔溃瓦解。该将军、参赞等，务须同心协力，深入长驱，勉图奏绩，朕听夕盼望捷音之至。

又蓝元枚前奏，差弁往约大甲溪义民熟番，会攻大里杙之南，自己早得回信，何以两次折内并未奏及？其所差该弁，究于何时回至鹿港，是否已经订期会攻，并著蓝元枚一并迅速复奏。将此由六百里加紧各传谕知之。并著常青、蓝元枚，将现在如何筹办，是否定计会合进剿，及府城、鹿港、淡水各要隘如何堵御剿杀，打仗得胜情形，迅速驰奏。柴大纪于诸罗、盐水港一带，连日如何剿散贼匪，打通粮路，于何日带兵前往斗六门会剿；又前调浙粤各兵及漳州兵，李侍尧于何日配船开驾，分拨常青、蓝元枚两路接应之处，一并六百里加紧迅速驰奏，以慰廑注。

钦此。遵旨寄信前来。

諭閩浙總督李侍堯妥速募兵并令

澎湖弁兵就近渡台

乾隆五十二年七月十六日 台灣檔

大學士和，字寄閩浙總督李，乾隆五十二年七月十六日奉上諭：

昨據藍元枚奏，鹿港之二林、埤头等庄，及彰化、淡水交界處所，俱有賊匪攻擾，懇請添兵五千一折，已諭令該督在漳州募兵一千，并令孫士毅再撥粵兵一千，合之前調粵省應撥鹿港兵二千，漳州有眷屬兵二千，共有六千。先盡五千名撥赴藍元〔枚〕處接應，其餘一千名，即令該督徑由五虎門配渡，撥赴淡水，以助徐鼎士防守之用。李侍堯務須妥速召募，即行分撥。至粵省及漳州兵，應撥往藍元枚者，該督究于何時先后配渡，未據奏及，著即將何日可抵鹿港之處，迅速復奏。

再，節據常青、藍元枚奏，盐水港、笨港、麻豆社等處，俱被賊匪焚毀村庄，斷絕糧路。并據李侍堯亦據地方官稟報，將賊匪滋擾各港社，并押去海邊船只情形具奏。該處社港，為米糧販運通衢。今被賊匪搶占，且押去海邊小船，又將在海口一帶滋擾，所關甚重。已節次諭令常青等，務將各港社屯占賊匪，迅速剿散，打通道路為要。今披閱台灣全圖，澎湖一處，正与笨港、盐水港、鹿仔草等處相對，且相距不远，俱有港口可通。現在常青、藍元枚兩處，酌辦剿賊，无暇前往各港社痛加剿殺。虽據常青、柴大紀各派官兵前往攻剿，恐不能得力。今澎湖既相距甚近，該處原駐有官兵，李侍堯自應飭令駐扎澎湖將弁，帶兵就近

配渡，前往鹿仔草、笨港、盐水港一带，接应会攻。如澎湖驻守兵丁为数不多，该督亦应于内地抽拨官兵，由澎湖前往协剿，庶内外夹攻。屯踞各港社贼匪，自可迅速剿散，肃清道路，使官兵声势联络，于剿捕机宜方为有益。况贼匪既占踞沿海各港社，保无滋扰澎湖之事，亦应预为筹备。常青、李侍尧、蓝元枚等，总未言及此。今因观图，甚为廛念。将此由六百里加紧传谕李侍尧，并将图内澎湖、鹿仔草、盐水港、笨港一带绘出，发交阅看，酌筹妥办。仍著李侍尧将如何派拨办理情形，迅速复奏。常青等正令合兵剿贼，无暇及此，故未传谕。

钦此。遵旨寄信前来。

两广总督孙士毅奏遵旨添派

征兵催趲赴台折

乾隆五十二年七月十七日批 军录

两广总督臣孙士毅跪奏，为遵旨添派征兵催趲赴台会剿，先行恭折奏复事。

窃臣钦奉上谕：常青等请再调京兵一节，今粤省已据常青等咨会孙士毅，调兵四千名。该省原有预行挑备兵二千，前后共兵六千。著孙士毅即行拣派速往，等因。钦此。伏查臣于六月初八日接准常青等知会，先遣粤兵二千名，由厦赴台，随后再备兵二千名，候奉谕旨，等因。适臣先有抽拨贴防潮州沿海一带兵二千名，分驻附近各县，即日调集黄冈，已于六月初十日起，分作四起，点验起程。六月十三日，即全数入闽省诏安县境。当经由驿奏闻在案。业据领兵将弁禀报，已于六月中旬陆

续抵厦，此时应已全数到台。

至续调二千名，臣已飞翼严催，内督标及增城、惠来等营一千名，七月初五、六等日即可出境。右翼镇标一千名，距潮较远，七月二十日外亦可点送赴闽。所有现在奉旨添调之二千名，因计期稍后，臣尤加紧飞调，并于营分略近者，量为抽拨足数，计程月杪、月初，亦可由黄冈出境，听候李侍尧分拨厦门、蚶江两处，配船东渡。臣惟望粤兵早一日到台，即早收一日之效。一切军装器械及铅弹火药，并裹带一月口粮。臣前此恐闽省军营续有征调，俱预为密饬部署，一俟檄调文到，各该营均可即日起程。查总兵内左翼镇李化龙曾经出师金川，赏戴花翎，臣即遵旨派委统领。其余带兵将弁，俱挑选谙练勇往，并有曾经打仗、赏戴花翎者。合前次带兵数起而论，凡粤东将弁曾经出兵者，此时俱已派往台湾。谨另缮清单，恭呈御览。至驻防兵一千五百名，想日内存泰、博清额亦已钦奉谕旨，会同图萨布挑选停妥，不日即可启行。臣仍一面星飞咨会，一面派员驰往前途弹压，到潮毋许稍有滋事。臣即驰赴黄冈，妥协照料出境。合将遵旨挑派催趲起程各缘由，谨会同提臣高瑑，由驿五百里先行复奏。仍俟全数出境后，再行专折迅速奏闻，伏乞皇上睿鉴。谨奏。

乾隆五十二年七月初三日。

乾隆五十二年七月十七日奉朱批：所办甚速，可嘉。钦此。

谕两广总督孙士毅再速拨兵一千名赴闽

乾隆五十二年七月十七日 台湾档

大学士和，字寄两广总督孙，乾隆五十二年七月十七日奉

上谕：

据孙士毅奏，遵旨添派征兵催趲赴台一折，内称前接常青等知会，添调兵丁，当将预备在潮兵二千名，点验起程。已于六月中旬陆续抵厦，此时已可全数前抵台湾。至续调兵二千名，七月初五、六日即可出境。现在奉旨添调二千名，计月杪月初亦可出境，已派委总兵李化龙统领，并挑选曾经打仗之将备分带前往等语。所办甚为迅速，实属可嘉，已於折内批示。昨据蓝元枚奏，鹿港之二林、埤头等庄，及彰化、淡水交界地方，俱有贼扰，恳请添兵五千一折，已降旨谕令孙士毅再于粤东挑拨兵一千名，速行派赴闽省，听候李侍尧拨赴北路军营应用。该督务须于附近营分内，量为抽拨，妥协派往，愈速愈妙。

又孙士毅另片奏称，接到李侍尧知会，台湾需用洋钱，即于盐课项下，拨银四十万两，易换洋钱，分起解闽应用等语。台湾况需用洋钱，自应迅速筹办解往，以应要需。该督于接到闽省咨会后，即拨银易换通融，如数拨解，所办亦属妥协。至孙士毅现在驻扎潮州，且因照料官兵出境，驰赴黄冈。该处与闽省较近，声息相通。现在台湾剿贼情形，该督自必有所闻知。并著得有何信，即行随时速奏，以慰廑注，不必以劳驿马为念。将此遇报传谕知之。

钦此。遵旨寄信前来。

闽浙总督李侍尧奏调兵赴台折

乾隆五十二年七月十八日批 军录

闽浙总督臣李侍尧跪奏，为奏明事。

窃臣于本月初三日接奉六月十九日廷寄谕旨：飭调浙粤两省驻防满兵三千，粤兵六千，及臣所预备之本省兵二千，共符常青所请一万一千之数。内以九千赴常青处，二千赴蓝元枚处，等因。钦此。仰见圣明默运，筹划周详，既符常青所请之数，而就近省调发，不致时日稽延，兼免征兵数省，徒骇听闻。又于此内分兵二千，往蓝元枚处，以资接济。是南北两路，无一不在睿谟筹虑之中。查闽兵二千已于前月十九、二十等日俱到台郡。粤兵先来之二千，于前月二十四、五等日放洋，计目下应亦到齐。自浙入闽一路，前因常青奏请京兵，臣已令各站预备。今仅浙省驻防满兵一千五百前来，一切过兵事宜，自可无误。其自粤入闽一路，亦俱有历次章程可循照。臣现驻厦门就近料理催趲，均可不致稽迟。至奉旨分兵二千前往蓝元枚军前之处，若论道里，则浙省满兵到泉州，即可由蚶江配渡。但该提督系汉人参赞，而永庆系满州将军，同在一处，恐不得臂指相使之用。臣拟令永庆带满兵越常青处，（朱批：甚是，周到之极。）俟粤兵来时，分拨二千往鹿仔港，似觉两处俱呼应得灵，较为有益。惟是该提督昨寄来折稿，亦有请添闽粤兵五千之奏。今增兵二千，似尚不敷所请之数。臣前奏明漳州镇兵独未调用，因该提督系漳人，是否漳人统漳兵，可以得用之处，札询该提督去后。兹于本月初四日接据札称，漳镇兵内，平和、漳浦二营，难保无会匪在内。其诏安、云霄二营兵，最为勇健得用。镇标中、右二营，及城守、同安二营，亦俱可得力，保无他虞。倘得此等兵五千，不独可以御贼，即相机进剿，似亦不难等语。该提督系本地人，自必确有所见。是以臣即照伊所指营分，咨会常泰。（朱批：好。）前因漳州地方紧要，故未调用。今办过抢劫、械斗等案之后，人心渐已宁贴，是以续有调发。如此行文，庶以释该地猜疑，而密令常泰挑取有家眷

之兵二千名，克日前往，以资应用。查南路贼匪既多，若俟常青由南而北，正需时日。今该提督增此闽、粤兵四千，可不必要常青南来会合，即进捣贼巢。庶于剿灭逆匪，较可迅速。臣以贼势日益蔓延，看来必须南北并举，以期军务早竣一日，即可早慰圣心一日。是以增调漳兵前往协力，谨缮折驰奏，伏乞皇上睿鉴。

乾隆五十二年七月初五日。

乾隆五十二年七月十八日奉朱批：即有旨谕。钦此。

谕钦差湖广总督常青等切勿株守
分兵零星打仗

乾隆五十二年七月十八日 台湾档

大学士和，字寄钦差将军湖广总督常、闽浙总督李、参赞提督蓝、提督柴，乾隆五十二年七月十八日奉上海谕：

据李侍尧奏，闽兵二千，已于前月十九、二十等日俱到台湾。粤兵先来之二千，于前月二十四、五日放洋，计目下应已到齐。其蓝元枚处应拨兵二千，俟粤兵到时，再行拨往。再，前备漳州兵，接据蓝元枚札复，即照所指营分令常泰挑取有眷属兵二千名，克日前往等语。所办尚属周到，已于折内批示。至常青处，已节次指示机宜，谕令舍南趋北，与蓝元枚、柴大纪会合一处，擒拿贼首林爽文，则其余伙党自必纷纷奔溃，易于歼除。即或窜往内山，亦可趁得胜兵威，令生番等缚献。今常青处，又有续到闽粤兵四千名，兵力更为厚集，正当乘其新到锐气，及锋而用。况府城于未添大兵以前，即已保护无虞。此时若因南路贼匪四出滋扰，分投堵御，零星打仗，何日始能进剿？况兵力合之则

见多，析之则见少。若东分西拨，即以万余兵而论，不为不多。而分作五处、十处，即每处不过一、二千人，仍形单弱。且绿营怯懦习气，动称贼有万余及数十万，试思贼匪虽肆行勾结，到处逼胁，亦不过台湾地方一处。民人况又未必尽皆从贼，又何至各处贼匪动有数万，且贼匪若果如此之多，又何所得食？岂贼人亦有钱粮散给之耶？此乃事理之显而易见者。该将军等岂可坐待株守，以一兵御一贼之理？自当遵照前旨，将营盘酌量收小，派员固守，常青等竟统领大兵，直越北路，前往诸罗会合柴大纪，廓清沿途贼匪，夹攻斗六门。蓝元枚处，现在已据李侍尧派拨漳州兵二千，其续调粤省兵二千，亦当陆续前赴鹿港。该参赞亦当令普吉保留守鹿港，亲自领兵由北而南，与常青、柴大纪会合一处，使我兵声势联络，军威壮盛，以全力擒拿贼首林爽文，但能将渠魁擒获，则其余贼目伙党，自无难迎刃而解，以成破竹之势。该将军、参赞等，务须勉力相机筹办，不可徒为贼所牵缀，以致师老力疲，坐失事机，此为最要。再，据李侍尧奏，贼势日益蔓延，必须南北并举，以期军务早竣等语。此等贼匪，不过乌合之众。总因官兵与贼相持，旷日持久，转与贼人以暇，以致处处牵掣我兵。若办理得其要领，贼匪焉能日聚日多，肆行屯聚？且该督称贼匪蔓延之语，亦系绿营恇怯讹传，从何而得，所指何处，并著李侍尧据实复奏。将此由六百里加紧各传谕知之。仍著常青等将现在如何定计会合进剿打仗得胜情形，迅速驰奏。至蓝元枚前奏札会柴大纪，订期由东螺、西螺等处攻杀至斗六门会剿贼匪。该参赞曾否与柴大纪约定日期，会兵攻剿，打仗得胜，及各港社占据贼匪，曾否剿散打通粮路之处，并著该将军、参赞等，一并由六百里加紧迅速驰奏，以慰廑注。

钦此。遵旨寄信前来。

江西巡抚何裕城奏准札调拨

火药业已解闽折

乾隆五十二年七月十八日批 军录

江西巡抚臣何裕城跪奏，为奏明事。

窃臣接准福建抚臣徐嗣曾札称：台湾军营需用火药，虽已于浙江、广东二省调拨协济，但有续调官兵，必须宽为筹备。江西省是否现有存贮火药，堪以拨济等因。臣查军营火药，关甚紧要。臣已在各营额备火药内，酌提六万觔（斤），装贮完固。臣诣局点验明白，派委员弁领解，即于七月初十日自省城接续起程，由陆路入闽省之崇安县，解送前进。一面札复徐嗣曾，并飞咨闽浙总督臣李侍尧，派员接收，交局应用。所有臣准札筹备火药解送缘由，理合恭折由驿奏闻，伏乞皇上睿鉴。谨奏。

乾隆五十二年七月初九日。

乾隆五十二年七月十八日奉朱批：知道了。钦此。

钦差湖广总督常青等奏加派

官兵应援诸罗折

乾隆五十二年七月二十日批 军录

臣常青、臣恒瑞跪奏，为加派官兵应援诸罗，恭折奏闻事。

窃臣等于六月十四日接据柴大纪等会禀，连夜派令总兵魏大

斌、副将詹殿擢等，带兵一千五百名，由水道至盐水港，前赴诸罗，经臣等于十六日具奏在案。至二十三日，臣等拜折时，尚未据魏大斌回报。正在盼望间，旋接现驻盐水港之游击杨起麟禀称：十七日魏镇等带兵至盐水港，因盐水港兵单，留都司罗光焰带兵五百名在港防御，魏镇即带兵前往诸罗一带剿捕等语。随又接据魏大斌来禀，职等领兵于十七日到盐水港，贼匪暂退，即到鹿仔草扎营，于十八日同副将詹殿擢、游击邱能成、武举陈宗器等，带领官兵义民至埔心、大崙等庄，与贼打仗。自巳刻至未刻，施放枪炮，打死贼匪不计其数。詎料四面贼庄群起蜂拥，竟有万余，将前后官兵围住。官兵施放连环枪炮，奋勇抵敌，至申刻杀出重围，收回鹿仔草营盘。所有受伤及阵亡官兵义民，俟查明另报，乞迅拨员弁领兵赴援会剿。又于二十五日接魏大斌续禀，报明十八日打仗，阵亡把总麦逢春、武成烈、刘联升，额外〔外委〕包定邦四员，阵亡兵丁六十六名，受伤游击邱能成，守备蔡国忠二员。受伤兵丁十一名，未知存亡千总黄殿臣，把总陈世栋、陈彪三员。未知存亡兵丁二百二十一名，阵亡义民四名各等情前来。臣等接阅之下，不胜愤懣。查鹿仔草距诸罗二十五里，该镇等自应预先通知柴大纪，内外应合，则攻打较易，何至多损弁兵。而军火器械，又未声明，料所失亦复不少。但柴大纪等自初十日会禀请援之后，至今尚无文报。则现在贼势充斥，阻隔音信，自属实情，急需添兵前往。臣等当派拨游击田蓝玉带兵一千名，即于二十六日仍由水道飞赴鹿仔草，随魏大斌并力攻剿，速达诸罗，统听柴大纪调遣。并饬魏大斌到诸罗后，与柴大纪悉心筹划。一面保固县城，一面将盐水港、鹿仔草一带防守。务令自县至郡，可以互为声援。除俟得有该镇将等前抵诸罗，合兵剿贼胜仗，星驰奏报外，所有加兵应援缘由，谨恭折具奏，伏

乞皇上睿鉴。谨奏。

乾隆五十二年六月二十六日。

乾隆五十二年七月二十日奉朱批：著著皆错，即有旨谕。钦此。

钦差湖广总督常青等奏山猪毛战况片

乾隆五十二年七月二十日批 军录

再，六月二十一日接据参将瑚图里、都司邵振纲禀报，二十日自山猪毛带兵六百余名，广东义民一千四百余名，由小路翻山至南潭来攻贼匪，临时恳求接应等语。臣等于二十二日黎明，派令革职参将那穆素里前往哨探，（朱批：尔等何不以大兵前往？）复派令翼长乌什哈达、都司杭富、参将特克什布，带兵五百名前至二层溪山脚下接应。约至巳刻，那穆素里回报，参将瑚图里、都司邵振纲已到前面山岗不远，甫经下山，贼匪四出。乌什哈达等将队伍排开，贼匪见有官兵接应，登即远散退去。参将瑚图里、都司邵振纲见贼惧退，趁势带同官兵义民向前追赶。广东义民奋勇争先，现擒获贼匪陈顺等五名。臣等查山猪毛汛与广东庄相连，贼人数次侵犯，俱被官兵义民打退。又官兵前经被困数月，并无粮饷，俱系广东义民助粮接济，实属义勇可嘉。臣等随面加奖励，酌赏六品顶带贡监生员周敦纪等九人，八品顶带民人曾秀等十三人，又每名赏银二两者九十名，赏银一两者一千二百八十二名，仍照士兵例给与口粮盐菜。其瑚图里、邵振纲所带兵，亦准分别补给粮饷盐粮（菜），以示鼓励。至山猪毛汛现有把总叶琪英带兵五百余名，同义民防守。所有参将瑚图里、都司邵

振纲带同官兵义民来营缘由，谨附折奏闻。谨奏。

乾隆五十二年六月二十六日。

同日奉朱批：所奏亦不明，即有旨谕。钦此。

谕钦差湖广总督常青等将剿捕及

会同柴大纪合攻之处速奏

乾隆五十二年七月二十日 台湾档

大学士和，字寄钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年七月二十日奉上谕：

据常青、恒瑞奏，加派官兵应援诸罗一折，内称接据游击杨起麟禀称，六月十七日，魏大斌带兵至盐水港，因该处兵单，留都司罗光昭带兵五百名，在港防御，魏大斌即带兵前往诸罗剿捕。是一千兵又分而五百矣。又据魏大斌禀称，十七日到盐水港，在鹿仔草扎营，次日同副将詹殿擢等带领官兵义民，至埔心等庄与贼打仗。詎料贼匪万余，将官兵围住。经官兵奋勇抵敌，杀出重围，收回鹿仔草营盘。查明阵亡把总麦逢春等四员，兵丁六十六名等因。当即派游击田蓝玉带兵一千名，前往鹿仔草，并力攻剿等语。所办著著皆错，已于折内批示。

又夹片奏称，据参将瑚图里等禀称，六月二十日，自山猪毛带兵六百余名，广东义民一千余名，由小路翻山至南潭攻剿贼匪。该将军派会那穆素里、乌什哈达等，带兵五百名，前往接应。贼匪四出，经瑚图里等奋力追赶，贼即散去等语。瑚图里等前因凤山失事，被贼拦截，在山猪毛驻守数月，幸而贼匪无能，

不致将山猪毛抢占。该将军等因中间道路阻隔，无从知彼处信息，以致日久并未遣兵救援。今瑚图里既于二月二十日稟报，从山猪毛小路翻山进攻南潭，声势可得联络，自属极好机会。该将军等一得稟报，即应亲统大兵，直往南潭一带，合力夹攻擒拿，贼目庄大田可期就获，其余贼伙，自当纷纷奔溃，则南路一带，即可乘势肃清。即使常青、恒瑞不能分身一同前往，亦应伊二人中酌留一人驻守营盘，或常青、或恒瑞，带领侍卫、章京、将备等，亲身统领，以大力多兵直趋南潭，奋力攻击，方合机宜。伊二人又有何不能分往处？纵使伊二人俱难以分身，亦应于镇将中，如蔡攀龙之奋勇可恃者，多派官兵，令其带往剿捕。乃常青等计不出此，仅派那穆素里、乌什哈达等带兵五百名接应，于事何益？且据称山猪毛汛与广东庄相连，前官兵被困数月，并无粮饷，俱系广东义民助粮接济。现在山猪毛有把总叶琪英带兵五百余名，同义民防守。瑚图里等带同官兵义民来营，分别奖赏，并给口粮盐菜等语。所办尤属错谬。官兵前在山猪毛被困数月，既全藉广东庄义民助粮接济，此次瑚图里等回至大营，其广东义民自应令其留守本庄，自为捍卫，乃竟带同来大营。试思义民等既离该处，其家属老幼、田地资产等项，岂能携带前来？自必委之于贼，适以藉寇兵而资盗粮。况瑚图里等带同官兵义民俱赴大营，仅留把总带兵五百名在山猪毛防守，岂足以资抵御？则山猪毛地方民庄，岂不为贼所蹂躏乎？伊等之意，不过为添此千余义民，可以稍添兵力。但山猪毛仍须留兵防守，又岂若令义民在彼自为守御之得力也？今将伊等带回大营，令其随营征剿，该义民等既系恋室家，心悬两地，不能得力。且使贼匪闻知该义民等随营助剿，必心怀忿恨，将其村庄焚毁，家属杀戮，义民转致受累灰心。似此措置乖张，岂用兵之道？且常青等统兵往北路进剿，

到处俱有义民协助。若见广东庄之义民投营出力，转致家属房产被贼摧残，是随同官兵打仗，止有吃亏，于彼无益，不但不能招徕鼓舞，转使义民等望而生畏，岂非驱之从贼？所关匪细，观之实生愤懑。著常青等即传旨，将现在山猪毛义民到营者，于奖赏后，俱令速回本庄，自行守护家属田产，并晓喻义民等，现奉渝旨，以此事系该将军等办理错误，特令义民仍回本处，自为守御。或仍令瑚图里亲自带领义民等，回至山猪毛，并酌添兵丁护送，以安其心而资守御。常青等前赴北路时，遇有义民投到者，皆应令其各在本庄自行防御。如有贼匪侵扰，即悉力堵剿，以助官兵声势。庶义民等无所瞻顾，踊跃从事，招徕更易，此为最要。

至柴大纪现在诸罗，被贼匪纠合伙党攻踞盐水港，四处把截，断绝粮道，又请添兵救援。常青等即应带领将备，亲身速统大兵，前往接应。乘我兵全力将盐水港一带屯踞贼匪奋力剿杀，打通道路，前赴诸罗会合柴大纪，方为得力。乃仅派魏大斌等，带兵一千五百名，已不足以资剿杀。而魏大斌又不晓事，复留兵五百名防守盐水港，止带兵千名前往诸罗，以致兵力益单，遇贼拥至，不能抵敌剿杀，收回鹿仔草营盘，仍不能前抵诸罗。且官兵义民多有受伤阵亡者，既徒损兵力。及魏大斌请援，常青等又止派游击田蓝玉，带兵一千名赴鹿仔草援应，似此零星派拨，何济于事？而伊等在府城，又何曾杀戮多贼，能进尺寸之地哉？且常青等见魏大斌请援，即拨兵一千前往接应，若他处复有求救者，又拨兵援应，似此各处派拨，分投堵御，则大营即有多兵，亦必所存无几，岂又将屡请添兵而不已耶？常青、恒瑞何漫无布置，办理错谬若此？俱著严行申飭。看来该将军等此时竟茫无主见，一错百错，于剿捕机宜，竟不能得有把握，增朕南顾之忧。为今

之计，该将军等惟有遵照节次所降谕旨，直赴诸罗。蓝元枚亦应留普吉保防守鹿港，该参赞自北而南，将各港社屯聚贼匪，痛加歼戮，前往诸罗，与常青、柴大纪会合一处，使官兵声势联络，军威壮盛，将阻隔屯聚贼众，乘势剿杀，俾南北道路相通。并侦探贼首林爽文现在何处，即以大兵全力前往搜捕，庶期捣穴擒渠，则其余党伙，自无难歼除净尽。该将军等勿再株守坐待，以致旷日持久，老师糜饷，坐失事机，自取重戾。将此由六百里加紧各传谕知之。仍著将现在剿捕情形，及各于何日前往会同柴大纪合力进攻之处，迅速加紧驰奏，并著李侍尧得有禀报信息，官兵打仗得胜情形，亦即一并速奏，以慰廑注。

钦此。遵旨寄信前来。

大学士阿桂阅看常青等折据实复奏

乾隆五十二年七月二十日 台湾档

大学士和，字寄钦差大学士公阿、河南巡抚毕，乾隆五十二年七月二十日奉上谕：

本日据常青等奏，派令总兵魏大斌、副将詹殿擢，带兵一千五百名，前往诸罗救援魏大斌。行至盐水港，又留兵五百名防守，而鹿仔草等处贼匪四出滋扰，魏大斌竭力抵御，弁兵阵亡受伤者甚多。常青又添派兵一千名，赴盐水港一带接应等语。所办著著皆错，现在降旨严行申飭。并令该将军等统领大兵，径趋北路，会合蓝元枚、柴大纪，以全力直捣大里杙贼巢，擒获首逆林爽文，则其余贼伙头目，无难次第歼除。看来常青此时漫无主见，于剿捕事宜不得把握，朕转增南顾之忧，恐竟不能蔽事。现

已传谕福康安迅速前来行在，面授机宜，驰往督办矣。

又据刘峨奏，天津县查获福建龙溪县糖船内水手赵荣一名，澄海县糖船内水〔手〕林光一名，与常青咨缉台湾逸匪名姓相同。及细加审讯，则赵荣系欧阳焕顶名，林光系魏宠顶名，年岁籍贯，亦属不符，俱非台匪等语。实属不成事体。台湾与天津远隔数省，即有逸匪，岂遽能逃匿该处勾结为匪之理？且船户等俱系身家殷实，天津行户皆为出结，更属可信。刘峨不顾事理轻重，率行拘讯，将来各海口商人闻风畏惧，裹足不前，成何事体？现已降旨，将该督交部严加议处外，著将本日常青、刘峨奏到各折，并申飭常青、恒瑞谕旨，及近日常青、蓝元枚奏到各折，所降谕旨，一并抄寄阿桂、毕沅阅看。阿桂熟谙军旅，其意以为何如，即就所见，据实复奏。将此传谕知之。

钦此。遵旨寄信前来。

两广总督孙士毅奏奉旨调兵赴闽折

乾隆五十二年七月二十日批 军录

两广总督臣孙士毅跪奏，为遵旨复奏事。

窃臣在黄冈地方点送征兵出境，于七月初五日接奉上谕，前据常青奏到添调粤兵，已降旨令该督先将挑备二千名速行速（赴）闽，再续调四千名，又派驻防兵一千五百名，一体克期配渡，等因。钦此。窃臣于七月初一日钦奉谕旨，添调粤兵六千名，驻防满兵一千五百名，迅速赴闽。臣恪遵赶办，即于七月初二日将钦遵办理情形，一一据实复奏在案。兹查续调粤兵六千名内，除预备贴防之二千名已于六月初十日起，每日五百名，接续行走，业

于六月十三日全数俱入闽境。其常青续调之二千名内，一千名现于七月初五、初六两日，已抵闽境。是现在续调之六千名，已有三千名赴闽，尚有三千名未经到潮，内一千名已在途次，约于七月十七、八等日可以赴闽，其最后添调之二千名，系于七月初一日飞檄行调。营分远近不一，自七月二十一、二日起，定可陆续到潮，即最远之罗定协兵三百名，七月尽亦可赴闽。至驻防满兵一千五百名，系副都统博清额带领。臣在潮州接博清额来字，久欲告兵赴台。今蒙谕旨特派，自必更加勇往。计程七月二十日后亦可抵闽。至需用船只等项，经抚臣图萨布与臣节次札商，宽为预备，满汉官兵尽敷乘坐。省城经抚臣派督粮道吴延瑞护送至惠州所属地方，妥为照料。臣复派惠潮嘉道图毕赫，迎至惠州所属，彼此交代，加紧催趲，断可不致迟误。臣复令参游大员，执持令箭，沿途严加弹压，毋许兵丁稍有滋事。据各要员及地方州县节次禀报，俱称十分安静。

至臣前此探闻台事未实，冒昧陈奏，刻深惶悚，蒙皇上不加罪谴，谕令嗣后得有信息，随时迅速具奏。恩施若此，感深欲泣，臣此后惟有益加确访，据实奏闻，断不敢稍涉高兴，摭拾浮言，亦断不敢略存隐讳，上悬圣廑，以冀殚此愚诚，仰候皇上烛照指示，庶逆匪可以速就荡平。

再，查自闽省首站诏安县前抵厦门，为期不过五日。惟自厦至台，若遇顺风，不过三、四日可到。倘风色不顺，即难预算日期。臣谨遵旨约计照常到台日期另开清，恭呈御览。所有臣钦奉谕旨垂问缘由，遵即用五百里迅速复奏，伏乞皇上睿鉴。谨奏。

乾隆五十二年七月初六日。

乾隆五十二年七月二十日奉朱批：知道了。钦此。

諭內閣沿海各口岸密緝逸逃

天地會眾不得扰累商船

乾隆五十二年七月二十日 台灣檔

乾隆五十二年七月二十日內閣奉上諭：

据刘峨奏，前准常青咨拿台湾贼匪高文麟等供出从贼之各犯姓名，开单移知，令于沿海各港口严密堵缉，当即飞飭各属，一体查拿。兹据天津镇道等稟称，查有福建来津之糖船内，有水手赵荣、林光二名，与高文麟等所供伙匪姓名相同。随讯该水手等。据赵荣供，我系同安县人，原名欧阳焕。林光供，我系彰化县人，原名魏宠。其赵、林二姓，实系造船时报官姓名，历年换照，均系顶认，并不添改。原籍俱有住址亲属可问。并有天津行铺人等，见该水手到过天津十数次，情愿具结等因。现飞咨闽督查照，所供是否属实，再行核办等语。所谓愈细愈远，殊属不成事体。常青等一正贼未获，而用心于无用之地，可笑可鄙。今之大臣等行事，率多如此，实增愧懣也。且台湾逆匪滋事，其夥党即或窜逸，不过在厦门附近一带海口潜匿，断无远逾数省，直至天津之理。无论赵荣等系属误拿，即或实系逸匪，伊二人逃至天津，又怎能滋生事端？况船户等俱系身家殷实，天津行铺皆为出结，更属可信。乃刘峨率行拘讯，殊为失当。此等船只，皆系装载货物，投行售卖。若如此混行查拿，将来商贩未免畏累，裹足不前，必至百货腾贵，于闾阎日用，大有关系。况该督及天津道府等，于所属地方，现有刘瑾之眷船被劫一事，并未能将盗犯拿获，转因数千里外闽省咨缉之案，纷纷查究，刘峨何不晓事至

此！著交部严加议处。并将水手赵荣、林光二名，即行释放，不得再行拖累。并晓谕该船户等，以此二人实系误拿，业经奉旨，即行释放，该督亦治罪矣，嗣后各安商业，不必心存疑惧。

至常青现在剿捕贼匪，于应行会合夹攻之处，不能妥速前进，乃于余匪窜逸咨缉，至数省之远，徒滋烦扰，实属不知事体轻重。著传旨申饬。常青既远咨直省于海口查拿逸匪，则浙江等省，自己早有咨会。并著李世杰、琅玕，于沿海各口岸，止须飭属密行访拿逸匪。遇有商船，不得如刘峨之过事搜求，累及无辜，以致商贩闻风裹足。钦此。

谕钦差湖广总督常青等勿再

因循贻误自干重咎

乾隆五十二年七月二十一日 台湾档

大学士和，字寄钦差湖广总督将军常、福州将军参赞恒，乾隆五十二年七月二十一日奉上谕：

昨据常青等奏，瑚图里自山猪毛带领官兵、义民，由小路翻山至南潭攻剿贼匪，该将军派令那穆素里、乌什哈达带兵前往接应，贼匪四出，经官兵杀散，随派把总叶琪英，带兵五百余名防守山猪毛，瑚图里带同官兵、义民来营等语。所办错谬之极，已降旨详晰指示，并将常青、恒瑞严行申饬。今反复思之，该将军等办理此事，实属失算。瑚图里在山猪毛被困数月，今由小路翻山而出，其意不过欲回至大营。若果可夹攻南潭贼目庄大田，该将军等何以并不亲率大兵，前往会剿，乃仅令那穆素里等带兵五百名接应？及贼匪四出拦截，经官兵杀散，瑚图里等即带同官兵、义

民前赴大营，已属非是。而该将军等于奖赏银两后，即给以口粮盐菜，令其随营征剿。常青等之意，不过为添此千余人，可以稍增兵力，殊不思该义民等居住，各有父母妻子，田地资产，既将伊等留营，则其本庄俱系老弱，岂能自行捍卫？无论贼匪闻知该义民等，随营助剿，心怀忿恨，必将其家属老幼，肆意摧戕。义民受其荼毒，自必灰心。即使幸保无虞，而系恋室家，心悬两池，即随营打仗，亦岂能得力？且使他处义民见此光景，望而生畏，适以阻招徕投效之心。似此措置乖方，思之愈觉其办理失当，实深愤懣。常青等接奉昨旨，即应遵照传谕，令义民等速回本庄，或令瑚图里带兵护送，毋再迟延贻误，仍即速行回奏。

至常青等自驻扎府城，止于桶盘栈一带结营株守，并未能剿杀多贼，挪移尺寸之地。而于诸罗请兵援救，则派魏大斌带兵一千五百名前往。及魏大斌请救，又派田蓝玉带兵一千名接应。似此各处派拨，分投堵御，设他处复有请援者，又将逐处以千余兵应之，则大营所存之兵，岂不全行派拨，所存无几，常青等更将何以处之？岂又请添兵而不已耶？若如此，即再添兵一万，亦不敷尔等零星派往之用。而汝等仍坐守郡城，成何事体？此系该将军曾经具奏之事，已如此错谬，不一而足。其未经具奏者，办理失当之处，恐更不知凡几，何以纾朕南顾之忧？看来该将军等此时于剿捕事宜，竟茫无主见，处处失算，不可不急思变计，以收桑榆之效。为今之计，惟有遵照节次所降谕旨，派拨奋勇镇将，固守郡城营盘，该将军等竟统领大兵舍南趋北，直往诸罗，与柴大纪、蓝元枚会合一处，以大兵全力擒拿贼首林爽文，捣其巢穴，使渠魁就获，则其余伙党自必纷纷解散，不攻而溃。该将军等勿再因循贻误，坐失事机，以致自干重咎也。此朕与尔等以教

过之路，不可不惧。朕于用兵赏罚严明，尔虽未经军旅，岂无闻见？不可不知也。慎之。将此由六百里加紧再行传谕知之，并著将定于何时统兵直趋北路，会合进剿，及广东义民是否已令回庄捍御之处，迅速驰奏，以慰廑注。

钦此。遵旨寄信前来。

谕闽浙总督李侍尧复奏更换常青是否适宜

乾隆五十二年七月二十一日 台湾档

大学士和，字寄闽浙总督李，乾隆五十二年七月二十一日奉上谕：

昨据常青奏，添派官兵应援诸罗，及瑚图里自山猪毛带领广东庄义民回至大营各情形，所办俱属错误。已降旨将该将军等严行申饬，并传谕李侍尧指示一切矣。今思常青前由察哈尔都统擢授将军、历任俱系武职，因其人尚明白妥当，嗣于闽浙总督缺出，即令暂署，亦尚能办理无误，是以实授总督任事未久，适值台湾逆匪林爽文等滋事不法，常青调遣将弁，派拨兵丁，及解送粮饷火药等事，亦尚有条理。旋因黄仕简、任承恩彼此观望，貽误事机，不能剿除贼匪，必须另派大员前往督办，是以就近派令常青前赴台湾督办。彼时朕本不甚意满，及常青到彼后，鼓励义勇，抚恤难民及一切调拨，颇觉井井有条，朕心出于望外，乃为之稍慰，方以该将军等为可倚恃，足资委任。数月以来，节次奏到各折，屡次打仗，虽未见出奇制胜，大加剿洗，尚无措置乖方、错误显然之处。至昨日所奏，魏大斌带兵一千五百名，前赴诸罗应援，至埔心庄遇贼，未能前进。常青闻信，并不亲领大兵

会合进剿，又仅派田蓝玉带兵一千，前往接应。似此零星派拨，于事何济？又另片奏，瑚图里带领广东庄义民，自山猪毛回至大营一事，该将军于义民到营后，即赏给银两口粮，令其留营助剿，不思义民弃其家属资产，贼若乘此焚毁庄田，是徒以藉寇兵而资盗粮。且该义民等系念室家，心悬两地，仍属不能得力，适以阻他处义民输诚投效之心。办理错谬，无甚于此。种种失策，看来，常青等此时毫无主见，于剿捕机宜竟不能得有把握，朕因此实增南顾之忧。常青、恒瑞二人，向来俱未曾经历军务，而恒瑞又复少不更事。伊现任福州将军，管理满州驻防兵丁，此时随同常青办理军务。恐其因职分相等，又以身系宗室，稍存矜贵习气。且未免有袒护满州兵丁之意，于商办一切事务，未能和协，亦未可定。但用兵之道，全在主将和衷，方能集事。若各不相下，心存意见，以致诸事多有掣肘，所关匪细。李侍尧现在驻扎厦门：见闻较切，且该督久任封疆，受恩最为深重。伊平日于该将军等剿捕机宜，原不应有所轩轻，至现在常青等办理诸务，动多错误，朕日夕焦急，特行降旨询问。该督自应将常青与恒瑞有无意见不和，彼此牵掣，及该将军等能否办理此事，可期完竣之处。据实复奏，毋得稍存瞻顾。

再，现已有旨令福康安速赴行在，面授机宜，令其前往台湾，更换常青督办军务。但军中屡易主帅，亦非所宜。特恐常青等不能了结此事，以致因循日久，不克蒇功。转不若及早更换，尚可保全之为愈，此实朕无奈之计也。并著李侍尧酌量情形，就其所见，是否必须如此办理，一并据实速奏。将此由六百里加紧密行传谕知之。今日申飭常青之旨，并抄寄李侍尧看，悉朕苦心，仍著由六百里加紧复奏。

钦此。遵旨寄信前来。

广州将军存泰等奏挑选驻防官兵

赶紧起程赴台折

乾隆五十二年七月二十三日批 军录

广州将军臣存泰、广东巡抚臣图萨布跪奏，为遵旨挑选驻防官兵，料理赶紧起程，恭折驰奏，仰祈睿鉴事。

本年七月初三日接奉六月十九日上谕，据常青等奏，统兵连次打仗并请添派官兵一折，应再行添派，以期迅速集事，著存泰、图萨布于粤省驻防满兵内挑选一千五百名，迅速分拨起程，著派副都统博清额带领前往。钦此。臣存泰、臣图萨布遵于初四、初五两日，会同副都统臣博清额、拍廷翰、传集满汉八旗及水师旗营各驻防官兵，逐加挑选。现挑得满洲甲兵六百五十名，汉军甲兵六百五十名，水师旗营兵二百名，共足一千五百名。当即敬宣谕旨，飭令迅速前往。各官兵世受国家豢养深恩，咸思报效，今得派剿台匪，人人踊跃争先。臣等察看各官兵，年力俱属强壮，勇往出于至诚，必能出力剿贼，克日蒇功。随照例散给俸赏、行装、盐菜、银两，备足军火器械，派定协领、佐领、防御等官共三十三员，分作四起行走，以三百七十五名为一起。七月初七日，头起自省起行，按日接连前进。副都统臣博清额统领第四起官兵起程，由水路昼夜兼行。至龙川县起岸过山，仍由水路至潮，从黄冈入闽境。现在河水通达，船只便利，每船复加给纤夫多名，按站更换，较陆路更为迅速。至官兵自省起程，臣等督同藩司许祖京及府县等，亲赴河干照料登舟，由省以至龙川起岸，至清溪派委肇罗道阿章阿支给人夫，随路弹压，由清溪下船至潮

州，派委惠潮嘉道图毕赫拨给船只，接赞护送，仍飞咨督臣孙士毅照料出境。其官兵逐日应需口粮，俱飭各府州预备，随到随发，免致停留。至此次驻防各官兵应支分例，先于司库动项支給，容俟汇案造报。所有现在遵旨挑选驻防官兵，料理赶紧起程各缘由，臣等谨合词缮折由驿五百里驰奏，并将跟随副都统博清额带兵各官职名，开列清单，恭呈御览伏乞皇上睿鉴。谨奏。

乾隆五十二年七月初十日。

乾隆五十二年七月二十三日奉朱批：知道了。钦此。

广东巡抚图萨布奏慎密办理

沿海口岸巡查事宜片

乾隆五十二年七月二十三日批 军录

臣图萨布跪奏：窃查粤东所属州县地方，内多滨临洋海，而附近省城沿海各隘口，尤关紧要。臣节次与督臣孙士毅檄飭文武，慎密严查，奏明在案。现在添调官兵赴台协剿，诚恐地方稍有疏懈，奸匪乘机潜窜。臣现飭各州县会同营汛，于沿海隘口，加紧巡查。凡船只收泊港澳，遇有踪迹可疑，其船户梢水，若非本处歇家行店素相认识，难保无台湾逸匪及洋面奸徒。一经盘查得实，即行拘拿解究。务须不动声色，严密办理，使匪迹无所潜伏，以靖海疆，理合附片奏闻。

乾隆五十二年七月初十日。

同日^①奉朱批：览。钦此。

^① 指乾隆五十二年七月二十三日。

諭閩浙總督李侍堯等巡緝毋得滋擾商販

乾隆五十二年七月二十三日 台灣檔

大學士和，字寄閩浙總督李、兩廣總督孫、廣東巡撫圖，乾隆五十二年七月二十三日奉上諭：

据圖薩布等奏，挑選駐防官兵料理趕緊起程日期一折夾片內稱，現飭沿海各隘口文武員弁，加緊巡查，恐有台灣逸匪及洋面奸徒，一經盤查得實，即行拘拿解究，務須不動声色等語。前据劉峨奏，准常青咨緝匪犯高文麟供出之伙犯趙榮、林光等，竟将由閩到天津之糖船內水手，因其姓名相同，遽行拿訊。嗣經該水手等供證明確，并非高文麟伙黨，而劉峨犹欲行文閩省，輾轉咨查，使商販聞風畏累，俱退縮不前，貽害匪淺。已降旨，將劉峨交部嚴加議處矣。台灣與粵省毗連，非江浙辽远者可比，保无有匪犯窜逸，自應严密查拿。但販貨商人俱系家道殷實，豈肯藏匿匪徒，自取重戾？該督撫等遇有形迹可疑者，固須留心盤詰，若遇到口商船，概行查訊，則商販等聞風裹足，将来商販不通，百貨騰貴，于閭閻民食大有关系。著傳諭李侍堯、孫士毅、圖薩布，飭屬不動声色，設法妥辦，毋得似劉峨之紛紛誤拿，徒滋扰累也。將此各諭令知之。

欽此。遵旨寄信前來。

諭閩浙總督李侍堯等將廣東

庄民留營甚為錯謬

乾隆五十二年七月二十四日 台灣檔

大學士和，字寄閩浙總督李，乾隆五十二年七月二十四日奉上諭：

前據常青等奏，參將瑚圖里自山猪毛帶領官兵義民，由小路翻山至南潭攻剿賊匪，該將軍派令那穆素里等帶兵接應，賊匪四出，經官兵殺散，瑚圖里帶同官兵義民來營等語。所辦錯謬之極，已將常青、恒瑞嚴行申飭，並諭李侍堯知之矣。今反復思之，常青等于此一事，愈覺其辦理失當，實深憤懣。該義民等居住廣東庄，各有父母妻子，田地資產。前官兵在山猪毛被賊拦截數月之久，應需糧餉，均系該義民等協助接濟。今隨同官兵冲杀賊匪，是該義民實為出力可嘉。瑚圖里于回至大營后，常青等自應即令義民歸守本庄，自為捍衛，既可護其身家，亦可堵御賊匪，為官兵聲援。乃瑚圖里帶同來營，而常青等于分別獎賞后，即給以鹽菜口糧，留其在營助剿。在該將軍等不過為添設此千余人，可以稍增兵力，殊不思該義民等既留大營，則其本庄俱系老弱，豈能自行捍護？其田地資產豈不委之于賊，適以藉寇兵而資盜糧！且使賊匪聞知該義民等隨同官兵助剿，自必心怀忿恨，將其家屬老幼肆意戕害，焚燒村庄。是義民協助官兵，不但無所利益，轉為受累，徒使灰心。即使其本庄幸保無虞，而義民等系念室家，身心兩地，即隨營打仗，亦豈能望其出力？且使他處義民見此光景，望而生畏，適以阻其急公投效之心？似此措置乖方，

种种失算，所关非小。已谕令常青等，将办理错误缘由，传旨晓谕义民，令其速回本处，自为守御。并令瑚图里亲自带兵护送，以安其心而劝来者。但前降谕旨，到彼尚需时日，已恐无及。若贼匪等乘义民远离本庄，已将其家属房产焚劫残毁，以致义民等受累灰心，并致他处义民闻风裹足，不肯踊跃报效，是皆由常青等措置乖张，贻误事机。朕必当将常青等，从重治罪。著传谕李侍尧，将事情情形是否如此，其意以为何如，就其所见，据实密陈。此时勿得稍有宣露，令常青等闻知，心怀疑惧，更于事无益也。将此由六百里加紧谕令知之。仍著将台湾近日如何杀贼打仗，及蓝元枚、柴大纪两处剿贼得胜情形，得地方官禀报，随时迅速加紧驰奏，以慰廑注。

钦此。遵旨寄信前来。

闽浙总督李侍尧奏台湾府库银两无存

请拨银以济兵饷折

乾隆五十二年七月二十四日批 军录

闽浙总督臣李侍尧跪奏，为台湾无著兵饷，请先行给发，以济兵食事。

窃照台湾额征地丁、庄租、盐课等项，每年计银五万九千三百余两，其应行解司兵马、建旷、扣缺、养廉，并文武各员借支各杂项，每年又不下三、四万两。历系扣存府库，划兑成兵饷银，如上两年奏销之银，于下两年请领兵饷内扣收，以省彼此运解之烦，历系著为成例。上年台湾请领五十二年分官兵俸饷养廉银，共一十七万五千一百余两，经署藩司李永祺照例划扣司库银一十万二千五

百余两，飭令将收存府库银两提出支放在案。兹据布政使觉罗伍拉纳详据台湾府知府杨廷樺详称，前项存贮府库银两，故守孙景燧任内垫用无存，兵饷不敷支放，请先行给发前来。臣查贼匪滋事，系在上年十一月以后，而本年台湾兵饷，应动支五十年完解之银。该年征收银两，业经奏销全完。实贮府库并应行解司各杂项，亦俱扣收在库，与本年官庄地亩被贼匪扰害，无可征收者，全不相涉。乃据称孙景燧任内垫用无存，其垫作何项？系何员任内垫用？并未有报案，显系亏空。本应查明参奏，分别追赔，但现当剿捕逆匪之时，因不便遽行查办亏空，而兵饷关系紧要，又不得不速多拨解，以应急需。除亏空库项统俟军务告竣再行查办外，臣一面飞飭藩司，将划扣银一十万二千五百余两，照数拨出，委员迅解台湾，以备支放。并行令查明阵伤亡故未回兵丁，按照出缺日期，将饷银扣贮府库，归入下年支放之用。仍飭将支放日期，官兵花名清册，并扣除亡故兵丁名数，造报查核，以杜影射那（挪）移情弊。所有划扣台湾戍兵饷银，照数补拨缘由，理合奏明，伏祈皇上睿鉴。谨奏。

乾隆五十二年六月十九日。

乾隆五十二年七月二十四日奉旨：知道了。钦此。

谕闽浙总督李侍尧用兵之际诸事宜严

乾隆五十二年七月二十四日 台湾档

大学士和，字寄闽浙总督李，乾隆五十二年七月二十四日奉上谕：

据李侍尧奏，台湾府库贮兵饷等项银十一万余两，前任知府

孙景燧垫用无存，其垫作何项，系何员任内垫用，并无报案，显有亏空，统俟军务告竣，再行查办一折。又据奏，泉州府马巷通判陆士锟，于该厅地方米船被劫，任听家丁差役私卖赃米，而于起获米石，又不全行给领，请将马巷通判陆士锟革职等语。所办二事，俱失之宽纵。

台湾库贮银两，原存为兵饷支放之用，且系五十年征收钱粮实贮在库之项，与去岁冬底被贼滋扰官庄无涉，何得称垫用无存？孙景燧在任酿成事端，又复任意亏缺，即应参奏查办，乃该督请于事竣后再行办理。试思孙景燧业已身故，将来又复向何人查究乎？现已降旨，谕令琅玕将孙景燧原籍贓财严密查抄，以抵官项。

至陆士锟，于所属地方米船被劫八十一石，并不上紧严拿盗犯，一任家人等私卖赃米二十余石。及事主认领，又只发给米二十七石。该通判当军务倥偬之际，并不严防盗贼，乃于商船被劫，转从中侵渔吞匿，是不但因该商被盗，乘人之隙，肆行侵隐，而且乘国家有事，任意贪婪。似此居心，真与盗贼无异，仅予革职，不足蔽辜。著李侍尧将陆士锟即行革职拿问，仍计赃科罪。

至李侍尧现值闽省地方废弛之时，正当实力整饬，乃于此二案办理失之宽纵，若此，殊属非是。著传旨严行申饬。用兵之际，诸事宜严。李侍尧不宜如此做好人也。将此谕令知之。

钦此。遵旨寄信前来。

谕浙江巡抚琅玕查封孙景燧家产以抵官项

乾隆五十二年七月二十四日 台湾档

大学士和，字寄浙江巡抚琅，乾隆五十二年七月二十四日奉

上諭：

据李侍尧奏，台湾府库贮，上年划扣兵饷等项银一十万二千五百余两，前故守孙景燧垫用无存，兵饷不敷支放，现飭藩司将前项银两照数拨出，迅解台湾，以备支放。其因何亏空库项缘由，俟军务告竣，再行查办等语。所办非是，已另降諭旨申飭矣。此项库贮兵饷等款银两，系五十一年奏销以前征收钱粮，实贮在库，与本年被贼扰累官庄无涉，何得藉称垫用无存？明系孙景燧挪移亏空无疑。孙景燧系台湾知府，平日于地方事务，既漫无整顿，以致酿成林爽文等纠众不法，肆行滋扰之事。而于库贮银两，又复任意亏缺，是其侵渔敛怨激成事端，不可因其被贼害而宽其罪也。岂可更使其家属坐享丰厚，著传諭琅玕，即将孙景燧家产逐一严密查封，以抵官项，毋任稍有隐匿，透漏寄顿情弊。将此諭令知之。

钦此。遵旨寄信前来。

闽浙总督李侍尧奏请于漳泉二府募兵折

乾隆五十二年七月二十五日批 军录

臣李侍尧跪奏，为遵旨筹办复奏事。

窃臣于本月初七、八、九等日，接六月二十三、四、五日諭旨，并朱批各折内，以海运粮饷、火药等项，最关紧要，令臣遴委妥员，小心押送，并给兵防护等因。查臣前闻诸罗通海之笨港口，被贼攻占，恐其出海作梗运道，曾两次派拨船及水师舱兵，往驻鹿耳门、鹿仔港两处，以为防护饷船之用，业经具奏在案。现在粤、浙等兵正当东渡，臣更拟多拨银米、火药等项，趁此兵船配渡之时，委员随同解往，尤为放心。将来如更有续解银

米，该二处既各有派往防护之兵船，当亦不致疏失。（朱批：好。）至谕旨以臣所奏调浙兵二千赴闽协防之处，恐浙兵懦怯，不如在闽省漳、泉一带，不必拘定额数，先行多募数千等因。查臣前以本省各营兵少，曾奏明照派往台湾换班兵数，沿海各营先募补十之三，上游一带募补十之二。兹蒙圣明指示，应于酌补十分二、三之外，就漳、泉两处，再募补二千名，使游手无籍之徒，得食钱粮，既不至为匪，而闽人素称犷悍，收入戎伍，及时训练，更可得巡防调遣之用。诚如圣谕，实属一举两得。现在厦门一隅，数日内已有四百余名送臣挑选。看来漳、泉二府情愿入伍者甚多。（朱批：却甚好事。）不过旬日，即可足数。所需银饷，将来总于台湾伤亡散失各兵截旷数内扣抵，约略计算，可以相当。（朱批：今总不可以多费为虑。）即有不敷，俟剿匪事竣后，再行奏请办理。所有拟调之浙兵二千，已咨明浙省抚、提二臣，停止调遣矣。（朱批：是。）再奉旨：常青虽未到湖广总督之任，所有分例养廉，应即移解，以供军前应用之处。臣查常青赴台湾后，即据藩司伍拉纳查照出差之例，详请支給一半养廉，按月解送在案。今应遵旨，将伊全分养廉，陆续解往。一面移咨署湖广督臣舒常知照。

至臣折内有恒瑞札称：府城外对阵之贼，实有万余，埋伏各庄者，更不计其数之语。奉旨垂询，何以此札独系恒瑞出名，岂恒瑞与常青又分两路，抑或常青偶患疾病，未能会办。令臣如另有所闻，即据实复奏等因。臣查军营公牒，俱系常青、恒瑞二人联衔。此札系恒瑞因便寄信通候，其中言及贼匪情形如此。是以臣即据以入奏，并非别有他故，（朱批：又恐二人有不和处，复问汝矣！当以实对。）可毋庸上座圣怀。

再，台湾殉难各官，或素系贪残，则殒身亦难赎酿祸之罪。

或尚称廉谨，则捐躯自当邀死事之褒。事关劝惩，未可草率。

（朱批：此二语公。至该府之亏空，岂可恕乎？）臣现在留心细访，兼听并观，务得确实，以仰副圣主彰瘅至公之意。除查明后再行具奏外，合先将遵旨办理各缘由，缮折驰奏，伏乞皇上睿鉴。谨奏。

乾隆五十二年七月十一日。

乾隆五十二年七月二十五日奉朱批：览奏俱悉。钦此。

闽浙总督李侍尧奏陆续调兵赴台片

乾隆五十二年七月二十五日批 军录

再，查前调之闽兵二千、粤兵二千，目下已早到台郡。又奉旨续调之粤兵四千，本日头起五百名，已到厦门。其余各起，有路远未能即到者。准孙士毅札称，现在严催进发。又浙省之驻防满兵，已据报于六月二十六日起程，粤省驻防满兵，虽未报起程日期，大约本月下旬俱可到厦。臣现在厦门料理，自当令其随到随即登舟，俾迅速前往，以期得用。

至北淡水一带，近据同知徐梦麟禀称：逆首林爽文遣贼在彰、淡交界之大甲溪等处滋扰。副将徐鼎士已带兵来援，蓝元枚亦遣守备潘国材带兵由海路前来，率同该处义勇，于六月十八及二十一、二等日，连次接仗等语。查臣所调漳州兵往蓝元枚处者，现已在途，俟粤兵到时，再遵旨分拨二千前往，则蓝元枚处新旧官兵，亦不为少。现奉谕旨，令常青、蓝元枚等多募义民、乡勇，或给与口粮，或收入营伍，并从贼而自拔来归者，亦准食兵粮等因。常青、蓝元枚等接奉谕旨，自必多募义勇，共相

协力。是南北两路既有增调之官兵，又有增募之义勇，相参并用，定可逐段摧廓。臣惟有料理粮饷，宽裕解往，俾足供支給，不敢稍有缺误。合并附奏。

乾隆五十二年七月十一日。

乾隆五十二年七月二十五日奉朱批：知道了。钦此。

谕钦差湖广总督常青等将近日

是否会攻速奏

乾隆五十二年七月二十六日 台湾档

大学士和，字寄钦差湖广总督将军常、福州将军参赞恒，乾隆五十二年七月二十六日奉上谕：

本日询问常青奏折差弁饶成珑台湾攻剿贼匪情形，据称将军扎营在小南门外十里之桶盘栈地方，自五月二十四日以后，与贼人打仗数次，因贼人四路抵御，未能前进。贼目庄大田所踞南潭，距桶盘栈营盘只有五里等语。

常青等自驻扎台湾，已经数月，其桶盘栈营盘，相距南潭不过五里，该将军等早应统领大兵，将贼目庄大田先行剿除，乃惟知结营自守，并不挪移尺寸，似此肘腋之间，任其逼处。常青等株守数月，即不能进兵□攻。岂见贼匪近在目前，竟不思乘势攻剿，实不可解。

前以为南潭离大营尚远，故屡次谕令该将军等酌留官兵，固守营盘，亲统大兵舍南趋北，直赴诸罗，与柴大纪、蓝元枚会同一处，合兵进剿。此时如已统兵前往北路，固属甚善。倘尚未启行，该将军等即应带领官兵，速将五里外南潭屯聚之庄大田痛加剿

洗，以清肘腋。岂有近在数里之内，而束手坐待之理？且此次续调兵丁，其粤兵二千，昨据李侍尧奏，业经配渡前往。其余浙粤官兵，自己陆续到彼。常青等正当乘其新到锐气，相机进取，拒可旷日持久，坐失事机？若似此株守因循，则新兵之气又馁，何日始可集事耶？著传谕常青等，将近日曾否前往北路会合进攻，打仗得胜，及贼目庄大田近在桶盘栈，何以并不先行攻剿之处，迅速驰奏，以慰廑注。将此由六百里加紧谕令知之。

钦此。遵旨寄信前来。

谕闽浙总督李侍尧等賑济漳泉

二府以收民心

乾隆五十二年七月二十六日 台湾档

大学士和，字寄闽浙总督李、福建巡抚徐，乾隆五十二年七月二十六日奉上谕：

据徐嗣曾奏，福建内地六十州县早稻收成分数，共计七分有余。上游各属米价，因早稻登场，均已平减。惟漳泉二府，雨泽稀少，晚禾地瓜多有未栽，米价略有加增等语。前因台湾剿捕逆匪，需用军糈，且漳泉一带地方缺雨，恐米粮市价昂贵，民情不无拮据。前已有旨，谕令该抚查明妥办。并节经降旨，于浙江、江西、江南、四川、湖广等省派办米共一百余万石，令该督抚等迅速运闽，自己陆续运抵闽省，源源接济，是闽省米石日逐充盈。除应付军糈之外，尽有多余。漳、泉二府如有缺雨成灾处所，该督抚务须详悉查明，一面奏闻，一面即行督饬所属，妥为抚恤，俾闾阎均沾实惠，毋使一夫失所，以副朕轸念民依至意。将此因

(以)六百里加紧之驿谕令知之。

钦此。遵旨寄信前来。

钦差湖广总督常青等奏进攻南潭等情折

乾隆五十二年七月二十七日批 军录

将军湖广总督臣常青、参赞福州将军宗室臣恒瑞跪奏，为搜剿南潭贼匪情形并严催应援诸罗官兵，恭折奏闻事。

窃臣等因总兵魏大斌等带兵一千五百名前赴诸罗，在鹿仔草遇贼阻滞，随又加派兵一千名，令游击田蓝玉带往，于六月二十六日奏明在案。但南路之贼，仍在南潭一带负隅不散，显系北路贼势鸱张，故敢有心窥伺。臣等于二十八日令侍卫乌什哈达等，率同游击孙全谋，并参将瑚图里、都司邵振纲管带弁兵，台湾道永福亦派同知杨廷理、守备衙庄锡舍督率义民，协同官兵前往搜捕。由鲫鱼潭至埔姜头庄，见贼数百，向前追杀，直至蜈蚣潭沟，焚毁贼寮十数间。当有南潭贼匪三、四千拥来，官兵齐放枪炮，打死贼数十人，杀贼十余人，（朱批：三四千贼，只杀数十，成何事？）贼遂败退。因该处沟径崎岖，不便追赶，随即收军。割献首级四颗，发辫二个，夺获贼械十余件。受伤委署骁骑校哈郎阿一员，兵丁一名，义民二名，阵亡兵丁四名，义民四名，均各分别记功赏恤。惟被贼冲散不知存亡兵丁十五名，俟查明另办。惟查派赴诸罗之带兵游击田蓝玉，于六月二十六日登舟去后，料数日之内，自可与总兵魏大斌会合。兹于二十七日接据驻守盐水港游击杨起麟禀称，二十五日贼众千余，由芦竹坑来攻盐水港。游击商令守备黄象新带领弁兵、义民，由东北势港墩堵

截，燃放枪炮，打死贼百余人，余贼败走。割取耳辨并于各贼尸身搜出伪将军封条。又另禀，内有县城被贼围攻，魏总兵被贼堵截，难以前进各等语。二十九日接据柴大纪禀报，六月二十二日接准魏大斌来字，十七日到盐水港，即将官兵带到鹿仔草扎营。十八日带领官兵至埔心、大崙等庄，与贼打仗，竟有万余。官兵奋勇杀出重围，伤亡者亦多，现在禀请拨兵救援。又据游击邱能成禀称：十七日魏镇到地住宿，询问贼情，时武举陈宗器并卑职回称，前途埔心等庄俱有贼匪，山路截断，音信难通。魏镇谕令将所扎鹿仔草官兵同往剿捕。十八日魏镇亲带兵四百名，余剩官兵留守鹿仔草。卑职亦带水陆官兵随往，至埔心庄遇贼打仗，枪炮打死贼匪无数。詎料四面各庄贼匪蜂拥突出，将队伍重重围住。义民陆续奔退，自巳至申，官兵奋勇杀出。卑职左手中指受贼刀砍，伤深见骨，坐马亦被砍伤，收回鹿仔草。魏镇营中阵亡千、把等员兵丁，遗失百余名，卑职本标三营城守右军水师阵亡把总二员，额外一员，兵丁遗失三百余名。黄奠邦、蓝应举各分下义民，遗失三十余名，俯俟一并查明确实另报等语。窃查魏大斌由盐水港直抵鹿仔草，尚未知会，即于十八日带兵四百名，并令游击邱能成、武举陈宗器将所扎鹿仔草之官兵、义民，同往大崙、埔心剿捕，致被围，官兵义民均有损失。十八日午刻，本职闻鹿仔草一带炮声，随派拨队伍义民前往接应。行至老店地方，炮声已歇。探系官兵收回鹿仔草，随亦收兵回县。

又据柴大纪另禀，二十二日贼匪攻县，兵民奋勇抵御，打死贼匪百人，打死骑马贼一人。二十四日贼忽分攻四门，职镇督率将备县令，分方堵御。枪炮并施，打死多人，贼始惧退。定更以后，贼匪复来，四面放炮喊杀，并无火亮。官兵义民多设火号，施放大炮。至二十五日黎明，贼匪拥众如墙而进，环攻西北营

盘。幸大炮叠发多中，打死骑马贼目二人，人马俱毙，歼贼千余人。其余贼匪冒死进攻，官兵义民力战。至未刻稍退，仍遥屯未散。四野积水泥泞，未敢进剿。申刻雷雨盆倾如注，直至戌刻，贼始散归各庄。现在多方雇觅熟识路径之人，连夜札调鹿仔草官兵前来协助，至今尚未见回信，容再设法办理各等情。臣等接阅柴大纪两禀，贼匪攻犯诸罗，虽被官兵歼戮，仍未远遁。而魏大斌带兵赴援，又未得力，必须游击田蓝玉所带之兵会同协助，乃可直抵诸罗。正在檄催间，于七月初三日接据田蓝玉来禀，系于六月二十九日前抵新店。查该处距鹿仔草不远，约计此时自己与魏大斌合兵一处，但尚未得该镇将等径达诸罗信息。又于初四日接据代理诸罗县知县陈良翼禀称，逆匪聚众八、九千人，于二十八日辰刻扛抬枋车，上蒙湿绵被，蜂拥围攻西、北两门营盘。东南两门山顶，各有贼众六、七百人，遥为声援。卑职分拨僚属守城，亲率各义民跟随署提督，统领将备弁兵，往来御敌，施放枪炮。贼匪枪炮甚多，抵死拥攻，官兵义民奋力攻杀，贼人退而复进者三次。我军用大炮轰击，碎其枋车数座，打死贼二、三百人，北门打死骑马贼目一人，西门杀死贼目一人，枭回首级，至申刻贼始溃散。官兵义民损伤数十人，贼虽暂退，差探尚欲纠贼攻城。魏镇驻扎鹿仔草，离县二十里，至今未得援应等语。

查诸罗一带贼匪浹旬不退，柴大纪等既能固守，又经屡次剿杀贼众，自不敢久逼围攻。但该县系二十九日具禀，是日游击田蓝玉才到新店，是以尚未得有该游击带兵协助魏大斌之信。臣等已三次严催魏大斌、田蓝玉等，务即通知柴大纪，迅速由鹿仔草起兵前进，内外奋击，开通道路。并已飭该道府添解饷银、药铅等项，委妥员运往接济，自可尽力堵剿，杀退贼匪，保固县城。至现在南潭、中洲等处，贼皆窝藏林菁，埋伏枪炮。而时值暑

雨，又皆放水踞险，官兵人马难行。臣等再三筹划，诸罗现未解围，固未得放心南下，（朱批：不能南下，何不北去，以全力救诸罗？即汝二人不能同往，一人分往，亦不能乎？）而沙路淤陷，亦须雨水稀少，方可前进。除俟得有柴大纪、魏大斌等会合剿贼捷音，星驰奏报外，所有搜剿贼匪，檄催赴援各缘由，理合先行具奏，伏乞皇上睿鉴。谨奏。

乾隆五十二年七月初五日。

乾隆五十二年七月二十七日奉朱批：所办不成事体，即有旨谕。钦此。

钦差湖广总督常青奏请再行添兵赴台折

乾隆五十二年七月二十七日批 军录

将军湖广总督臣常青、参赞福州将军宗室臣恒瑞跪奏，为接据诸罗禀报，再行添派官兵前往协剿，恭折具奏，仰祈圣鉴事。

查逆匪围扰诸罗，经臣等派总兵魏大斌带兵一千五百名，又续派游击田蓝玉带兵一千名，先后赴援。随即屡次严催该镇将等迅速前进，并将六月二十七、二十九、七月初四等日，接到署提臣柴大纪等驰禀御贼打仗各缘由，于初五日陈奏在案。兹于初六、初七、初八等日，又连接各镇将禀报。据柴大纪及署县陈良翼会禀内，六月二十至二十八等日守城杀贼情形，与前接各禀，大略相同。惟又称现在县城四面道路田洋积水，皆有逆匪阻截，遍插竹签，官兵难以行动，积存文报不得递送。城中粮饷、铅药存剩无多，大炮銼子随时铸造，已用过一万三千余斤。现今铁炭渐缺，设法加意防御。又另禀，二十五日贼目蔡福被炮打穿颌颊，伤重

拾回打猫街，二十八日贼目叶省被炮打中右腋，拾回牛稠山毙命。现据各庄民奔报属实各等语。据魏大斌来禀，七月初一日，游击田蓝玉已抵鹿仔草庄，职同将弁等拟于初三日杀赴诸罗，并职接到柴总兵来函一并录呈等语。据游击田蓝玉禀称，游击见魏总兵商议打通诸罗道路，查鹿仔草由东边往诸罗，系埔心、大崙等贼庄。路更被贼削小，田水堵满，由南边往诸罗，系后寮一带，各路口亦是贼匪屯扎之所，俱有蔗园深沟，阻碍去路。现与魏总兵妥酌分兵前往，何敢冒昧等语。又据魏大斌来禀：初三日寅刻，职同副将詹殿擢、游击田蓝玉等带领官兵义民前赴诸罗，行至半天厝，见埔心、大崙各庄贼匪突出，约有数万，分路杀来。遂令排列队伍，施放枪炮，打死贼匪不计其数，内有骑马贼一名。但贼匪悍不畏死，尚敢围扰。官兵义民奋力战，至未刻贼匪退聚各庄路口，拦截官兵，势甚猖獗，难以前进。查阵亡兵丁一名，义民一名，受伤兵丁十二名，义民十九名。随将队伍收入鹿仔草营盘，再商计策前赴等语。

臣等细阅各禀，魏大斌已接柴大纪书函，则彼此自可关会。其贼目蔡福、叶省若果被炮伤毙，则贼势亦应稍减。惟是已抵鹿仔草之各官兵，屡前复却，皆因贼匪削小官路，乘夏令多雨，灌为水田。又遍插竹签，以防官兵进剿。为此困守诸罗之计，殊为狡恶。但查鹿仔草距诸罗仅二十余里，若我军并力奋勇，能透过十余里，城内兵民亦奋力接应，尚似可以打通。且埔心、大崙等贼庄，在诸罗西南一面十余里之外，并非四面围住县城，若募熟识路径之人，无论水陆，亦可间道疾趋，期于必克。臣等以柴大纪望援甚殷，（朱批：既如此，尔等不即督大兵前往，实不解。若诸罗有事，此罪谁当之？）而该镇将等设法应援，自以兵多为善，是以再行添派参将特克什布、张万魁、署都司邵振纲带兵一

千四百名，并派令健锐营章京官宝、德成额协同前往。即于初八日早起程，仍配船由水道前抵鹿仔草，并飭该镇将等，务即悉心筹划，彼此熟商。或并力直前，或觅途驰赴，总期速达诸罗，痛歼丑孽，而随军运行之军装、药、铅等项，尤宜严密防护，不得少有遗失。除俟添赴各官兵协剿得胜飞折奏报外，所有据禀再行添兵前往缘由，谨先合词具奏，伏祈皇上睿鉴。谨奏。

乾隆五十二年七月初九日。

乾隆五十二年七月二十七日奉朱批：即有旨谕。钦此。

钦差湖广总督常青等奏连日拔兵
应援诸罗并严防窜逸折

乾隆五十二年七月二十七日批 军录

将军湖广总督臣常青、参赞福州将军宗室臣恒瑞跪奏，为钦奉谕旨，恭折复奏事。

窃臣等于七月初六日奉到五月二十四日两折朱批，先于初五日奉到谕旨：台湾三面濒海，将来贼势穷蹙，内山要隘既有官兵堵截，必思乘间逸出海口。常青等务严飭沿海各口岸将备，带兵梭织巡查，不使匪犯得以偷渡免脱，方为周妥等因。钦此。又于初六日奉到谕旨：即日大兵进剿，四路夹攻，贼匪或偷觅小舟由斗六门之溪河逸出海口，常青等务拣派得力将备，带领弁兵，于通海各溪河处，严密防守。并将船只收藏，毋令近岸。如此四面防堵，庶可搜剿无遗等因。钦此。又于初六日奉到谕旨：此次常青等折所奏太迟，嗣后务于发折后七、八日，即将剿贼情形具奏一次。如得有胜仗及擒获贼首，并有名贼目，更宜随时加紧驰奏。

再，另片内，有千总卢思聪及兵丁义民阵亡受伤者，均应查明咨部，照例赏恤等因。钦此。又于初六日奉到谕旨：贼匪敢于附近府城各处聚集窜踞，倘窥伺大兵已出，乘虚滋扰，虽常青等派有副将丁朝雄等带领官兵足资堵御，究不免有后顾之忧。著传谕常青，先应将城外贼匪搜剿围拿，并将贼首庄大田设法擒获，肃清肘腋，方可乘锐前驱，等因。钦此。又于初七日奉到谕旨：贼匪所掠粮米、火药等物，渐次用尽，其势日益穷蹙，不过苟延残喘。至林爽文竟敢令其党羽蓄发，作为亲丁，实属悖逆不法，可恶已极。必应尽数歼戮。此等匪徒，既经蓄发，转易识认，实属自留证验。常青等攻剿时，但见有蓄发者，即系党恶逆徒，便概行歼擒，转可不致漏网也，等因。钦此。钦遵各到臣。

查台湾贼匪蔓延，虽经各路官兵剿杀，而蚁聚蜂屯，往来莫定。前因附近府城各处贼伙，经臣常青节次剿捕，料其不敢再来。乃于臣等起兵出城之后，又复纠众抗拒。是以暂且扎营，并再请添兵，以期痛加歼戮。（朱批：尔等歼戮者何贼？何处？不过城外观望而已，朕甚忧之。）现在仍由附近搜拿，将来大兵远出，无虞后顾。诚如圣谕，肃清肘腋，方可乘锐前驱。今自六月十八、二十八等日，复将附郡南潭等处之贼剿杀数次。旬日之内，尚知畏避。但现值水漫沙淤，道路难行。贼犹踞险窜伏，未得追捕净尽。而诸罗又被贼攻扰，所有应援官兵，接济药铅、粮饷，俱自府城运往，不可稍有疏虞。臣等悉心筹度，此时先以速援诸罗为要，是以连日派拨官兵前往。（朱批：既知此，尔等何不统领大兵前去？）并前此所派潘韬之兵，已共派往兵五千名，且有总兵、副、参以下等官带领，定可剿除逆匪，保守诸罗。兹查续添之闽省兵二千名，于六月十九、二十一等日，先到粤省兵二千名，惟配渡兵八十五名，船一只，尚未到来。余已于七月初七

日齐到军营。再，参赞蓝元枚统领北路官兵，亦以仅能守御，不敷攻剿，是以奏请添兵。臣等俟请添各兵陆续到齐，即相机前进。惟有遵旨围拿贼党，不但防其逸入内山，并于溪河海口，严密堵守，毋使漏网，并一经擒获贼首、贼目，即随时驰奏，不敢稍迟。除阵亡之千总卢思聪等应行赏恤之处，容臣等查明一并咨部核办外，所有奉到谕旨缘由，谨合词恭折复奏，伏乞皇上睿鉴。谨奏。

乾隆五十二年七月初九日。

乾隆五十二年七月二十七日奉朱批：所办不过遮饰而已，甚不合机宜，徒增愤懣而已。钦此。

谕钦差湖广总督常青等速奏近日战况

乾隆五十二年七月二十七日 台湾档

大学士和，字寄钦差湖广总督将军常、闽浙总督李、福建水师提督参将（赞）蓝、陆路提督参赞柴，乾隆五十二年七月二十七日奉上谕：

据常青等奏，搜剿南潭贼匪情形，并严催应援诸罗官兵一折，内称六月二十八日，令侍卫乌什哈达等督率官兵义民，前往南潭搜捕，打死贼数十人，贼遂败退。因该处沟径崎岖，不便追赶，遂即收军。至派赴诸罗官兵，节据游击杨起麟禀报，魏大斌现驻鹿仔草，田蓝玉于六月二十九日前抵新店。该镇将等尚未能径达诸罗，已三次严催魏大斌、田蓝玉，务即通知柴大纪，速由鹿仔草前进，内外奋击。至诸罗，现未解围，未得放心南下。又沙路淤陷，亦须雨水稀少，方可前进等语。所办不成事体，已于

折内批示。

昨询据常青赍折差弁称，南潭距桶盘栈大营，止有五里。已谕令常青等速带官兵，亲赴南潭，将贼目庄大田先行剿除，以清肘腋。又询据该弁称，南潭贼匪于屯据处所，挖有沟壕，埋藏竹签，是以官兵未能前进。而本日常青亦称，该处沟径崎岖，沙路淤陷，不便追赶。但贼匪虽挖沟壕，不过十余里，止系为自守之计，并非险阻。即官兵结营拒敌，亦岂无沟壕自卫？此乃行军之常事。常青等统领大兵，其桶盘栈营盘，与南潭相距数里，何难督率兵民，填平沟堑，奋力攻击。况官兵剿贼，即遇深沟高垒，劲敌当先，亦将鼓勇争先，直前催破，岂有见此么磨草窃挖有沟壕，近在目前，即畏葸不进，日久相持，株守坐视之理！前以为南潭离大营尚远，故屡次谕令该将军等舍南趋北，合兵进剿。今南潭近在肘腋，常青等自应先将庄大田等痛加剿洗，不使负隅窥伺，再行统领大兵，直趋北路，与蓝元枚、柴大纪会合一处，以官兵全力擒拿贼首林爽文，庶可收捣穴擒渠之绩。况续调兵丁业已陆续进发，计此刻自己全抵大营，声势倍为壮盛。府城于未经添兵以前，久经保护无虞，今又添此多兵，更可无虞疏失。今常青等接据柴大纪请援之信，常青、恒瑞二人内，自应酌留一人，带兵固守府城营盘，一人统领大兵，径赴诸罗，会合柴大纪、蓝元枚，使兵势联络，南北信息相通，直捣贼巢，擒拿首逆，方合机要。乃始则仅派魏大斌带兵千余前往，及魏大斌在鹿仔草被贼拦截，又派田蓝玉带兵一千接应，仍不能直抵诸罗。似此零星派拨，于事何益？且常青等如见南路贼匪屯聚窥伺，实有难以远离郡城，不能遵旨前往北路之处，亦应将该处情形据实奏闻。而该将军等作何主见，或拟先清南路，或不能南下，已在彼酌筹布置，遵旨统领大兵，前往北路会剿，亦应将该处情形，及如何定

夺筹办事宜，详晰声叙。乃自驻扎台湾以来，业经数月，既未那（挪）移尺寸，而于如何运筹决胜，擒杀贼匪，及定于何路进兵之处，亦总未据该将军等奏报。似此株守因循，旷日持久，何日可以集事？乃仅以申办贼犯，开单具奏，此等事有何紧要？岂得为奋勇之功？常青等宁不知羞愧耶？

又据奏柴大纪禀称，贼匪于二十及二十四、五等日，攻扰县城，经官兵施放枪炮，奋力抵御，歼毙贼千余人，打死贼目百余人。又据诸罗县禀报，贼匪于二十八日扛抬枋车，围攻西北两门营盘，经官兵义民奋力攻杀，用炮击碎枋车数座，打死贼二、三百人，贼始退散等语。看来柴大纪处，当南北之冲，四面受敌。柴大纪又素为贼所畏惮，是以屡次侵扰，百计攻城，思欲围困柴大纪。而该参赞屡次督率官兵义民，奋勇抵御，且杀死贼匪甚多，诸罗保守无虞，实属可嘉。柴大纪著赏给御用玉扳指一个，大荷包一对，小荷包二对，以示奖励。

本日巳刻，又据常青等奏到，接据诸罗县禀报，再行添派官兵协剿各折，所办不过遮饰，总不合机宜，亦于折内批示。据常青等称，柴大纪望援甚殷，自以多兵应接为善，是以再行添派参将特克什布，带兵一千四百名，前赴鹿仔草，速达诸罗。又称台湾贼匪蔓延，屡经剿杀，仍复纠众抗拒，是以暂且扎营，并请添兵，以期痛加歼戮，将来大兵远出，无虞后顾等语。今既添兵亦将到齐，尔等进剿究在何时何处？若似此东拨西调，零星用去，又将以兵少为请，坐待添兵乎？柴大纪驻扎诸罗，屡被贼人围扰，其势甚为着重。常青等既知其望援甚殷，早应亲统大兵，前往援应，歼杀贼匪，会合进剿。况常青、恒瑞俱在府城营盘，即该处亦属紧要，不能一同前往，若以一人留守，以一人统兵前往诸罗援应，有何不可？岂伊二人必须同在一处，不能分身耶？

乃计不出此。常青、恒瑞惟知一同坐守营盘，仅以派镇将等，前后带兵五千名前往接应，以致兵单力弱，途中遇贼拦截，兵丁受伤，至今未能直抵诸罗助力攻剿。而常青等株守营盘，惟知奏请添兵。究竟所歼戮者系何处贼匪？杀贼能有几人？不过在城外因循观望，徒增朕南顾之忧，实深烦懣。设使诸罗稍有挫失，谁实当其咎耶？为今之计，常青、恒瑞应遵照节降谕旨，酌留一人固守营盘，其一人竟当乘官兵新到锐气，亲身统领，速赴诸罗，会合进兵，毋得再事因循，坐失事机，以致自罹咎谴也。

又据常青等奏，据柴大纪等禀，二十五日贼目蔡福被炮打伤，抬回打猫街。二十八日贼目叶省被炮打中右腋，抬回牛稠山毙命，现据各庄民奔报属实等语。所奏殊未明晰，贼目蔡福、叶省，既被官兵放炮打伤，又抬回打猫、牛稠等庄，似该处村庄已为贼所占据，其庄民与贼匪显属一党，而贼目等伤重毙命，庄民又复赴官奔报。若该处村庄并非贼党，则贼目受伤，即不应抬至彼处。若该庄民人业经从贼，又不应赴官奔报。乃贼目受伤既抬回各庄，而庄民又以贼目伤重毙命奔报，岂有贼与义民同居一庄之理？若该庄民人并未从贼，俱属义民，是该处即不应有贼匪屯占，何以魏大斌等带兵到彼，又复被贼拦截？殊不可解。究竟该庄民人是否贼党，抑系义民，着常青等查明具奏。并着传谕李侍尧，试思常青等所奏，何以糊涂若此。

至柴大纪在诸罗督率堵剿，固甚为得手，但伊自五月二十八日拜折以后，从未据有续奏，朕悬盼甚切。着柴大纪务将近日打仗得胜，及魏大斌等于何日会合攻剿情形，迅速驰奏。又蓝元枚前奏称，札会柴大纪，由东螺、西螺等处进攻斗六门，会剿贼匪。自前次奏到后，已阅十余日，亦未据续有奏报。蓝元枚现在鹿港，曾否打仗杀贼，及究于何日订期，由东螺、西螺一带，进

攻斗六门，并着蓝元枚速行驰奏。将此由六百里加紧各传谕知之。仍着常青等将南潭贼匪曾否先行歼除，及定计酌留何人守营，何人于何日统兵前赴诸罗，接应柴大纪会合攻剿之处，一并迅速驰奏。并着李侍尧将台湾近日剿捕情形，一得地方官稟报，随时速奏，以慰廑注。

钦此。遵旨寄信前来。

谕钦差湖广总督常青等务宜悉心

筹划设法前进

乾隆五十二年七月二十八日 台湾档

大学士和，字寄钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年七月二十八日奉上谕：

昨据常青等奏到，副将林天洛、参将廖光宇病故，〔原缺〕^①业经委员署理。但现在台湾剿捕逆匪，正在需人之际，若由部推补，前抵台湾，未免稽迟，而且于打仗出力人员，不足以示鼓励。着传谕常青，即于军营带兵人员内，择其奋勇出力者，不拘广东、浙江及福建本省，即遴选二员补授。行军之际，全在得人，不妨通融拔补，以示鼓励，原不必拘定本省也。即嗣后遇有缺出，常青等俱应就随征出力人员，酌量拣补，毋庸拘定成例，先行委署，听候部推，俾勇敢员弁知所奖励。

再，昨据常青等奏，贼匪将道路削小，田水堵满。贼人屯扎

^① 据《钦定平定台湾纪略》（稿本）卷二十八增补。

之所，俱有蔗园深沟，阻碍去路等语。贼匪负隅抗拒，又将道路削小，放水淤陷，冀图阻碍官兵，不能前进。但道路既经削小，官军人马难行，则贼匪行走自亦不易。乃数月以来，贼人四出侵犯，动称万数，是皆由何道而行乎？而官兵辄以道窄沙淤为辞，岂贼能行，而官军即不能行，有是理乎？即夏令雨水较多，尚可藉口。计此旨到日，已届深秋，正潦尽潭清之候，道路自己已经干涸。且续调兵丁俱已到齐，该将军等正当乘其锐气，亲自统领，奋力进剿。况行兵之道，贵在随宜制变。即遇崎岖险阻，亦当设法开通，直前摧破，岂得因小有阻隔，即株守坐待之理？若因贼匪鬼蜮伎俩，削小道路，放水淤陷，即束手无策，一筹莫展，则从前平定金川时，跬步皆山，又将何以进兵破贼耶？常青等务宜悉心筹划，设法前进，以期迅速藏事，断不可因循坐待，以致师老力疲为要。

至蓝元枚自前次奏到各折后，已逾半月，而柴大纪两月以来，并无续有奏报，朕日夕悬盼，实深烦闷。该参赞等在彼如何打仗杀贼情形，务即随时迅速驰奏，勿再迟延。并着常青等将如何设法进攻之处，一并速奏，以慰廑注。由六百里加紧者，亦以六百里加紧奏来。

钦此。遵旨寄信前来。

福建巡抚徐嗣曾奏照料调兵配渡及
飭属赶运军需折

乾隆五十二年七月二十八日批 军录

福建巡抚臣徐嗣曾跪奏，为奏闻事。

窃照本月初一日钦奉谕旨，增调浙江、广东等处满汉官兵共一万一千名，前赴台湾会剿。督臣李侍尧现驻厦门，所有粤兵配渡事宜，均经就近督办。其浙江满兵一千五百名，经督臣酌定，由浦城陆路送至蚶江登舟，赴鹿耳门较为便捷。臣飞飭沿途将人夫船只等项，妥为预备，派委粮道凌广赤及署臬司戚蓼生，分赴建宁、延平等处，往来弹压。兹浙江满兵分作六起趲行，其头起兵二百五十名，据报于十三日已到延平，约十八日可抵省城。以后各起，俱间日接续而至。臣接送一、二起后，即先驰赴蚶江料理配渡，以期迅速前进。至闽省、粤省先经预调兵四千名，已经全抵台湾。其续调粤兵五千五百名，本月下旬俱可到厦，乘风迅渡。统计八月上旬即可齐进鹿耳门及鹿仔港两处。当此大兵云集，粮饷、火药等项甚关紧要，节经督臣悉心预筹，臣严飭各属，勒限转运，不致迟误。其浙江饷银，已过省二十万，米石已到泉、厦者，七万有余。火药、铅弹等项，亦俱源源而至。臣于陆续到省时，亲加照料，迅飭押运前进。江西米石，由光泽县滩河拨载，现飭延建邵道元克中，在该处专司督办，设法赶运。窃计兵威倍加壮盛，军需已甚充裕，秋凉气爽，定可克日蔽功。伏读节次上谕，总以招抚胁从，解散贼党为第一要务。无论从贼打仗，及被贼驱使者，一经弃械投诚，即为良民。在军营多一归顺，即贼匪少一党恶等因。仰见圣明指示机宜，无微不烛。臣查逆匪蜂屯鸟合，虽云日积日多，其中因劫掠焚庄被胁强从者，实居大半。即如淡水一路，近据副将徐鼎士、淡防同知徐梦麟等禀报：访知白石湖山内奸良错处，官兵往捕，始初竟敢掷石抗拒。该副将等商同剿抚并用，先为剴切示谕，随即派委文武员弁，带领兵役及泉州义民人等，步行上山，开诚抚慰，即有扶掖归顺者三千余人。细询情形，始知贼本不多，见百姓下山，余匪奔窜，当即擒

获要犯彭喜等数名。又于鹿寮、金包里等处，招出难民千余人，护送归庄，赶种晚禾。徐鼎士现已带兵前驻大甲溪，搜剿彰化贼匪等情。经督臣饬拨饷银五万两，解往为赏恤义勇难民之用。兵粮宽裕，民心愈觉坚固，就淡水情形而论，已不出睿谟炳照之中。推之南路，如鹿仔港难民聚集甚多，自五月初旬运到米薯，设厂煮粥，陆续赈给，所全活者不下数万人，无不感颂皇仁，欢呼载道。复经提臣蓝元枚就难民内勇壮者挑作义民，以助战守，实属一举两得。至台湾府城，前将军臣常青初到之时，即奖赏乡勇、义民，广为召募，至今防守协剿，深得其力。惟离城数里之外，即有贼匪，往来啸聚，民人被胁者较多。情形与北路大同小异，招抚安插，自应倍加慎重。今常青等叠奉上谕，明切指示，自必遵旨，妥为筹办。臣于臬司李永祺起程时，即将现奉谕旨筹办招徕之法，谆切面嘱。于到军营时，随同将军常青等，细酌该处情形，相机办理，务使良民归顺，贼匪势孤力竭，指日就擒，以仰副圣主谆谆诰诫之至意。所有料理官兵到省前赴蚶江配渡，及台湾抚恤难民各缘由，臣谨恭折驰奏，伏乞皇上睿鉴。谨奏。

乾隆五十二年七月十六日。

乾隆五十二年七月二十八日奉朱批：览奏俱悉。钦此。

谕闽浙总督李侍尧速奏招抚及

调兵作战情形

乾隆五十二年七月二十九日 台湾档

大学士和，字寄闽浙总督李、福建水师提督参赞蓝，乾隆五

十二年七月二十九日奉上諭：

据徐嗣曾奏，据副将徐鼎士、同知徐梦麟稟报，白石湖山内奸良杂处，经官兵往捕，始犹掷石抗拒。随派文武员弁及泉州义民人等，上山抚慰，即有扶掖归顺者三千余人。细询情形，始知贼本不多，见百姓下山，余匪奔窜。又于鹿寮、金包里等处招出难民千余人，护送归庄，赶种晚禾。徐鼎士现已带兵前驻大甲溪，搜剿彰化贼匪等语。台湾贼匪四处屯聚，虽日积日多，究系乌合之众，其中被贼迫胁勉强听从者，正复不少。是以节经降旨，令该将军等广为招抚，解散贼党。今白石湖山内贼匪，经徐鼎士带兵搜捕，并令兵役义民人等开诚抚慰，即有扶掖归顺者三千余人。鹿寮、金包里等处，又招出难民千余人。俱经该副将送归各庄安业。可见贼党虽众，如果能设法招徕，剿抚并用，无难即行解散。此事徐嗣曾既得该副将稟报，则李侍尧驻扎厦门，岂有不得信息之理？何以并未据该督奏及？

又，蓝元枚前于六月二十五日奏到折内，只称据徐鼎士稟报，淡水白石湖贼本无多，已经拿获从贼之参革守备彭喜，解送督臣究办，贼匪逃入金包里后山等语。而于该副将招抚归顺之三千余人，及鹿寮、金包里难民千余人，护送归庄之处，并未奏及。该参赞驻扎鹿港，距淡水更近，何以于此等情形，并未详晰陈奏？著传谕李侍尧、蓝元枚，将曾否续得徐鼎士稟报，何以未经具奏，及此后南北各路有无续行投顺民人，一并据实复奏。至徐鼎士带兵驻大甲溪，搜剿彰化贼匪，前已谕令李侍尧拨兵一千名接济。徐鼎士所拨兵丁，于何日配渡前往，及近日蓝元枚、徐鼎士在鹿港大甲溪等处剿捕杀贼情形，并著李侍尧、蓝元枚迅速驰奏，以慰廑注。将此由六百里加紧各谕令知之。

钦此。遵旨寄信前来。

大学士阿桂复奏增兵及令福康安

先行通筹全局折

乾隆五十二年七月二十九日批 军录

臣阿桂、臣毕沅跪奏，为恭折复奏事。

本月二十四日接奉上谕：本日据常青等奏，派令总兵魏大斌、副将詹殿擢带兵一千五百名，前往诸罗救援。魏大斌带兵行至盐水港，又留兵五百名防守，而鹿仔草等处贼匪四处滋扰，魏大斌竭力抵御，弁兵阵亡受伤者甚多。常青又添兵一千名，赴盐水港一带接应等语。所办著著皆错，现在降旨严行申飭，并令该将军等统领大兵，径趋北路，会合蓝元枚、柴大纪，以全力直捣大里杙贼巢。常青此时漫无主见，现已传谕福康安迅速前来行在，面受机宜，驰往督办矣。又据刘峨天津县查获福建龙溪糖船内水手赵荣一名，澄海县糖船内水手林光一名，与常青咨缉台湾逸匪姓名相同。及细加审讯，俱系顶名，年岁籍贯亦属不符等语，实属不成事体。台湾与天津远隔数省，即有逸匪，岂遽能逃匿该处勾结为匪之理？且船户等俱系身家殷实，天津行户皆为出结，更属可信。刘峨不顾事理轻重，率行拘讯。将来各海口商人闻风畏惧，裹足不前，成何事体！现已降旨将该督交部严加议处外，著将本日常青、刘峨奏到各折，并申飭常青、恒瑞谕旨，及近日常青、蓝元枚奏到各折，所降谕旨，一并抄寄阿桂、毕沅阅看。阿桂熟谙军旅，其意以为何如？即就所见，据实复奏。钦此。臣等跪读之下，知台湾剿捕贼匪事宜，常青等办理不得把握，又致上烦睿虑。而圣明指示，洞中机宜，臣等实深钦佩。查

台湾远隔重洋，臣阿桂于该处情形，平素实未能稔悉，自上年冬底逆匪林爽文等聚众滋事后，臣在军机处阅看奏折，并留心询问，兹又蒙寄信谕旨及近日常青等奏到各折，发交阅看。臣详细恭阅，谨就愚见，遥为揣度。

缘台湾地方，西临大海，东凭大山。大山之东，系生番居住，为民人所不到。大山迤西之麓，则现为贼匪全行占据。山麓之下，以至滨海平衍地方，始为建设郡县处所，官兵驻扎即在于此。此时贼匪占据山麓，官兵进剿，势须仰攻，无由察其虚实。而贼众居高临下，且其中如水沙连、虎仔坑、斗六门等处，南北又在在可通，足以伺官兵之隙，前邀后截，四处滋扰。若徒拨兵堵御，则山径丛杂，不但现有之兵不敷分派，即再添一倍之兵，恐仍不能一一尽堵。（朱批：常青等所办，正以此中贼计耳！）现在惟将紧要地方，如郡城、诸罗、鹿仔港等处，先为驻兵防守。而防守之兵，必察其力保固，实可无虞，再选择可战之兵二、三万，进逼贼人巢穴，捣其要害。或两路夹攻，或全力专注。但得官兵连胜一两次，贼人胆落，其党伙附从，当不攻而自溃。伏读节次谕旨，实已烛照靡遗，乃蒙垂询及臣，以臣曾膺军旅，令就所见，据实复奏。臣再四思维，方今国家全盛之时，帑藏充盈，威棱远播，谅此么磨草窃，岂能久肆鸱张？惟台湾现有兵丁，除分守府城等处外，似尚不敷剿捕，且其中亦少可用之兵。在初办时，若深悉贼匪情形，就本省兵略为多调，趁贼情惶惑之际，未尝不可即就扑灭。今则贼人已渐知战守，台湾复被占据过半，从贼者为数已多，实又有不得不增添兵力之势，此事现奉旨，令福康安前往督办。福康安近年经历军务，声威已著，各省兵丁情形，均所深悉。计臣此折到日，福康安亦可驰抵行在。臣愚以为，此时似应令福康安先行通盘筹划，（朱批：俟其到

时，自当详酌。）台湾现有兵丁若干，尚须添兵若干，及何省兵丁于山路崎岖之地用之，方可得力。虽距闽隔远一两省者，亦准其檄调备用，或竟调惯于跋涉山路之黔、楚兵各一万，合之粤兵万余，兵力充裕，贼必指日授首。虽目下似稍迟一、两月，而功成返速矣。

至常青等办事日浅，以致胸无主见，应俟福康安到彼后察看，如该处有需用常青等之处，即留于该处，以备分路带兵。如无所需用，即奏闻请旨定夺。其兵丁中有患病受伤无用者，并令撤回内地，以节粮饷，而归实用。此臣阿桂愚见所及，谨据实具奏。是否，伏候圣裁。至臣毕沅因在豫省距闽遥远，于台湾剿贼情形，不能详悉，兹跪读谕旨，知逆贼尚稽歼灭，不胜发指。现蒙皇上圣谟远运，烛照如神，谅此乌合匪徒，无难剿除净尽。臣即得仰窥睿算，而常青、刘峨等未权事理轻重，办理失当，臣职任封圻，恭聆圣训，惟有诸事倍加留心，益增奋励。所有接奉谕旨缘由，理合恭折复奏，伏乞皇上睿鉴。谨奏。

乾隆五十二年七月二十四日。

乾隆五十二年七月二十九日奉朱批：览奏俱悉。钦此。

福建水师提督蓝元枚复奏筹划进攻事宜折

乾隆五十二年八月初一日批 军录

福建水师提督参赞奴才蓝元枚跪奏，为遵旨复奏，仰祈圣鉴事。

奴才于七月初五日奉到谕旨，蓝元枚带领浙省官兵，由蚶江配船开洋，此时自己早到鹿港，即将剿捕情形迅速奏闻。钦此。

窃照鹿港离诸罗九十余里，自奴才于五月二十日到鹿港，诸罗县属之铁线桥等庄，俱已被贼烧毁。彰化县属之东螺、西螺，亦被贼占据。奴才屡经札商柴大纪相机夹攻，缘道途梗塞，系由海道递至盐水港，转递诸罗，至今尚未接准柴大纪复札。鹿港系四面受敌，所恃周围二十余里，俱有村庄。若贼来扰鹿港，周围村庄得以会合应援。但贼情狡獪，自五月至今，虽不敢直扰鹿港，屡就各处小庄滋扰焚烧，意在断鹿港应援之路。是以奴才到鹿港之后，即派拨官兵在番仔沟一带安设营盘，增添堆卡，又另拨官兵义民往二林、大突沿海一带堵御，遥为诸罗声援。

奴才细查彰化县属各贼巢内，约有一、二十万人，多系漳州及同安之人。内中情愿作贼者，不及十分之一。其余或被胁相从，或贪图跟随贼伙焚烧村庄，抢掠财物，是以每出蚁聚至一二万人。奴才于六月二十六日奉到上谕：其被贼胁从之村庄百姓，应先行晓谕，令其速行改悔，等因。钦此。奴才当即恭录上谕，敬谨遍行张挂晓谕。遂于数日之后，有耆老人等，陆续从各贼巢出来求见，痛哭苦诉，并无从贼，因家属被贼拘留，未能遽出。奴才皆逐细开导，令其遍谕众人，俟官兵一到大里杙各贼巢，务须协同擒杀贼匪，立功自效。各人无不欢欣碰头，知有再生之路。（朱批：好。）奴才细察贼伙虽众，易聚自亦易散。但鹿港附近贼巢，若大兵径赴斗六门，恐道途阻塞，一时难与柴大纪会合，并虑贼匪乘虚滋扰。奴才是以不揣冒昧，业于六月十三日恭折奏恳添兵五千名，如蒙圣恩允准，（朱批：已添兵，命速往，想今亦到矣！）计七月半后官兵自可陆续到鹿港。兵力既厚，便可分作二路，一由埤头攻杀东螺贼匪，扎营二八水，一由二林攻杀西螺贼匪，就该处扎营。自西螺至斗六门仅十余里，即可乘势攻击斗六门，似于事机有济。（朱批：已有旨，令常青率大兵向北夹

攻。)然贼匪诡计多端，奴才惟有详加筹度，务出万全，迅速生擒贼首，剿灭匪党，以仰慰圣怀。所有奴才筹划剿捕情形，理合恭折复奏，伏乞皇上睿鉴。谨奏。

乾隆五十二年七月初六日。

乾隆五十二年八月初一日奉朱批：固当持重，亦不可误进剿之宜。然目下当以通诸罗为急务。钦此。

福建水师提督蓝元枚奏诸罗周围战情片

乾隆五十二年八月初一日批 军录

窃照奴才因诸罗贼匪滋扰，道途梗塞，即分派官兵，各路牵制，使贼匪回顾巢穴，以解其势，业将一切情形，奏闻在案。仍四路差人侦探贼巢踪迹，于七月初二日探事人来报，贼目林领从诸罗回来，纠王田、犁头店等庄贼伙，初三日要来焚烧阿辣等社。奴才随知会总兵普吉保，带游击裴起鳌兵八百名，在阿夷庄遥为声援堵御，以防快官庄贼匪出来拦截。奴才亲带游击琢灵阿、穆腾额，兵八百名，由阿辣社前去堵杀。行至中寮溪州，见贼匪约有千余人，拦途抗拒。续有王田庄贼匪千余人，亦赶来鸠集一处抵敌。奴才亲率官兵奋勇向前，施放枪炮，自辰至未，贼匪始从犁头店逃散。奴才因犁头店一带俱是贼巢，未便远追。计枪炮打毙贼匪约一百余人，（朱批：不痛快。）官兵俱无伤损。又埤头庄经奴才派拨官兵设卡，带同乡勇一千名防守。亦于初三日有贼目庄好，纠东螺贼一千余人，到埤头焚抢村庄。经兵民用枪炮打毙十余人，杀死七人。查义民阵亡一名，被枪伤三名，已先酌量赏恤。似此贼匪虽蔓延肆扰，但鹿港周围村庄，均已联络设卡，官

兵义民亦皆奋勇向前，每逢攻杀，俱得胜仗。（朱批：好，勉为之。）奴才惟随时相度机宜，务期迅灭贼匪。所有杀败贼情，理合附片奏闻。伏祈圣鉴。谨奏。

乾隆五十二年七月初六日。

同日①奉朱批：览。钦此。

福建水师提督蓝元枚奏大肚溪战情片

乾隆五十二年八月初一日批 军录

再，奴才于六月二十一日，亲带官兵乡勇由番仔沟、鹿仔厝一带，巡查搜捕贼匪。行至大肚溪，遇贼数百人。奴才随令官兵、乡勇施放枪炮，贼即退走，打毙贼匪十余人，生擒郑球、姚塞三名，讯非贼目，于二十四日恭请王命正法示众，理合附奏。

乾隆五十二年七月初六日。

同日②奉朱批：览。钦此。

谕钦差湖广总督常青等应南北 夹攻速报战情

乾隆五十二年八月初一日 台湾档

大学士和，字寄钦差将军湖广总督常、闽浙总督李、参赞提

① 指乾隆五十二年八月初一日。

② 指乾隆五十二年八月初一日。

督蓝、提督柴，乾隆五十二年八月初一日奉上谕：

据蓝元枚奏，五月二十日到诸罗县属之铁线桥，彰化县属之东螺、西螺各庄，俱被贼烧毁占据。前札商柴大纪夹攻，尚未得复信，已于鹿港增添堆卡，遥为诸罗声援。至彰化县属各贼巢内，约有一二十万人，内中情愿做贼者，不及十分之一。前经遵旨晓谕，有耆老人等，各从贼巢出诉，并未从贼，当即逐细开导，令其杀贼立功，无不欢欣碰头，知有再生之路。计七月半后，添调官兵可到，便可分作二路，一由埤头攻杀东螺贼匪，一由二林攻杀西螺贼匪，即可乘势攻杀斗六门等语。已于折内详晰批示。

彰化等处贼匪屯聚，虽据称有一、二十万人，但系被贼用威迫协勉强听从，不过乌合之众。今经蓝元枚传旨晓谕，即有民人从贼巢投出，自诉并非贼党。该参赞详加开导，谕以擒杀贼匪立功自效，皆知欢欣鼓舞，共庆更生。是贼匪虽众，易聚亦易散。若能设法招徕，遍行开导，则被贼迫胁附从者，自当纷纷投出，贼党日就解散。

至蓝元枚与柴大纪札商会攻，因道路阻隔，尚未得有复信。鹿港兵力稍单，未能前进。但蓝元枚所请添调兵五千名，早经如数拨往。前据李侍尧奏，漳州有眷属兵二千，已经配渡，其余兵三千，此日自己陆续全抵该处。蓝元枚正当乘此兵力厚集，速行进剿。以此时情形而论，当以打通诸罗，接应柴大纪为急务。

至常青处，已节次降旨，令其酌留一人，固守府城营盘，其一人速统大兵，直趋北路，前抵诸罗，会合进剿。今南北两路添调官兵，自己陆续到齐，正应乘其锐气，及锋而用。常青竟当令恒瑞督率兵民，驻守营盘，悉力捍卫府城，牵缀贼势。该将军亲自统领大兵，自南而北，径趋诸罗。蓝元枚亦应令普吉保固守鹿港，该参赞亲统大兵，自北而南，则东螺、西螺、斗六门之贼，

皆可顺便剿灭，接应柴大纪，与常青会一处，使声势联络，以大兵全力奋勇夹攻，擒拿贼首林爽文，剿除伙党。若渠魁就获，则其余贼匪自可纷纷解散。而被胁从贼民人，更当相率投诚，不呼而集，无难迅速蕲事。常青、蓝元枚此时固当持重，但于进剿机宜，不可坐失。况府城于未添兵以前，即已保护无虞。其鹿港现据蓝元枚奏，周围村庄均已联络，官兵义民，奋勇向前。今若令恒瑞、普吉保在彼带兵，分驻保守，自可不致疏虞。岂有添此重兵，尚复因循坐待，竟为贼所牵缀，而不乘势急行进剿之理，又请添兵乎？

又同日据李侍尧奏，接据台湾同知杨廷理禀称，郡城北路运道稍通，贼目蔡福最为凶悍，前攻犯诸罗，被柴大纪用炮击毙，所用枋车亦被击破。彰化附近贼巢各庄民人，闻官兵义民齐集大甲，多有私自奔来请教等语。柴大纪驻扎诸罗，督率官兵义民，竭力堵御。贼匪屡次攻扰县城，俱被官兵杀退，击破枋车，歼贼甚多，并将贼首林爽文用事头目蔡福等，用炮击毙，贼首为之夺气。此事前据常青等业经奏到。柴大纪奋勇出力，实属可嘉。已颁赏搬指、荷包，用示奖励。但柴大纪自五月拜发奏折以后，总未据续有奏报，朕心实切盼望。前常青等所派魏大斌、田蓝玉接应之兵，在鹿仔草被贼拦截，此时自己打通道路，并力前进。柴大纪得此兵力援应，自更为得力。近日如何杀贼攻剿情形，著柴大纪迅速驰奏。

至彰化附近贼巢庄民，一闻官兵到彼，即自行投出，奔请救援。可见民情皆知贼匪虽众，终归扑灭，自属极好机会。该将军、参赞急当妥为抚驭，广行招集，并开诚晓谕，令其杀贼立功。而常青、蓝元枚尤应乘此机会，速统大兵，会合进剿，以期迅奏肤功。将此由六百里加紧各传谕知之。仍著常青、蓝元枚，

将定于何日统兵前赴诸罗，会合柴大纪，及近日攻剿得胜情形，迅速驰奏。并著李侍尧续得地方官禀报，并南北两路打仗杀贼信息，仍即随时速奏，以慰廑注。

钦此。遵旨寄信前来。

闽浙总督李侍尧奏台地近日情形折

乾隆五十二年八月初一日批 军录

闽浙总督臣李侍尧跪奏，为台地情形事。

臣接奉上谕：柴大纪于五月二十八日奏到后，并无消息。朕心日切悬注，已谕令常青等，一得情形，即行驰奏。并令蓝元枚将梗阻道路之贼匪先行剿散，以通信息。又李侍尧驻扎泉州，见闻切近。一得禀报，即加紧驰奏。钦此。仰见我圣主宵旰焦劳至意。

查柴大纪在诸罗自六月中旬被贼攻围，日夜拒守，以少击众，节经常青遣魏大斌、田蓝玉、张万魁等率兵往援，业经常青具奏。至蓝元枚数日前抄录折稿寄来，亦称官兵未能直达诸罗。是以先攻大肚溪以分贼势，则诸罗之贼，自应减少等语。是蓝元枚亦尚未将诸彰道路疏通。近日台湾各官禀报甚少，未有续得信息。惟同知杨廷理禀称：郡城北路运道稍通，薯粒大麦间有数船，俱自北淡水载来。是以粮价稍减。探得贼攻诸罗，有头目蔡福被炮击死，林爽文为之大哭。又贼用枋车来攻，蒙以湿被，亦被炮击破数辆等语。（朱批：二事已知，但柴大纪信息盼望之亟。）查中路贼目有蔡福、叶省、张牵、李阿七等，而蔡福混号辽东仔，最为凶悍。前据胡番供称，林爽文曾封为提督军门，是该匪系逆首得力之人。今既中炮身死，而所用枋车又被击破，是贼众

虽屡次急攻，实俱遭杀败，（朱批：柴大纪实可嘉之至。）祇恃其乌合之多，尚未退散。魏大斌等并力前进，日内想已打通道路，可以相机剿杀。

又据北淡水同知徐梦麟禀称：彰邑附近贼巢各庄，均有良民被贼钳制，不得已许以所收田稻加二抽分，始免杀戮。今闻官兵义民齐集大甲，多有私自奔来求救等语。是各庄良民甚多，即伊等已被胁从，（朱批：是好机会。）预恐官兵破贼巢后，难以分割，先来请援，以见其并非从贼，亦可见民情皆知贼终必败，是以早自投明。又据禀称：拿获陈贺一名，系被贼逼胁入伙，在大里代代春城墙，求林爽文之父林奇出了伪令，来至军工寮讨欠，临出时有林旺托伊顺便代接家眷进大里代居住等语。是从贼之人，亦惟恃大里代巢穴为苟延旦夕之计，此皆极好消息。

今奉旨续调之粤兵四千，已先到一千，于本日放洋前往台郡。漳兵二千，亦已登舟，不日可到鹿港。其余浙、粤之驻防满兵三千，及粤省绿营兵三千，计月内总可到齐配渡前往。定当逐路剿杀，不难迅速蒧事矣！谨将近日台地情形缮折奏〔闻〕，伏乞皇上睿鉴。谨奏。

乾隆五十二年七月十八日。

乾隆五十二年八月初一日奉朱批：知道了。钦此。

闽浙总督李侍尧奏前审廖东情形折

乾隆五十二年八月初一日批 军录

闽浙总督臣李侍尧跪奏，为查明复奏事。

窃臣于本月十六日接奉本月初三日上谕：以柴大纪拿解送京

之胡番、连清水二犯，已申明正法。廖东、阮赞二犯，狡猾不认，令臣查明情节具奏。臣查此案先经柴大纪咨报，正月中该镇领兵收复诸罗，二十一日在外三部竹地方与贼打仗，生获廖东一名，并随身红旗一面，写有“护驾大将军”字样。二十二日到田洋打仗，又获伪军师侯辰等因。经前督臣常青具奏，奉旨将廖东、侯辰解京。臣到任后，接柴大纪续咨，又有拿获之伪千总阮赞，伪军师张请先，伪先锋吴映三名，并称各犯俱系林爽文封为伪官，同往攻陷诸、彰二邑。上年十二月到盐埕打仗败回，后退守诸罗。至本年正月二十二日，官兵前来，复敢执旗对敌，贼走被擒，供认不讳等因。是廖东等俱系从贼抗拒官兵之犯，已无疑义。

嗣准提督黄仕简抄录折稿，称侯辰、吴映、张请先患病，先行正法。臣随飞提廖东、阮赞，并续奉旨解京之王启郎、曾锦等去后，四月初旬据台湾道府委员解送廖东、阮赞、曾锦、王大年及王启郎之弟、监生王世昌等七犯前来，并声明王启郎已死，其余各犯供情亦多有不符，乞再行审讯，分别办理等因。除王大年一犯在途病故外，臣随率同司道审讯。胡番、连清水已供认从贼不讳，王世昌供系曾锦巫扳，并称与伊兄王启郎率领义民随官军在大湖等处出力。质之曾锦，亦称巫扳属实，而台湾道府详内，并称该生兄弟实系良民，兼曾随军出力，是以臣即奏明将王世昌、曾锦收禁，暂停起解，俟移询常青查明是否属实，再行办理。今尚未准常青复到，其廖东、阮赞二犯始亦狡展，不肯承认。经臣查出柴大纪原咨，廖东系正月二十一日在三部竹地方临阵拿获，阮赞系二十二日在诸罗城外田洋临阵拿获，指明诘责，始俯首无词。是以将该二犯与胡番、连清水一并解京，今该二犯在京翻异。查供词内，廖东（朱批：亦已正法矣。）称系正月十八日被

拿，阮赞称系二月十五日被拿，是其所供月日，已与柴大纪所咨迥不相符，其得受伪官之处，自因质证无人，故敢狡赖。兹奉旨垂询，谨将当日审讯供情据实复奏，伏乞皇上睿鉴。谨奏。

乾隆五十二年七月十八日。

乾隆五十二年八月初一日奉朱批：览。钦此。

谕闽浙总督李侍尧嗣后有查询

诬误案件不必咨询常青

乾隆五十二年八月初一日 台湾档

大学士和，字寄闽浙总督李，乾隆五十二年八月初一日奉上谕：

据李侍尧奏，查明解京之逆匪胡番、廖东，俱系从贼抗拒官兵之犯，毫无疑义。惟王世昌供，系曾锦诬扳，并称与伊兄王启郎曾率领义民官军打仗出力，现在移询常青查明，是否属实，再行办理等语。胡番、廖东二犯，明系饰词狡展，前之查询，已为失当。已有旨谕该督等，不必再行查询，已将该犯等正法矣。现在剿捕贼匪正当严行查拿之际，因一二犯供词稍有不符，以及避罪狡赖，即彻底查讯，由将军以至将备及兵丁义民等，展转追求，势必心怀瞻顾。将来即遇有贼匪，亦不肯上紧查拿，于军务大有关系。且行军之道，法律贵严，不可稍涉姑息。在平日无事之时，用刑必须慎重分明，虽以枷责之刑，亦应详晰推求，归于允当。若如此等匪犯，业已从贼，即系伙党，即误被杀，亦彼自取，又何必向将弁兵民纷纷查问，致滋疑惧耶？

至王世昌一犯，既被曾锦诬扳，而台湾道府详文内，又称该

生弟兄实系良民，该督即应将王世昌照例办理，不必再向常青等查询。该将军现在督办剿捕事宜，军务倥偬，若因误拿贼匪，往返咨查，恐常青以该督有意搜求，心生嫌隙，必至于公事有碍。此事竟不可问，该督不可不加之意也。将此由六百里加紧谕令知之。

钦此。遵旨寄信前来。

大学士和珅奏进呈金娘等人口供片

附：审讯金娘等人供词笔录

乾隆五十二年八月初一日 台湾档

臣等将福建委员解到金娘等四犯，隔别严讯。该犯惟自认从贼，至林爽文、庄大田等情形虚实，该犯等坚不供吐。加以拧耳跪链，仍执前供。谨先录取供词进呈。谨奏。

附：审讯金娘等四人供词笔录

金娘供：我系凤山县上淡水庄社番，现年四十岁，父母已故，并无兄弟。男人洪标，死有七、八年了，并无生有儿女。我于三十二岁上，因患病，从过番妇宾那学习画符医治。后来我替人治病，又有凤山人林乞，替我编写请神治病的经传。那林乞死过三四年了。今年正月内，有林爽文的大元帅庄大田，因他儿子患病，请我去画符医治，就叫我在打狗港祭神，保佑他们出阵，又替他们治好了几个同伙的人。庄大田封我做女军师。到三月初间，庄大田儿子庄天位，要攻凤山。我就假说有神助战，庄大

田又叫我画符，哄骗众人，称做仙姑。后来攻破凤山，众人越发信我的法术。庄大田每次攻打府城，我带一把剑，在山头念咒打鼓，假说神人保佑，不受枪炮。到四月二十边，庄大田又将林爽文仍札谕给我，封我做一品夫人。其实我还没见过林爽文的面，也没入过天地会。这林红，是前在凤山认我做干姊，学符治病，去年才与我通奸。每次打仗，他也帮着打鼓。是实。

诘问：你既跟庄大田做女〔军〕师，他手下实在共 有 多 少 人；林爽文既有札谕，封你做一品夫人，林爽文那边许（虚）实光景，你必是知道的。再，你会念咒请神保佑，可以不受枪炮，难道庄大田的贼党，就没有被枪炮打死过的吗？你这符咒，再不止传授林红一人。据实供来。

据供：我跟庄大田做女军师的时候，他手下伙党有万余人，共有一百多枝旗。那伙党内，也有胁从的在内。至林爽文，我并没见面，实不知他那边有多少人，如何虚实光景。至我假说请神，保佑众人不受枪炮，其实被枪炮打死的甚多。我只说命里该当，众人也就不疑了。我原没有什么本事，除林红外，再没有传授别人，不敢谎供。

诘问金娘：你既跟着庄大田做军师，你如何就被官兵拿获？现今庄大田处究竟伙党有多少？他有何本事？他的光景比林爽文如何？据实供来。

据供：我在南潭，原跟着庄大田的。那日庄大田不在营盘，就被庄锡舍带了许多人将我拿住的。那时我看见庄大田处共有几万人，他的本事，我实在不知道。他是林爽文的大元帅，他有一百多杆旗子是实。

杨章供：我系诸罗县人，年四十二岁，父母早故，并无妻子。上年十二月内，有林爽文伙党许尚，招我入天地会。许尚

去攻诸罗，他们给了我一面小旗，叫我管队。今年二月内，许尚在诸罗地方与官兵打仗，三月内又跟随林爽文去攻府城。我前后共打仗十一次，杀过有十多人，又抢过好几庄米粮。到四月二十六日，我们又到诸罗西港地方去焚抢船只，就被官兵拿获。

诘问：你既入天地会，这会内共有多少人？你随林爽文打仗，他的贼匪共有多少？许尚现在何处？林爽文封你做什么官？

又供：我上年十二月初，许尚招入天地会不久。这会内多少人，我实不知道详细。林爽文到处要人跟他，如有不从的，便要杀他。所以跟随他的人，竟有数万。许尚现在跟着林爽文呢。他们见我杀过好些人，打过好几次仗，就都叫是将军，其实并不是林爽文封我的。不敢谎供。

诘问杨章：你既跟着林爽文攻城打仗，杀了许多人，林爽文的光景你自然知道的。他同庄大田是谁利害？林爽文手下的，闻得都是蓄头发的么？据实供来。

据供：庄大田是林爽文手下的大元帅，自然是林爽文利害。我打仗时，总是跟着许尚，他是督令，我是管队的。至他们那里的人，都未见蓄有头发。不敢谎供。

林红供：我年二十八岁，原籍仙游县，父母俱故，并没兄弟。有妻陈氏，现在内地，没有子女。我是四十五年到台湾，在凤山淡水社居住。原认这番妇金娘做干姊，跟她学画符治病，去年才与她通奸。到今年正月，庄大田请金娘做军师，我也跟了同去。每次攻城打仗，金娘叫我在旁打鼓，她带一把剑，念咒请神。庄大田又给我一把半斩刀，帮着他们虚张声势，其实我并不会打仗。是实。

诘问：你既跟从庄大田，替他们打鼓，他们封你做什么官？再，他们还有多少军师？天地会内究竟有多少人？你必定都知

道的。

据供：我原不会打仗，不过跟着金娘打鼓助势，实在没有受过伪职。至庄大田那里还有一个番婆，名叫纲仔，两个男军师，执剑出阵，都会看阵气。还有一个和尚，听说是冈山人，我都叫不出他们名姓。我并没入天地会，实在供不出会内有多少人。只求饶刑。

诘问林红：你跟着金娘打鼓出阵，你虽在庄大田那里助剿（战），林爽文与你同姓，是你什么人？你自然也会符咒。上阵时，你自然也念咒画符。此外你还有什么本事？从实供来。

据供：我跟金娘出阵，总是金娘请神，我在旁打鼓助战。虽跟着金娘学过符咒治病，上阵时时（愆字）我并未画符念咒，我止拿半斩刀，跟在金娘轿边，亦并未杀过人。至林爽文并不是我一家，我也不认识。不敢谎供。

王坑郎供：我系漳浦县人，年四十九岁，父亲已故，母亲方氏，并无兄弟，娶妻吴氏，有两个儿子，名叫王恩、王良。我三十年到了台湾，在凤山县卖鱼度日。后来我在本县充当粮差，又改充皂役。上年十二月，我奉差查拿天地会，正当庄大田来攻凤山，就被他们拿住。庄大田因我充过粮差，要我顺从，许封我官职，并要我帮助银两。我就将我家内番银四百圆送给他，又替他到各处亲友家凑出番银一千多圆，实未曾替他打仗杀人。是实。

诘问：你既从了贼，又替他科派许多番银，岂有不替他打仗？庄大田究竟封了你做什么官？据实供来。

又供：庄大田因我替他凑了多少银子，他就许我做副元帅，曾给我三杆旗，手下有三百多人。他因我是拐脚，不能打仗，仍交给旗首蓝罩等，带领攻打各庄，我只管运粮，实不曾打过仗。不敢谎供。

诘问王坑郎：你既专管运粮，这粮米从何处来的？你既是拐脚，不能打仗，他如何又给你三杆旗，你手下又有三百多人呢？

据供：我们的粮食，俱是各处抢来。我虽是拐脚，不能打仗，因我帮过他许多银子，又各处替他聚集些粮食，给我三杆旗，又派三百多人，在我名下，是给我虚体面。其实打仗，还是旗首蓝罩出去的。

大学士和坤奏续奏金娘等人口供片

附：审讯金娘等人供词笔录

乾隆五十二年八月初一日 台湾档

臣等复派员，连夜将台湾解到四犯隔别熬讯，严加究诘，录取供词呈览。谨奏。

附：审讯金娘等四人供词笔录

诘问金娘：你跟庄大田做女军师，他那里究竟有多少头目？每头目管多少贼众？再，你说你这念咒画符，都是哄骗他们的，并没真本事。他们如何就肯信你，封你做女军师？你究竟跟庄大田上阵念咒，打过几次仗？见他们杀过多少官兵？再，你说那日庄大田不在营盘，就被庄锡舍带人将你拿获，那日庄大田又往何处去了？留你在营盘想做什么？那时同你守营盘的，又有多少人？你如何被拿？一一供来。

金娘又供：庄大田那里的头目，都是有旗的，每一名给他一杆旗，旗上就写那头目的名字。每一头目名下，带有三、五百人

不等。这些人原是随时增减，也有见打了败仗，就各自散去的，并无一定数目。我跟他做军师的时候，有二百杆旗子，共有数万人。那些头目的名字，我实在记不清了。至我并没别的本事，跟着番妇宾那学画符治病。后来庄大田请我去替他儿子治病，好了，他们就信我有些法术，遇见他们打仗的时节，假说请神保佑，就不受枪炮，其实枪炮打死的甚多。我跟打仗请神念咒，不过三、四次。那日庄大田到各庄抢劫粮米，叫我在营盘守着，就有从前做贼的庄锡舍，拿轿来接我，叫我替他们治病。不想庄锡舍已经投诚，做了义民，把我诓去，至被拿获的。

诘问杨章：你说你打仗时都是跟着贼目许尚，你到西港地方去焚抢船只，难道就是你同许尚两人去的么？那时同去头目还有多少？再，你们焚抢船只，想要做什么？还是要断官兵来路，还是你们想要抢坐这船只，好与官兵打仗呢？再，你说你曾打过十几次仗，你有什么本事？一一供来。

据供：那日我们到西港抢船只去，原为夺了船只，要装载我们的粮草。同去的头目是许尚、吴基、黄水、杨三、苏良，我是许尚带去的。我也并没别的本事，不过跟着他们见人混砍，前后杀死过十多人。至许尚们，现在都跟着林爽文。是实。

诘问林红：你跟着金娘，在旁拿着半斩刀，自然也随同他们打过仗的了。再，庄大田共有多少人？有多少头目？你们这些人，吃的米粮都是从那里来的？火药铅弹是从那里来的？逐细供来。

林红又供：本年四月二十二日、二十七日，我跟着庄大田，在南潭地方实在打过两次仗，是庄大田领阵，吴鳌端、许恭来押阵。那时因官兵枪炮利害，我们的火药不够，被官兵赶跑了。我们用的火药，从前原是抢的。后来用完，庄大田自己会做铅弹，是叫铁匠打造。如铁匠不肯，就将铁匠枷号。现在庄大田手下

的，约有四、五万人，分作二百余杆旗子。每旗头目一名，带二、三百人不等。凡打仗时，后赶到的人，只管往前加添，并没有什么左右队伍。我们吃的米，是到一处抢一处。如吃完了，从北路林爽文那里运来接济，有二百多里路。我没有到过，实不知他的米是从那里来的。五月十一日被拿。

诘问王坑郎：你说替庄大田专管运粮，这粮究竟从何处来的？若是粮米吃完，又是何处接济？现在他那里还有多少粮米？再，你说庄大田并没封过你伪官，你又如何甘心替他办粮，还帮他这些番银呢？至你说你还是拐脚，既不能打仗，如何又能运粮？这运粮的事，也不是一人能办的，同你运粮的又是什么人？你手下究有多少人帮你呢？逐细供来。

据供：那粮米，原是庄大田到一处村庄，就把那一处人家粮米抢劫。若吃完了，也有从北路林爽文那里运来的。实在现存多少粮米，我不能知道。至番银四百圆，实是我自己积赚的。因庄大田攻凤山时，把我拿住逼胁，要我从他，说有银子给他，就许我封官。若没有银子，就要杀我。我就将自己的番银四百圆给他，他嫌少，又叫我在各处凑出一千多圆。至我虽是拐脚，原能行走，不过照料粮米，实不能打仗。是实。

大学士和坤等奏审拟金娘等人片

附：审讯杨章等人供词笔录

乾隆五十二年八月初二日 台湾档

臣等复将杨章等四犯逐一究诘，继以夹讯，并脑箍、手镯各样严刑，使其备受苦楚。该犯等俱自认从贼打仗、助势、运粮等

情，实属罪大恶极。杨章拒敌官兵，杀死多人，应请旨凌迟处死。金娘、林红、王坑郎，虽未杀人，但均系从贼逆匪，俱未便久稽显戮，应请旨即行处斩，以彰国法而快人心。谨将现在复讯供词，一并录取进呈。俟命下，臣等再将该犯等用刮等刑后，即行正法。谨奏。

乾隆五十二年八月初三日奉旨：知道了。钦此。

附：审讯杨章等人供词笔录

夹讯杨章：你既跟林爽文打过十几次仗，都叫你是将军，那林爽文自然比你更大，你们平日称呼他什么？再，林爽文他既然称有年号，自然蓄意造反，有几年了，你自然该知道的。至你们到西港去抢船，你说要装载你们的粮草，你们究竟有多少粮草？这粮草又从那里来的？据实供来。

杨章又供：我们平日称呼林爽文是大军王，他有什么年号，我实不知道。我是去年十二月内跟许尚入了天地会，他那时已经劫了彰化。至他几年起意谋反，我也不知道。至我们那日到西港抢劫船只，是抢的客商的粮食，今受这样严刑，还敢不实供吗？

刑讯金娘：你跟庄大田做军师，你既说庄大田是林爽文的大元帅，你们称呼庄大田是什么？再，你说并没见过林爽文，你们贼众平日称呼林爽文又是什么？再，林爽文封你一品夫人，他那里自然也有官职，都是些什么名色？还不实供吗？

金娘又供：我们称呼叫庄大田是大哥，至林爽文是在北路占据，我并没见过，只听见我们贼众，都称呼他大军王。至他那里有些什么官职，如何名色，我不知道。

夹讯林红：你既说庄大田手下有许多头目，并有二百余杆旗

子，那些头目他又封些什么官？你见庄大田又称呼他什么？庄大田究竟有什么本事？你说那押阵的吴鳌端、许恭来两人，林爽文又封他什么官职？他们又有什么本事？逐细供来。

林红又供：庄大田手下头目，我就知道吴鳌端、许恭来，都是封做元帅的。其余头目名姓，我都记不清，更不知他们曾否受过官职。我们平日称呼庄大田是大哥。他使的是一把单刀，临阵督战，我曾见过的，别的实不知道。

夹讯王坑郎：你说庄大田逼你从他，若有银子给他，就封你官职。你既自己给他四百圆番银，又替他各处凑了一千多个番银，他必定封官职的了。究竟封你是什么，你还不实说吗？再，你称呼庄大田是什么？你们贼众又称林爽文是什么？一一供来。

王坑郎又供：我们称呼庄大田是大哥，至林爽文我实没见过，只听见贼众都称他为大军王。我现受这样严刑，若果受过职衔，还敢不实供吗？

福建陆路提督柴大纪奏麻豆庄等处战况折

乾隆五十二年八月初二日批 军录

奴才柴大纪谨奏，为奏闻事。

窃照本年五月初十日奉将军臣常青檄，令奴才酌拨官兵千名，赴麻豆庄，与守备黄乔协剿贼匪。随派游击李隆、杨起麟、守备黄象新等，带领官兵一千五十名，于十二日驰赴麻豆庄，杀退贼匪，收军回至盐水港。又闻哆啰咽一带贼匪欲攻盐水港。查盐水港系通府要路，即飭该游击等留驻该处截拿。五月十九日，据游击李隆、杨起麟，守备黄象新等报称：本月十七日早，差探

贼匪二千余人离盐水港七里之查亩营、八老爷庄等处焚烧庄社。游击等随带队伍前往该处剿捕，贼众胆敢前来对敌，游击等督率弁兵义民，施放枪炮，打死贼匪甚多。贼败，追赶过急水溪，至下窝庄，生擒贼匪白润、林得二名，贼众由山径四散逃走，随收兵回扎盐水港。查点官兵并无损伤，惟义民曾儒、黄孺二名，被枪伤，伤医可痊。抢获令旗一面，鼓一面，短铳一杆、旧帐房一架等项，解送前来。随将白润、林得二犯，发交署诸罗县陈良翼审讯。又二十八日据该游击等解到贼匪王宁一名，并发县收讯。又三十日据该游击等报称，二十八日辰刻，据报有贼匪千余名，分路来攻盐水港。游击等分头迎敌，各率弁兵义民奋勇力战，施放枪炮，打死贼匪数十名，追杀过河，至茄苳脚，生擒贼匪李猫、林苞二名，斩杀贼匪九名，割取耳辮，抢获大旗一杆，写南路伪先锋字样，又令旗五杆，鸟枪一杆，竹牌番弓箭等项。余匪逃窜，具禀解送前来，随将该犯林苞等二名，发交署诸罗县陈良翼审讯。

查游击杨起麟屡次打仗，均属勇往，可当一面。随拨把总陈国忠带兵二百名赴盐水港，换回游击李隆，仍驻扎诸罗南门外营盘。兹六月初五日，探得贼匪数千，聚集于离诸罗城十余里之中庄、山仔门等处，诱胁庄民，复图肆扰。奴才随即亲率游击邱能成、李隆，把总罗勇、石光升、石生辉等，同署诸罗县陈良翼，武举黄奠邦，拔贡郑天球，生员吴正兰、温协和各义民飞往。至近中庄之三界埔，遇贼千余胆敢抗拒官兵，飭令队伍齐放枪炮，打死贼匪数十人，贼势披靡。官兵义民奋勇追赶至水尾仔，杀死贼匪数十人，割取耳辮十三个，生擒贼匪蔡文、萧却、林颜等三名。抢获乌旗三杆，及竹牌器械等项，余贼奔窜山后。缘山径崎岖，溪坑错杂，恐有埋伏，鸣金收军。查点官兵，俱无损伤，

惟义民沈斗生、何名愿、卢蕃、严君运等四名受伤，伤医可痊。随将拿获贼匪林颜等三名，发交署诸罗县陈良翼收讯。所有节次拿获贼匪白润、林得、王宁、林苞、李猫、蔡文、萧却、林颜等八犯，经诸罗县审明，供认从贼打仗，并未受有伪职。奴才复讯无异，于六月初七日恭请王命，就地正法。除通报将军、督抚、提督外，合将打仗得胜，获贼正法各缘由，由驿驰奏，伏乞皇上睿鉴。谨奏。

乾隆五十二年六月初八日。

乾隆五十二年八月初二日奉朱批：汝甚为出力可嘉，屡有旨谕。但所奏总迟，朕盼望捷音甚焦急。以后隔五、六日，即速奏闻。钦此。

福建陆路提督柴大纪奏鹿港等处

堵御情形折

乾隆五十二年八月初二日批 军录

奴才柴大纪谨奏，为遵旨据实复奏事。

窃奴才于六月初六日奉到上谕：柴大纪、普吉保此时北路剿捕事宜，系伊二人专责，务须和衷商酌，奋勉办理等因。钦此。伏查奴才自本年正月十七日带兵一千九百三十名，从盐埕桥起程，至二十二日克复诸罗县城，而首犯未获，匪党尚多，随于城外择地扎营，并招集义民，严加堵御，极力剿捕。二月二十五日夜，二十六日，北路贼目蔡福勾连南路贼目陈灵光等，约有万余，夹攻诸罗。经督率官兵义民奋勇力战，贼匪被枪炮打死者数百，杀死者亦多。生获张淡等二十五犯，贼匪畏惧，党类远窜。

迨三月初八日，凤山再失，贼复鸱张。自二十九至四月初四、初十、十二、十六、十八、二十一、二十三、二十七等日，贼众均有万余、数万不等，叠来侵犯各营盘，俱经奴才督率官兵义民，奋力剿杀。前经陆续运到盐水港旧存大炮一十五门，安置各营盘，连日轰击，甚为得力。先后共轰毙贼匪不下数千，杀获亦有千余，业将节次得胜各缘由，恭折驰奏在案。

但贼匪虽被我兵连日杀退，而首恶尚未就擒，经移会总兵普吉保，各带兵一千，会合协拿，于五月初三日齐到大埔林，四面搜捕，并无贼匪。查探贼首林爽文早已潜逃，大里杙匪党，俱窜入斗六、沙连等处。奴才与总兵普吉保是晚同驻土库。正在会商机宜，适接据署北路副将林天洛等先后稟称，四月二十八日，贼匪万余来攻鹿港、埔心二处。本月初一日，又来滋扰。虽经官兵二次杀退，但兵力单薄，恐其复来，难以抵御，恳请回军。初四日又据署诸罗县陈良翼并游击杨起麟各差稟，南路贼匪数千，聚集赤山一带，欲乘虚攻城，民心惶惑等情。奴才与总兵普吉保再四商议，查鹿港、诸罗均关紧要，各宜严守。随一面会稟将军臣常青，一面各带兵驰回，各保地方。迨回营盘，探知诸罗贼匪南北交通，随处诱胁滋扰。奴才或亲带官兵前剿，或拨将弁往捕。查四月二十一日蒙将军臣常青派拨参将潘韬等带兵一千零名，前往诸罗接应。复于五月初十日飞檄酌拨官兵千名，星赴麻豆庄协剿。遵即派游击杨起麟、李隆、守备黄象新等，共带兵一千五十名，驰抵该处，杀退贼匪，回至盐水港。又闻哆囉囡一带贼匪勾连贼目李七、蔡福等逆党，欲占据盐水港等处，希图断绝通府道路，使粮饷莫运，以困县城，是不可不为保固，即飭游击杨起麟等，将所带之兵留驻该处防御。又鹿仔草地方亦系通府要路，拨千总陈邦材、把总施必得等，带兵二百名驻守。派游击邱能成带兵二百五

十名，一路哨巡接应。奴才诸罗城外各营盘，共兵一千四百余名。所有叠次打仗，仰赖圣主天威，均属得胜，乃贼多兵少，所以尚未歼除净尽。惟有督率官兵义民竭力堵御，奋勉剿捕。兹跪读上谕，仰见睿虑精详，圣训淳切，奴才敬谨禀遵，与总兵普吉保和衷商酌，奋勉办理。俟将军臣常青统领大兵到诸罗，会同犄角夹攻，一举蕲事，以仰慰圣怀廑注。谨将现在堵剿情形，据实复奏，伏乞皇上睿鉴。谨奏。

乾隆五十二年六月初八日。

乾隆五十二年八月初二日奉朱批：即有旨谕。钦此。

谕浙闽总督李侍尧等查察柴大纪文报

何以迟延并速奏近况

乾隆五十二年八月初二日 台湾档

大学士和，字寄钦差湖广总督将军常、浙闽总督李、水师提督参赞蓝、陆路提督参赞柴，乾隆五十二年八月初二日奉上谕：

据柴大纪奏，北路贼匪滋扰官兵堵剿情形各折内称，贼目蔡福勾连南路贼匪，夹攻诸罗，经官兵杀退。又与普吉保到大埔林等处，商同进剿，闻贼匪攻犯鹿港、埔心，驰回各保地方，及节次拿获贼匪审办各情形，皆系五月内及六月初四、五日之事。其贼目蔡福攻犯诸罗，被官兵用炮击毙，并击碎枋车，杀死骑马贼目等事，前据常青、李侍尧先后具奏，而柴大纪折内，俱尚未经奏及，显系台湾及洋面耽延。柴大纪自驻守诸罗，经贼匪屡次滋扰，百计攻城，该参赞督率官兵义民，奋力堵御，杀退贼匪，歼戮甚多，实为出力可嘉。已屡经降旨奖谕，并令常青、蓝元枚，

各统大兵，亲赴诸罗，会合接应矣。

但柴大纪所发奏折，自五月二十三日拜发后，至六月初八日，始行续奏，已属过迟。朕盼望捷音，日切悬注，该参赞务须仰体朕怀，嗣后每隔五、六日，即将该处打仗杀贼情形，具奏一次，毋再迟缓。至此次柴大纪奏到之折，系六月初八日拜发，距今五十余日。查阅沿途驿递牌单，系于七月十九日递至厦门，是内地接递尚无迟误，竟系由诸罗渡海阻隔四十余日，海洋风信，虽属靡常，但常青、蓝元枚两处驰递之折，俱由海配渡，即遇风色不顺，偶有阻滞，多者亦不过十余日，何以柴大纪此次奏折，竟在洋面耽延至四十余日之久？岂海洋独非闽省所辖，不可按日而稽耶？着传谕李侍尧，即将柴大纪所发之折，渡海何以如此迟延多日，严行查察申飭，以儆将来。仍著柴大纪将近日如何打仗得胜，魏大斌、田蓝玉于何日前抵诸罗接应，及常青、蓝元枚曾否统兵会合进剿之处，一并迅速驰奏，以慰廑注。将此由六百里加紧各传谕知之。

钦此。遵旨寄信前来。

谕四川总督保宁等挑选屯练降番赴闽

乾隆五十二年八月初二日 台湾档

大学士和，字寄四川总督公保、署湖广总督舒、两江总督李、浙江巡抚琅、贵州巡抚李，乾隆五十二年八月初二日奉上谕：

台湾逆匪林爽文滋事不法，前令常青统兵进剿，数月以来，筹办一切虽尚属妥协，但常青年逾七旬，究恐精神未能周到，已

令福康安前来行在，面授机宜，驰赴台湾更换常青，督办剿捕事宜。

至台湾前后所调兵丁，不为不多。但该处山深箐密，路径崎岖，因思川省屯练降番，素称趑捷，前经调往甘省剿捕逆回，甚为得力。著传谕保宁，即于屯练降番内，挑选二千名，并拣派曾经行阵奋勇出力之将领张芝元等，分起带领，从川江顺流而下。由湖北、江南、浙江一路，前赴闽省。所有沿途应用船只，及一切应付事宜，并着舒常、李世杰、琅玕等预为筹备，免致临时迟误。仍着该督等妥协经理，毋得稍涉张皇，致滋烦扰。将此由六百里加紧传谕保宁，并谕舒常、李世杰、琅玕、李侍尧知之。

钦此。遵旨寄信前来。

谕署湖广总督舒常等挑选官兵听候调遣

乾隆五十二年八月初二日 台湾档

大学士和，字寄署湖广总督舒、云贵总督富、湖南巡抚浦、贵州巡抚李，乾隆五十二年八月初二日奉上谕：

台湾逆匪林爽文纠众不法，前经陆续派调粤闽及浙江绿营驻防兵丁，令常青等统领，分路进剿，迄今尚未藏功。因念常青年逾七旬，虽办理剿捕事务尚俱妥协，究恐精神未能周到。现在谕令福康安前来行在，面授机宜，令其前赴台湾，更换常青，督办军务。

至台湾前后所调兵丁，自己足敷攻剿。但该处山深箐密，路径崎岖，因思湖广、贵州兵丁前经调赴金川军营，于驰涉山险，较为便捷，若调往台湾助剿，自更得力。著传谕舒常等，于湖

北、湖南各挑备兵二千，富纲、李庆葵于贵州挑备兵二千，拣选曾经行阵奋勇干练之将备带领，一切军装火药妥为密行预备停当，听候调拨。如必须调遣，或俟谕旨到日，或接到福康安檄调文书，即行分起迅速前进。其湖广官兵，即从本省由江西一路行走。贵州兵丁，从广西、广东一带行走，前抵闽省。所有沿途经过地方，并著该督抚等一体预为筹备。俟兵丁到境，即可迅速遣行，仍须妥协经理，毋致张皇扰累。将此由六百里传谕舒常，并谕孙士毅、姜晟、孙永清、何裕城知之。

钦此。遵旨寄信前来。

谕内阁授福康安为将军督办军务

常青来京陛见

乾隆五十二年八月初二日 台湾档

乾隆五十二年八月初二日内阁奉上谕：

台湾逆匪林爽文等，于光天化日之下，胆敢纠众不法，劫县戕官，前特派总督常青前往台湾，授为将军，督办剿捕事宜。数月以来，该将军督率调度，尚无过失。但统领多兵驻守府城营盘，虽屡有斩获，并未能痛加歼戮，挪移尺寸之地，相机进剿。是常青虽属无过，亦不得为有功。且该将军年逾七旬，究恐精神不能周到，兹特命福康安前来行在，面授机宜，令其携带钦差关防，驰赴台湾，更换常青，督办军务。即授福康安为将军，并授海兰察为参赞大臣，普尔普、舒亮为领队大臣，其恒瑞、蓝元枚、柴大纪，仍着照前参赞军务，并拣派曾经战阵之巴图鲁、侍卫、章京一百余人，分起前往领兵征剿。

至台湾初次调拨及续调官兵，已有数万，嗣又于广东、浙江添调绿营，及驻防兵万余名，并于福建本省派拨兵六千，现又添派四川屯练降番，并于湖北、湖南、贵州等省挑备兵数万，陆续遄程前往，合计征调各兵不下十余万。福康安到台湾后，察看情形，如以兵力多多益善，再行添兵若干，即一面檄调，一面奏闻。所有应用军糈，已于浙江、江南、江西、湖广、四川等省，拨运米百余万石，军饷火药等项，亦已广为储备。着李侍尧通盘核算，妥为经理，俾足数十万官兵之用，毋致稍有短缺。似此大兵云集，加以派出带兵之巴图鲁、侍卫、章京等，皆屡经行阵，一以当千，是百余人已足当万余人之敌。谅此么麽（磨）小丑，一时乌合，何难立见歼除，指日授首。

至常青剿捕贼匪，虽未能藏功奏绩，念伊究系年老，尚无贻误。着于福康安到台湾后，即行来京陛见，再赴湖广总督之任。钦此。

军机处为调赴台湾听福康安差遣事

给江南狼山镇总兵袁国璜札文

乾隆五十二年八月初二日 台湾档

办理军机处为札知事。

照得新授江南狼山镇总兵、前任甘肃督标副将袁国璜，现经钦差协办大学士将军侯福奏明带往台湾军营征剿。惟查该镇昨经具奏，现已进京陛见，相应飞飭该镇，于途次接到札会，即由该处迅速驰赴江南、浙江一带，探听钦差经过之处，即行随同前往。倘赶赴不及，即一面申报本处，一面经由驿驰往台湾听候调

遣，毋得迟误。须至札者。

谕钦差湖广总督常青不可因福康安

赴台督办心怀疑惧

乾隆五十二年八月初二日 台湾档

大学士和，字寄钦差湖广总督将军常，乾隆五十二年八月初三日奉上谕：

昨因常青在台湾办理剿捕事宜，一切调度，虽尚妥协，惟统领多兵，驻守府城营盘，未能进剿，且念伊年老，恐精神不能周到，是以明降谕旨，授福康安为将军，驰赴台湾，更换常青，督办军务，并令常青于福康安到台湾后，即来京陛见，再赴湖广总督之任。但朕特命福康安前往更换常青之意，并非因常青办理军务大有贻误，实因常青年逾七旬，军旅之事，本非素练，恐日久因循，不能办理完结，是以特命福康安前往接办，以期迅速藏功。福康安未到之前，常青接奉前旨，不必心怀疑惧，转致遇事茫无主见。更不可因福康安已往更换，即不复悉心筹办，株守坐待，则获咎重矣。如遇有可进之机，仍当督率将弁，相机进剿。该将军数月以来，统领多兵，未能挪移尺寸之地，虽属无功，而调度防守，悉力堵御，亦并无过失。若因有福康安前往接办之旨，心存观望，稍有懈弛，不复努力前进，则常青不但无功，而且有过，即大负朕委任之意。该将军当明喻朕意，务宜熟筹妥办，勉图进取。倘此时能将逆首林爽文擒获，固属甚善，即首逆尚在稽诛，而贼目庄大田若能就获，官兵已操胜势，即著该将军用六百里加紧驰奏。已谕令福康安于途中得有捷报，即先行拆

看。若见常青于剿捕事宜，业已得力，并可无须前往，即由途次仍回甘肃本任。将来办理善后一切，原属常青所优为，更无须福康安前往帮助也。特此再行申谕，该将军勿须疑惧，当倍加奋勉，趁福康安未到以前，努力自效。酌量情形，于何路可以进兵，即当决机制胜，擒渠捣穴，迅奏肤功，以承受恩眷。断不可疑惧，因循坐待，致失机宜，以致无功有过，失朕期望之意也。仍著将近日如何定期会剿，打仗杀贼情形，迅速驰奏，以慰廑注。将此由六百里加紧传谕常青，并谕李侍尧知之。

钦此。遵旨寄信前来。

大学士和珅等奏恒瑞赍折人

所述台湾战况片

乾隆五十二年八月初三日 台湾档

臣等询问恒瑞赍折差人福克进、达清阿，据称：系驻防满州前锋队长。我们于四月二十二日随将军恒瑞在省城起身，五月十九日到台湾府城。二十四日在大东门外三里外拿营。是日即随将军与贼人打仗，至申刻贼人退散。二十六日、六月初一日，又随将军打仗二次。每次贼人俱约有四、五千，分作四、五处，前来抗拒。经官兵施放枪炮，贼始败退。因道路低洼险阻，追至前路，贼人放水阻道，多系泥泞，且树木丛杂，贼人在内藏匿甚多，未能前进。于初二日，将军即差我们赍折前来。以后的事，我们不能知道。府城外拿的营盘，在大东门外。营盘周围共有十里。府城南至凤山，有八十里。营盘三、四里外，俱系土坡，树木甚多，前有高山，贼人多在树林内出没。听见说山内贼匪藏匿甚多，庄

大田占的南潭，在什么地方，我们不知道。大营内除派拨各处镇守外，共有五、六千兵，其疲弱者，都派在城内守城。拿营地方，系东南总要路口。贼人每次攻扰，俱从东面土坡处所前来。所用多系长枪、长刀，用皮牌挡箭，也有小炮，不多。贼人亦分队伍，有青红黑白旗子，拿旗的约五、六人，俱骑着马。也有被官兵用炮打死的。现在凤山一带，俱系贼人占据，听说那城内房屋，贼人俱已烧毁。府城内义民有三、四千人，打仗时都出城，在官兵之后，随同打仗。至贼人粮食从何处运来，我们在那里日浅，不能知道。常将军与恒将军常到帐房商量事体，这是我们常见的。别的我们不知道等语。谨奏。

臣等复询恒瑞赍折之福克进、达清阿，俱称：我们在台湾府城营盘，止住得七八日。跟将军打仗时，见贼人并无衣甲。那时天气狠（很）热，贼匪都有不穿衣屨的。他最怕官兵放炮，每遇打仗时，官兵进得近了，贼人就四散退避，仍旧在树林土坡内聚集藏躲，又将道路放水泥泞。若官兵前往，退赶林箐中埋伏的贼匪狠（很）多，道路又险阻不平，就要吃亏，是以未能追杀。及至官兵退后，贼人又出来滋扰。且路径甚杂，各处俱有贼匪。所以官兵不敢远离营盘。至府城东门外，仍有居民舖户，城内自东门至西门，约有五六里，舖户民居甚为稠密。见官兵多了，他们也不害怕。那时米价每升卖大钱二十四五文，也不甚贵。我们在鹿耳门，来往看运载船只，照常行走。俱在鹿耳门汛地挂号稽查，甚是安静等语。

臣等复将五月十九日以后至六月初，常青等拜发奏折内，所指庄大田伙党屯聚之大目降、中洲、崙仔顶等处，及府城北路麻豆庄运粮道路，被贼侵扰各情形，详晰询问。福克进等俱称，我们在营盘住不多日，又系初次到台湾，除跟随打仗外，每日俱在

本营帐房内看守。别的事情，实在不能知道等语。谨奏。

臣等复询福克进、达清阿等，据称：我们营盘扎在大东门
外，周围约有十里。将军常青、恒瑞，分左右下帐，及带兵将
官，俱在此营盘内，各按该管地面，分布居住。至官兵打仗时，
贼人因官兵枪炮利害，他使的都是长枪、长刀，有炮甚小，也不
多，所以官兵前进稍近，他就怕放枪，退避等语。谨奏。

署湖广总督舒常等奏酌拨湖南仓谷赴闽折

乾隆五十二年八月初三日批 军录

署湖广总督臣舒常、湖南巡抚臣浦霖跪奏，为遵旨酌拨湖南
仓谷，碾米运闽，恭折具奏事。

窃照台湾逆匪滋事，现在大兵云集，不日荡平，一切应付军储
及抚恤平糶等事，需米甚多。臣舒常前于筹拨湖北仓谷折内，将湖
南省年岁丰稔，存谷尚多，俟到长沙与臣浦霖酌定，碾拨另行具
奏之处，附片陈明。臣浦霖接准知会，当与藩司郭世勳查明附近
水次二十五州县，约存谷四十余万，足数拨运。随各按仓贮多
寡，酌量派定，共动谷二十万石，碾米十万石。一面飞飭预为赶
办，并令选雇经涉江湖坚固大船，齐集水次，听候拨用，以免临
期迟误。

兹臣舒常在湖南审案事毕，正在起程间，接奉朱批并钦奉上
谕，当与臣浦霖公同恭阅，将湖南运米赴闽，自省起程应由何路
行走，并一切办运事宜，逐一悉心商榷。查湖南醴陵县与江西萍
乡县接界，有路可达闽省。亦系经由江省新城县五福地方，较之
取道武昌，计程差近数站。惟醴陵境内，即系逆水滩河，运至萍

乡，又须起早六十里。至芦溪地方，再行换船。彼地系一线溪河，滩险更甚，不通大船，来往止有本地小船，装米不及二十石。深秋水落，随地爬滩，即小舟亦虞涉阻。是萍乡一路，水陆纡折既烈，欲速反迟。且节节换船起驳，运费亦复不轻，自不如北渡洞庭，由岳州直达武昌，尾随北省米船之后，经历长江行走，较为便捷。至自汉口开行以后，应由何路行走之处，臣等恭绎谕旨：江西运闽米石，办有章程。湖北所碾米石，不过照该省程式办理，自属便易等因。是湖北之米可由江西接运，则湖南之米，即可紧随北省尾帮，鱼贯前进，庶一切换船起驳及雇夫挑运事宜，皆可次第办理。在江西不致两路并集，一时拥挤，有难于照料之虞。而两湖之米，源源接续，依次遄行，亦可无虞迟滞。臣等已飭令各属赶紧碾就齐全，分帮起运，即或江西五福一路，实有难以行走之处，俟何裕城知会到日，亦即钦遵谕旨，将米石运往江南，交李世杰等由上海出口，运往闽省。临时在九江一带分路，道里亦无纡回。

再，此次拨运米石，自应酌定章程，以期迅速。现已分飭遵照其在省城上游者，统于省城取齐，不经省城者，于岳州水次取齐。计米十万石，分作四起，每二万五千石为一起，每起派委正印、佐杂各一员，专司管押，并遴委明干道府一员，总理督运。往来催趲，以昭慎重，而专责成。除开帮起运日期，及由何路运闽之处，另行恭折具奏外，所有臣等酌拨湖南仓谷，接奉谕旨，现在赶紧办理，及筹定由湖北大江一带行走缘由，理合先行驰奏，伏祈皇上睿鉴。谨奏。

乾隆五十二年七月二十三日。

乾隆五十二年八月初三日奉朱批：已有旨了。钦此。

闽浙总督李侍尧奏官兵直抵诸罗折

乾隆五十二年八月初五日批 军录

闽浙总督臣李侍尧跪奏，为据稟官兵直抵诸罗事。

窃臣前接将军常青折稿，知柴大纪在诸罗被贼攻围，屡次杀贼，贼尚未退。常青已即次遣魏大斌、田蓝玉等前往救援，因贼放水满田，又将田埂削窄，以致官兵不能结队前进。本月十九日臣又接柴大纪咨会，系本月初一日所发。其所述被围情形，较之常青所奏更觉危急。查柴大纪（朱批：实可嘉者。）兵本不多，又分拨盐水港、鹿仔草等处，城中兵民之力益觉单薄。而贼自六月十八日在府城被官兵杀败之后，见府城兵多，不能得利，遂尽趋诸罗。是以诸罗之贼日多，而围亦日急。倘一有失事，则不惟贼势益张，而全台人心俱为摇动。（朱批：因此甚忧懣。）是以臣屡次札商常青，务须增兵设法掘沟放水，以通道路，（朱批：亦屡有旨矣。）速解重围为最要。正在日夜盼望信息，兹于二十二日辰刻接台湾道永福稟称，据佳兴里^①巡检邵宗尧稟称，赴援之兵，以及粮饷军需，俱于十三日卯时由鹿仔草三路进发，即于午刻直抵诸罗等语。虽不甚详细，而魏大斌、田蓝玉、特克什布、张万魁等已攻透重围，与柴大纪会合，自属确实。自此官兵之气益振，贼势自衰。永福稟内又称，探得贼首庄大田已回南路。本月十四日常青遣兵巡哨南潭，有贼匪数千聚集该处，经官兵义民奋勇剿杀，贼匪大溃，闻庄大田有潜逃之信，现在设法截

^① 原文如此——编者。

拿，南路贼势日渐退散。再得续请之兵三四千到郡，即可长驱北路等语。查续调之粤兵四千内，现有一千到厦，已经放洋，日内又有续到者。臣现在厦门督催，务令随到随即登舟。其浙、粤驻防兵总于本月内俱可抵厦，迅速配渡前往。看来贼势已衰，而官兵之力益振，灭贼不难矣！所有官兵已抵诸罗信息，谨缮折驰奏，伏乞皇上睿鉴。谨奏。

乾隆五十二年七月二十二日。

乾隆五十二年八月初五日奉朱批：是好消息，欣慰览之。余有旨谕。钦此。

查邵宗尧系押解饷银随援兵前进，接济诸罗之员，所禀自属确实。合并附奏。

乾隆五十二年八月初五日奉朱批：览。钦此。

谕钦差协办大学士福康安等庄大田

有潜逃之信应乘机奋力进击

乾隆五十二年八月初五日 台湾档

大学士和，字寄钦差协办大学士总督将军侯福、钦差湖广总督将军常、福建水师提督参赞蓝、陆路提督参赞柴、闽浙总督李，乾隆五十二年八月初五日奉上谕：

据李侍尧奏，官兵直抵诸罗一折，内称接台湾道永福禀报，赴援诸罗之兵，以及粮饷军需，俱于七月十三日直抵诸罗。贼目庄大田已回南路。常青遣兵巡哨，南潭有贼匪数千，经官兵剿杀，贼匪大溃。闻庄大田有潜逃之信，现在设法截拿。再得续调之兵三、四千到郡，即可长驱北路等语。此是极好消息，览奏欣

慰。已于折内批示。

贼目庄大田纠合伙匪，屯占南路，四出滋扰。数月以来，因常青等未能进剿，曾经降旨飭渝，并念常青年老，恐其精神不能周到，是以特命福康安前往更换，以期迅速蒞事。今南潭贼匪已经官兵义民奋勇剿杀，庄大田已有潜逃之信，是贼势业经溃散，剿捕事务，大有转机。想常青之折，不日即行奏到。该将军等接奉节次渝旨，自当倍加奋勉，乘此贼人溃败，兵威振作之时，该将军等急应亲统大兵，奋力追杀。若于福康安未到以前，能将贼首林爽文及贼目庄大田等，即时擒获，则克复全台，俱系常青之功，受朕恩眷，岂复可量。

至贼目庄大田溃败潜逃，其势自己穷蹙。现在北路一带，鹿港有蓝元枚在彼领兵堵截，而诸罗接应之兵，已经三路会合，庄大田逃往北路，自无他处可以窃踞，必逃至大里杙，以为负隅苟延之计。若贼首贼目同聚一处，正可聚而歼戮。即使负隅死守，以大兵全力四面合围，贼人资粮有尽，无所得食，自当束手就毙，又何能久延残喘耶？常青等正当趁此极好机会，激励将弁，统率官兵，直前攻剿，并设法掘沟放水，开通道路，俾官兵可以振旅长驱，毫无阻滞。且据台湾道稟称，再得续调兵三、四千到郡，即可直攻北路。现在添调粤兵，先到厦门者，已据李侍尧配渡放洋。其余浙粤官兵，陆续登舟前发，此时自己全抵台湾。常青处兵力日盛，而诸罗、鹿港声势亦渐联络，该将军不可不益加勉力，深入长驱，速奏捣穴擒渠之绩，以副眷注。但南路贼目庄大田，现欲逃窜，虽势已窘迫，而该将军等统兵前往北路追剿，仍当酌派弁兵，严防后路，勿使余匪得以乘隙潜出山林，又在南路滋扰，此为最要。

至柴大纪驻守诸罗数月，兵本不多，经贼匪百计围攻，其势

甚急。而柴大纪于贼众屡次侵犯时，多方捍卫，于魏大斌等援兵未到以前，竟能歼戮多匪，保守无虞，实属可嘉。著再赏蟒袍一件，大荷包一对，小荷包二对，奶饼一匣，以奖劳绩。魏大斌前经常青派令带兵接应诸罗，在鹿仔草被贼拦截，小有阻滞。该镇能督率官兵，透出重围，前抵诸罗，与柴大纪会合，亦奋勉出力，著赏戴花翎。其田蓝玉、特克什布、张万魁同往接应，能与魏大斌奋力剿杀，直抵诸罗，亦尚奋勇，著常青查明何人最为出力，即于前次发去花翎，酌量赏给戴用，以示鼓励。

至柴大纪处既得此接应兵力，声威渐壮，现在如何打仗杀贼，合兵进剿，蓝元枚处已节次降旨，令普吉保固守鹿港，该参赞亲统官兵，自北而南，前往诸罗会剿。前据蓝元枚奏，已与柴大纪札商夹攻，拟由埤头、二林前往东螺、西螺，攻杀斗六门贼匪。今所请添调兵丁，自己陆续前抵该处。蓝元枚自必趁此机宜，统兵进发，会合攻剿。俱著蓝元枚、柴大纪一并迅速驰奏，以慰廑注。

至贼目庄大田在南潭，经官兵剿杀，望风奔溃，自必因贼中粮食火药将次用尽，冀图潜窜。此时贼势衰弱，匪徒解体，其中附从迫胁伙党，见其败衄无成，自必纷纷溃散，各图生路。常青等正应趁此贼匪离散之时，设法招集，广为抚慰，令其或入伍或归农，各安生业，并可解散贼党，机不可失。该将军等务宜迅速妥办，最为紧要。

李侍尧办理军务，调度接应，俱为妥协周到。此次一得常青处杀散南路贼匪，及柴大纪处援兵会合信息，即行驰奏，以慰朕怀，亦著赏蟒袍一件，大荷包一对，小荷包二对，奶饼一匣，以示奖励。其常青俟奏报到日，再行赏给。

至福康安于昨日启行，在途不远，著将李侍尧折内抄寄阅看，令其同为喜慰。若常青等续有捷报剿捕得手信息，则所调川省

屯练降番，远隔数省，调发需时，竟可停止前进矣。若贼首林爽文、贼目庄大田等得以擒获，即福康安于途次，亦可旋回，毋庸前往台湾也。将此由六百里加紧传谕常青等，并谕福康安知之。仍著常青、蓝元枚、柴大纪，将近日南北两路追剿贼匪，及大兵于何日会合诸罗，督率进剿之处，迅速驰奏。并著李侍尧续得地方官禀报南北两路会合打仗得胜情形，一并由驿速奏，朕日夕悬盼捷音之至。

钦此。遵旨寄信前来。

大学士和珅等奏遵旨询问常青贲折

差弁李文斌情形片

乾隆五十二年八月初六日 台湾档

臣等遵旨询问常青贲折差弁李文斌。据称：我系水师提标前营把总，跟随常将军于三月初九日到台湾府城后，将军即差我贲送文报至厦门，来往三次。至六月十八日复到台湾，那时将军已在府城外方扎大营。听得五月内，贼匪屡次来扰，每次约有四、五千人，分作四五处，南北两边均有贼匪前来，每次杀贼甚多。至六月十八日，我又到台湾，那日贼匪又分四、五路前来，将军即带领官兵从大营迎击，府城内亦有官兵义民出小东门及北门，两路截杀，施放枪炮。这次打杀贼匪更多，不计其数。贼人最怕枪炮，离官兵将近，随即逃回。我兵往前追放枪炮，直到南潭溪边，因道路险阻，那边林木中藏匿贼匪，埋伏甚多，不便再追。那时听见将军商量，俟添〔兵〕一到，即要设法往前追杀。我就于六月二十三日起身前来。

臣等复询以瑚图里在山猪毛带回广东庄义民一事。据称：六月二十一、二等日，将官瑚图里带领广东庄义民前来，约有一、二千人。那广东庄系在山猪毛左近，与这边隔着一溪，俱是广东民人居住。从前将官瑚图里被贼截在那边，那里米粮甚贱，一切俱是义民供应的。听得广东庄所住民人甚多，约有数万人。义民跟到大营的不过一二千，此外俱在本庄，尽可以防守等请（情）。谨奏。

谕湖广总督常青亲统官兵长驱北路

捉拿林爽文等

乾隆五十二年八月初六日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月初六日奉上谕：

昨据李侍尧奏，援应柴大纪官兵已抵诸罗，南路贼匪经官兵剿杀，庄大田有潜逃之信，现在设法截拿各情形。已降旨令常青等乘此极好机会，整旅长驱，擒拿贼首林爽文，贼目庄大田等，以期迅速肤功。本日常青奏折差弁前来，令军机大臣询问。据称：前此瑚图里带领广东庄义民到营止有一、二千人，其广东庄所住民人甚多，约有数万人，尽可防守等语。前因瑚图里在山猪毛带领广东〔庄〕义民前到大营，常青等并未令义民等即回本庄，留于大营，随征助剿，恐其本庄只系老弱，不能捍卫田地贗产，或被贼人怀恨，肆意摧戕，义民等受累灰心，且使他处义民闻风生畏，阻其急公投效之心，甚不以为然，曾经降旨饬谕，并以广

东庄倘有被贼骚扰，当治常青以措置乖方之罪。今据该弁所称，广东庄所住民人有数万，则随从瑚图里之义民等虽留在大营，而其本庄不致空虚，足资捍卫。此即常青时运好处，现在南路贼匪已经官兵剿杀，贼目庄大田思欲潜逃，剿捕事务大有转机。该将军亟当乘此贼人溃散，军威振作之时，亲统官兵长驱北路，以奏擒渠捣穴之绩。若能于福康安未到以前，即将贼首贼目拿获，余匪扫除净尽，则克复全台，皆系常青之功，必当受格外恩眷。该将军不可不倍加奋勉，速奏捷音。

至大里杙系贼首巢穴，四面皆山，将来官兵围攻，恐路径险峻，艰于驰涉。若常青等此时已能督率官兵复其巢穴，擒获渠魁，固属甚善。倘围攻之后，贼人尚在负隅固守，则前此派出之海兰察、普尔普、舒亮所带巴图鲁、侍卫、章京六十人，令其分三起行走。伊等俱经历行阵，勇健趑捷，一以当千，是数十人已足当万余人之敌。现已有旨令其兼程遄往，到彼后，即令带兵攻扑，更当得力。谅此么磨小丑，自可立见歼除，指日授首。

至柴大纪处，既有魏大斌等带兵接应会合，声势壮盛，自己乘机剿杀，打仗得胜。而蓝元枚闻知诸罗援应之兵已到，亦必率领官兵，自北而南，直趋诸罗，与柴大纪并力会剿。现在庄大田有潜逃之信，常青等自己由南而北，打通道路，与蓝元枚、柴大纪会合一处。著该将军等即将何日会齐，统领大兵全力进攻贼巢之处，迅速驰奏，以慰廑注。

至福康安带领侍卫、章京等二十人启程前往，到彼未免需时，此时南北两路官兵联络，贼党已有溃散之势，福康安正应先行星驰前往，督率攻剿，以期及早蒞功。福康安于途次，如见有常青等陆续奏报捷音，竟当遵照前旨，先行启看。或因所带侍卫、章京等人数较多，一同行走不能迅速，不妨令伊等在后攒

（趲）程，福康安竟先行轻骑减从，早抵台湾，赞成大功。多一人即添一人之益，于剿捕机宜岂不更为妥速耶？

再，川省屯练降番，远隔数省，调发需时。若常青等续有捷报，即当降旨将屯练降番停止进发，以省烦扰。并著李侍尧续得台湾官兵打仗得胜信息，即随时星速知会福康安及海兰察等。如官兵益操胜势，可以克期集事，已令海兰察等接信后，当加倍攒（趲）行，早抵该处，即助拿逸匪，亦属甚好。倘常青等统兵会剿，未能长驱深入，设有意外之虞，则当仍令海兰察等在厦门等候，俟福康安到彼，会齐全力，一同配渡放洋，方为妥善。此则朕不自满，假居安思危之虑，该将军等不可不仰体朕意也。将此由六百里加紧各传谕知之。仍著常青、蓝元枚、柴大纪速将会剿得胜情形，随时驰奏。李侍尧续得地方禀报官兵打仗得胜信息，亦即一并加紧速奏，伫盼捷音之至。

钦此。遵旨寄信前来。

闽省总督李侍尧奏遵旨将运米接济及

缓征钱粮出示晓谕折

乾隆五十二年八月初八日批 军录

闽浙总督臣李侍尧跪奏，为遵旨将运米接济及缓征钱粮出示晓谕事。

窃臣于本月二十四日接准廷寄奉上谕：前已拨浙江、江西、江南、四川等省米六十余万石来闽接济，并令先行晓谕，以安民心。今又令川省再办米三十万石，由江南接运至闽，著李侍尧再行出示晓谕，并著常青、蓝元枚等一体晓谕兵民，使之安心，踊跃

从事。至漳、泉二府钱粮已经完纳者，自未便再行给还，且恐徒为州县吏胥等肥橐。尚未征齐，即可一面传旨出示缓征，一面据实复奏等因。钦此。

臣伏查节次奉旨拨运浙江、江西、江南米石来闽接济，已通行各属，无不周知。昨奉到拨运川米二十万石之谕旨，又遍行出示晓谕。兹又蒙天恩，再令川省办米三十万石运闽，以资台地及漳、泉一带军糈民食之用，仰见皇上轸恤之切，筹虑之深，真无远不见，亦无微不到。臣随将续运川米三十万石之处，再行出示晓谕，并移常青、蓝元枚一体出示外，内地民人蒙皇上顾复惻隐至于此极，无不感激顶戴，共庆生成。昨据台湾道永福禀称，近日郡城粮食因北淡水一路渐觉宁贴，时有米船到来，是粮价稍觉平减，是台郡民食亦尚不至拮据。现在内地将各省运到之米，陆续运往，源源接济，自不致缺乏。

其漳、泉二府应征钱粮，查漳州各属共十二万一千八百余两，又屯米一项，漳州一万三千九十余石，泉州一万一千六百余石，臣即面询藩司觉罗伍拉纳本年未征收各数。据称：该二府钱粮虽据各属于二月间具报开征，缘各花户因上年旧粮尚未完清，先行赶纳。其本年新粮，各该县又多承办兵差，不及催征。现在并无报司完解各数等语。今奉恩旨缓征，若俟查明已、未征各数，始行出示，转恐官吏开报不实，或有挪前移后之弊。臣即一面出示，除已征者即提解司库，其未完之钱粮及屯米，概行缓征，俾小民咸知皇上轸念民艰至意，当益加欢跃。除一面飭查已征、未征银数、米数，照例分别递缓，另行咨部按限带征外，所有遵旨晓谕缘由，谨缮折驰奏，伏乞皇上睿鉴。谨奏。

乾隆五十二年七月二十五日。

乾隆五十二年八月初八日奉朱批：即有旨谕。钦此。

闽浙总督李侍尧奏续调兵丁分拨情形片

乾隆五十二年八月初八日批 军录

臣李侍尧谨奏。再，奉上谕：前已令李侍尧于续调之一万一千兵内，将九千拨往常青处，二千拨往蓝元枚处。续据李侍尧奏，预备漳州二千名，亦有旨令该督即行派往蓝元枚处矣！此项漳兵究于何日配渡，此外应拨蓝元枚之二千是否即将漳兵抵数？抑于前派一万一千兵内，再拨二千前赴鹿港？现在蓝元枚处是否拨兵四千前往？著详悉速行复奏，等因。钦此。

查臣前以漳州镇兵独未调用，常青既请增兵一万一千，恐蓝元枚亦请增兵，则无兵可调。是以奏明拟挑漳兵二千以备调拨。嗣奉上谕：令于一万一千兵内，分拨二千交蓝元枚应用。适接蓝元枚折稿，亦有增兵五千之请。是以臣即拟以漳兵二千及粤兵后到之二千，派往鹿港。于蓝元枚所请之数，亦均略相当，俱经具奏在案。是蓝元枚处实系拨兵四千前往，并非以漳兵二千抵分拨之数。今漳兵已于本月二十日开洋，前往鹿港，而常青处九千兵内，先派往闽粤兵四千，已久到台郡。本月十八日续到之粤兵一千，亦已开洋。本日又有粤兵一千到厦。臣亦即令配渡。其浙粤二省驻防满兵，月内俱可到厦。臣令随到随即登舟，务当迅速飞渡。

查近日既有诸罗解围之捷，而南路贼匪亦渐退散，今又增此满汉兵五千前往，合之先往四千，共足九千之数。兵势既盛，自当有席卷之势。而蓝元枚处既增漳兵二千，再将后到之粤兵二千派往，军力亦已壮盛。兼闻贼中被胁之徒，亦多有急欲自投者。兵

势一振，贼党自当解散。不日可期剿灭矣！谨查明复奏。

乾隆五十二年七月二十五日。

乾隆五十二年八月初八日奉朱批：知道了。钦此。

闽浙总督李侍尧奏粮船于洋面被劫情形折

乾隆五十二年八月初八日批

《钦定平定台湾纪略》（稿本）卷二十九

李侍尧奏言：松山汛千总郑魁报称，有浙江石门县运闽官米船户刘新春到汛报称：本月初八日该船驶至两山相对不知是何洋面，遇贼船劫去米数十石，并押运兵役所带鸟枪一杆，腰刀一口。又据崇武汛把总赵珠成报称：有浙江新城区运闽官米船户林长茂，本月十六日驶至莆田、惠安交界之洋面，被盗夺去押运兵役所带鸟枪二杆、腰刀二口，其米石并未被抢。又据船户甘发兴到厦门报称：装运兴化府米三百五十袋，本月十七夜在崇武澳十里外，被盗船二只，劫去该船户自带番钱、香菇等项，并押运兵丁之鸟枪二杆、腰刀二口，其米石并未被抢等因。查洋盗见官运米船，胆敢抢劫，已属目无法纪。而林长茂、甘发兴船所遇之盗，则不抢米石，专抢枪刀，尤觉可疑。地方文武屡接臣护送交替之檄，何以此三船并无巡船防护，即米船在外洋乘风迅驶，本地兵役或有不及赶接护送之处，然果平时巡缉严密，何至盗贼充斥如此。臣唯有遵照海澄县兵役被劫一案所奉谕旨，将该地方文武参，革去顶带，留于本任缉拿，勒限半年。如或不获，即请从重治罪。庶于巡哨不视为具文，而缉拿可得实效。

（发文日期不详。）

諭欽差协办大学士福康安从严审办

洋面抢劫粮船案

乾隆五十二年八月初八日 台湾档

大学士和，字寄钦差协办大学士总督将军侯福，乾隆五十二年八月初八日奉上諭：

据李侍尧奏洋面贼船劫去米石、兵器及运米接济、缓征钱粮各折，据称浙省运闽米船，于七月初八日在洋面遇贼船劫去米数十石，并鸟枪、腰刀各一件。又新城县运闽米船，亦在洋面被盗夺去鸟枪二杆、腰刀二口，其米石并未被抢。又船户装运兴化府米石，在崇武澳亦被劫去鸟枪、腰刀等物，并未抢夺米石等语。此等盗犯，胆敢在洋面行劫官运米船，实属目无法纪。而该船户所遇之盗，又有不抢米石，止抢鸟枪、腰刀者，或竟系贼党潜出滋扰，亦未可定。该地方文武向视巡缉为具文，并不实力查拿，以致盗贼毫无忌惮，肆行劫掠，自应从严查办。着李侍尧督飭所属员弁，务须上紧设法勒限查拿务获。并于拿获盗犯时，亲行提讯，是否系海洋劫盗，抑系贼人伙党之处，严切跟究，务得实情。用兵之时，不必按例具题，一面奏闻，一面正法。并着拿获一案，即将审办情形，先行具奏。其未获者，俟拿获审讯明确，再行随案续奏。

至漳、泉二府应征钱粮，据奏虽于二月间具报开征，并未报司完解。现在出示晓諭，除已征者即提解司库，其未完钱粮及屯米概行缓征等语。漳、泉各属，虽已具报开征，而各州县因承办兵差，未及催征报解，所有未完钱粮及屯米，业经该督遵旨出示

缓征，务须督飭所属，严行稽察，实力查办，俾间阎得受实惠，以纾民力，毋任吏胥影射滋弊。

又据李侍尧另片奏称：蓝元枚处，派往兵力已为壮盛，兼闻贼中被胁之徒，多有急欲自投者。兵务一振，贼党自当解散等语。此是极好消息。前据蓝元枚奏，在彰化地方传旨晓谕，即有民人从贼巢投出，自诉并非贼党，该参赞详加开导，皆知欢欣鼓舞，共庆更生。今李侍尧又闻有被胁民人欲自投之信，可见贼党渐已离散。但李侍尧所闻之信，得自何人，着即详悉复奏。至贼中被胁民人，现既纷纷投出，常青等务须乘此机会，设法招徕，广为晓谕。一经投出，或令其入伍食粮，或令其归农安业，务使闻风踊跃，投效争先，俾贼党日就离散，势如瓦解。此为最要。

又据奏查讯彭喜、赖树二犯被获缘由，此等匪犯既被官兵、义民拿获，其为党恶无疑。况现在正须严拿逸犯之时，其有形迹可疑者，即被兵民误拿，亦不得为冤抑。若向将弁兵民逐一跟讯推求，将弁兵民心怀疑畏，必致观望束手，逸匪等转得漏网。着传谕李侍尧、常青等，此后拿获匪犯，除实系良民，被兵民挟嫌、索赃、诬陷，及本系义民曾经随征出力，确有可据者，自应照例宽释外，其余被获之犯，竟无须再行跟究，以致转得疏纵也。

至常青处所请添调官兵，其先派往之闽、粤兵四千久已到彼，其余各兵陆续配渡开行，此时自己已到。蓝元枚处应添兵五千，亦经李侍尧派拨前往。两处兵力，愈为壮盛。现在南路贼匪经官兵搜剿，贼目庄大田已有潜逃之信。今据李侍尧奏，北淡水一路渐觉宁贴，时有米船到彼，粮价平减，是南北两路于剿捕之事俱有转机。道路既已疏通，声势联络，该将军等亟应趁此贼匪溃散之时，乘官兵新到锐气及锋而用，各亲自统领南北两路，会

合柴大纪擒拿贼首贼目，进捣贼巢，迅速藏功。常青、蓝元枚自前次奏到后，已阅旬余，尚未据有续奏。柴大纪于魏大斌等援兵到后，自必乘势剿杀，打仗得胜，亦久未据该参赞奏报。朕盼望捷音，日切悬注，着常青、蓝元枚、柴大纪即将近日剿贼得胜情形，速行驰奏，以慰廑念。

至李侍尧所奏守备罗礼璋、外委陈皋在大屯山见有挑运私磺匪徒，率兵前往查拿，该匪即弃担而逃，不知去向等语，是何言耶？该守备等既见有挑运私磺之人，自系贼匪无疑。即使带兵不多，不能尽数就获，亦应擒贼一、二人，以便跟究严办。何至竟任该匪等悉行逃散？罗礼璋、陈皋殊属无能，着蓝元枚严行申饬。此二人遇有劳绩，不准记功，以示惩儆。

再，据李侍尧奏，请将福宁镇何俊暂署水师提督等语。何俊如果熟悉海疆，足资弹压，自可令其暂署；否则前此派出赴闽之王柄，人亦明白，着该督于此二人内酌量其才具实堪胜任者，即委一人署理水师提督事务，于巡缉稽查，更当得力。将此由六百里加紧各传谕知之。仍着常青等将于何日会合进剿，得胜情形，各行驶奏。并着李侍尧续得地方官禀报，南北两路打仗得胜信息，一并速奏。朕日夕盼望捷音之至！并谕福康安知之。

钦此。遵旨寄信前来。

钦差协办大学士福康安奏起程

往台办理军务折

乾隆五十二年八月初九日批 军录

臣福康安跪奏，为接奉谕旨，恭折复奏事。

窃臣奉旨前往台湾督办剿捕事宜，在热河行在叩觐天颜，仰蒙圣恩，指授方略，训谕周详，俾得遵循办理，实深钦感。查台湾现在情形，贼匪四出攻扰，久未藏事。总由南北道路梗阻，声势未能联络，而贼目庄大田攻逼郡城，牵缀官兵，常青等又不能自南趋北，致贼匪乘隙围困诸罗，即须将郡城及诸罗两处贼匪，痛加剿洗，开道通路，是现在急应办理紧要关键。

今于初六日途次接奉谕旨，据李侍尧奏到，官兵及粮饷军需，俱已直抵诸罗。贼目庄大田已回南路。常青遣兵巡哨南潭，经官兵剿杀，贼匪大溃。闻庄大田有潜逃之信，等因。钦此。又蒙抄寄朱批李侍尧奏折一件，臣敬谨阅看，得悉赴援之兵及军需粮饷，俱由鹿仔草三路前进，直抵诸罗。南潭贼匪经官兵义民剿杀溃散，庄大田已欲潜逃。诚如圣谕，实属极好机会。臣跪读之下，实深喜慰。从此附近郡城一带贼匪，经官兵大加歼戮，贼势益衰。常青等统领大兵即可前往北路追剿，诸罗道路既通，蓝元枚亦可自北而南，会合柴大纪，攻剿占据斗六门贼匪。此时添调兵丁，业经陆续配渡，大兵四面云集，声势壮盛，贼人党羽自必纷纷溃散。又蒙圣谕，以庄大田穷蹙潜逃，势必至大里杙藏匿。令该将军等三路会合直捣贼巢。该将军等钦遵谕旨，奋勇直前。贼首贼目无难一鼓歼擒，想数日内常青自有捷音奏到。

臣到京后，起程之期，蒙恩谕令初九日时日最吉，遵即于是日清晨起程。沿途仍无分昼夜加紧行走。途中若遇常青驰奏六百里加紧报匣，已蒙赏给钥匙，即可先行开看。常青等若能督率官兵复其巢穴，将贼首林爽文、贼首庄大田业经全数擒获，（朱批：想汝到台湾，不难即听捷音。）臣再行遵旨旋回。一面飞咨川省将所调屯练降番停止进发，以省烦扰。倘贼首等尚未全获，及有应行搜捕余匪之处，仍应驰往台湾督办一切，容臣临将酌量情

形，随时具奏外，所有接奉谕旨缘由，理合恭折复奏，伏乞皇上睿鉴。谨奏。

（发文日期缺。）

乾隆五十二年八月初九日奉朱批：是。知道了。钦此。

钦差湖广总督常青等奏南潭打仗得胜折

乾隆五十二年八月初九日批 军录

将军湖广总督臣常青、参赞福州将军宗室臣恒瑞跪奏，为截剿南潭贼匪，连得胜仗，恭折具奏，仰祈圣鉴事。

窃臣等因诸罗有贼滋扰，屡派官兵接续应援，复虑南路匪众窥伺郡城，于六月二十八日督率官兵剿捕鲫鱼潭一带，将南潭贼匪杀败，业于七月初五日具奏在案。至初九日臣等拜折后，南潭中洲各处之贼，又纠众三千余人，三面来攻大营。当派侍卫乌什哈达、章京岱森宝、总兵梁朝桂等，各带弁兵，并令臣常青之子希明随同乌什哈达等，迅往迎击。贼人胆敢围拢，官兵分开队伍，施放枪炮。约打毙贼五、六十人，贼即败退。官兵向前追赶，割取贼首一颗，（朱批：但觉少耳！）夺获贼炮一门，军械二件。因有阵雨路滑，随各收兵。初十、十一两日，贼众并无动静。臣等细思派赴诸罗官兵，尚无到彼信息，今南路贼匪屡次失利，倘或潜赴北路合扰诸罗，则应援之兵，必更阻滞，不可不预为堵截。因于十二日拨兵二千名，分左右队，派令乌什哈达、希明、梁朝桂等分带，由南路进攻南潭、中洲。贼人分头抗拒，官兵枪炮打毙三、四十人，割献耳记发辫七个，夺获贼械六件。

（朱批：总觉少，不快人意！）贼人败走。官兵追至溪边，泥泞

收回。

十四日又派令乌什哈达、岱森宝、总兵梁朝桂、陆廷柱、协领海星阿、副将谢廷选、三等侍卫希明等，各带本队弁兵，并郡城及山猪毛各义民，臣等亲往督阵调度，各官兵分作三路，由沙岗、嵌脚、北势前赴南潭。先将贼人藉为遮蔽之丛竹密菁，随路砍伐，（朱批：好，早应如此！）贼人不能藏伏，悉出抵御。约有贼五、六千人，恃其趑捷，直来迎扑，并与官兵对放枪炮。满汉官军用连环枪、子母炮进步施放，约毙贼百余人，（朱批：不为快意。）贼各骇奔。三路官兵会合追赶，由车路干杀进康厝洋，乃贼人又于山坎结队，抵拒迎战。官兵奋勇，义民争先，齐用排枪直压，贼遂大溃。官兵义民追杀，直至南潭，（朱批：此系庄大田住处。今何往？）烧毁贼人草屋篷寮数百间，余贼纷窜。因该处山径逼仄，天色已晚，不便深入，即将官兵撤回。是日除枪炮毙贼外，又杀贼八十余名，（朱批：总觉少。）生擒匪犯高深、杨老二名，割献首级二颗，耳记发辫二十六个，夺贼炮械七十五件，阵亡满兵一名，受伤兵丁一名，义民六名，又未知存亡兵一名，照例赏恤查办。臣等查十四日将弁等带兵打仗，协领海星阿、副将谢廷选、都司杭富，俱能身先士卒，洵属勇往。内都司杭富在金川军营已戴蓝翎，现今仍能奋勉，臣等将海星阿、谢廷选、杭富三员，一并奖给花翎，（朱批：好。）以示鼓励。其余查明出力之千、把、外委等员，遇缺即予拔擢。至此次随同打仗义民人等，内山猪毛前来之广东庄义民，实为勇猛，尽力杀贼。查其有功受伤者，臣等面为嘉奖，分别赏给银牌番元，（朱批：尚不足酬劳，应与武弁数人，以示奖励！）莫不踊跃。臣等察看南路贼匪经官兵连日搜剿，自不能分赴诸罗，结党聚扰。臣等俟雨水渐少，兵力敷用，即乘锐前驱，殄灭丑孽。

再，续添粤兵内，未到之八十五名，兵船一只，兹于十五日齐到。所有连次截剿得胜情形，谨合词具奏，伏祈皇上睿鉴。谨奏。

乾隆五十二年七月十六日。

乾隆五十二年八月初九日奉朱批：即有旨谕。钦此。

钦差湖广总督常青等奏应援官兵

已抵诸罗折

附：陈妈球等供单

乾隆五十二年八月初九日批 军录

将军湖广总督臣常青、参赞福州将军宗室臣恒瑞跪奏，为应援官兵已到诸罗，恭折奏闻事。

窃臣等先派总兵魏大斌等带兵一千五百名，又派游击田蓝玉带兵一千名，俱抵鹿仔草庄。因大崙、埔心等贼庄阻路，复于七月初八日再派健锐营章京官宝、德成额、参将特克什布等，带兵一千四百名前往。即于初九日具奏在案。伏思诸罗被贼攻扰将及一月，署提臣柴大纪等望援甚殷，不可不迅速打通。又虑南路之贼，或有分助北路贼党之事，是以臣等连日搜剿南潭一带贼巢，以预截其往北之路，（朱批：贼不北往，今在何处？）并差人驰探鹿仔草至诸罗信息。正在盼望间，兹于十五日接据参将特克什布等禀报，所带弁兵于初九日到新店，初十日登岸遇雨，至夜到盐水港。十一日起行，约有五里，听闻炮声，赶到鹿仔草庄。适有雷雨，魏总兵、田游击现将官兵掣回营盘，会商办理。俟攻打前往诸罗，再行具禀等语。又接据游击邱能成驰禀，三起各应援

官兵，于十三日辰刻自鹿仔草庄起行，前往诸罗。各兵军装系随带需用，所剩药铅、帐房、锣锅等项，俱存鹿仔草看守。俟道路相通，另行搬运。游击即带驻扎弁兵四百余名，沿途开路护送。大兵前进，施放枪炮，打败贼匪，四散奔逃。直至汤元店地方，将队伍扎住。随令武举陈宗器、黄奠邦、监生蓝应举，（朱批：此三人亦当予以官职示奖。）各分下义民，为大兵向导，护送同往。约未刻将进诸罗，游击仍带弁兵回鹿仔草固守等语。并据台湾道府转禀，接据随营巡检邵宗尧禀称，十三日申刻差役在鹿仔草打听，官兵于本日辰刻，分三起攻剿直前，杀退逆匪。于午刻已抵县城。所有解县饷银随同前进等语，理合转禀各等语，理合转禀各等情前来。

查诸罗屡有贼扰，俱经柴大纪杀败。惟此次道路阻隔，则粮饷药铅恐有匮乏，今应援各兵业已齐到县城，既可保固无虞，贼人自必伎穷势蹙。但尚未接有柴大纪、魏大斌等咨报会剿情形，或系十三〔日〕大兵接队前进，军声壮盛，贼人暂时逃避，尤未尽行溃散，亦未可定。除俟接据该镇将等得有会同剿贼胜仗，星驰奏报外，所有官兵已到诸罗缘由，谨合词恭折具奏，伏祈皇上睿鉴。谨奏。

乾隆五十二年七月十六日。

乾隆五十二年八月初九日奉朱批：已有旨了。钦此。

（以下据《钦定平定台湾纪略》卷三十补）

又，武举黄奠邦义民同兵丁获解匪犯苏普、陈纪二名，凤山县义民武生吴鹰扬等，获解匪犯陈妈球、陈接老、陈苏、蔡阁四名。内除误拿之陈阁一名讯非贼伙保释，被胁随行之陈苏一名，拟遣另办外，其陈纪、陈接老二犯，俱曾随贼攻城杀人，当即讯明正法。至陈妈球原籍同安县，于三十七年来台湾与庄大田贼伙

张基光熟识。上年庄大田攻陷凤山，该犯投张基光入伙，给有旗号，手下有洪富、洪义等四十多人，在大湖与官兵打仗三次，本年因攻府城受伤，庄大田许做先锋。五月间至东港各庄派饭，才被拿获。苏普原籍亦系同安，在台湾生长，系林爽文伙党，李七于上年十一月间招入天地会。至十二月初间，林爽文攻诸罗时，即领旗号同李七攻入西门，林爽文封为存城千总，随又同李七攻盐埕桥。本年二、三、四月间，俱随李七来攻府城。因至打苗（猫）庄纠人被获。该二犯罪大恶极，应请解交刑部再行确审。

附：陈妈球等供单

问据陈妈球供：小的年三十八岁，原籍同安县，父母已故，并无兄弟妻子。三十七年来台湾，住居凤山县万丹新庄，佣工度日。与庄大田贼伙张基光熟识，去年十二月十三日，庄大田攻破凤山县城，小的投张基光入伙。给小的大旗一枝，小旗二枝，沿庄派人钱米，掠人衣物。庄大田是林爽文伪封元帅，张基光伪封招讨，并称总统营。还有许光来伪封副帅，又有陈建平封为先锋。小的在大湖打仗三次，手执藤牌半斩刀。今年三月初八日，随张基光复陷凤山县城，曾杀三个义民，并未伤害官兵。三月二十六日，来攻府城小南门营盘。小的被炮打伤，庄大田许做先锋。小的因伤回大溪脚医治，到五月十八日才来东港，见张基光因无粮食和旗脚，陈接老们到大林蒲等庄派饭，就被义民拿获的。小的分下有四十多人，去来不常。内中只记得洪富、洪茂、陈细、陈六、吴探这几个人，其余记不得了。小的并不认识林爽文，也没有入天地会。他们何时起会，共有若干人，小的供不出的。

问据苏普供：小的年二十岁，原籍同安县，在台湾生长，住居诸罗县他里雾庄。父母俱故，并无妻子，只有一个兄弟苏德，分居各自营生。去年十一月初六日，是林爽文伙党李七来招小的入天地会。同时还有谢启、谢平、赖番、赖水、赖荫、谢水、谢松、翁聪、林三献、黄阿三、叶和、陈辉、陈赤狮、杨蒲、杨猴山、杨猫明、林子孝们一班人，余外不认识了。十二月初六日，林爽文来攻诸罗县城，小的领一枝红旗，同李七攻入西门。林爽文封小的为存城千总，给一颗木印。他们杀害官长，小的并未在场。初八日小的又同李七去攻盐埕桥。今年二、三、四月，都曾随李七来攻府城。因林爽文、蔡福、叶省手下人被官兵大炮打毙甚多，林爽文生了气，杀了一个军师，不晓得他名字。林爽文就和贼伙都回大里杙去了。小的如今来打猫庄寻人，被官兵义民拿获的。这天地会起于何时？共有若干人？小的入会未久，实在不知详细，供不出的。

福建水师提督蓝元枚奏西螺战况折

乾隆五十二年八月初九日批 军录

福建水师提督参赞奴才蓝元枚跪奏，为杀退西螺贼匪，恭折奏闻事。

窃彰彰化县属之条圳塘，及东螺、西螺一带村庄，俱被贼占踞，以致诸罗道路梗塞。经奴才分派官兵各路屡次杀败贼匪，牵制贼势。探闻林爽文尚在诸罗滋扰，皆由各处百姓畏迫相从，是以贼仍猖獗。奴才细查彰属自条圳塘、东螺、西螺数十庄约计一万余人，多系同安、漳州民人，内中因畏焚杀从贼不少。奴才随

令武生陈大用系同安人、武生钟奇英系漳州人，（朱批：此二人如出力，即可以武弁用之。）分头前往，详细晓谕各村庄人等，令其保守村庄，各安生业。旋据称各庄百姓俱皆感激改悔，不敢从贼。奴才筹度，西螺贼匪虽众，系藉该地百姓胁从鸠聚。若该地之人不敢附和，则林爽文拨来窜踞之贼，亦属有限，势易攻杀。（朱批：所想是。）但西螺离奴才营盘五十里，若奴才带兵前往，恐一声张，则贼匪必先设备，于事转为无益。奴才是以派拨守备张奉廷带兵五百名，先去贴防二林。于七月十七日密令该备，带兵同二林义民、武生陈大用等自二林由嵌头厝进攻西螺。又令牌头兵民由条圳塘前进，夹攻西螺，使贼首尾不能相顾。当日西螺一带贼匪共有千余人，并无防备，一见官兵猝至，俱鸠集西螺溪旁迎敌，被官兵施放枪炮打毙数十贼。（朱批：但少耳。）该贼见各该地村庄从贼之人俱无出来救应，随即逃散。生擒贼匪程甫一名，是否贼目，讯明另办。夺获竹牌、牛皮牌二十三面，大小旗八杆，焚毁条圳塘、牛埔厝等处大小贼庄十三庄。因西螺村庄系是广东良民居住，被贼所占，是以未令焚毁，（朱批：好。）以示区别。但西螺离斗六门不远，兵力稍单，未便扎营。该守备仍带兵驻扎二林，严加堵截。仍令相机行事。

查兵丁王名邦、陈联升俱被枪伤，伤医可痊。至添调漳州官兵四、五日内谅可陆续渡到鹿港，倘守风未到，奴才仍统现在官兵，相机剿捕。一得胜仗，即行驰奏。（朱批：是，盼望之至。）所有杀退西螺贼匪缘由，理合恭折驰奏，伏乞皇上睿鉴。谨奏。

乾隆五十二年七月十九日。

乾隆五十二年八月初九日奉朱批：虽非大胜，亦可称兵威稍振，速行进剿，余有旨谕。钦此。

两广总督孙士毅奏林爽文军

在大里杙筑城折

乾隆五十二年八月初九日批 军录

两广总督臣孙士毅跪奏，为奏闻事。

窃查台逆林爽文等，不过匪犯作恶，其势断难抗拒大兵。但臣每次伏读谕旨，见我皇上为此么磨不靖，时时宵旰图维，无微不至。臣受恩极重，岂敢一刻自安？今既不能身列戎行，力图报效，惟有将风闻贼人情状，并臣涉见所及，一一入告，仰候皇上随时指示，庶逆犯得以早就荡平。

臣闻林爽文等狡诈百出，指使零星小贼骚扰各处村庄，使之不得耕种。而于大里杙贼巢之外，架起厚墙，如城垣光景，挡住我兵搜捕之路。此即钦奉谕旨，牵缀我兵时所为。其中各处山田，遍种禾稻杂粮，使将来外间乏食穷民，不得不迫而入伙。又闻贼人缺少火药，其炮子、枪子铸造不能如法，势难及远。每于我兵施放枪炮之后，满地捡拾铁子，用以抗拒我兵。臣是以每于点送粤兵赴台时，面谕领兵将弁，必须贼人见面，计枪炮可到，方许施放，毋令于相距稍远之地随便施放，（朱批：此绿旗向来恶习也！）不能剿贼，而转为贼用。又闻大里杙后山名曰三湖，三湖之后即系生番地面。此内数处生番，已为贼人所戕，占住村落，为将来窜伏之地。臣思该处内山，皆系生番地面，此数处生番虽为所戕，其余为数尚多，似可就近设法，密遣熟番进山，晓谕生番人等，逆贼林爽文与尔等势不两立，尔等若再不同心协力，剿除贼匪，将来尔等地方势必尽为所占。剴切谕知，则以番攻贼，或者

亦可得力。

又闻逆犯已于水口暗造贼船数十只，希图危急之时逃入洋面。臣系属风闻，不知水口确实地名。伏思剿除贼匪，宁可再迟一月、半月，至一经剿除，必须生致贼首，尽法处治，方足以快人心，而申国宪。现在既已厚集兵力，定可计日成擒，应将贼人窜逃诡计，先为绝其去^①路，使此等悖逆奸徒，无可潜踪，庶为周妥。臣本不知兵，且远隔台洋（原文），风闻亦未知是否确实。仰蒙圣谕，再有信息，总当速奏。附此次由驿之便，缮折驰递。伏乞皇上睿鉴。谨奏。

乾隆五十二年七月二十四日。

乾隆五十二年八月初九日奉朱批：具见留心，即有旨谕将军等矣！钦此。

谕钦差协办大学士福康安等务

须跟踪追剿庄大田

乾隆五十二年八月初九日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、两广总督孙、福建水师提督参赞蓝、陆路提督参赞柴，乾隆五十二年八月初九日奉上谕：

据常青等奏截剿南潭贼匪及应援官兵已到诸罗各折内称，南潭、中洲各处贼匪，于七月初九日纠众攻犯大营，经官兵施放枪炮，击毙贼匪五、六十人，贼即败退，官兵向前追赶，因有阵

① 《钦定平定台湾纪略》（稿本）卷三十为“生路”。

雨，路滑收兵。又恐贼匪潜赴北路骚扰诸罗，于十二日拨兵二千，分两路进攻南潭、中洲，贼人分投抗拒，被官兵枪炮打毙三、四十人。追至溪边，泥泞收兵。十四日又派兵三路，亲往督阵，前赴南潭，将竹菁砍伐，贼人悉出抵御，经官兵用枪炮打毙百余人。追杀直至南潭，烧毁贼人草屋篷寮数百间，余贼纷窜，因路窄天晚，即将官兵撤回等语。已于折内批示。

昨据李侍尧奏称，接据地方官禀报，应援柴大纪官兵已抵诸罗，贼目庄大田已回南路，常青遣兵巡哨，南潭有贼匪数千，经官兵剿杀，贼匪大溃，闻庄大田有潜逃之信，现在设法截拿等语。朕意南路贼匪屯占南潭数月，屡出滋扰，今经官兵义民大加剿杀，贼目庄大田思欲潜逃，是贼势业经溃散，庄大田穷蹙无归，自必逃至大里杙贼巢，同贼首林爽文等负隅死守。是剿贼之事，已有转机。即谕该将军等亲统大兵，速赴诸罗，会合蓝元枚、柴大纪，进逼贼巢，以期速奏擒穴擒渠之绩。并以柴大纪守城出力，歼贼甚多，李侍尧一得信息，即行驰奏，以慰朕怀，俱赏给蟒袍、荷包等件。并以常青不日即当奏报捷音，亦预备蟒袍等物，俟其奏到，即行颁赏。乃本日常青等具奏各折，仅系派兵剿捕情形，并未大败贼寇，擒获贼中有名头目。伊等每次奏折，动称贼有数万，而此数次所杀贼匪，不过数十人及百余人，不为快意。似此零星剿杀，何足以痛示惩创，俾贼党闻风夺气？且贼目庄大田既在南潭，官兵前往剿捕时，即应侦探贼目所在，督率兵民，奋力穷追，以期一鼓就获，乃屡次俱称遇雨路窄，收兵回营，而于庄大田是否尚在南潭一带藏匿，抑系逃往北路之处，并未提及。况据该将军奏称，南路贼匪屡次失利，或恐潜赴北路，合扰诸罗等语。常青等既知虑及庄大田潜往北路，攻扰诸罗，则该将军即当留恒瑞带兵固守府城营盘，常青竟亲统大兵，跟踪追剿，竟由北

路前往诸罗，擒拿庄大田，方合机要。乃竟计不出此，即将官兵撤回，并不直前追剿，又无庄大田下落，实属糊涂。此时暂且不值仰邀赏赉，仍著传旨严行申饬。该将军等亟应乘此贼匪屡败之时，竟留恒瑞驻守府城营盘，常青速统大兵，侦探庄大田实在去向，竟前往诸罗，会合柴大纪、蓝元枚，进逼贼巢，擒拿渠魁党恶。现在伊等所请添调兵丁，自己全抵该处，军威倍为壮盛，尤应及锋而用，以期速奏肤功，勿再因循坐守。

至南潭一带贼人，藉为遮蔽之丛竹密菁，现经常青于搜剿时，随路砍伐，所办较好。且此事早应如此办理。此时该将军等统兵前往北路，遇有似此深林密菁，贼匪倚为藏伏处所，即应随路砍除，廓清道路，不使贼人得以潜藏匿，方为妥善。

再，常青于十四日带领官兵义民，进攻南潭贼匪时，既将贼人草屋篷寮数百间烧毁，此系庄大田屯占居住之处。今既行烧毁，庄大田现又何往？又，此次随同打仗之广东庄义民，甚为奋勇出力，常青止赏给银牌番元，尚不足以酬劳。著常青查明实在出力者，拔补武弁数人，俾该义民益知踊跃奋勉。又，游击邱能成带兵护送火药军装等项前抵诸罗，亦应升赏。武举陈宗器、黄奠邦、监生蓝应举，各率义民为大兵向导，护送同往，亦属可嘉。陈宗器、黄奠邦、蓝应举，俱著予以官职，用示奖励。

再，柴大纪处既有魏大斌等带兵援应，已抵诸罗，兵势益壮，柴大纪自必趁此援兵接应之时，出城夹击，奋力剿杀。如果庄大田逃往诸罗，正可乘机截擒。其如何打仗杀贼情形，总未据该参赞奏到，深为廛注。著柴大纪迅速驰奏，以慰悬念。

再，据孙士毅奏，闻贼匪缺少火药，每于我兵施放枪炮之后，捡拾铅子，用以抗拒我兵。于粤兵赴台湾时，面谕领兵将弁，必须贼人见面，方许施放枪炮，不致转为贼用。又，闻大里

杙后山名曰三湖，其后即系生番地面，应密遣熟番进山晓谕，令生番等协办剿除贼匪。又，闻逆犯于水口暗造船只，希图危急之时逃入洋面，应先设法防范，截其去路等语。所奏具见留心，甚合机宜。官兵与贼相遇，每于贼人尚远之时，即行随便施放鸟枪，既不能打毙贼人，而枪子转为贼匪捡用，最为绿营恶习。自应晓谕兵丁，令其临阵近贼，如法施放，方为得力。至贼匪溃败，恐其逃入内山，已早经降旨，令该将军等晓谕生番，奖赏花红布疋，令其缚献。向海口一带，尤应先事严防，绝其去路。今孙士毅驻扎潮州，即闻贼匪有暗造船只之事，该将军等在彼岂无闻见？而于施放鸟枪及晓谕生番等事，该将军等并未预为筹及，将来贼首远窜，弋获较难。著将原折及朕批示，抄寄常青等阅看。并著将孙士毅所奏各节，即行悉心筹办，庶于剿捕有益。

本日已刻，又据蓝元枚奏到杀退西螺贼匪一折，内称于七月十七日，密令守备张奉廷带领官兵义民，自二林进攻西螺，又令埤头兵民，会合夹攻西螺。贼匪共有千余人，并无防备。见官兵猝至，纠众迎敌，被官兵枪炮打毙数十人，夺获器械，贼人逃散。现在统领官兵相机剿捕等语。已于折内批示。昨因李侍尧奏应援柴大纪官兵，已抵诸罗，南路贼目庄大田有潜逃之信，朕以蓝元枚若能统兵会剿，奏到得胜捷音，亦应与柴大纪一体颁赏。今初阅柴大纪奏到之折，虽调派官兵，分路攻剿西螺贼匪，打仗得胜，兵威较为振作，但尚未能统兵前进，擒拿贼首贼目，大加斩获，本不应加以赏赉。及阅折片内称，伊族人二百余人住居彰化县，于七月十四日有蓝启能等男妇共七十九人，因所住地方离贼巢不远，蓝元枚到鹿仔港后，恐贼匪闻知，怕伊等暗通信息，逼令从贼，各带家属从小路投出。又蓝住等三人被贼拦住杀死，

拿去蓝湖等七人眷属十一口，不知下落。蓝启能等恳求安插等语。蓝元枚同族之人，因恐被贼胁迫，挈眷投出，遇贼拦截，拿获被害，实为可悯。所有被贼杀死之蓝住等三人，俱著加恩赏恤。至蓝元枚所奏投到之蓝启能等，若能熟识山路，即令随同剿贼。其中如有曾经从贼者，仍请查明正法等语。则所办尤为公当，可嘉之至。蓝元枚著即赏给缙丝蟒袍一件，御用大荷包一对，小荷包二对，以示奖励。至蓝启能等挈其老弱，自行投诉，其畏贼胁迫，自属实情，蓝元枚竟可毋须疑虑。如有熟悉该处路径者，正可用为眼目向导，令其随同征剿，更为得力。且既自行投出，亦当遵照前旨，许令自新。从前有无从贼之处，可以无庸追究。蓝元枚惟当趁此兵力厚集，贼匪溃败之时，迅速统领剿杀沿途贼匪，直抵诸罗，与常青、柴大纪会合一处，以大兵全力攻扑贼巢，拿获林爽文、庄大田等，蔽功奏绩，承受恩眷，毋负委任之意。

至福康安前已有旨，令其遄程前赴台湾。现在南路贼匪已有奔溃之势，庄大田思欲潜逃，北路柴大纪处亦经援兵应合，蓝元枚又经杀贼得胜，此时计当与常青、柴大纪合兵会剿贼匪。恐贼匪势穷，纷纷奔散，正须派出之巴图鲁、侍卫等，前抵该处截拿追剿。福康安与海兰察等，于此时急应带领侍卫、章京等，星速遄行，及早到彼，督同剿捕，赞成大功，擒拿贼首贼目及逃窜余匪，以期一举集事。将此由六百里加紧传谕常青、蓝元枚、柴大纪，著将近日曾否拿获贼目庄大田，及于何日会合进捣贼巢，打仗得胜情形，一并迅速驰奏。

再，著李侍尧续得官兵剿贼信息，即行随行速奏，以慰悬注。并谕福康安、孙士毅知之。

钦此。遵旨寄信前来。

谕钦差大学士阿桂阅看折谕详悉复奏

乾隆五十二年八月初九日 台湾档

大学士和，字寄钦差大学士公阿，乾隆五十二年八月初九日奉上谕：

前据李侍尧奏，援应柴大纪官兵已抵诸罗，南路贼匪经官兵剿杀，庄大田有潜逃之信，现在设法截拿各情形，朕方以常青等乘此机会整旅长驱，可期擒拿贼首，迅速蒧事，为之稍慰。本日据常青等奏到各折，仅系剿捕南潭贼匪情形，虽打仗得胜，但所杀贼匪不多，不为快意。且屡次俱因遇雨路窄收兵，而于庄大田逃往何处，折内未经提及，且并未跟踪追剿。现经降旨飭谕。

同日又据蓝元枚奏到杀退西螺贼匪情形一折，虽非大胜，亦可称兵威稍振。并据称伊族人蓝启能七十余人，由彰化县小路投出，现在分别安插。其有熟谙路径者，即令随营征剿，并请伊族人内有曾经从贼者，即当明正典刑等语。所办可嘉之至。已另降谕旨，并赏给蟒袍荷包等物，以示奖励。看来南北两路官兵俱渐有起色。现在各处添调之兵，已经齐到，既谕令常青、蓝元枚迅速带兵前赴诸罗，与柴大纪等会合一处，乘新到官军锐气，扫穴擒渠，一举蒧事。并谕福康安等带领侍卫、章京迅速前往，帮助擒拿首伙逸匪。所有前日李侍尧及本日常青、蓝元枚奏到各折，并所降谕旨，俱著抄寄阿桂阅看，如即就所见，详悉复奏。将此传谕知之。

钦此。遵旨寄信前来。

谕钦差湖广总督常青等将

陈妈球等就地正法

乾隆五十二年八月初九日 台湾档

大学士和，字寄钦差湖广总督将军常、闽浙总督李、浙江巡抚琅，乾隆五十二年八月初九日奉上谕：

据常青等奏，台湾各路擒获贼匪，除将陈纪等犯当即正法外，查有陈妈球、苏普二犯，讯系林爽文滋事之初即已入伙，应请解交刑部审办，现已押赴泉州，交李侍尧另委妥员解京等语，已于折内批示矣。逆匪纠结伙党，肆行滋扰，如系擒获助贼头目，关系紧要之犯，自应解京确讯情节，尽法惩治。至于附从伙党，拿获后即当随时正法，何必纷纷解京？现在陈妈球、苏普二犯，尚非若廖东、连清水等得受伪职者可比，徒劳驿传，殊觉无谓。此时早至内地，即著李侍尧将该二犯立行正法。或业经解至浙江地界，即著琅环查明该犯等解至何处，即在该处正法，毋庸解京，致滋扰累也。将此传谕知之。

钦此。遵旨寄信前来。

两广总督孙士毅奏招募兵丁以备调遣折

乾隆五十二年八月初九日批 军录

两广总督臣孙士毅跪奏，为遵旨办理恭折复奏事。

本年七月二十三日，臣在黄岗接准大学士和，字寄乾隆五十

二年七月十二日奉上谕：据常青等奏，接准诸罗会禀，派兵赴援一折，等因。钦此。仰见我皇上于数千里外，凡军营南北两路情形，一经训示，无不洞若观火，非臣下浅识所能窥见。臣遵即出示惠潮等处，令营员会同地方官，广为招募，挑选勇健丁壮，多多益善，以备调遣，并向现在出境之满汉官兵，面加晓谕闽粤两省。又奉谕旨，添调官兵数万，俟尔等赴台之后，即当接续前进，使之胆气愈旺，兵气愈扬。

再，臣闻南北两路贼目虽多，而其中狡狴险狠，众贼视为进退，尤以林爽文为渠魁。若以大兵力量全注南路，即使将庄大田等尽数驱除，而于北路贼势仍未丝毫挫动。逆贼林爽文转得藉此休息，为悉力抵御之计。且府城前此兵单之候，尚能竭力坚守，此时兵力已增数倍，逆匪岂不知万万难攻，而乃或逼南门，或扰东门，常作侵犯之势，明系林爽文暗令庄大田等在南路牵制大兵，该贼得于北路招匪聚粮，从容布置。（朱批：竟是如此！）便图攻占诸罗，狡恶若此，实堪发指。今奉谕旨，以该贼故作窥伺府城，牵缀官兵，令常青等拣选精锐，直趋北路，会同柴大纪等擒渠捣穴，并将盐水港及笨港等处贼匪，一概扫除，如此不独打通粮道，并可肃清水口，将来贼匪亦无从涉足洋面，四散潜逃。伏读皇上筹算，至圣至明。此时逆犯林爽文断不料大兵忽然自南而北，自必闻风胆落。常青等恪遵办理，必能将逆犯指日剿擒。其余贼匪，一闻林爽文就获，即势如扫箠，不攻自破，臣实不胜忭庆。所有钦奉谕旨详细示知，臣遵即出示招募缘由，谨缮折由驿奏复，伏乞皇上睿鉴。谨奏。

乾隆五十二年七月二十四日。

乾隆五十二年八月初九日奉朱批：近闻我兵势已大振，但常青尚未奏到，为之盼望耳！钦此。

閩浙總督李侍堯奏遵旨募兵及

派兵赴鹿耳門折

乾隆五十二年八月十一日批 軍錄

閩浙總督臣李侍堯跪奏，為遵旨募兵及派兵往鹿耳門，仰祈聖鑒事。

竊臣於本月二十五日接奉上諭：賊匪因大兵俱在府城，故以伙黨牽綴，而實欲攻陷諸羅，使南北益致阻隔，令將軍常青等速籌打通道路，會合柴大紀，以為進剿之計。欽此。仰見皇上洞燭萬里之外，毫無遁形。今幸柴大紀守御甚力，（朱批：實在出力可嘉。）而赴援之鎮將等，亦俱奮勇殺入，諸羅之圍已解，自此軍聲益振，賊胆日寒，脇從之徒將漸解散，此台灣一大轉關也。又奉上諭：令臣與兩廣總督臣孫士毅再募兵數萬，多多益善，以備調遣。欽此。尤見聖明遠見，倘萬一再需增兵，與其征調遠省，自不如在閩粵近地，預行召募訓練，可備緩急。查臣前以本省營兵不敷差防，奏請照派往台灣班兵之數，沿海各營先募十之三，上游各營募十之二，此第為內地營伍空虛起見，實未計及將來再有調發之處。及接奉上諭，令于漳、泉一帶再募數千，始知皇上預籌深意，隨即奏明，漳、泉二府各募一千，現在已俱召募足數。今奉諭旨，應再廣為召募。第查諸羅現已解圍，軍聲日壯。近據同知楊廷理、楊紹裘俱稟稱，本月十四日，官兵焚燒南潭，見賊寮內只有番薯，並無米糧。又被害之同知王雋家人逃回稱，賊目尚有米可吃，賊伙惟吃番薯，且互相欺奪，勢將潰散等語。又同知吳元琪稟稱，聞得各賊目不复相睦，多有欲投誠者，

虽贼情狡诈，未可尽凭，然渐有涣散之势等语。是南路贼势已衰，看来内地可不必再募兵数万。臣前所奏募十之二、三，约可得三千有余。嗣又增募漳、泉兵二千，共已得五千有余。今请再于泉州及沿海各营募兵五千，约共成一万之数。（朱批：亦足矣。）臣仍以募兵三万为词，使外间传说，其实分开各营招募，外间但见处处增兵，固无由知其实数也。如察看台地情形，或尚非旦夕可了，则随时再行增募，以新兵存营训练，而以已练之旧兵派往，亦足应手。是否如此，伏乞圣明指示。（朱批：筹划精详，可嘉之外，无可谕。）

至凤山之东港，被贼占据，于鹿耳门甚有关系，奉旨令臣于内地总兵、副将内，拣派一员，带兵一二千，前往剿除。查臣前以东港被陷，已两次配赠船二只，兵二百名，派往鹿耳门防范。今再派兵前往沿海剿杀，必须水师，而内地水师各营现因米船被劫等事，（朱批：此种贼更可恶，今获数人否？当严审讯，尽法处之。）尤须巡缉洋面，每营除防汛外，不过存兵一二百^①及数十名不等，实无可再调。臣今于陆路各营内，凑兵一千名，配渡前往。移会常青留在军营进剿，而于在台之水师兵内，换出一千，（朱批：好。）以资沿海剿贼之用。查台郡安平港内，本有战船数十号，可就近配载。或在沿海搜捕，或向东港剿杀，则海面既有防御，而征兵亦不致短少矣！其领兵大员，查内地总兵、副将内，多系一人兼署数缺，实亦无可再调。臣拟于参游内酌派一员，带领前往，合并声明，为此谨缮折驰奏，伏乞皇上睿鉴训示。谨奏。

乾隆五十二年七月二十六日。

① 《钦定平定台湾纪略》（稿本）卷三十为“三百”。

乾隆五十二年八月十一日奉朱批：即有旨谕。钦此。

闽浙总督李侍尧奏飭令蓝元枚进兵

大里杙斗六门片

乾隆五十二年八月十一日批 军录

再，臣伏读上谕：令蓝元枚带兵往盐水港剿贼。钦此。臣查盐水港系府城由海道赴诸罗之水路，现有柴大纪所派游击杨起麟带兵一千驻守。魏大斌往鹿仔草时，又留兵五百名协防，并未被贼占据。该处距府城近，而距鹿港较远。蓝元枚须自鹿港出海，乘船南行，方至该处。今贼攻诸罗不利，倘乘蓝元枚兵出之后，来鹿港及北淡水等处滋扰，则蓝元枚又须折回。（朱批：如是则不可矣！即有旨谕。）查蓝元枚前奏增兵四五千，即可直攻大里杙之南，或攻斗六门等语。今漳兵二千^①已开洋前往，粤兵二千现亦陆续到厦配渡。是当责成蓝元枚即从陆路进攻大里杙斗六门等处。（朱批：是。）既直逼贼境，贼必不敢来窥鹿港及北淡水。即或绕道来窥，蓝元枚可以就近兼顾，似不必赴盐水港，转须自南而北，更觉纡回。臣详绎谕旨，原虑盐水港已被贼占，是以令蓝元枚前往打通道路。今盐水港既无疏虞，臣恐蓝元枚奉到谕旨拘泥前往，转非事机所急。是以一面具奏，一面移会蓝元枚，仍向大里杙、斗六门等处进兵，与柴大纪会合，相机攻剿，似为直捷。谨并附奏。

（发文日期缺。）

^① 《钦定平定台湾纪略》卷三十为“三千”。

同日^①奉朱批：甚是，用兵机宜，原应相时而动，前旨原为贼占盐水港也。今情形不同，汝所办甚是。钦此。

谕钦差大学士福康安等乘庄大田军

涣散之势妥为招抚

乾隆五十二年八月十一日 台湾档

大学士和，字寄钦差大学士公阿、钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月十一日奉上谕：

据李侍尧奏召募兵丁及台湾贼匪情形一折，内称诸罗现已解围，军声日壮。接台湾同知杨廷理等禀报，官兵焚烧南潭，见贼寮内仅有番薯，并无米粮，各贼目彼此不睦，多有欲投诚者。又有被害之同知王雋家人逃回称，贼目尚有米可吃，贼伙惟吃番薯，互相欺夺，势渐溃散。至李侍尧所募之兵，已得五千，再于泉州及沿海募兵五千，共成一万，可以足用。如必须增添，再行续募等语。所办筹划精详，可嘉之至，已于折内批示。又，折片称，盐水港系府城由海道赴诸罗之路，蓝元枚距彼较远，若自鹿港出海南行，恐贼匪到鹿港及北淡水等处滋扰，已移会蓝元枚，仍向大里杙、斗六门等处进兵，与柴大纪会剿等语。所办甚是，亦已详悉批示。前因盐水港贼匪纠众滋扰，思欲断绝粮道，是以谕令蓝元枚察看情形，或派普吉保驻守鹿港，该参赞带兵前往盐水港，将贼匪剿杀，再赴诸罗，会合柴大纪。今据李侍尧奏，盐

^① 指乾隆五十二年八月十一日。

水港距府城近而距鹿港较远，恐蓝元枚带兵南行，贼兵潜至鹿港滋扰，蓝元枚又须折回，即一面具奏，一面移会蓝元枚，令其即从陆路进攻大里杙、斗六门等处，尤合机要。用兵之道，原当相时而动。今该处情形，既有不同，自不当拘泥办理也。

至常青、蓝元枚已节经降旨，令其酌派官兵，留守府城、鹿港两处营盘，该将军、参赞各亲统大兵，直趋北路，与柴大纪会合一处，进捣贼巢，擒拿贼首贼目。今南路贼匪粮食就尽，其伙党乏食，且互相欺夺，彼此不睦各情形，系台湾同知等稟报，自当确实。是贼匪口粮垂尽，已有涣散之势。其附从伙匪，自必各自图生，纷纷投出。现在常青、蓝元枚两路应添官兵，已据李侍尧先后派拨，自早已全抵该处。常青、蓝元枚急应乘此军威壮盛，贼匪溃败之时，一面妥为招抚，一面速赴北路，将斗六门等处贼匪剿杀，廓清道路，前抵诸罗，与柴大纪会合一处，直捣贼巢，以期一鼓成擒，迅速集事。看来贼势已衰，剿捕事宜大有转机，不过九、十月间，即可蒞功奏绩，朕日夕盼望捷音之至。该将军等会合进剿、打仗得胜情形具奏之折，想已在途驰递，但尚未奏到。著传谕常青、蓝元枚，速将添调官兵，究于何日到齐，于何日各行统领前赴北路，与柴大纪会合进剿，及柴大纪处近日如何打仗杀贼，会合夹攻，曾否拿获贼首贼目之处，各行迅速详奏，以慰廑注。并著李侍尧续得台湾剿贼得胜及贼匪溃散投诚各信息，随时速奏。

至福康安已有旨，令其遄程前往。今贼匪日渐涣散，急须乘势搜剿。福康安更当与海兰察星速驰赴台湾，督同办理，迅奏肤功。所有本日李侍尧奏到之折，并著抄寄阿桂、福康安阅看。将此由六百里加紧各谕令知之。

钦此。遵旨寄信前来。

钦差湖广总督常青等奏军中

偶染暑湿等情折

乾隆五十二年八月十二日批 军录

将军湖广总督臣常青、参赞福州将军宗室臣恒瑞跪奏，为钦奉谕旨恭折复奏事。

窃臣等于七月十八日奉到五月二十八日再请添兵一折朱批，并奉到谕旨：柴大纪驻扎诸罗，屡次将贼败退，实属奋勉可嘉，等因。钦此。又于十八日奉到谕旨：现在台湾办理军需粮饷等事，恐不敷差委，等因。钦此。又于十八日奉到谕旨：常青等因现在所带兵丁不敷攻剿，等因。钦此。又于十八日奉到谕旨：据孙士毅奏折内称，林爽文之母闻已自缢，等因。钦此。又于十八日奉到谕旨：据常青等请调派京兵，及湖广贵州之兵，等因。钦此。又于十八日奉到谕旨：细阅蓝元枚图内鹿港，等因。钦此。钦遵。各到臣。伏思臣等因南路贼多，再请添兵，惟知京师劲旅及黔楚之兵可以痛歼丑孽，并未计程途辽远，调拨张皇，实属粗疏冒昧。兹乃仰沐圣慈，不加罪谴，于近省添调满汉官兵一万一千名，又派臬司李永祺速赴台湾督办军需等务，均蒙俯允臣等所请，复荷天恩，以柴大纪补授陆路提督兼管台湾总兵事务，将来与臣常青悉心筹办，又蒙简派伊辙布等六员赴闽，俾敷差委，仰见圣明廑注纤悉咸周。臣等敢不益竭驽骀，倍加奋勉。

惟查南北路贼人，于郡城、诸罗二处，尤所覬覦，所以攻扰不绝，败而复来。近因臣等连次派兵数千应援诸罗，军中偶染暑湿疾病者，又十有二三。故南路贼首庄大田等探知信息，（朱

批：使其知此信息是谁之过耶？）又生心纠众，于附近各处潜伏窥伺。是以臣等于十二、十四等日督兵搜剿，一使其不敢侵犯府城，一截其分助北路贼党合扰诸罗之路。乃败退后仍未溃散，每有乘闲抵隙之虞，现在时刻严防，实未可以暂时松放。且臣等扎营关帝厅，与贼打仗，屡经得胜。凡南路被胁从贼之人，已知贼匪伎俩难敌官军。（朱批：贼目尚有米，贼众皆食番薯，尔等不奏及，将以谓贼尚可虑，以为不能分兵北往之掩饰乎？）又见庄锡舍所带投诚数百人，以及山猪毛义民一千四百余名，皆随营效用。此等胁从之人，闻此风声，自不愿始终从贼。兹据附近各里庄出具互结，请给腰牌归庄者，现有千余人，（朱批：好。）臣等酌量概行发给。该里庄等咸以官军南向，隐有所恃，若遽舍南趋北，既恐近府贼窝又思窃发，而已经安业各庄，不无惶惑。

（朱批：总因怯虑，朕谕原非令汝等一兵不留，全往北路也。若论保护村庄，则分二万之兵，又且不足矣！）今蒙圣恩宽宥，无论从贼打仗及被贼驱使者，一经弃械投诚，即为良民，或归耕安业，或自效立功。臣等惟有仰体皇仁，遵奉谕旨，详悉出示晓谕，并招集奖抚，愈坚其悔罪自新之念。不日大兵经临，（朱批：汝等又思请数万大兵乎？）民人既各归庄，贼势自必穷蹙。至臣等受恩深重，任兹军旅，稍有人心，恨不灭此朝食，何敢株守，致失机宜。但目前情事，尚未能竟置南路，少俟暑气渐减（朱批：今八月矣！暑气尚未减乎？看来汝等竟欲〔待〕福康安。福康安到而成功，汝等为何如人？）道路渐干添调之满兵粤兵亦可到营，臣等即乘锐前驱，必可一举集事。

查逆首林爽文父母传闻畏罪自缢，四月间曾据已正法之从贼兵丁林盛供称，有林爽文之母自缢了，他父亲同家眷搬入北投大崙山后之语。但传言互异，恐未确实，是以未经陈奏。

兹自十四日以后，未曾打仗，现派将弁等驾船于鹿耳门内外洋面，加意巡缉。又密探贼首庄大田等踪迹，设法擒拿。并酌量可进即乘势攻剿外，所有接奉谕旨缘由，谨合词恭折复奏，伏乞皇上睿鉴。谨奏。

（发文日期缺。）

乾隆五十二年八月十二日奉朱批：尚无定见，遵后次旨谕，速行可也。钦此。

钦差湖广总督常青等奏应援官兵

抵诸罗后并无信息片

乾隆五十二年八月十二日批 军奏

臣常青、臣恒瑞跪奏：窃臣等于十五日接据驻守鹿仔草游击邱能成禀称，派赴应援诸罗三起官兵，于十三日辰刻自鹿仔草起行，约未刻将进诸罗。并据台湾道府转禀，接据随营巡检邵宗尧禀称，差役打听官兵三起直前于午刻已抵县城各等语。业经臣等于十六日据禀奏闻在案。

惟是提臣柴大纪、总兵魏大斌等，数日俱无文报。臣等即疑各兵前进，或系贼人暂时逃避，犹未尽行溃散，亦未可定。兹于二十日接据邱能成续禀，官兵于十三日起行，至今并无消息。差丁前往诸罗探听，奈道路不通，现于十七日贼匪围攻鹿仔草，自辰至未，枪炮毙贼甚多，贼始退去。但现存鹿仔草军装药铅等项，未便疏虞，乞赐添兵前来，会扎固守。倘闻诸邑有枪炮之声，俾得带兵前往夹攻等语。查应援三起各兵，军装系随带需用，所剩药铅等项，原存鹿仔草看守，不可不加紧保护。且各官兵于十三

日前赴诸罗，至今尚无文报。而贼又回攻鹿仔草，则其势似复猖獗。一面派拨游击董秉璆管带本标兵四百名，由海道赶赴鹿仔草，协同防御，（朱批：所以猖獗皆因尔等大兵未去之故。一游击四百兵何用？若再有失，是谁之咎也！慎之。又添朕一忧虑矣！）一面密飭干差飞赴北路，必得诸罗确信，星即驰奏外，所有接据续稟缘由，合先附片奏闻，伏乞圣鉴。谨奏。

（发文日期缺。）

同日^①奉朱批：似此零星发兵何用？钦此。

谕钦差大学士阿桂等严行申飭常青蓝元枚

乾隆五十二年八月十二日 台湾档

大学士和、字寄钦差大学士公阿、钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月十二日奉上谕：

据常青奏南路贼匪情形一折内称，南北路贼匪于郡城、诸罗二处，尤所覬覦。近日贼目庄大田探知官兵前往诸罗应援，又生心纠众潜伏窥伺府城。经官兵搜剿败后，仍未溃散。若遽舍南趋北，恐近府贼窝又思窃发，而已经安业各庄不无慌惑。请俟暑气渐减，道路渐干，添用各兵到营，即乘锐长驱冀可集事等语。所办尚无定见，已于折内批示。前据常青等奏，于初九、十二等日，带领官兵攻剿南潭贼匪，枪炮毙贼二百余人，官兵义民追杀至南潭，烧毁贼人草屋篷寮数百间，并将竹箐随路砍伐，贼匪纷窜。

^① 指乾隆五十二年八月十二日。

又据李侍尧先后奏到，贼目庄大田闻有潜逃之信，现在贼首尚有米可食，贼目（伙）皆食番薯，彼此不睦，伙匪多欲投诚各等语。是南路贼匪，其势已日就涣散，无欲乘势扫除，方以为慰。今日据常青奏到情形，则又是南路贼匪仍未溃散，尚在窥伺滋扰。而于贼匪乏食一节，并未奏及，以掩饰其不即分兵往北之咎，是诚何心！且常青等派兵应援诸罗，及军中偶染湿疾使贼目等预先探知消息，又复纠集伙匪，生心窥伺，以致官兵被贼牵掣，不能远离。是我军全无法度，措置失宜。似此机事不密，谁实当其咎耶？况常青等所虑，官兵若舍南趋北，恐近府贼窝乘间窃发，安业各庄不无慌惑一节，殊不思常青、恒瑞同在府城营盘，原令一人统兵前往北路，一人留营驻守，并非令二人一同前往，一兵不留在府城营盘也。节次所降谕旨甚明，府城营盘既有兵防守，又有大员统帅弹压，附近贼匪又屡经官兵剿杀败退，势穷乏食，则大营有何可虑？岂能因贼匪牵制，并不那（挪）移尺寸之地？况府城前次未经添兵之时，以黄仕简之懦弱无能，尚能保守无虞，常青到彼后，又添多兵，岂转不能抵御，而虑贼匪生心窥伺，株守不动之理？若云保护村庄，则各处村庄甚多，即数万之兵，亦不足敷零星分拨防守，岂又将增添大兵乎？况现据常青奏，贼匪围攻鹿仔草，游击邱能成请兵接应，常青又派兵四百名前往等语。似此零星派拨，于事何益？总由常青等并未带领大兵亲往北路，是以贼匪猖獗。于魏大斌等前赴诸罗之后，又复潜出鹿仔草滋扰，思欲邀截军装火药等项，是仍中贼之计也。今常青等既知派游击带兵四百名接应，何不亲统大兵前往，痛加剿杀，廓清路径？似此弁兵四百，岂能得力？且鹿仔草系僻小村庄，前后皆有贼匪，此四百官兵皆须口粮，从何接济？若再有挫失，咎将谁任？常青于此等事，何茫无主见若此！又，蓝元枚处亦屡有旨，令其统兵自北而

南，直抵诸罗，合兵会剿。前诸罗被贼攻围，该参赞允应速统官兵，亲往援应，乃亦并未前进。看来常青、蓝元枚，总因持重怯懦，畏葸不前，常青不免蹈黄仕简复辙。而蓝元枚迁延观望，亦与任承恩相仿。伊二人受恩深重，非如黄仕简之老病颓废，任承恩之少不更事，而惜任举死事尚无后之可比。若再事因循，其获咎将恐甚于黄仕简、任承恩矣。朕为尔等畏之。常青、蓝元枚俱先著严行申饬。

为今之计，急应遵照节次所降谕旨，常青竟令恒瑞留驻府城营盘，蓝元枚令普吉保留驻鹿港，各督兵固守，悉力堵御。该将军、参赞速即各统大兵，先清占诸罗沿途之贼，直抵诸罗，与柴大纪会合一处，以大兵全力进捣贼巢。若渠魁授首，则其余伙匪，自必纷纷溃散。况现在浙、粤二省驻防绿营，及续调漳州兵，早已到齐。计此旨到时，节候又届深秋，暑气已减，雨水已稀。该将军更复何所藉口？惟当乘此兵力厚集，新到锐气，及锋而用，会合进剿，以奏捣穴擒渠之绩。若俟福康安到彼，一举蔽功，伊二人将置身何地耶？黄仕简、任承恩即系前车之鉴，不可不慎。

至常青所奏南路被胁从贼之人，已知贼匪伎俩难敌官军，又见庄锡舍所带投诚之人，及山猪毛义民随营效用，附近各庄民人，俱请给腰牌，归庄者现有千余人等语。该将军等即应妥为抚慰，设法招集。遵照前旨，或令入伍，或令归农，俾闻风投出，解散贼党，方为妥善。

至柴大纪处，于魏大斌等前抵诸罗后，近日如何攻剿杀贼，其邱能成所押军装火药，于何时在鹿仔草杀退贼匪，直抵诸罗，并着迅速俱奏，以慰廑注。将此由六百里加紧传谕常青等，并谕阿桂、福康安知之。所有本日常青奏折，并著抄寄阿桂、福康安

阅看。仍着常青、蓝元枚将定于何日统兵前赴诸罗，会合进剿，打仗得胜情形，各行速奏。李侍尧续得南北两路剿贼得胜信息，亦著随时速奏，以慰悬注。

再，本日据毕沅由驿奏到，大名滋事案内首逆段文经，已据委员毛师沅于八月初四日，在陕西留坝厅地方，经所带眼目指认拿获，现已派员星速押赴行在矣。常青等若能将贼首林爽文、庄大田等擒获，似此解京审办，则其功岂可量乎？惟在该将军等遵照节次续降谕旨，勉图自效，以期承受朕恩也。

钦此。遵旨寄信前来。

福建巡抚徐嗣曾奏浙省满兵过竣及

料理添兵赴淡水等情折

乾隆五十二年八月十五日批 军录

福建巡抚臣徐嗣曾跪奏，为奏闻事。

窃照浙省驻防满兵一千五百名，由建宁、延平一带赴省前进。臣飞飭沿途妥为预备，并派委大员，分往督催弹压，业经恭折奏闻。兹六起满兵，已经全数过省。据报头、二起已抵厦门。

臣正在起程，亲自护送照料配渡，于本月初一日接准督臣咨会，钦奉谕旨：以提臣蓝元枚奏请增兵折内称，淡水一带亦有贼滋扰，应拨兵一千名接应。若由鹿港再赴淡水接应，未免迂远，著即由五虎门配渡，竟赴淡水接济徐鼎士，等因。钦此。经督臣酌定，于督标及水师营内，调兵五百名，抚标及福协营内，调兵五百名，共兵一千名，令都司敏禄、守备陈峰毫带领，就近于南

台配船直抵淡水徐鼎士军前听候调遣，并寄信嘱臣，留省料理。臣当即督同将备，将各兵迅速挑派，一面上紧雇备船只，一应粮饷、军火、器械等项，部署停妥。

适于初二日接据原任副将徐鼎士、淡水同知徐梦麟稟称：职等自抵大甲后，官兵先后到齐，并募集义民、番勇，分隘扎营，连战克胜。探闻诸罗柴镇于六月二十八、九两日，与贼鏖战。贼目叶省、蔡福俱毙于炮，余贼死者无数，林爽文仅以身免，窜聚斗六门，不敢回彰。闻彰化凶悍之贼，先经纠赴诸罗，其大里杙等处巢穴，存贼尚有万余。查大甲溪自南而西，过大肚溪十余里，即近鹿港。由北而东，自犁头店至乌日庄，即逼近大里杙贼巢。七月十一、二等日，闻贼营时有炮声，密差侦探，系犁头店贼伙自相攻杀，毙命不少。贼既外溃，又自内残，此时乘虚进剿，实大机会。职等统计现在官兵一千七百余名，所募义民、番勇共七千余名，诚得鹿港大兵，密订进期，先在大肚溪等处声援，职等即分兵两路，一攻大肚〔溪〕以断贼营之右，一攻乌日庄以绝贼营之左。乌日一破，纵使大里杙势甚完固，架以大炮，四面环轰，如拉枯朽。更得港兵一枝扎营南投，隔断虎仔坑陈泮贼巢，使其不能应援。而林圯埔、水沙连等处贼匪，亦不敢蠢动。并已预遣妥人，前往结好生番，在内擒献，以绝林爽文逃入内山去路。腹心之患既除，余贼以次搜捕，势如瓦解。职等商之各备弁义勇人等，无不众口同声，及锋欲试。唯需添兵一二千名，迅速由大安进口，帮守大甲。职等即统带官兵、义勇，再添募义民数千，随同进剿，并壮声势。并请发饷银五万两，以备军需各项费用等语。臣窃思歼贼首贵擒渠，扫恶务先捣穴。大里杙一带，久为逆首盘踞，纵横数里，聚族而居。又有竹墙溪水环绕，度其狡狴伎俩，未必不趁此官兵未到之先，日事深沟高垒，营巢愈密，以为

将来抵死负隅之所。而南路及中路官兵，因贼匪尚在蔓延，未及迅行北剿。即鹿仔港官兵，亦因东螺、斗六门、大武垵等处，为贼牵掣，未能分兵进逼。惟淡水一路，自竹塹城以北，此时搜捕渐净，官兵俱驻大甲溪。该处迫近贼巢，地势又较便捷，果能乘隙进捣，将逆党私蓄一炬而尽，使逆首势孤力竭，不难指日就擒，即或攻围稍需时日，贼仍退而返顾，则南路之势已解，官兵可移而向北，并力齐攻，亦可迅速藏事。细核该将、丞等所禀，似属实有所见。其禀内所请饷银，先经督臣拨银五万两解往，日内定已应手，惟兵力稍单，正在亟需策应之时。仰荷圣明洞烛几先，远在万里之外，无微不照。旨到添兵之日，适值该处禀到请兵之日，臣实不胜钦佩。现在船只俱雇齐，飭令该兵等多带火药，已于初四日登舟，候风开驾。复经督臣飭司添拨银三万两，米六千石，委试用知县王履吉押附兵船带往，粮饷已极充裕。

又，查上年调兵北渡淡水时，因竹塹、新庄等处，皆有贼扰。令兵船由八里坌上岸，以便逐路搜剿。此时各处俱已安帖，若仍由八里坌登岸，则由陆路前抵大甲溪，尚有二百余里，山径亦多迂折。臣细访路径，照依徐鼎士所禀，由五虎门出口，直抵大安港登岸，相去大甲只有十余里，较为便捷。是以即雇募熟悉此路之舵水人等，径由该处进发，以期早资接应。臣仍于点兵起程时，将节奉谕旨，拨到邻省协济银米各数百万。又现募强兵数万之处，晓谕该弁兵，令于军前广为播告，使义勇之气壮，贼人闻风胆落。并飭徐鼎士、徐梦麟加倍努力，鼓舞兵民。果有机会可乘，即须设法密速妥办，进逼贼巢以待大兵合剿。仰副圣主先事预筹之至意。所有浙省满兵过竣，及料理添兵赴淡缘由，谨恭折驰奏。伏乞皇上睿鉴。谨奏。

乾隆五十二年八月初四日。

乾隆五十二年八月十五日奉朱批：甚好，即有旨谕。钦此。

闽浙总督李侍尧奏拨兵配渡及增募营兵折

乾隆五十二年八月十五日批 军录

臣李侍尧跪奏，为拨兵配渡及增募营兵事。

窃臣于七月二十七日接准廷寄奉上的谕：蓝元枚奏请闽粤兵五千，除前已飭令，于续调之满汉兵一万一千内，分拨二千往蓝元枚处。钦此。等因。查漳兵二千，已于七月二十日开洋。嗣因风汛不顺，有折回蚶江、厦门等处者。臣因风势稍平，又催令开驾。计目下当已到鹿港，其粤兵二千，已先到五百，亦同漳兵先后开洋，尚有一千五百，现据孙士毅咨称，即在满兵之后陆续可到，至奉旨续调之粤兵一千，想孙士毅亦即就附近营分凑集调来，臣惟当令其随到随即登舟。又奉旨令臣于闽省新募兵内，派一千前往。查所募新兵，入伍未及一月，虽上紧操演，而技艺尚未娴习，所制枪械亦未齐全。现挑各营旧枪，使之演放，必须一两月后方可调用。是以臣飞檄督、抚两标及水师一营、城守一营现存额兵内，挑凑一千，派将备管带，即由五虎门出口赴北淡水，随同徐鼎士协同堵剿。（朱批：好。）臣已移咨抚臣即在省城料理，点派起程，计十日内即可至北淡水矣！

至内地募兵一事，臣前接台湾道永福所禀，官兵已直抵诸罗。魏大斌、柴大纪等自当里外会合，（朱批：竟是魏大斌杀透重围而至诸罗犹然路梗也。）军声益壮，即可乘势进剿，指日不

难灭贼。是以臣奏明三次共募兵一万有余之外，可毋庸再募。今准常青寄来折稿，则魏大斌等进抵诸罗后，又无信息。恐系贼人故意撤围，俾官兵抵县，却又于后梗阻道路，使所运粮饷火药不能前往接济。（朱批：竟是如此！）是不惟柴大纪被围，而魏大斌等又在贼围之中。虽据常青已派兵前往接应，且常青接到近日谕旨，或亲率大兵由南而北，自可解围。但看来事势，或尚须量为预备，则内地募兵诚如圣训，必须多多益善，方觉有备。臣拟于水陆各营再募兵一万，（朱批：是。）及早训练，所有鸟枪等项军械，亦飭司速拨银两，令各营分头制造。臣惟有日夜催趲，以期应用，不致迟误。所有遵旨配兵接济，及增募兵丁缘由，谨缮折驰奏，伏乞皇上睿鉴。谨奏。

乾隆五十二年八月初二日。

乾隆五十二年八月十五日奉朱批：即有旨谕。钦此。

闽浙总督李侍尧奏多解米石赴台

以资招抚折

乾隆五十二年八月十五日批 军录

闽浙总督臣李侍尧跪奏，为多解米石赴台，以资招抚事。

窃臣于七月二十六日，接准廷寄奉上谕，以舒常等具奏，于湖北碾运仓米十万石，由江西运闽，饬知到臣。臣查闽省节次蒙皇上拨浙江、江西、江南及四川米已九十余万石，今又增湖北米十万石，共计一百余万石。仰见圣明远见，先事预筹，所以储积军糈者固极宽裕。而接济民食，使人情安贴，地方宁谧，尤为消患未萌之至计。臣查漳、泉一带，现在尚有早禾可食，计九、十月

间必须平糶，直至明年青黄不接之时，约二、三十万石可以敷用。惟台地除接应兵粮及乡勇难民外，现在贼匪势又鸱张，其实俱系胁从，房屋已烧，资粮已罄，不得不从贼抢掳以延旦夕。近接将军常青折稿称：各庄民已有改悔出结归庄者，大兵进剿必多自拢来归。然不稍资其生计，俾得暂可度日，则无食之民仍无所仰赖，未免观望不前。若来投者，即加以抚恤安插，使得重延残喘，复为良民，则胁从之徒，谁不相携而至？是米在漳、泉，固所以绥靖地方，而米之到台湾，尤足散贼党而省兵力，是宜多为解决，源源接济。（朱批：是极。）今浙江所拨之十万石将次到齐。八月中，浙江、江南、江西之米，又可到一、二十万石，臣拟先行解往台湾南北两路，以供支应官兵义勇口粮，及招抚胁从之用。（朱批：好。）其内地平糶等事，九、十月间各省米又必有解到者，以之分运各处平糶，自可陆续应手。

至台湾抚恤安插之事，臣现知会常青、蓝元枚，并飭办理粮饷之臬司李永祺，及台湾道府等官兵，随路廓清，有被胁来投者，随时察看情形，或就各村庄煮赈，或量给钱米，俾得存活。一面劝谕伊等及时补种番薯之类，（朱批：更好。）以资续食，则贼伙日益解散，逆首自易就擒。至军前既有随路抚恤等事，需用佐杂人员必多，臣并多行挑选，派令解运银粮前往，即酌量留于该处委用。内地现有拣发一等举人，陆续到闽，可以差遣，亦不致乏员。所有臣筹办解米缘由，谨缮折驰奏，伏乞皇上睿鉴。谨奏。

乾隆五十二年八月初二日。

乾隆五十二年八月十五日奉朱批：如此经理，甚愜朕怀。钦此。

諭欽差协办大学士福康安等令藍元枚

速与徐鼎士夹攻大里杙

乾隆五十二年八月十五日 台湾档

大学士和、字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴、福建巡抚徐，乾隆五十二年八月十五日奉上谕：

据李侍尧奏拨兵配渡及运解台湾米石各折，内称前接台湾道禀报，官兵已直抵诸罗，则魏大斌、柴大纪等自当里外会合。今准常青寄来折稿，魏大斌进抵诸罗后，又无信息。恐系贼人故意撤围，俾官兵抵县，又于后梗阻道路，使所运粮饷火药不能接济等语。已于折内批示。魏大斌前经常青派令带兵一千五百名，前赴诸罗援应，柴大纪在鹿仔草地方，被贼拦截，经魏大斌杀透重围，直抵诸罗，而邱能成所押粮饷火药，仍被贼匪梗阻，不能前进。看来竟系贼人狡计，将魏大斌放出重围，听其入城，仍将粮饷截断，道路梗阻。则魏大斌所带兵数百，前抵诸罗后，贼人仍将县城围困，柴大纪虽与魏大斌会合，仍不能剿散贼匪。而诸罗添此应援之兵，粮饷又被截断，更恐军粮不给，是贼匪奸计显而易见。数日待柴大纪奏折未至，正为此焦心。但前据常青奏，接据巡检邵宗尧禀报，鹿仔草官兵已抵县城，所有解押饷银随同前进等语。则又似所运粮饷等项，亦已前抵诸罗。如果所报属实，则官兵自可无乏食之虑。否则，有兵无粮，其势岂不更为急迫！著传谕常青、李侍尧，将所运诸罗粮饷、火药，究竟仍在鹿仔草或系全行运到，及鹿仔草道路曾否打通，不致梗阻之处，迅速

驰奏。

至柴大纪处，虽援兵已到，势尚单弱。且据李侍尧奏，接据徐鼎士禀报，贼首林爽文现在诸罗攻围。是该处贼势尚炽。常青急应遵照前旨，令恒瑞留守府城营盘，该将军亲统大兵，自南而北，迅赴诸罗，大剿贼匪，打通梗阻道路，会合柴大纪，使兵威壮盛，合力攻剿，擒拿贼首贼目。现在添调官兵自己全抵台湾，常青正当乘其锐气，长驱深入，毋再因循观望，致失事机。

又，据李侍尧奏，接徐鼎士禀报，鹿港在大里杙之南，须步步仰攻。自大甲过溪，系贼之背，乘高而下，易于俯制。若鹿港攻其南，大甲攻其北，可使贼腹背受敌等语。同日，又据徐嗣曾奏，浙省满兵过竣及添兵前赴淡水一折所称，贼目叶省、蔡福在诸罗被官兵用炮击毙一节，前已据常青等奏到。至徐鼎士禀报，拟于大甲溪夹攻大里杙，情形更为详悉。鹿港在大里杙之南，势须仰攻，较难得力。今据徐鼎士禀，商令鹿港大兵，密订进期，在大肚溪等处声援，而徐鼎士分兵两路，一攻大肚〔溪〕，一攻乌日庄，断贼左右。乌日一破，即以大炮轰击大里杙，使贼人腹背受敌，又可乘高而下，为捣穴擒渠之要策。蓝元枚前已有旨，令其统兵径赴诸罗，会合常青、柴大纪。今大甲一路，既有可乘之机，该参赞又当与徐鼎士速行订期夹攻，先在大肚溪等处遥为声援，俾徐鼎士分路进兵，截击贼人要害，以期会合直捣贼巢。用兵之道，原贵相机而动。前因蓝元枚驻守鹿港，不能得手，是以令其前往诸罗会合攻剿。今既有大甲溪一路可以制胜，蓝元枚自先得信，会合徐鼎士进攻，不必拘泥前旨向南夹攻斗六门，竟当速由大肚溪知会徐鼎士，进攻大里杙贼巢，俟成功再往诸罗。蓝元枚自早已接到徐鼎士禀报，或已订期前往夹攻，固属甚善。否则，即须带兵速往大肚溪，与徐鼎士会合夹攻为要。至徐鼎士，

前已谕令李侍尧拨兵一千接应，现已派拨前往，自当即日到彼。并著李侍尧、蓝元枚传谕徐鼎士，若能督率兵民，乘机进剿，倾其巢穴，使逆首进无所据，退无所归，自必指日授首。大里杙系贼人家属聚处之所，若将其家属擒获，则逆匪伙党闻风解体，更无难迅速扫除扑灭。是平台之功，徐鼎士实为第一，将来受朕恩眷，岂复可量耶！徐鼎士务须倍加努力，速成大功，以副委用之意。

至徐鼎士所称贼营时有炮声，探系犁头店贼伙自相攻杀，又访有何清风与贼目何安邦交好，因令何清风开导何安邦立功赎罪一节，此系极好机会。蓝元枚近在該处，何以并未奏及？甚为焦闷。贼人伙党既自相残杀，已有内溃之势，常青、蓝元枚等急应乘机招集，或剿或抚，以解散贼党，此为最要。

至李侍尧所奏，增募营兵一万，及将先到米石运赴台湾，以供支应官兵义勇及招抚胁从之用，并令补种番薯，以资接济，并添拨官兵前往澎湖防守各事宜，一切经理妥协，甚愜朕怀。徐嗣曾照料过兵，及拨运粮饷，前赴淡水，所办亦好。俱于折内批示。

又，李侍尧所奏派兵巡洋一折，其从前洋面被劫各案，实由该营员废弛懈怠，视巡缉为具文，以致匪徒公行无忌。事定后，急当严行查参，俾弁员知所警戒。并著该督于审办此案随时具折陈奏一次，并将有无获犯，一并据实具奏。

至署海坛镇总兵李长庚，现丁母忧，此时闽省正在剿捕贼匪，需人料理，李长庚自应暂留该省署理海坛镇总兵事。俟剿捕事竣，再令回籍守制。

至本日据福康安奏，已于十一日行抵景州，自己即日星驰前往。现在台湾北路，正有机会可乘，福康安尤应及早到彼，督同

办理。其前调川省屯练降番，究恐缓不济急，俟常青等续有捷音奏到，即当降旨停止进发。

将此由六百里加紧传谕常青等，并谕福康安知之。所有本日李侍尧、徐嗣曾奏到之折，并著抄寄福康安阅看。仍著常青将于何日统兵前赴诸罗，蓝元枚是否已往大肚溪，与徐鼎士订期夹攻大里杙，及如何相机进剿情形，并柴大纪处近日如何打仗杀贼，鹿仔草所运粮饷等项，曾否已抵诸罗之处，各行迅速驰奏。并著李侍尧、徐嗣曾续得禀报，即日随时六百里加紧速奏，以慰廑注。

钦此。遵旨寄信前来。

福建水师提督蓝元枚奏派员前往

沿海村庄晓谕民人折

乾隆五十二年八月十七日批 军录

福建水师提督参赞臣蓝元枚跪奏，为恭折复奏事。

本年七月十八日钦奉谕旨：蓝元枚处附近贼巢虎仔坑、大里杙一带，阅其所进图说，贼匪亦不为少，等因。钦此。又奉谕旨：据蓝元枚等奏，在柴坑子一带与贼匪打仗情形，等因。钦此。又奉谕旨：着常青、蓝元枚亦各就郡城、鹿港一带，广行招募。等因。钦此。臣跪读之下，仰见皇上睿虑周详，虽重洋万里，无一不在圣明洞照之中。臣知微识浅，一经钦承圣训，谅么膺无难即日荡平。

查贼党近日因被官兵各路剿杀，胁从之众未免解体。又蒙皇上予以自新之路，贷其一死，经即出示晓谕，乘间来归者颇不乏

人。臣多方抚慰，令其各安本业，复蒙天恩，不惟贷其一死，并令其随营自效。是被胁之人既得自新之路，又有进身之阶，稍有人心者，无不感激涕零，痛自愧悔，断不肯甘愿从贼。臣谨奉上谕，再行晓谕，被胁之众，具有天良，必能闻风图脱，贼党自应渐就解散，倘弃械投诚，有情愿充伍者，当即遵旨募补，以安反侧。惟是贼匪诡计多端，恐有奸细冒充，臣仍须严密查防。（朱批：此为最要，慎之，勉之。）至岸里社熟番不肯从贼，诚如圣谕，即与义民无异，给与马兵粮饷，随同官兵打仗。臣随传该番社通事去后，俟其传到，宣布圣谕，该社番众，素知向义，自必欢欣鼓舞，益加奋力。

至台湾南北道路被贼阻隔，（朱批：尔等何不速剿此贼！）往来文报，俱由海洋递送，不无迟滞。海口一带，诚恐奸匪潜踪，关系匪细。经严饬各海口员弁，实力稽查，臣时常密为缉访。现督臣李侍尧在于内地又派拨弁兵，管驾哨船二只，前来鹿港，于各海口巡查，更为有益。此时鹿港一带洋面，颇觉安静。二林海口现有守备张奉廷，带兵五百名同义民驻扎。查自二林以南村庄，系贼匪出没之所。第东螺、西螺一带数十庄，先经臣差该地武生陈大用、钟奇英等，剴切晓谕，令其保守村庄，各安生业。本月十七日乘其不备，官兵分路攻剿西螺贼匪，该地百姓俱无助贼，业经奏闻在案。今臣又差武生陈大用、陈飘香等分头前往海丰港、麦仔寮沿海各村庄，遍贴告示，面为晓谕。使沿海百姓咸知大义，纠集乡勇，共御贼匪，则贼势益孤，便易设法剿捕。所有解散贼匪及剿捕一切机宜，钦遵圣训，伺机妥办。臣仍当持重审慎，（朱批：太持重矣！）一得胜仗，即行驰奏。合将臣筹划缘由，具折复奏，伏乞皇上睿鉴。谨奏。

乾隆五十二年七月二十二日。

乾隆五十二年八月十七日奉朱批：总未奏及汝如何杀贼，是何故也？待之逾旬，接此虚语，殊不满意。余有旨谕。钦此。

谕钦差协办大学士福康安等星速赴台

并令蓝元枚会攻大里杙

乾隆五十二年八月十七日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月十七日奉上谕：

本日蓝元枚由驿递到一折，以为必系杀贼打仗情形，及披阅奏折，仅系复奏屡次接奉谕旨缘由，而于近日如何相机进剿之处，总未奏及，殊深烦闷，已于折内批示。前以蓝元枚奏到杀退西螺贼匪，拟即统领官兵相机剿捕。又伊族人蓝启能等在彰化投出，恳求安插，在中途多有被贼戕害者，其蓝启能等经蓝元枚给予口粮，并令熟识山路者随同剿贼，所办尚属妥协。方以蓝元枚系本省人，统本省官兵，可资倚任，是以加恩颁赏蟒袍、荷包等件，以示奖励。蓝元枚自应倍加奋勉，速图奏绩。乃待之逾旬，而奏到之折，仍系虚语。蓝元枚前因兵力单薄，奏请增添，业据李侍尧奏到，粤兵、漳兵皆经陆续配渡开洋，自己早抵鹿港。该参赞正应乘其锐气，鼓勇前进，痛加剿杀，以期迅速集事。今阅所奏情形，止系遵旨晓谕被胁贼众，宣谕番社防范海口各事宜，并非紧要关键。且据称台湾南北道路被贼阻隔，往来文报不无迟滞。是则更应速领官兵，前往剿杀，打通道路，擒拿贼首贼目。乃既未前往进剿，而于何调度会合之处，亦并未陈奏。看其光景，

竟系株守鹿港，一筹莫展矣。即云持重，亦不应恒怯迁延若此。前此任承恩在鹿港时，心存观望，束手无策，以致师老力疲，旷日持久，贻误机宜，是以降旨革职，拿问治罪。蓝元枚尤非若任承恩之少不更事，又伊父任举死事无后者可比。若复踵前辙，观望不进，则蓝元枚获罪尤重，不可不慎。著先传旨严行申饬。该参赞务宜自知儆省，力图进取，毋得仍前贻误。

前屡有旨，令该参赞留普吉保驻守鹿港营盘，亲自统兵自北而南，前赴诸罗，会同常青、柴大纪，并力攻剿。嗣因徐鼎士拟由大甲分兵攻击大里杙之北，并约会蓝元枚从鹿港进兵大肚溪，以期里外应合，俾贼人腹背受敌，捣其巢穴。因复谕蓝元枚毋须拘泥前旨，即由大肚溪进兵，定期夹击。不知徐鼎士此策知会蓝元枚否？如蓝元枚接奉前赴诸罗之旨，已领兵自北而南，固属甚善。否则，亟应遵照昨降谕旨，带兵速赴大肚溪，会同徐鼎士夹攻大里杙贼巢，使贼人进退无据，并将其家属擒戮，俾逆伙闻风解体，克期扑灭。此系机不可失，蓝元枚务须加倍奋勉，力图自效，勿再因循迟缓，坐失事机，致干重戾。

至常青前已有旨，饬谕令其速统大兵，廓清诸罗沿途占据贼匪，直抵诸罗会合柴大纪，以官兵全力进捣贼巢。常青所请添调官兵，早已到齐，此时暑气已减，雨水已稀，更无可藉口。该将军尤当乘此兵力厚集，及锋而用，以奏扫穴擒渠之绩。再，柴大纪于魏大斌前抵诸罗后，如何攻剿杀贼，游击邱能成所押军装火药，于何时在鹿仔草杀退贼匪，前赴诸罗，尚未据续有奏报，甚切悬盼。并著常青、蓝元枚、柴大纪各行迅速驰奏。

至福康安已有旨，令其星速遄行。今看常青、蓝元枚于剿捕事宜竟无定见，当必须福康安前往督办，方能蔽事。福康安在途行走，务须益加紧急，及早到彼，督率调度，以期迅奏肤功。

再，贼首林爽文纠众谋逆，罪大恶极，覆载不容。现在官兵合力进剿，无难指日授首。林爽文系漳州人，其祖坟自必近在漳州一带，著李侍尧密委妥员，将林爽文祖坟先行刨挖，剝骨扬灰，以申国宪而快人心，亦损贼势之一法也。

将此由六百里加紧传谕常青等，并谕福康安知之。本日蓝元枚奏到之折，著抄寄福康安阅看。仍著常青等各将现在于何路进兵会合攻剿，及近日打仗得胜情形，速行驰奏，勿再延缓。李侍尧查明林爽文祖坟处所，及得有地方官禀报军营信息，亦即随时速奏，以慰廑注。

钦此。遵旨寄信前来。

参赞蓝元枚等复奏查询任承恩

所供打仗情形折

乾隆五十二年八月十七日批 军录

参赞奴才蓝元枚、总兵奴才普吉保跪奏，为遵旨复奏事。

窃奴才等接奉上谕：据常青等委员将黄仕简、任承恩解到行在，令军机大臣询问，录取供词呈览，等因。钦此。奴才蓝元枚、普吉保随于七月十八日，会同传齐副将格绷额、都司陈邦光询问。据格绷额称：副将系同普总兵于二月初十日到鹿仔港，二月初六日有无打仗，副将不知。二月十三、二十二等日，任承恩同普吉保带兵在番婆庄并彰化西门外市仔尾、八卦山打仗。三月十二、十九等日，在马鸣山、秀水打仗。四月十三、十六、十八等日，在番仔沟、番婆庄打仗，这是有的。据陈邦光称：二月初六日，贼匪出来，任承恩曾带兵往崙仔顶打仗一次，余称与格绷额

同。奴才等细加体访，任承恩于二月初六日在崙仔顶打仗，又与普吉保分路进剿，于二月十三、二十二及三月十四、十九、四月十三、十六、十八等日，督率将弁亲临打仗，杀贼一千余名，似无虚捏。惟所供亲往虎仔坑打仗，查虎仔坑离鹿港五十余里，系陈泮贼巢。其附近一带村庄，俱是贼匪屯踞，兼之山路险峻，任承恩何能猝至？询之陈邦光等，亦称并未进剿虎仔坑。任承恩实是畏罪巧词支饰。至所供鹿港居民稠密，米粮业积甚多，及兵力单薄，未敢轻离各情节，查鹿港新开口岸，船只往来，商贾云集，且粮饷铅药存贮该处。任承恩带兵二千二百名，除分拨各路把守要隘，留港之兵，仅数百名，不敢轻离，似属实情。奴才等谨将会询密访情由，理合恭折奏闻，伏乞皇上睿鉴。谨奏。

乾隆五十二年七月二十二日。

乾隆五十二年八月十七日奉朱批：览。钦此。

谕留京办事王大臣等提讯任承恩

何以捏词谎供

乾隆五十二年八月十七日 台湾档

大学士和，字寄留京办事王大臣、刑部堂官，乾隆五十二年八月十七日奉上谕：

据蓝元枚、普吉保奏查询任承恩所供打仗杀贼各情形一折称，询之副将格绷额等，俱称任承恩在彰化西门外及八卦山等处，带兵打仗，尚无虚捏。至虎仔坑离鹿港五十余里，系陈泮贼巢，其附近村庄俱是贼匪屯踞，任承恩何能猝至？实系畏罪支饰等语。是任承恩前此所供，与普吉保在虎仔坑打仗一节，竟系虚

捏。任承恩前在鹿港株守数月，因循观望，贻误事机，本应按律正法，特因伊父兄歿于王事，任承恩又无子嗣，姑贷其一死。今所供虎仔坑带兵打仗一节，或虚或实，于伊罪总无所增减。著传谕留京王大臣、刑部堂官等，即提任承恩讯问，令将前此何以捏词谎供之处，据实复奏。所有蓝元枚等奏折，并著抄寄阅看。

钦此。遵旨寄信前来。

永琅奏诘问任承恩捏词谎供折

（批文日期缺）

臣永琅等谨奏，为遵旨询问恭折复奏事。

本月十八日戌刻，接奉上谕：据蓝元枚、普吉保奏，查询任承恩所供打仗杀贼各情形一折称，询之副将格绷额等，俱称任承恩在彰化西门外及八卦山等处，带兵打仗，尚无虚捏。至虎仔坑离鹿港五十余里，系陈泮贼巢。其附近村庄，俱是贼匪屯踞。任承恩何能猝至，实系畏罪支饰等语。是任承恩前此所供，与普吉保在虎仔坑打仗一节，竟系虚捏。任承恩前在鹿港株守数月，因循观望，贻误事机，本应按律正法，特因伊父兄歿于王事，任承恩又无子嗣，姑贷其一死。今所供虎仔坑带兵打仗一节，或虚或实，于伊罪总无所增减。著传谕留京王大臣、刑部堂官等，即提任承恩询问，令将前此何以捏词谎供之处，据实复奏。所有蓝元枚等奏折并著抄寄阅看。钦此。臣等即于次日监提任承恩，谨将所奉谕旨，细加诘问。任承恩伏地碰头，痛哭流涕。据供：我于正月初六日到鹿仔港，因该处系居民稠密，米粮聚集之所。我所带兵丁只二千余名，不敢轻离要口。彼时闻得贼目陈泮在虎仔坑

屯踞，肆出滋扰。我即派拨弁兵前往堵御，并亲自带兵在彰化县西门外及八卦山下等处打仗各情形。前在鹿港时，曾经奏闻。惟虎仔坑一带，贼匪甚多。我仅止派拨弁兵堵御，不能进逼贼巢。前在热河军机大臣传旨讯问时，我曾供进兵攻剿虎仔坑，实是我一时害怕，未将并未亲身前往虎仔坑之处，据实供明，实在糊涂该死。我蒙皇上怜念父兄微劳，矜全格外，乃仅株守鹿港，不能亲往虎仔坑剿贼，已属辜负天恩。及蒙传旨讯问时，又复含混具供，此时愧惧战栗，无地自容，断不敢觐颜再辩。惟求皇上将我重治罪等语。所有遵旨询问缘由，理合缮折由驿复奏。谨奏。

大学士和珅等奏审拟彭喜赖树片

附：审讯彭喜赖树供词笔录

乾隆五十二年八月十八日 台湾档

臣等将彭喜、赖树二犯，拧耳、跪链、押杠各样刑具尽法处治，讯取供词，缮录呈览。俟命下，即将该二犯先行刮板，再交刑部堂官监视凌迟处死。谨奏。

乾隆五十二年八月十八日奉旨：知道了。钦此。

附：审讯彭喜赖树供词笔录

彭喜供：年四十五岁，漳州府诏安县人。父彭福，母林氏，妻林氏，有子彭升，年二十二岁，现住在南澳地方。我由兵丁拔补千总，乾隆四十四年升任澎湖守备，四十七年委署北路淡水都

司，后经军政参革回籍。上年十一月，往淡水向林小文讨取旧欠银两，听见林爽文闹事，我避到白石湖。林小文知我做过武官，定有机谋，前来逼我替他抗拒官兵。我就同他商量，将来有官兵前来剿杀，即用石块掷打。后来贼势解散，官兵亦来攻剿，贼匪各自逃走，我遂被拿获等语。

诘问彭喜：你既做过守备，又署过都司，是个职官。当贼匪肆逆时，就该同义民等力图报效，如何反丧心从贼？你于上年十一月内，往找林小文，那时贼匪已经滋事，你明欲助贼，并非只为讨欠前往。后来你在白石湖，如何设立计策，教贼伙多拾石块，掷伤官兵？至林爽文手下有多少贼众，现在米粮尚存若干，系从何处得来？你与官兵打仗几次，杀过多少人？如何就被官兵拿获？据实供来。

据彭喜供：我于上年十一月内向林小文讨取旧欠，我走到淡水，才知道林爽文闹事，并非欲从贼前往。林小文知我做过武官，逼我替他抗拒官兵，我本不肯听从，因他再三逼胁。他说，若不听从，即要将我杀害，我实系害怕，无奈应允。至后来官兵来剿，贼人问我教他计策，我说用石块向下掷打，官兵自不能上来，他就依我叫众掷打石块，这是我教他的，我实在并无别样计策。至林爽文手下贼众，现有二十余万。他的米粮俱系随时抢夺，现存多少，我不能知道。我并未与官兵打仗，后来副将徐鼎士带兵前来，将难民招抚归庄，贼匪各自逃走，我正欲逃避，即被姓王的外委拿获，等供。是实。

赖树供：年三十一岁，漳州府平和县人，父母兄弟俱故，妻沈氏现住漳州，并未生子。我于五十年五月到台湾生理，在淡水新庄街居住。这林小文系唱戏营生，彼此认识。上年十二月初五日，林小文带了许多人前来，要借银一千两，并邀我入会。我见

他人多，害怕，就许了他五百花钱，跟他前往。那时他伙党约有七八百人，我认得的有刘长芳、陈轩、萧水、林三奇、李壬、叶山林、叶义春，蔡洪、林子房、王番等十人，其余俱不认得。刘长芳系军师，林小文是大王爷。他口许封我北路大将军，我并未跟他打仗。那时正要逃走，适值官兵前来剿杀，我即被拿获等供。

诘问赖树：你系小百姓，如何有许多银子，林小文就向你借用？林小文既封你北路大将军，你手下人自然众多，因何被官兵拿住？实系何人拿获？林小文他自称大王爷，你称呼他什么？你可曾见过林爽文？他那里有多少头目？据实供来。

据赖树供：我本系开杂货店生理，有家资一万数千两。我与林小文素日认识，他知道我有钱。上年十二月内，他带了许多人来借银两，并邀我入会，我俱不应允。他们将我绑起，就要杀我，我实在害怕，许了他五百花钱，就跟他前往，封我北路大将军。因不过口内许封，我手下并无所管之人。我称呼林小文是大哥。十二月十二日，艋舺文武官兵来剿新庄时，贼匪逃散，我亦欲跟同逃走，即被义民郭尊拿获。至林爽文所住地方，离淡水有五六站，我并未见过，不知道他手下有多少头目。是实。

又诘问彭喜、赖树：那林爽文纠众谋逆，他究竟要做什么，他手下能有多少人，干得甚事，你们既经从贼，没有不知道的。从实供来。

据彭喜、赖树供：林小文手下有七、八百人，这是我知道的，俱系他一人带领。我们实因怕他杀害，就跟了他，后来就被官兵义民拿获。至林爽文，我们并不曾见过，只听见众人说，他要占住台湾，别的我们实不知道。若有知道的，我们受这样严刑，还肯替他隐瞒，不据实供出吗？

浙江巡抚琅玕奏酌拨本省

盐课银赴闽备用片

乾隆五十二年八月十八日批 军录

臣觉罗琅玕跪奏：窃臣于七月二十八日接准户部咨，遵旨酌拨闽省备用军需银一百万两，请于附近两浙盐课项下拨银八十万两，即令照数动拨，委员迅速解往备用。钦奉朱批：依议速行。钦此。钦遵行知到臣。当飭盐道舒其绅于本年春季报拨银九十八万二千三百余两内，拨出银八十万两，委派丞倅二员、盐场大使八员管解，酌定分作四起，每起银二十万两，间日行走，以免前途人夫拥挤，赶紧弹兑，钉鞘完竣。兹于八月初二日起，至初八日止，所有四起银八十万两，俱已由省起程，飭令各委员加紧趲（趲）运，解赴闽省。仍飞行前途府营，派拨员弁兵役，小心护送，迅速前进，不得稍有迟误，并移会闽省一体拨护外，所有遵奉谕旨动拨盐课银八十万两，分起全数起运缘由，臣谨附片奏明，伏乞皇上睿鉴。谨奏。

乾隆五十二年八月初十日。

乾隆五十二年八月十八日奉朱批：览。钦此。

閩浙總督李侍堯奏止須添派

海蘭察等赴台折

乾隆五十二年八月十九日批 軍錄

臣李侍堯跪奏，為奉旨垂詢，據實復奏事。

竊臣于本月初五日接准廷寄奉上的諭：常青聞魏大斌赴援諸羅，為賊所阻，並不親領大兵進剿，等因。欽此。仰見皇上籌慮几先，通盤計算至意。查常青自到台灣以來，諸事似尚俱妥協，惟不親自赴援諸羅，及留用山猪毛粵民，誠如聖諭，甚屬錯誤。第查山猪毛各粵庄義民最為勇猛，賊人屢攻，俱為所敗。其隨同瑚图里等到府及留在軍前助剿之處，或出自情愿。即如瑚图里等于六月二十二日到府，旋据同知吳元琪稟稱：七月初三、四等日，逆匪庄大田遣許光來等往攻山猪毛粵庄，被粵民殺退。而七月十四日常青等往剿南潭時，所留軍前之粵民，最為出力。看來竟系該義民自度無內顧之虞，愿在軍前殺賊。（朱批：此或有之。）常青前奏未曾聲叙明白，是以上塵聖懷。至恒瑞前往台灣時，臣見其虛心商酌，深知以國事為重，到台灣后，聞其諸事與常青和衷辦理，並無意見不和，（朱批：如此固是好事。）此臣所深知者。惟魏大斌等往援諸羅，為賊所阻，常青僅遣田藍玉帶兵前往。及田藍玉仍不能進，又遣特克什布、張萬魁帶兵前往，共撥兵三千九百名。而常青并未親自赴援，虽或因府城外賊勢有未可移動營盤之處，然究不免為賊所綴，而未能扼要制勝，以致聖明廬慮，將常青是否可了此事之處，垂詢到臣。臣愚昧之見，察看此時情形，總以能打通諸羅為第一關鍵。如常青接奉近日諭

旨，亲自率兵前往打通诸罗道路，与柴大纪、魏大斌等会合，则军声已振，贼势自衰。柴大纪最为奋勇，且临机应变，调度得宜。既得与常青会合一处，必能协心并力，共图进剿。兼以内地续调之兵，现在陆续配渡，不日可到。似即可乘势捣穴擒渠，完结此事。但目下五、六日内，尚未得诸罗信息。万一诸罗一时不能得手，则常青恐不免著忙。但伊灭贼之心甚切，特军务素未历练，是以不能得要。而军中屡易统帅，诚如圣谕，亦非所宜。臣再四思维，可否仰恳皇上或于武臣中如海兰察者，授为参赞大臣，令其前来，（朱批：已发往矣。）会同常青督率料理。（朱批：恐常青管不住他，是求益而反损，已命福康安驰驿前往。余有旨谕。）贼匪虽多，究系乌合之众，自不难摧败。臣前奉谕旨，以海兰察等非常青所能统辖驾驭，但海兰察系受恩深重之人，久历戎行，来当重任，自必期于妥办。且俱系头品大臣，同舟共济，亦无待常青驾驭然后出力。而常青处事亦极明白，决不肯各立意见，自当坦怀商度，相与有成，则剿匪之事似即可及早告竣。是否如此，谨就臣愚昧所及，据实复奏，伏乞皇上睿鉴训示。谨奏。

乾隆五十二年八月初六日。

乾隆五十二年八月十九日奉朱批：已有旨了。钦此。

再，广东驻防满兵一千五百名，副都统博清额带领，已于七月三十、八月初一、初二、初三等日，全数抵厦，俱已配渡，现在候风开驾。浙江驻防满兵亦陆续到有四起，随即登舟。江宁将军永庆已于初五日抵厦，尚有两起，日内亦可到齐。至粤省最后之绿营兵一千五百名，随满兵后行走，亦于初五日到厦。七百名即由厦门配渡前赴鹿港，得有顺风，即当放洋。谨并附奏。

同日①奉朱批：览。钦此。

① 指乾隆五十二年八月十九日。

諭欽差湖廣總督常青與藍元枚夾攻林爽文

乾隆五十二年八月十九日 台灣檔

大學士和，字寄欽差協辦大學士將軍侯福、欽差湖廣總督將軍常、閩浙總督李、福建提督參贊藍、提督參贊柴，乾隆五十二年八月十九日奉上諭：

據李侍堯奏，前此山猪毛廣東莊義民，于常青等往剿南潭時，義民隨從打仗最為出力。看來該義民自度無內顧之忱，願在軍前殺賊。常青前奏未經聲叙明白，現在續調之兵已經配渡，不日可到，自即可乘勢進剿完結。此事若令海蘭察前來會同常青督率辦理，賊匪雖多，不難克期摧破等語，已于折內詳悉批示。前因常青等辦理剿捕事務未得把握，是以諭令福康安同海蘭察等，帶領巴圖魯侍衛、章京等，馳赴台灣，督同進剿，以期迅速肅清。朕非不知軍中主帥不可屢易，特念此事前已誤于黃仕簡、任承恩二人，觀望因循，漫無籌劃，以致日久未能辦結。猶意此等賊匪不過么麼（磨）草竊，無難速就殲除，初不料其聚眾張，蔓延未已，是以前此就近令常青前往台灣更換黃仕簡，冀其督率官兵克期奏績。常青到彼後，籌劃調度尚俱妥協，已出朕望外，但究系年老，未能諳練軍旅。藍元枚、恒瑞又更事未多，駐守數月，總未能相機進取。因思此事一誤，豈容再誤！若于賊匪起事之初，即派福康安同海蘭察等，帶領巴圖魯侍衛百余人，及早馳往，則賊匪定已早就殲擒，何致曠日持久，尚未肅清！今已失之于前，此時不得不派福康安前往接辦，此朕不得已之苦心。現在福康安、海蘭察帶同侍衛、章京等兼程前往，不日即可到彼，

所谓成事不说。

至常青办理此事，虽未能奏绩藏功，而督励兵民防守堵剿，尚属妥协，前已屡降谕旨，令其亲统官兵，自南而北，直抵诸罗，接应柴大纪，合兵进捣贼巢，擒拿贼首、贼目，并令蓝元枚或自北而南，与常青、柴大纪会合一处，或由鹿港进兵大肚溪，与徐鼎士夹攻大里杙，捣其巢穴。此时常青、蓝元枚若于接奉前旨后，业经各带官兵直抵诸罗，杀透重围，剿杀贼匪，与贼（柴）大纪会合一处，长驱深入，固属甚善。否则，常青仍应遵照前旨，剿散诸罗沿途占据贼匪，速抵诸罗，接应柴大纪。而蓝元枚即应从大肚溪，进兵攻击大里杙之南，令徐鼎士由大甲攻大里杙之北，使贼匪腹背受敌，进退无据，以收捣穴擒渠之效。前据李侍尧奏，贼中粮食就尽，互相残杀，已有内溃之象。常青、蓝元枚乘机进剿，自当得手。

福康安于途次遇有常青、李侍尧等六百里加紧军报，仍可启看。若大里杙已经摧破，林爽文、庄大田等并就歼擒，则福康安一闻此信，或抵泉州后，即可旋回，毋容渡台湾。其善后事宜，固常青所优为，无须福康安前往帮办。倘大里杙虽已摧破，而贼首贼目尚未就擒，或林爽文、庄大田仅止擒获一人，未能藏事，则福康安仍当速渡台湾，督同剿捕，以期迅奏肤功。至常青等前所请添兵，彼时尚未全到，虽进剿稍需时日，朕亦不加责备。常青等若能于福康安未到以前，趁此兵力到齐，军威壮盛之时，将首伙各犯弋获，则平定全台，仍是伊等之功。常青等不必心怀疑虑，转致遇时不能得有主见。惟当悉心筹划，奋勉自效，速图奏绩。

前此拟调川省屯练降番一事，朕反复思之，究为失计。此等屯练降番，前此征剿逆回时已经调用，今又檄调，既使屯练降番

等见内地兵力有限，遇事必仗伊等出力，且连次征发，并似内地屡有事端，转启众土司轻视内地之心，殊为失算。福康安从前亦未想到。朕意日内如续得常青等奏报捷音，即当降旨停止。至黔、楚兵丁，远隔数省，缓不济急，尤可毋容征调矣。

将此由六百里加紧谕令常青等，并谕福康安知之。仍著常青将于何日前抵诸罗，与柴大纪会合，蓝元枚定于何路进兵，其柴大纪处近日如何打仗杀贼情形，各行迅速驰奏。并著李侍尧续得地方官禀报打仗信息，一并迅速驰奏，以慰悬念。

钦此。遵旨寄信前来。

谕钦差湖广总督常青等速奏近况

乾隆五十二年八月二十日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月二十日奉上谕：

昨据李侍尧奏，台湾剿捕事宜已有旨谕，令常青速即统兵前赴诸罗，会合柴大纪，并令蓝元枚进兵大肚溪，与徐鼎士南北夹攻，以期捣穴擒渠，迅速集事矣。至柴大纪处，半月以来总未据续有奏报，甚为烦闷。因思前次魏大斌带兵前往诸罗援应时，在鹿仔草被贼拦截，后经魏大斌杀透重围，直抵诸罗，而火药粮饷仍存鹿仔草，被贼匪梗阻，不能同到，看来竟系中贼之计。贼匪围攻诸罗已经数月，明知诸罗城内粮饷无多，故将魏大斌放出去路，听其入城，仍将粮饷截断，道路梗阻。则诸罗城内，既增魏大斌所带兵丁数百，口粮愈增，军粮火药铅弹更当不给，使之同

困。此乃贼匪狡计，显而易见者。前据常青奏，接巡检邵宗尧禀报，鹿仔草官兵已抵县城，所有押解饷银随同前进等语。或邵宗尧所押粮饷等项，初被贼人拦截，后已续经前抵诸罗，亦未可定。如果所报属实，则官兵自可无乏食之虞，固属甚善。但柴大纪尚未奏到，而常青等亦并未将鹿仔草道路曾否打通之处俱奏，深为悬注。

至柴大纪被围数月，未能得有寸进，今魏大斌应援之兵既已会合，柴大纪即不能进攻大里杙贼巢，自应令魏大斌分兵出城，将从前经过道路，如鹿仔草一带屯聚贼匪，先行剿散，廓清道路。纵使魏大斌不能分身，亦应于将弁中，择其勇于可恃者，令其带兵出城剿捕，何以魏大斌到彼，柴大纪仍复漫无举动？岂添此魏大斌兵力，徒令帮守县城，甘心受贼围困，而不思乘其新到锐气，相机进剿耶？著传谕柴大纪，急应设法筹划，倍加奋勉。或令魏大斌或拣派勇于将弁，迅即带领官兵，将魏大斌经过一路贼匪，悉力歼除，痛加剿杀，使常青统兵自南而北，沿途道路更可无虞梗阻，迅速前抵诸罗，会合一处，进捣贼人巢穴，方为妥善。不可一味株守，徒堕贼人奸计，以致坐失时机也。

至常青屡经有旨，令其舍南趋北，此时暑气已退，雨水已稀，添调官兵已全抵该处，该将军急应先统大兵，剿散沿途屯占贼匪，直抵诸罗，与柴大纪合兵进捣贼巢，擒拿贼首贼目。常青究竟于何日统兵前赴北路，著即迅速复奏。蓝元枚接到徐鼎士知会，是否已由大肚溪进兵攻击大里杙之南，抑已遵前旨，统兵前赴诸罗，与常青、柴大纪合兵进剿，尚未据该参赞等续有奏报。著即将定于何路进兵会剿之处，迅速驰奏，以慰廑注。

李侍尧日内自必续得地方官禀报台湾南北两路进兵剿贼得胜信息，及鹿仔草道路于何日打通，粮饷火药究于何日前抵诸罗之

处，并著一并驰奏。将此由六百里加紧传谕常青等，并谕福康安知之。

钦此。遵旨寄信前来。

谕钦差协办大学士福康安等

星速渡台以期迅奏肤功

乾隆五十二年八月二十一日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月二十一日奉上谕：

据常青奏，魏大斌带兵援应诸罗，于七月十三日由鹿仔草与贼接战，奋力将贼匪杀退，行近诸罗西门，见有参将潘韬等带领兵民迎接，随即前抵诸罗，仍被贼匪围困，所带官兵共伤有一千一百余名，现派副将蔡攀龙等，带兵一千六百名，仍由水道前往接应等语，所办总不成事体，已于折内批示。魏大斌带兵前往诸罗援应，在鹿仔草被贼拦截后，经魏大斌杀散贼匪，前抵诸罗，而一切军火粮饷，仍不能运送入城，我兵受伤者甚多，明系贼人故意撤围，放魏大斌抵县，仍将道路梗阻，使所运粮饷火药不能接济。诸罗城中既添官兵，口粮愈增，军粮火药等项更当不给，是不惟柴大纪被围，而魏大斌又在贼围之中，此正堕贼人之计。常青等接到禀报，自即应留恒瑞驻守府城营盘，常青亲身统领大兵，径赴诸罗，打通道路，接应柴大纪，方可得力。乃仅添派蔡攀龙等，带兵一千六百名前往援应，似此零星派拨，何益于事？不又似魏大斌乎？况柴大纪处被围日久，今魏大斌虽已前往，而县

城仍被围困，其势甚为急迫。常青于此时，尚不亲往救援，则岂拥此重兵，徒以株守府城营盘为事耶？且常青即或因肘腋堪虞，未能遽离府城，亦应带兵就近先将南路屯占贼匪廓清剿杀。兹据常青等奏，南潭贼匪被官兵追杀，将贼人草屋篷寮烧毁，竹箐砍伐，贼匪纷窜，则南路贼伙已有溃散之势，正应乘机剿捕，擒拿庄大田，使南路肃清，以便直趋北路，可无后顾之忧。今据所奏情形，则是南路贼匪尚在窥伺，而常青又并未领兵前往攻剿，即云连日风雨未能进兵，但官兵处遇有风雨，岂贼匪独无风雨耶？况官兵遇雨，即枪炮不能施放，而弓箭刀矛独不可用以杀贼耶？常青等何以株守无策若此！为今之计，常青处添调官兵早已齐集，竟应留恒瑞驻守府城营盘，常青速统大兵，直抵诸罗，杀散贼匪，打通道路，与柴大纪会合一处。蓝元枚若已由大肚溪进兵，与徐鼎士订期夹击，固属甚善。否则，亦即令普吉保驻守鹿港，该参赞即亲带官兵，自北而南，直赴诸罗，会合常青、柴大纪，则得二、三万大兵全力奋勇剿杀，进捣贼巢，擒拿贼首贼目，庶可期迅速集事。

至川省屯练降番，前已有旨派调二千人。该处兵丁自胜江西、广西远甚，是二千人足抵二万人之用，尤可资以杀贼。其常青所请巴图鲁侍卫百余人，朕早已虑及，派令福康安、海兰察等带领前往矣。但屯练降番到彼，尚须时日，常青此时不可坐待川省兵丁，惟应就现在添调已到之兵，迅速带往，自南而北，会合进剿，毋得再事因循，致蹈黄仕简等复辙，自干重戾。

至福康安在途已两次启阅常青、李侍尧奏折，该处情形谅已明悉，自必定有主见，其具奏之折，想日内自必递到。看来常青等于剿捕事宜，竟无把握。福康安此时惟当趲程前往，逾加紧急行走，于抵厦门后，毋庸等候屯练兵到，竟先带同巴图鲁侍卫等，

星速前渡台湾，即统领该处官兵，径赴诸罗，会合常青、蓝元枚、柴大纪，捣穴擒渠，痛加剿杀，以期迅奏肤功。

将此由六百里加紧各传谕知之。仍著常青将于何日统兵前抵诸罗，蓝元枚定于何路会剿，柴大纪曾否将贼匪杀退，粮饷火药于何日打通道路，运至县城，各行迅速驰奏。并著李侍尧得有官兵打仗信息，一并随时速奏，以慰廑注。

钦此。遵旨寄信前来。

湖南巡抚浦霖奏挑备官兵候调赴闽折

乾隆五十二年八月二十一日批 军录

湖南巡抚臣浦霖跪奏，为遵旨挑派官兵候调赴闽，并筹备一切应付事宜，以期行走迅速，仰祈圣鉴事。

本年八月十二日丑刻，接署督臣舒常札知，八月初七日戌刻，承准大学士和坤字寄八月初二日奉上谕：著传谕舒常等，于湖北、湖南各挑备兵二千，富纲、李庆棻于贵州挑备兵二千，拣选曾经行阵，奋勇干练之将备带领。一切军装火药，妥为密行预备停当，听候调拨，等因。钦此。恭录知会到臣。

臣查台匪林爽文等逞其螳臂，妄肆鸱张，天下臣民无不欲灭此朝食，今蒙皇上简派重臣前往督剿，现在大兵云集，似此么膺小丑，自无难一举歼擒，用彰国宪。兹奉谕旨，湖南挑备兵丁二千名听候调拨等因。臣遵即于本标备战兵丁一千名内，择其年力精壮，技艺娴熟，及曾出兵金川、现有家室者，密为挑选记籍。一面将火药等项宽为预备，临期委员随解。并知会提、镇各臣，一体挑备。再，此时已届深秋，转瞬即交冬令，兵丁御寒衣履在

所必需。若俟奉文后始行制备，未免有需时日。臣已飭藩司先行动项，为购备齐全，届期按名给发，以免迟延。

至兵丁由江西行走，应于长沙府属醴陵县渌口地方取齐，由江西萍乡县出境。其自各标营至渌口，皆系大河，乘船较为便捷。惟自渌口以上至江西萍乡，系一线溪河，节节浅滩，行走恐未能迅速。臣已酌定于渌口地方起旱，至江西萍乡县交界之插岭关出境。计程一百一十里，行军迅速，未便稍稽。所有夫船及沿途应付，并兵丁尖宿处所，现在密飭地方官早为预备，无致稍涉张皇。俟奉到谕旨或接福康安调取檄文，即行分起间日前进。臣仍亲至醴陵地方，率同藩司郭世勋，分途督催照料，护送出境。一面知会提臣俞金鳌，于常德至长沙一带弹压督催，并令臬司恩长，在于省城上下，随同照料。其余水陆各路，均委道府大员带领丞倅佐杂等官，逐程催趲，以利遄行。除俟署督臣酌定领兵将备员名，及各标营挑派兵丁数目，听候调拨外，所有臣接奉谕旨，预为筹备缘由，谨由驿五百里驰奏，伏祈皇上睿鉴。谨奏。

乾隆五十二年八月十二日。

乾隆五十二年八月二十一日奉朱批：大约用不着，不可张皇，只宜镇静。钦此。

钦差湖广总督常青等奏接据诸罗

文报再请添兵折

乾隆五十二年八月二十一日批 军录

将军湖广总督臣常青、参赞福州将军臣恒瑞跪奏，为接据诸

罗提镇等文报，酌量兵力，再请补添，恭折具奏，仰祈圣鉴事。

窃臣等于二十日接据现驻鹿仔草游击邱能成续禀，总兵魏大斌等各官兵自十三日前赴诸罗，尚无消息，而贼又回攻鹿仔草。该处存贮军装药铅，必须加意防护。当又派游击董秉璘带兵四百名前往，并飭干差探听诸罗确信，经臣等于二十三日具奏在案。

兹于二十五日接据提臣柴大纪咨报，本月十三日卯刻，有贼七、八千复来攻县，本职督率官兵义民堵杀，至午后贼退。适闻炮声连响，料系魏总兵官兵来县。随令参将潘韬、游击李隆带队接应，本职即带官兵义民继进。至外三苞竹、刘厝庄地方，探闻官兵被贼围困，该将等齐放枪炮，义民并力冲杀，打死贼数百，接护魏总兵、两侍卫、特参将、詹副将、田游击各官兵等，陆续前来。又，参将张万魁在三苞竹坠马危急，义民救出，亦到。复有台斗坑、水堀头两路贼匪赶到，本职督率官兵分头抵御，枪炮齐放，毙贼数百。旋因雷雨如注收军。阵亡兵丁王世宾等十二名，义民洪降等二十一名，受伤兵丁一名，义民十八名，俱各给银收埋医治。查魏总兵、田游击、张参将等三起官兵，据称除留在鹿仔草看守军装外，共带兵二千七百名来县。但目击到县之兵，不过一千五六百名，器械均不全备，药铅火绳俱无。现在会县设法备办，以济需用，并据兵丁林锋禀称，外委段昭明、沈贤赍回折，随同大兵来诸罗，至老店被贼所害，折亦遗失。又据代理知县陈良翼禀称，据巡检邵宗尧家丁苏容哭禀，本官将番银一万员（圆）于十三日跟随大兵来县，行至老店被贼截杀，家丁郑荣并挑夫二名被贼杀死，余役逃散，家丁拚命同挑夫力护番元二桶，计一千员（圆）到县，余俱被贼抢去。本职随即面问魏总兵、两侍卫、特参将、田游击，俱称并不知情。所有魏总兵等所带官兵

阵亡遗失若干，应听魏总兵自行查明具报。

又接据总兵魏大斌、侍卫章京德成额、官保、副将詹殿擢、参将特什布、张万魁、游击田蓝玉等同禀称，十二日夜接柴提督来札，公同阅看。内云：汝等带领之兵，何日可抵诸罗？我闻炮声即带兵接应等语。是以公同商议，于十三日即带兵二千七百名，至半田处地方，并无见有贼人。又前行二、三里，见路旁数座大庄，尽被贼侵占。见我大兵，贼即出战。我兵施放枪炮追击，贼即败走，职等追贼八九里，至道店地方，询及居民，离诸罗尚有四五里。职等思我兵之火药、铅子、帐房等项，虽俱留在鹿仔草。但现离诸罗甚近，若仍回原处，约有二十余里。是以公同商酌，我兵直进诸罗。正与贼战之际，忽降大雨如倾，乘此之际，道店、汤圆店、三坎店等处贼匪，蜂拥而来。约有二万余人，围困我兵。我兵不能施放枪炮，彼此鏖战，杀死多贼。我兵奋力战，贼始败走。行近诸罗西门，见有参将潘韬、游击李隆带领兵民前来迎接。查得职等所带官兵内，千总至兵伤有一千一百余名，职等虽抵诸罗，仍被贼匪围困各等情前来。臣等接阅之下，不胜焦急。伏思应援之兵，内外订期必须彼此熟商，不误时刻，乃克有济。（朱批：此皆余言，于事无济。果如此，尔等何不早报之魏大斌？）今魏大斌虽接柴大纪来札，有闻炮接应之语，但定于某日某时，此从某道而往，彼从某道而来，亦当从容详审。今于十二日夜接札，即于十三日早前往。而魏大斌等起程在途之时，正柴大纪在县城御贼之顷。至午后贼退，柴大纪闻炮派队往迎，而魏大斌等已为贼阻。是虽曾预先关会，而仍属临时愆期。俟该镇将等将弁兵实在伤亡各数，分晰报到，另行查办。惟是目前道路梗塞，一切军火粮饷不能运送诸罗，实关紧急。臣等当又派副将蔡攀龙、贵林、参将孙全谋带兵一千六百名，仍由

水道前往。（朱批：仍不成事体，何不以大兵前往？且汝等重兵在府城，所成何事？发兵千余又如魏大斌耳，汝处又觉少矣！）又因二十六、七、八连日风雨，至二十九日始得开行。并谕令既抵鹿仔草，务必打通诸罗，并与柴大纪等悉心筹划，使往来道路不致再有阻塞，并飞飭前后调往各镇将官兵悉听提臣柴大纪调遣，则意见无所参差，（朱批：竟无定见，更不成话。）必可克期集事。

至臣等军营新添本省兵二千，潮州兵二千，而总计派往诸罗各兵已有七千名。但即日打通诸罗之后，该处亦须分兵堵剿，仍不致再为贼困。是业经派往之兵，不能调回郡城。臣等军营兵力，依然不足。是以再四筹酌，仰恳天恩，或于江西、广西两省各拨兵三千，（朱批：此两省兵既无用，付尔等无用之人何益？）臣等并不专候此六千兵到营方图进剿，惟俟现今浙、粤满兵三千，以及粤省绿营兵二千到齐，即相机前进，（朱批：非正算，惟当遵后降谕旨，勉力补过，不然福康安到，自有处置。）必将逆首庄大田等擒获，即与蓝元枚、柴大纪会攻大里杙贼巢，擒拿林爽文，以期一举殲事。

再，南路贼党知臣等有备，旬日有余，未敢来犯。（朱批：贼不来犯，汝等不往攻，欲相持终老于台湾，能乎？）又因臣等遵旨晓谕附近民人，渐次归庄。现已招募壮丁充伍者百余人，以后陆续愿来投充者自多，并闻尚有贼目来投之语。一俟实有投出贼目，及拿获之人，并得打通诸罗信息，即行驰奏外，所有接据提镇文报，补添兵力缘由，谨合词具奏，伏乞皇上睿鉴。谨奏。

乾隆五十二年七月二十九日。

乾隆五十二年八月二十一日奉朱批：即有旨谕。钦此。

谕钦差湖广总督常青切勿株守府城

乾隆五十二年八月二十二日 台湾档

大学士和，字寄钦差大学士公阿、钦差协办大学士总督将军侯福、钦差湖广总督将军常、闽浙总督李、福建水师提督参赞蓝、陆路提督参赞柴，乾隆五十二年八月二十二日奉上谕：

昨据常青等奏派兵接应诸罗一折，已降旨令该将军亲统大兵，速赴诸罗，会合进剿矣。反复思之，常青等办理此事，实属毫无定见，一筹莫展。当贼匪滋扰诸罗时，常青既不亲往援应，止派魏大斌等带兵接应，以致堕贼狡诈之计，将魏大斌放出重围，复将道路梗阻，截断粮饷火药，魏大斌虽抵诸罗县城，仍被贼围困。常青又仅派蔡攀龙等带兵往援，则与前此派魏大斌往救诸罗何异？似此零星派拨，既不能剿散贼匪，打遏道路，而大营兵力更以分而见少，已为失计。况常青即因南路贼匪肘腋堪虞，未能分身前往北路，亦应将南路屯占贼匪扫除歼戮，勿使牵缀官兵。纵使常青不能亲往，亦应令恒瑞带兵前往剿捕。且前据常青奏，南潭贼匪被官兵追剿，焚烧草屋篷寮，砍伐竹箐，是南路贼匪已有溃散之势，正应乘此机会，悉力追剿，擒拿贼目庄大田，使南路肃清，以便直趋北路，无虞后顾。乃既不舍南趋北，又不分一人将南路之贼乘势歼除，常青、恒瑞徒拥多兵，一同株守郡城营盘，并不前进尺寸。而折内尚称，旬日有余贼党知官兵有备，不敢来犯。岂贼不来犯，常青即以为万幸，不思进攻？似此与贼相持，略无展布，岂在台湾坐守终老即能了事乎？常青何并未计及，止请于江西、广西添调官兵。试思江西、广西之与浙江

之兵相等，岂能得力？而江西兵，尤为绿营中之最无用者。若以此等无用之兵，付尔等无用之人，徒以虚糜粮饷，轻试贼锋。而常青又于各处东派西拨，于事更属无益。且常青既不往北接应诸罗，又不往南路剿擒贼匪，伊等如此按兵株守，究系意欲何为，是何主见，又不于折内声叙明白，常青等所办何事？常青亟应遵照屡次所降谕旨，趁福康安未到之前，留恒瑞驻守营盘，亲统大兵，速赴诸罗，合兵进剿，力图补过，以收桑榆之效。从前黄仕简株守郡城，犹得借口兵少力单，不敷剿捕。今常青原带之兵，已较黄仕简在彼时为多，又经陆续添调闽省及粤东、浙江绿营驻防兵，共计不下二万，兵力如此厚集，而复何所借口？常青可不勉图进取，稍赎前愆耶？

至福康安，已屡经有旨，令其趲程行走。今看常青等光景，于剿捕事宜竟难望其办理完结，福康安更应加倍趲行，一抵厦门，不必等候屯练兵到，即带领巴图鲁侍卫等，速渡台湾，督率进剿。彼时常青处添调各兵，早已齐集，又有巴图鲁侍卫等百余人派令带兵，自必军威倍壮，壁垒一新。福康安竟当直抵诸罗，会合蓝元枚、柴大纪，直捣贼巢，擒拿贼首贼目，以期迅速集事。常青究系年老，留于军营亦属无益，且军中有将军二人，恐事权不一，将弁无所禀承，转多未便。福康安到后，察看情形，如有必须留彼帮办之处，即令常青留于军营亦可；若留彼无用，即当令其来京陛见，总在福康安酌量而行。但朕意究以常青可不必留在该处也。至恒瑞年力精壮，应仍留于军营听候调遣。福康安带有钦差关防，即以钦差办理将军事务。其常青所带福州将军印信，仍著交与恒瑞可也。

再，昨据常青等奏巡检邵宗尧家丁禀报番银被劫一节，其邵宗尧究在何处，是否已抵诸罗，抑仍回鹿仔草，著常青、李侍尧

查明复奏。将此由六百里加紧传谕福康安、常青等，并谕阿桂知之。仍著常青先将于何日领兵前赴诸罗，蓝元枚是否已进兵大肚溪，与徐鼎士会合夹攻大里杙贼巢，抑系遵旨自北而南，前往诸罗，会合常青、柴大纪进剿之处，各行迅速驰奏，以慰廑注。

钦此。遵旨寄信前来。

大学士阿桂复奏台湾剿捕事宜管见折

乾隆五十二年八月二十二日批 军录

臣阿桂跪奏，为遵旨复奏事。

本月十四日接奉上谕：前据李侍尧奏，援应柴大纪官兵，已抵诸罗，可期蔽事。本日据常青等奏到各折，仅系剿捕南潭情形，不为快意。同日又据蓝元枚奏到，杀退西螺贼匪情形一折，虽非大胜，亦可称兵威稍振。所有各折并所降谕旨，俱著抄寄阿桂阅看，即就所见详悉复奏。钦此。臣跪读之下，仰见圣谟广运，于数千里军务情形，靡不遥授机宜，至周且悉，实深钦佩。

查台湾剿捕贼匪，前蒙将军常青奏折，并寄信谕旨，抄录发给阅看。臣详细恭阅，知柴大纪驻扎诸罗，兵力单薄，兼之贼众分扰盐水港、鹿仔草等处，势甚危急。乃常青等接到柴大纪咨会，初仅派兵一千五百，令总兵魏大斌等带往应援，实属不知缓急。（朱批：昨日所奏更不成话，亦有旨谕汝矣！）虽续又添派官兵前往，然恐其到迟。柴大纪迫不及待，若诸罗稍有失利，所关匪细。皇上降旨，将常青等严饬，并令亲率大兵前往攻打，是该处情形圣明早已洞若观火。而臣旬余以来，私心窃虑者，亦在乎此。兹接奉谕旨，知常青等先后所派应援柴大纪之兵，已全抵

诸罗。是诸罗即可放心，（朱批：竟不然，亦有旨谕。）其南潭及西螺贼匪并经官兵剿杀逃窜，诚如圣谕，看来南北两路官兵，俱有起色。又蒙谕令将出力之兵弁、义民等，从优升赏。投到之蓝启能等，免其追究。如此奖劝离解，士卒自无不争先效力，而贼党亦必闻风溃散。至粮饷火药等项，又节奉谕旨，宽为购备。现在台湾应办要务，俱已不出圣明筹示之中。迺复垂询及臣，令就所见，详悉复奏。臣再四思维，此事初起时，贼势非不甚炽，迨内地官兵一抵台湾，林爽文即回顾大里杙巢穴，不暇复至郡城侵扰。后因凤山失陷，贼势顿觉鸱张，又敢覬觐郡城，纠众来犯。其意以为郡城一得，则官兵无可驻足，台湾全郡均可据为所有。嗣见郡城安设重兵，无隙可乘。又以诸罗兵少，思用全力攻犯，计在必得，以期隔绝官兵南北信息，并分遣党伙，于沿海一带肆行抢掠，希冀官兵粮饷匱乏，贼人即可收不攻而自困之利。（朱批：贼之奸计竟巧，而常青所应皆失之迟，不得不用福康安速去剿灭逆贼，以奏成功矣！）其奸谋谲计固已不遗余力，乃柴大纪仅带兵一千余名，与之相持，将及一月，毫无所失。固由该提督奋勉出力，得以保护无虞。而贼人之智穷力拙，不能复有所为，于此亦可概见。今常青等派往应援之兵，业经攻透重围，与柴大纪会为一处。而续调之兵，又指日可到。从此官兵之气益振，贼势自衰。此等乌合匪徒，众志成城，瓦解必速。就臣愚见，揣度此时台湾断不至复有他虞。如常青等俟续调之满兵、粤兵一到，能乘此机会，遵照谕旨廓清道路，南北会攻，固可以及早戡事。即或贼众自知罪在不赦，负隅抗守，福康安与海兰察均久历戎行，一到台湾，厚集兵力，设法进攻，贼人亦必立就歼除，不能久稽显戮。（朱批：所望者此耳！然为期尚遥，益增烦遽耳！）所有接奉谕旨缘由，理合恭折复奏，伏乞皇上睿鉴。谨奏。

乾隆五十二年八月十六日。

乾隆五十二年八月二十二日奉朱批：览。钦此。

大学士阿桂复奏进攻大里杙等管见片

乾隆五十二年八月二十二日批 军录

再，臣正在缮折拜发间，本日寅刻又接奉十一日上谕：以李侍尧奏南路贼匪粮食就尽，其伙党乏食，且互相欺夺，彼此不睦，是贼匪已有涣散之势等因。钦此。辰刻又接奉十二日上谕：以常青奏到情形，又似南路贼匪仍未溃散，尚在窥伺滋扰。而于贼匪乏食一节，并未奏及，等因。钦此。臣思贼匪不过么磨乌合，其党羽自必无多，（朱批：原不多，奈常青等不能奋发剿灭，竟至蔓延日多！）现在之所以蚁聚蜂屯者，缘台湾向多游手好闲之徒，见贼人滋事，遂尔附从，乘机劫掠。又贼于抢夺各村庄时，胁诱良民入伙，必将其家属拘留，再令帮同出拒。民人无奈听从，日聚日多。当官军按兵不动之际，贼即驱使四出滋扰，或以之尝试先当枪炮，是以官兵每次所见，势若盈千累万，然其中如尽系贼党，则临阵自当拚死抵拒，何以一经官兵追剿，即潜行逃窜，是贼之无能，于此亦可概见。（朱批：所幸者此耳！）今李侍尧所奏贼匪粮食就尽情形，系得自同知杨廷理等禀报，该同知等近在台湾，所禀谅非无因。且被害同知王隼家人，系由贼中逃回，其言更当确实。此等贼众粮食既乏，则互相欺夺，彼此不睦，亦事之所必有。即常青折内亦称，附近各里庄，出具互结，请给腰牌归庄者，现有千余人。南路民人既纷纷归庄，是贼众实已有涣散之势。

至游击邱能成驻扎之鹿仔草，距诸罗仅二十五里。如果贼人暂避，听官兵前进，再回攻鹿仔草，岂不虑诸罗之兵，从而蹶其后。就臣愚见揣度，或因总兵魏大斌等统率大兵，全赴诸罗，其附近村庄从贼匪徒，见鹿仔草所存兵力不敷搜捕，希图趁此劫掠。而邱能成以军装、火药等项尚存该处，乃其专责，恐有疏虞，过怀畏惧，遂复请兵接济，亦未可定。况前此柴大纪驻守诸罗，仅有兵一千余名，尚能与贼相持月余，毫无所失。现添常青派往援应之兵，前后共有四千，兵威既甚，岂转不能御贼？（朱批：纵之使入，资粮益多，贼之计亦巧矣。）似可毋庸仰廛圣怀。至前奉谕旨令恒瑞、普吉保留驻府城、鹿仔港，常青、蓝元枚即各带兵至诸罗，与柴大纪会合攻剿，此旨系七月十二日发往。而常青此次奉到之折，系七月二十三日拜发，（朱批：至今尚未回奏到，望信益甚。）计该将军等发折时，尚未接奉前旨，其折内称俟道路渐干，添调之满兵、粤兵亦可到营，即乘锐前驱，必可集事等语。此时添调之满兵、粤兵，自己到彼。南北两路，兵力厚集。即柴大纪处亦有兵五、六千名，足以办贼。又经李侍尧移会蓝元枚，仍从陆路进攻斗六门、大里杙，不必复至盐水港，以省纡回，似亦得当。谅该将军、参赞等，自必遵照续降谕旨，廓清道路，会合攻剿，不至畏葸观望，自取重戾，又蹈黄仕简、任承恩之复辙。

再，臣自逆匪林爽文滋事以来，每留心询问大里杙地方，系凭山面谷，若由正路进剿，势须仰攻，不能得力。必须先攻得虎仔坑，即可俯瞰贼巢，建瓴而下。此时大兵进剿，似宜扼其要害，不必拘于一路，（朱批：近有徐鼎士之奏，与此颇合。及今日之旨，寄去看。）或由虎仔坑前进，或照蓝元枚前奏，纠集牛骂头各庄义民、熟番，由大肚溪与大兵一齐分路前进。总使贼人左

支右拙，无暇相顾，庶更易于扫穴擒渠。此臣所闻，若是未稔该处地势，能否如此办理，可否于常青、蓝元枚等报便谕令酌量筹办，（朱批：早降旨矣！）并寄福康安一体留心参酌之处，恭候圣裁。所有接到谕旨缘由，理合附片复奏。谨奏。

乾隆五十二年八月十六日。

同日^①奉朱批：览。钦此。

钦差湖广总督常青奏近日战况及 诸罗被困等情折

乾隆五十一年八月二十三日批 军录

臣常青、臣恒瑞跪奏，为搜剿打仗并接据诸罗文报，恭折奏闻事。

窃照诸罗贼势猖獗，臣等复派副将蔡攀龙、贵林，参将孙全谋等带兵一千六百名，于七月二十九日前往应援，当经具奏在案。但自七月二十六、七、八、九等日，飓风霖雨，至八月初一日，风雨稍息，初三日始得晴霁。臣等预揣贼人诡计，必乘雨后枪炮潮湿，又有攻犯，且阻挡兵民樵采等事。臣等于初二日夜，密令那穆素里往探贼人动静，即派总兵梁朝桂、协领海星阿带兵四百名，往正南十三里庄巡哨。又派侍卫郭尔敏色、游击双德带兵四百名，往南势庄巡哨。又派侍卫雅尔疆阿、协领色普星额带兵四百名，往槟榔宅巡哨。又派岱森宝、富克精额、他思哈、副将丁朝雄等带兵八百名，分巡白崙仔、虎仔山两处。至初三日辰

^① 指乾隆五十二年八月二十二日。

刻，据那穆素里并了哨兵丁报称，有贼三、四千四路前来，臣等带领中队迎击，各路巡哨官兵，争先邀截，枪炮齐施。贼人胆敢对放枪炮，抵死抗拒。臣等预派下之翼长乌什哈达、官福，侍卫希明带满汉官兵一千，并山猪毛义民千余，从沙岗抄出。贼人望见胆怯，纷纷逃窜。官兵追杀，枪炮毙贼约二、三百人。迨至未刻，因地土泥泞收军。义民割献首级一颗，发辫一个，耳记二个。受伤义民一名，俱各量加奖赏，官兵并无伤损。臣等仍相机搜捕、逐渐剿除。（朱批：如此逐渐，一年亦不能完事。）惟是派赴诸罗蔡攀龙等官兵，本系冒雨开行，尚未知该将等曾否到彼。而诸罗尚无消息，臣等正在盼望，兹于初四日接据提臣柴大纪七月二十六、七、八连日来禀。查二十六日禀称，贼匪于十五、二十一、二十三并本日，叠攻县城，均经官兵义民奋勇杀退。第诸罗被围两月，粮饷铅药一切匮乏。外庄之民，迫于贼势，粒米不得到县。况新到之兵，其气甫挫，一时不能出剿，旧存之兵，为数无多，只堪力守。合再禀恳迅发大兵四千名，多备饷银铅药，派拨干练大员，统领速来诸罗等情。二十七日禀称，二十七日匪众万余复攻县城，本职同将弁兵民分头抵御，施放大炮，接连轰击，匪势稍阻。本职分拨将备，各带队伍义民追杀，自卯至午，打死逆匪数百人，时值风雨收军。察看情形，逆党恃众分割各庄，有必陷诸罗之意，恳速拨援兵饷米，陆续运接等情。二十八日禀称，匪党分屯各庄，大出金帛，竖旗招人，无赖之徒，蚁附益众。而孤城坐困，深可忧虑。就地煮硝制药，所得无几，且米谷一项，日见空乏，恳即发兵援救。本职等愚昧之见，窃恐非用重兵，不易剿灭，恳请再调内地官兵一万，速来台湾，斯军威丕振，克期戡事等情。并又接据提臣柴大纪，总兵魏大斌，参领官宝、德成额，参将特克什布、代理县陈良翼八月初

一日同稟称，自二十八日至今，连日大风霖雨，贼匪仍屯各庄，开霁必复攻县。本职日与代理县陈良翼设法米粮，煎煮硝药，以期力守。但煎确实不敷用，劝糴难以久供，本职两次飞咨蓝参赞，发兵救援。二十七夜接到蓝参赞回札，并未提及有无救援诸罗，似因道路阻隔，不信诸罗危急情形。合再驰稟，星刻发兵应援。仍飞咨蓝参赞克日起兵，由船至笨港，来诸罗夹攻，庶贼匪可灭，道路可通。再，本职愚见，贼匪鸱张，务求迅调闽浙两省兵一万名，即来台湾，以便剿洗各等情前来。

臣等细阅各稟，诸罗望援甚殷，但臣等又派蔡攀龙等带兵一千六百名前往，（朱批：汝等不领大兵前往，是何故？似此一千余兵何济？）该提臣等尚未得信，计算一二日内自可前抵鹿仔草。一面飭令道府预拨粮饷铅药，妥速运赴盐水港，转运接济。一面飞咨参赞蓝元枚，现有添拨漳州兵二千名，约计已到鹿港，务即于该处酌拨一二千名，派令将弁带领，即由笨港星赴诸罗，自可订期夹攻，并力打通。至柴大纪恳请调兵一万，自因贼匪众多，必须厚集兵力，臣等已于前折具奏，再请添调江西、广西二省兵六千名在案。

再，查臣等军营官兵于六、七月间受湿染病者颇多，自祭关帝厅以后，官兵叩拜者不绝，目下病皆渐愈。除前后派赴诸罗兵七千，现计军营兵数除病者，不过四千余名。然剿贼尽皆奋勇，泥水亦不少怯，不日溪水稍涸，添调粤、浙之满汉兵亦接续到来，即无难尽歼匪逆。一俟有应援诸罗得胜信息，飞折奏报外，所有现在打仗情形，并接据诸罗文稟缘由，谨合词恭折具奏，伏祈皇上睿鉴。谨奏。

乾隆五十二年八月初五日。

乾隆五十二年八月二十三日奉朱批：不成事体。即有旨谕。

钦此。

闽浙总督李侍尧奏增兵接济诸罗折

乾隆五十二年八月二十三日批 军录

臣李侍尧跪奏，为准咨增兵接济并陈愚昧，仰祈圣鉴事。

窃臣因诸罗被围甚急，魏大斌等援兵抵县后，又为贼匪所围。正在日夜望信，本月初七日接到常青抄寄折稿，知其又遣蔡攀龙带兵前往救应。初八日又接常青折稿，知诸罗益觉紧急。蔡攀龙是否已到，尚无信息。而常青仍复坐守军营，并未亲往设法解围，（朱批：不可解。）是真不知缓急，实不可解。但就现在台地情形而论，不得不早为筹划。目下究当以先救诸罗为第一要务。常青折内称柴大纪咨请蓝元枚由笨港赴救等语。查蓝元枚处，臣所调往之漳兵二千，久已开洋，虽七月下旬海多大风，而日内料已全到。其一万一千兵内，奉旨分往鹿港之粤兵二千，已先有五百前往。今续到之一千五百，亦已登舟。又奉旨续调之粤兵一千，亦到四百。而领兵之总兵李化龙，又已先到。臣现催该镇带此已到之兵，即日开驾（朱批：好。）速与蓝元枚商酌，或由陆路进攻，或笨港已无贼占，而海船不能进港，则多用小船入港。臣再三面嘱该镇，务与蓝元枚奋勇进攻，不可再有观望，（朱批：是。）此亦赴援解围之一路。至前奉谕旨，令臣于闽省多行召募，原以备续调之用，惟甫经入伍，尚未操练娴熟，是以难于骤调。然既有新兵，及时训练，以实营伍，即可将旧兵挑出进剿，（朱批：是。）而新兵内有兵家子弟，已能演习适用者，亦可参用。是以臣一面将泉州等处酌量新旧兼挑凑足三千名，派委大员

统领配渡，（朱批：甚好。）径向盐水港进发，以免到府城后再赴盐水港，转致纡折，此又赴援解围之一路，但未知诸罗之力是否尚能久待。（朱批：正为此焦虑。）

至常青折内有增调江西、广西兵各三千之请，而声叙柴大纪咨文，又有增兵一万之请。虽觉迹涉张皇，然看来亦不得不再为接济。与其零星续派，自不如尽用大力，以期一举扑灭之功。查江西赣州，素称强劲，且距闽省路亦近便。粤西之兵，亦尚可用。如蒙皇上照常青所请之数调派三千前来，合之臣此次续调之闽兵三千，则兵力亦已壮盛。（朱批：此兵可速到，江西、广西可无用。）惟是统兵全恃主帅，常青措置错谬，（朱批：说晚了。）看来竟不能完结，此事仰恳皇上或如臣前所奏，竟令海兰察前来统领调度。（朱批：已遣福康安速去矣！）庶不至再有贻误，可期迅速奏功矣。（朱批：奋勇是其所能，调度恐不能，汝岂见不及此？）缘连接常青折稿察看情形，谨就愚昧所见，缮折驰奏，伏乞皇上睿鉴训示。谨奏。

乾隆五十二年八月初九日。

乾隆五十二年八月二十三日奉朱批：已有旨了。钦此。

谕钦差协办大学士福康安等

南北夹攻切勿株守分兵

乾隆五十二年八月二十三日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建提督参赞蓝，乾隆五十二年八月二十三日奉上谕：

昨据常青奏派兵接应诸罗一折，内称前运诸罗军火粮饷，不能直抵县城，又派副将蔡攀龙等兵一千六百名，由水道前往等语，已降旨飭谕矣。复思柴大纪在诸罗被围数月，常青仅派魏大斌等带兵接应，及魏大斌抵诸罗后，县城仍被贼围，所运粮饷火药又被截断，常青并不亲统大兵前往接应，又仅派蔡攀龙等带兵往援，并令由海路行走。是台湾府城迤北至诸罗一带，仍被贼人屯占，道路阻塞。而常青驻守府城营盘，既不将南路贼匪乘势扫除，又不将迤北一带诸罗沿途屯占贼匪悉力剿杀，惟知一味株守，按兵不动，意欲何为？岂常青等带兵前往北路，亦由海道行走，而自府城至诸罗一带贼匪，竟听其屯聚，将道路梗阻耶？且前据常青奏称，南潭贼匪经官兵剿杀，烧毁篷寮砍伐竹箐，自即应乘此兵威已振之势追剿，并将沿途远近一带所有深林密箐，贼人借为遮蔽，可以阻碍官军之处，随路砍伐净尽。何以并不乘胜直前，遽行撤回，致贼人散而复聚，仍然窥伺，为所牵缀。况军营粮饷、铅弹、火药宽足有余，又何所疑虑怯懦不前耶？看来常青初到台湾，尚有振作之气，及不能取胜，又见贼多，竟致年老无用，一筹莫展，难望其力图振作。此事惟仗福康安迅速到彼督率筹办，以期壁垒一新，及早蒧事。福康安抵厦门后，务即遵照前旨，带领巴图鲁侍卫等，速渡台湾，统领大兵，先将府城至诸罗一带沿途贼匪痛加剿杀，使道路廓清，直抵诸罗，会同蓝元枚、柴大纪合兵进剿，不可过于持重。若福康安亦将如此怙怯，岂不失朕所望乎！总之，贼伙虽多，不过协从乌合，易聚易散，止须将其渠魁党恶擒戮尽净，其余伙匪自必闻风瓦解，纷纷溃散。彼时相机酌办，或剿或抚，自无难迅速集事。若如常青所办，零星派拨，分投堵御，徒使师老力疲，毫无寸进，转与贼人以暇，俾得肆其狡计，惟知奏请添兵。岂贼有二、三十万，亦将以二、三十万官兵

应之，有是理乎？况如常青所办，即再添多兵，亦不过东派西拨，仍属不敷，岂能添兵不已乎？从前伊犁、金川等处，皆系番回部落，其人岂止百万，大兵所临，无不摧破克捷，扫穴犁庭，悉就平定，况台湾本属内地，林爽文等不过么膺小丑，乘间窃发，以如许兵力，而贼首尚日久稽诛，更复成何事体耶？福康安务须胸有定见，激励将弁兵民，使士气百倍，长驱深入，以期捣穴擒渠，副朕委任之意。不可稍事游移，又如常青之旷日持久，此为最要。并著福康安查明常青因何株守府城，既不带兵剿杀南路贼匪，又不北往，将诸罗沿途之贼悉力剿除，打通道路，前抵诸罗，仅派将弁等由水路前往诸罗接应。即该处有不能移动之势，何以不将实在情形陈奏之处，逐一询问常青，令其明白登答，据实复奏。

至常青在彼半载，并未能挪移尺寸，止知零星派拨，茫无定见，李侍尧驻扎厦门，闻见自必真切，乃并未将常青年老无用，办理竭蹶情形，据实陈奏。经朕降旨询问李侍尧，以常青是否可了此事，而李侍尧之意，尚以常青处事明白，可毋庸另派更换。试思常青近日所办之事，尚能望其办理完结乎？看来李侍尧惟恐奏明常青于剿捕事宜不能得力，必恐派伊前往台湾接办，是以含糊其词，不肯直奏。此等处，亦不能逃朕洞鉴。其实李侍尧地方军糈办理尚妥，而于军旅素未娴习，石峰堡覆辙不远，即往台湾与常青无异，朕亦断不派伊前往也。

本日已刻又据常青等奏，派兵前赴南路搜剿打仗，并接据诸罗文报情形一折，所办总不成事体，已于折内批示。常青既称南路贼匪必乘雨后攻犯，随派梁朝桂等带兵往南巡哨，遇贼三、四千人前来打仗，经官兵施放枪炮，贼人逃窜等语。是南路贼匪尚在屯聚。常青等株守府城营盘，既不往北路攻剿，而于南路贼匪

又不亲自带兵悉力剿杀，即常青不能分身，亦应令恒瑞前往，乃二人一同株守营盘，岂将在台湾相持终老乎？又据奏节次接到柴大纪禀报情形，贼匪纠众数万，连日攻围，城中粮饷火药俱属不敷，其势甚属急迫。总因常青节次所派魏大斌，蔡攀龙等，不过带兵千余名，零星调往策应，既不足以资攻剿，而火药、铅弹、粮饷截断，城中徒增吃用之人，愈形拮据，实为失策。

今常青处无兵可派，已据奏业经札令蓝元枚拨兵一二千，援应诸罗。蓝元枚已屡经有旨，令其留普吉保驻守鹿港，该参赞亲自带兵前往诸罗，会合攻剿，自早已接奉前旨，何尚未据复奏。且据常青奏，柴大纪已两次飞咨蓝元枚发兵救援，七月二十七日接到蓝元枚回札，并未提及有无救援之处等语。诸罗被贼围困，飞咨请救，蓝元枚何以接到咨会后，并未发兵，是何缘故，著即明白回奏。现在诸罗被围紧急，蓝元枚若能进兵大肚溪，与徐鼎士夹攻大里杙贼巢，使林爽文回顾巢穴，有所牵缀，则围困诸罗之贼，自当渐就解散，柴大纪可以捍卫无虞，亦是一策。若未能前进，蓝元枚亟应亲统官兵，速即自北而南，径赴诸罗，攻透重围，剿散贼匪，接应柴大纪，毋得稍有迟缓。此事总由常青因循贻误，株守无策所致。虽据奏称存营之兵，止有四千，未能前赴北路，但现在添调之兵，计月内早已齐集，更无可借口。常青若能先将南路贼匪悉力歼除，将贼目庄大田拿获，固可稍赎前愆。否则，速统大兵，乘其新到锐气，直趋北路，奋力剿杀，打通道路，前抵诸罗，接应柴大纪，会合攻剿，亦尚可补过，即属常青之福。若既不能剿捕南路贼匪，又不迅速前赴北路应援会剿，惟知株守郡城，坐视柴大纪被贼围困，致有疏虞，则是常青罪上加罪，恐不能当此重戾也。

同日，又据李侍尧奏，常青株守府城，诸罗再被贼围，并未

亲往援剿，实属不知缓急，无可解免。似此措置错谬，竟不能完结此事，等语。此语公当，但所奏已迟，亦已于折内批示。至折内称常青现有征调江西、广西兵各三千之请，已于泉州等处挑拨三千名，径向盐水港进发。如再蒙调派广西、江西兵三千前来，合之此次续调闽兵三千，兵力亦已壮盛等语。江西兵在绿营中最为无用，朕所素悉。即该省镇将大员，向亦只将才具中平者酌量简用。至其兵丁，仅可防守营汛，若用以剿贼，徒令虚糜兵饷，轻试〔贼〕锋，断难得力。即粤西兵，亦属平常。前据福康安奏，调川省屯练兵二千，朕初意续得捷音，尚应停调。今看此情形，势难中止。现据鄂辉等奏到，业经照数派拨，并令鄂辉统领前进矣。此二千兵最为趑捷，已足当二万之用。而续调闽兵三千，即可抵粤西、江西兵六千，是兵力不为不厚。

福康安在途于常青、李侍尧奏到之折，俱已启阅，自悉该处情形。前因常青等剿捕不能得力，已节次谕令福康安迅速趲行，抵厦门后，无须等候屯练兵到，即行前渡台湾。今据现在情形而论，常青等办理著著皆错，而诸罗势又急迫，福康安到厦门后，即应酌量该处情形，如常青等业已前抵诸罗，柴大纪处贼围已解，福康安自应遵照前旨，无须等候屯练兵到，即带领巴图鲁侍卫等，速渡台湾，督率进剿，擒拿贼首贼目。倘常青等尚未能进抵诸罗，而诸罗或有挫失，福康安即当在厦门暂驻，俟屯练兵到齐，军威壮盛，再带领巴图鲁侍卫等前渡台湾，相机筹办，方为妥善。或于巴图鲁中先发去四、五十，亦可备目下攻剿之用。

再，魏大斌前因其带兵援应柴大纪，杀退贼匪，直抵诸罗，尚为奋勉，是以降旨赏戴花翎。今据常青等节次奏到情形，是魏大斌竟系在鹿仔草被贼将粮饷火药等项拦截，魏大斌恐贼邀截，难

以复回，只得前赴诸罗，希图掩饰。且魏大斌所带兵一千五百名，被贼杀伤一千一百名，是魏大斌竟属有过无功。著福康安于到彼后，切实查明。如魏大斌实系杀透重围，直抵诸罗，尚能奋勇杀贼，自应仍赏戴花翎。若伊系因粮饷等项被贼截断，始行前赴诸罗，而兵丁又伤亡过半，不但不应赏戴花翎，并著据实参奏。李侍尧驻扎厦门，闻见自确，并著将此情节一并查明具奏。

又，昨据常青奏，派令蔡攀龙等，由海道前往诸罗援应，似由府城至诸罗之陆路已被贼人梗阻。而所接柴大纪咨报，又称外委段昭明、沈贤资回之折，随同大兵来诸罗，至老店被贼所害，折亦遗失等语。则又以往来奏折俱由陆路递。现在发往柴大纪文报，究系于何路行走？且段昭明等资回之折，既有遗失，而节次发给柴大纪谕旨，总未见复奏，恐亦不免有在途遗失之事。若被贼人捡得，恐贼众内不乏识字之人，转可得知官兵虚实，关系紧要。此等军情要务，常青、李侍尧等何以并未想到，查办及此？此后所发柴大纪文报，若由台湾府城递，即交常青专差奋勇弁兵递送。若由鹿仔港一路递，即交蓝元枚专差奋勇弁兵递，毋致稍有遗失迟误。此次发交柴大纪谕旨，即著寄交李侍尧照此办理。并著常青、李侍尧，将前此所发柴大纪谕旨奏折有无遗失，是否俱行递到之处，一并查明复奏。

将此由六百里加紧各传谕知之。所有鄂辉等奏折，著抄寄福康安阅看。仍著常青、蓝元枚将于何日领兵前赴诸罗援应会剿，及柴大纪处近日如何堵御剿贼情形，各行迅速驰奏。李侍尧续得台湾官兵打仗杀贼及诸罗信息，亦即速驰奏，以慰廑注。

钦此。遵旨寄信前来。

两广总督孙士毅奏张破脸狗

供出之赵明德等情折

乾隆五十二年八月二十三日批 军录

正文见第一部分

大学士和坤等奏常青处有兵四千名片

乾隆五十二年八月二十三日 台湾档

查常青处，节次派调广东、浙江及闽省兵，共七千名，续调浙粤驻防绿营及闽省兵九千名内，止到四千名。合计常青处应存兵一万一千名。除节次派拨潘韬、魏大斌、田蓝玉及特克什布、蔡攀龙等接应柴大纪兵七千余名，核计常青本日所奏，除患病存城外，随营兵有四千余名，数目尚属相符。谨奏。

成都将军鄂辉等奏遵旨调派

番练筹酌办理折

乾隆五十二年八月二十三日批 军录

臣鄂辉、臣保宁、臣成德谨奏，为遵旨调派番练筹酌办理，恭折奏闻事。

窃本年八月十一日钦奉谕旨：台湾逆贼林爽文滋事不法，前

令常青统兵进剿，数月以来，筹办一切，虽尚属妥协，但常青年逾七旬，究恐精神未能周到，已令福康安前来行在，面授机宜，驰赴台湾更换常青，督办剿捕事宜，等因。钦此。伏查川省屯练降番，前经调赴甘肃剿捕逆回，办理已有章程。此次仍应照办。臣等遵即专委三标中军驰赴杂谷新疆，会同该营将领，检派屯练一千六百名，降番四百名。均挑选曾经打仗壮健之人，并派得力土弁木塔尔、日朋丹巴、西拉布等带领，星赴成都。臣等亲为点验，优加赏赉，令其迅速进行，并调素经行阵曾带番兵之将备八员，率同勇千千把，分起管领。查屯练原系维州协专属，该协副将那苏图屡经出师，人亦明白勇往，现令与懋功协副将张芝元，一同管领。惟是番众二千，道经数省，必得统领大员，以资总理弹压。臣等公同商酌，查相潘镇总兵穆克登阿熟谙军旅，才识干练，现派令统率前往，方资镇抚。

至自成都由水路至重庆需用内江船只，查现在上游各属，两次赶办米石，俱已运竣，足敷雇用。惟自重庆至楚船只，除前运米二十万石，已归数开行外，其续运米三十万石，现亦接续兑运，节经臣保宁设法雇备船只，催趲凑集，虽所少无多，已可无缺，恐一时难得余船，舟副军行。臣等现复严飭原委办船之文武各员，将上游川船，速行赶赴重庆供载。伏思昨奉谕旨，浙江运到泉厦米，已有七万余石，加以江楚等省之米，并前办川米二十万石，陆续运到，已属充裕。倘番练等行至重庆，尚无多余船只，即将复运三十万石尾帮之船，（朱批：是。）暂停运米，先尽兵行，再将续到之船随后运米，亦不致守候稽延。至沿途一切供支，臣等飞飭水陆地方，预备夫马及盐茶米麦肉食柴斤等项，宽裕应付，俾师行歌舞，迅发遄臻，除俟调集全数自省起程另行具奏外，所有遵旨办理缘由，合先恭折奏闻，伏乞皇上睿鉴。

谨奏。

乾隆五十二年八月十二日。

乾隆五十二年八月二十三日奉朱批：知道了。钦此。

成都将军鄂辉等奏请赴台片

乾隆五十二年八月二十三日批 军录

再，奴才鄂辉、成德俱受恩深重，身历行阵，前此未敢冒昧请行，今奉调屯练降番，原系将军提督统辖，奴才等职分，俱视总兵较大，川省现无经办要务，合无仰恳皇上天恩，于奴才等二人中飭派一人统领，前赴台湾，更足以资弹压。而奴才等亦得稍图报效，谨沥诚具奏请旨仰祈圣鉴训示。谨奏。

同日①奉朱批：鄂辉可往。钦此。

两广总督孙士毅奏闽省所需火药

可在粤配制报销片

乾隆五十二年八月二十四日批 军录

臣孙士毅跪奏，窃照火药为军营最要，臣遵旨挑派赴台官兵，酌定枪兵每名携带火药十斤，加以炮位火药，前后共八万斤。复于兵丁随身携带外，两次委员解闽备用，又共火药八万斤，均经先后奏明在案。

① 指乾隆五十二年八月二十三日。

茲查粵東赴台滿漢官兵，共一万二千五百名。现在正值剿匪吃紧之时，兵数既多，火药尤宜宽裕，以期一举荡平。臣先期饬备，复经潮州镇臣彭承尧在本营加紧配制，又于额外赶备火药四万斤，即随此次官兵之后，接续运闽。计兵丁随身携带，及三次委员额外运送，共火药二十万斤，均在粤省年额之外，内十万斤系额外办出。尚有十万斤，系于预备三年火药内抽拨解往。臣严饬藩司许祖京，务须克期采办硝磺，分给各标营，即日领回配制，以期大火营分，仍足三年之额。臣前接闽省抚臣来札，借用粤东火药，将来制就解还。臣思闽粤同一办公，无分畛域，况闽省现在用兵，正须火药应用，粤东拨解之项，即可在粤配制报销，无庸闽省解还，徒糜运脚。除咨明闽省并咨部查核外，合即附片声明。谨奏。

乾隆五十二年八月初八日。

乾隆五十二年八月二十四日奉朱批：好。知道了。钦此。

两广总督孙士毅奏续调官兵全数出境折

乾隆五十二年八月二十四日批 军录

两广总督臣孙士毅跪奏，为续调官兵全数出境，恭折驰递，仰祈睿鉴事。

窃臣遵奉谕旨，添调粤兵赴台，兹查驻防兵一千五百名，分作四起，经抚臣添派臬司姚棻、运司德尔炳阿、肇罗道阿彰阿送至惠州老隆一带，副都统博清额自省统领行走，于七月二十五、六、七、八等日，齐入闽境。其续调绿营兵六千名内，除四千五百名早经配渡到台外，尚有在满兵后接续前进一千五百名。臣本定期

于七月二十九、三十日点送出境，内有顺德、新会营兵四百名迟到两日，于八月初二日才到黄冈，当即点送入闽。又臣钦奉谕旨，添调一千名，八月初三日先点四百名出境，其余六百名，计程极迟八月初五、六等日必到，前抵闽省诏安县境，今于初六初八两日才到黄冈，亦即日点送出境。查顺德、新会及罗定营兵，俱迟到数日，虽据禀缘溪河水浅，以致迟逾，究属有违程限。臣会同提臣高球传齐众兵，分将领兵备弁，各重责二十棍，使凛遵纪律，不致稍有违误。计该兵等到闽配船东渡，如风色较顺，此最后之一千名，亦可于八月二十前齐赴军营。臣谨会同提臣高球由驿奏报，伏乞睿鉴。谨奏。

乾隆五十二年八月初八日。

乾隆五十二年八月二十四日奉朱批：知道了。钦此。

两广总督孙士毅奏遵旨拨粤海关

银二十万两解闽片

乾隆五十二年八月二十四日批 军录

本年八月初五日承准户部来咨钦奉上谕：台湾现在剿捕贼匪，军需费用繁多，著于附近邻省酌拨银一百万两，等因。钦此。经部议将粤海关五十二年分应征税银拨运二十万两，解闽备用。奉上谕：依议，速行。钦此。行知到臣，遵即恭录谕旨，移知广东抚臣图萨布，会同监督臣佛宁，于乾隆五十二年粤海关税项下，拨出银二十万两，由抚臣迅速委员跟同弹兑装鞘起运，交与闽浙督臣李侍尧存贮，入于军需项下备用。再查向例粤海关税，每千两有加平十五两入鞘解交户部，此系向来征税章程，并

非额外多余。本年五月间拨运五十一年关税四十万两赴闽时，臣知会监督臣佛宁拨解邻省备用，只用库平，其每千两外，加之十五两，应照数扣出，随同其余正饷搭解户部。所有此次每鞘十五两自应划一扣出解部，合并声明。谨奏。

乾隆五十二年八月初八日。

同日^①奉朱批：览。钦此。

钦差协办大学士福康安奏途次折阅

常青奏折筹酌缘由折

乾隆五十二年八月二十四日批 军录

臣福康安跪奏，为奏闻事。

窃臣于十五、十六等日途次，迎见李侍尧及常青、恒瑞等奏事之折，当即遵旨先行折看。除李侍尧所奏，系复奏事件外，至常青折内，奏称据柴大纪咨报，魏大斌带兵二千七百名，往援诸罗，路遇贼匪伤损一千一百余名，经柴大纪遣兵接应，前抵诸罗，仍被围困。巡检邵宗尧解送番银一万元，被贼抢去九千元，现派副将蔡攀龙带兵前往应援，计前后派往诸罗之兵，已有七千。郡城兵力依然不足，请再于江西、广西两省，各拨兵三千名，并请简派巴图鲁官兵一百名前往，以资带兵进剿等语。

窃查台湾逆匪情形，前据李侍尧奏称，援兵饷银俱已直抵诸罗，贼目庄大田有潜逃之信。昨又接到十一、十二等日所奉谕旨二道，敬悉李侍尧续行具奏，诸罗现已解围。南潭贼匪，粮食

^① 指乾隆五十二年八月二十四日。

就尽，势渐溃散。臣以南北两路官兵渐加振作，方为喜慰。乃阅常青等所奏，诸罗尚被围困，援兵损伤实多。南路贼匪，折内谨称旬余未敢来犯郡城，（朱批：实不成话。）并不能直前进剿。是南北两路官兵尚未得手。查常青亲在台湾，较李侍尧据属员禀报之词，自为确切。所称兵力不足，似属实在情形。

臣伏思林爽文自上年滋事以来，陆续征调各省满汉官兵不为不多，（朱批：兵虽多，奈无能用之人何！）谅此么膺小丑，早应一举歼除。何以阅时已久，仅能保守郡城，小有斩获，尚不能扫穴擒渠。揆厥所由，固属该将军等零星堵御，以致兵力分薄，

（朱批：原是如此。）亦因久未蔽功，士气日形馁怯。现在虽有添调之浙省、粤省官兵，陆续配渡前往，第该兵丁等尚未出征，恐不能十分得力。其李侍尧召募新兵又属未经训练，虽前据该督奏请，先将内地各营存兵内派拨，即令新兵充补。但查闽省各营兵丁，挑赴台湾者已多，存营之兵谅非精壮。且闽省地方，山海交错，在在需兵汛防弹压。此时若将内地兵丁调往，而概以新兵充补，亦属非计。以臣愚见，必须增调得力兵丁，乘其初到锐气，痛加剿杀，俾壁垒一新，兵势益加壮盛。况行军之道，最贵先声。前臣在热河时，面奉谕旨，令李侍尧多备粮饷，足敷十万官兵之用。使外间互相传说，贼人闻风胆落，今若见官兵日益增多，自必心存畏惧，党羽渐离，渠魁更易就获，于剿捕机宜实为有益。查常青等请派巴图鲁官兵，仰蒙皇上洞烛机先，业经简派侍卫章京一百员，数适相符，灭贼之机于此可见。今该将军等又以郡城兵单，奏请添调广西、江西兵六千名。（朱批：行不得。）或蒙俯鉴该处情形，允其所请。但前奉谕旨，令贵州、湖北、湖南等省，各挑兵二千名，听候檄调，此时自己遵旨预备齐全。查贵州兵丁屡经行阵，在绿营中最为勇捷，湖广地方与闽省一水可

通，与其另调他省，莫若仍将贵州、湖广（朱批：此二处兵尚可略俟常青后信。）未调之兵，即令分起启程，较为妥速。至四川屯练降番已蒙降旨，令保宁派拨二千名，（朱批：此二千兵即宜速往，早有旨谕矣！）速行赴闽。兹蒙谕旨复令暂缓调发，臣再四思维，该处既须增兵，则早到一日，即早得一日之用，此项屯练兵丁，业经该督遵旨檄调，想已行走在途。将来前抵军营，较他省更为迅速，若复中途停止，未免徒劳往返。（朱批：昨据奏到，尚未动身，已有旨令速行。）况台湾地方，多系深林密箐，屯练兵丁登山趑捷，以搜捕匪犯，必能得力。合无仰恳皇上天恩，仍将川省屯练准其调发。臣遥度情形，惟恐缓不济急，不揣冒昧，一面咨会保宁，飞催前进。臣此时虽未行抵台湾，而详阅常青等奏折，实有必须添兵之势。（朱批：莫为常青所惑。）谨就愚昧之见，据实密陈，伏候训示。如日内常青等奏报捷音，则续调兵丁除屯练外，其余俱可飞咨停止，以省烦扰。

再，查魏大斌赴援诸罗带兵二千七百名，中途被贼围截，受伤几及一半，虽据称贼众二万猝至，又适遇大雨，不能施放枪炮，彼此鏖战，杀死多贼，仍遗失兵一千一百余名等语。但绿营往往有谎报恶习，魏大斌是否张大其词，以掩其遗失多兵之咎，而此项损失之兵，有无溃散从贼之处，（朱批：正交汝详察。）均须彻底查究。容臣抵台湾后，再行查明核办。所有常青、恒瑞及李侍尧奏折拆阅后，仍行封固，交驿赶紧驰递外，谨将酌筹缘由，缮折具奏，伏乞皇上睿鉴。再，臣沿途加紧行走，于十七日已过清江，合并陈明。谨奏。

乾隆五十二年八月十八日。

乾隆五十二年八月二十四日奉朱批：即有旨谕，毋畏难，毋多虑，勉力行之，以全朕用人颜面。钦此。

钦差协办大学士福康安奏札知李侍尧

速备马匹送台片

乾隆五十二年八月二十四日批 军录

再，查台湾不产马匹，向来俱由内地带往。此次巴图鲁侍卫等前进剿，带兵打仗，追拿贼匪，必须乘骑马匹，方能得力。臣已札知李侍尧速行备马二三百匹，先期派员送往台湾应用。理合附片奏闻。谨奏。

乾隆五十二年八月初八日。

乾隆五十二年八月二十四日批。（批文缺。）

钦差协办大学士福康安奏请调贵州

湖广等省兵迅速赴闽片

乾隆五十二年八月二十四日批 军录

正在封折间，又迎见常青等八月初五日所发夹板折。内称初一日，派令那木苏（穆素）里等于十三里庄等处搜剿，得有胜仗。惟接署柴大纪、魏大斌等屡次呈报，贼匪叠攻诸罗县城，两月以来，饷药匮乏，只可力守，稟恳迅发大兵四千救援。续又据该提督等报称，匪党分屯各庄，大出金帛，招集匪徒，蚁附益众。诸罗甚为危急，米谷日见空乏，救援不至，恳请再调闽浙兵一万名速来台湾进剿各等情。臣查柴大纪力捍孤城，坐困又及两月，现在贼匪鸱张更甚，城中存兵无多，火药粮饷又已匮乏，设

有疏虞，所关匪细。虽据常青等派令蔡攀龙等带兵一千六百名前
往，但尚未得有到彼信息，且所带兵力无多，贼势正在猖獗，恐
难即时进剿。

窃思南路贼匪屡经官兵搜捕，贼势渐衰，此时郡城一带，较
之诸罗被困情形，不甚著重，自应令常青遵照节次谕旨，舍南趋
北，于郡城各营迅发多兵，前往援救。但贼人狡计百出，若见大
兵全集诸罗，又恐乘虚在郡城滋扰。郡城为全台根本重地，若留
兵过少，不足以备剿捕应援之兵。（朱批：果如此，进退无据矣。）
臣通盘筹划，所有现在请调贵州、湖广等省兵丁，（朱批：即贵
州、湖广之兵两月之间能到乎？）及四川屯练降番，伏乞敕下各
该省督抚速行派拨，赶紧赴闽，听候调用。谨奏。

乾隆五十二年八月十八日。

同日^①奉朱批：汝略觉畏难矣！朕甚忧之。钦此。

谕钦差协办大学士福康安等

不可先存畏怯之意

乾隆五十二年八月二十四日 台湾档

大学士和，字寄钦差协办大学士总督将军侯福、钦差湖广总
督将军常、闽浙总督李、福建提督参赞蓝，乾隆五十二年八月二
十四日奉上谕：

据福康安奏，途次启阅常青、李侍尧奏折，知诸罗尚被围
困，援兵亦有伤损，常青在郡城不能直前进剿，南北两路官兵尚

^① 指乾隆五十二年八月二十四日。

未得手，实有必需添兵之势。已知会保宁，令将屯练降番飞速前进，并请调贵州、湖广等省兵丁，赶紧赴闽等语。已于折内详悉批示。前因常青等办理剿捕事宜，怯懦因循，茫无定见，是以特派福康安前往更换，督办军务。福康安非常青可比，朕方倚以集事。今阅奏到之折，看来福康安竟不免为常青所惑，略有畏难之意。福康安虽更事未久，但军旅之事屡曾经历，宁不知台湾贼匪，止系乌合之众，伙党虽多，易聚亦复易散，惟在歼其渠魁，则胁从当不攻自破。现在常青处兵力虽经零星派拨，止存现兵四千名，但添调之浙粤驻防绿营兵五千名，业经陆续配渡。又经李侍尧于闽省泉州各营派拨兵三千名，早应接续到彼，加以川省屯练兵二千名，昨已令鄂辉带领星速前往，是添调之兵，不为不多。况福康安带领巴图鲁侍卫等百余人，皆属屡经行阵，矫健可用，以如许兵力，而又得奋勇带兵之人，更何必于此时先为颺颺过计乎？且用兵之道，全在乎将，如运筹制胜得宜，原可以少击众。断无贼有一、二十万，即须以官兵一、二十万应之之理。若以一兵当一贼，即再调多兵，亦属不足。岂有添兵不已之理乎？且据奏称，郡城一带较之诸罗被困情形，不甚著重。但常青若遽舍南趋〔北〕，又恐贼匪乘虚滋扰郡城，如留兵过少，不足以备剿捕应援等语。若果如所见，更不免进退无据。现在贼匪以全力围攻诸罗，其势甚重。福康安到彼，自应统领大兵，径趋北路，打通道路，联络声势，会合进剿，方可使军威振作，壁垒一新，鼓勇直前，令贼人望风奔溃。若先存瞻前顾后之见，何以集事？况就福康安所虑，如恐大兵往北，贼人乘虚滋扰郡城，试思贼匪等如由诸罗一路攻扰郡城，则贼人来路，即福康安、常青等北去之路，正可迎头截杀，贼人焉能逼近郡城？若虑贼从间道山径潜出滋扰，我兵岂不可堵其出路？若虑南路之贼攻扰郡城，则常青在彼

数月，添兵未及到齐，尚能保守无虞，岂福康安与海兰察等同往，各路增调之兵万余又已到齐，且有巴图鲁侍卫等百余人，转虑其乘虚滋扰之理？即使常青于福康安未到之前，业已带兵前赴北路，而郡城营盘尚有恒瑞带兵驻守，岂不足以捍御？福康安又何所顾虑而先存畏怯之意，甚不满朕所望矣。况台湾逆匪纠众滋事，揆之天理，朕并未以该处地利富饶，收成丰稔，有加赋之事，或致输纳维艰，民不堪命，遂尔滋生事端。若如是，则朕当其过，亦甘心矣。即有一二贪黷之员，亦皆被贼匪戕害，已足泄忿。且以人事而论，则林爽文系属无籍，一时蚁聚，胆敢于光天化日之下，肆其不逞，被其害者，亦复不少，谅此么膺小丑，岂能久延残喘耶？此尤为不足置虑者也。

至常青折内，所称柴大纪请添兵一万之语，自因柴大纪被贼攻围两月，与府城道路阻塞，文报不通，于陆续添调浙江、粤东及福建本省节次派拨，并新调川省屯练兵共计一万六七千名之处，并未得有信息。又因诸罗被围甚急，不无惶怯，是以有添兵一万之请。今福康安已知添调多兵，正当乘其锐气，及锋而用，一振从前萎靡畏葸之习。乃于途次即已奏请添兵，转比常青所请之数较多，岂非畏难多虑乎？福康安身为统帅，军中俱视其意向，若福康安先有示怯之意，则以下将弁等更必心存懦怯，士气岂能振奋耶？朕见今日所奏，更添愤懣，至于不知所为矣。况即如所请添调贵州、湖广等兵，亦非指日可到，必须两月之久，方能到彼。设诸罗稍有意外之虞，已属缓不济急，于现在剿捕援应机宜，有何裨益耶？福康安系朕特经简派之人，非若常青之年老无用者可比。此事全仗伊一人督率办理。福康安务须坚持定见，胸有成竹，相机妥办，不可稍涉游移。若福康安亦不免畏难过虑，朕又将何所倚恃，岂不更增南顾之忧乎？

总之，此事全在得其窍要，决机制胜，以期鼓勇直前，迅速藏事，不可预存畏难之见。朕廑念军务，早已通盘筹划。今不妨为福康安明白宣示，使之放心。若此时常青等剿捕得有转机，早晚捷音奏至，即前此调备之黔楚兵，竟当停止征调。福康安自应速渡台湾，督兵奋剿，万一常青等仍前株守，诸罗势竟不支，甚或至台湾全郡摇动，则其事必须大办。且将调用京兵及各省兵，并不止于调派湖广贵州之兵而已。朕岂大意不审事体之人？然以天理人情论之，未必至此决裂，福康安不必先事畏惧也。彼时自应令福康安驻扎厦门，俟大兵齐集，再图进取，必不令福康安止带屯练二千，冒昧前进。福康安又何必于此时先存疑难畏怯之见乎？福康安接奉此旨，更当安心镇定，勉图克捷，毋负朕委任之意。

再，本日据孙士毅奏，现于粤省赶备火药，计兵丁随身携带及委员运送共二十万斤等语。现在台湾剿捕贼匪，添兵甚多，将来进攻大里杙贼巢，尤须用炮轰击，火药铅弹最关紧要。且贼人此时所抢火药，渐已用尽，若运送军营或被贼人乘间邀截抢夺，贻误非细。此一节著传谕常青、李侍尧、蓝元枚等，务须加派弁兵，小心押运，加意防范。倘稍有疏虞，惟伊等是问。将此由六百里加紧各谕令之。

钦此。遵旨寄信前来。

贵州巡抚李庆莱奏遵旨预挑

战兵二千赴闽折

乾隆五十二年八月二十四日批 军录

贵州巡抚臣李庆莱跪奏，为钦奉谕旨，恭折复奏事。

窃臣于八月十一日接奉上谕：台湾逆匪林爽文纠众不法，常青等进剿尚未蒇功，现令福康安前赴台湾。该处山深菁密，因思湖广、贵州兵丁驰涉山险，较为便捷。著传谕李庆棻于贵州挑备兵二千等因。钦此。臣伏查黔省原有挑备战兵二万名，平日勤加训练，以备调遣。今接奉谕旨，随密飭各标营即于战兵内，复加挑选，择其劲勇出色者，如数预备。并飞咨督臣富纲及提臣保成，将曾经行阵奋勇干练之将备，公同拣派，令其带领管束。

至黔省军装，向俱整齐，火药亦属充裕。惟沿途一切支应事宜，现在督同司道查照章程，妥协办理，听候调拨。一俟续奉谕旨，或福康安檄调文书到日，即可分起迅速前进，由广西、广东一带赴闽，不致迟误，亦不敢张皇扰累。除会同督臣富纲挑定各营官兵数目，另行具奏外，所有臣遵旨预为备办缘由，理合先行缮折，由驿驰奏，伏乞皇上睿鉴。谨奏。

乾隆五十二年八月十二日。

乾隆五十二年八月二十四日奉朱批：知道了。钦此。

谕钦差协办大学士福康安

无庸疑惧奋勇直前

乾隆五十二年八月二十五日 台湾档

大学士和，字寄钦差协办大学士总督将军侯福，乾隆五十二年八月二十五日奉上谕：

昨据福康安奏请添派官兵一折，已降旨详悉开导指示矣。福康安系朕特派前往信任之人，朕方倚以集事，今于途次启阅常青等奏报情形，即不免存畏难之见，反复思之，竟至彻夜不能

成寐。福康安受恩多年，最为深重，非他人可比。因其才具历练，是以特令前往台湾督办军务。

前福康安陛辞之时，朕曾经详悉面谕：福康安由驿前往，如途次启阅常青等奏报剿捕事宜办理得手，已与蓝元枚、柴大纪会合，福康安于抵厦门后，即应迅渡台湾，督同进剿。倘常青、柴大纪或不能得胜，而台湾全郡竟有意外之虞，福康安自应驻扎厦门，等候官兵调齐，再渡台湾，相机妥办。所谕机宜至为明晰。朕临御五十余年，于一切重大事务，经历不知凡几，无不通盘筹划，熟虑机先。今委福康安以剿捕之任，岂有不为福康安计出万全，而令其冒险前进之理？无论福康安久经简任，寄以股肱心膂，事无巨细，无不休戚相关，断不肯置伊于险地。即常青、蓝元枚、柴大纪等，身历戎行，皆系为国家出力，亦皆体恤周至，图其万全。下至蔡攀龙、徐鼎士及大小将弁，朕亦无不时加轶念，弗令涉险。岂有福康安为朕所亲信倚任之人，转不为之计出万全耶？福康安非不晓事者，何至不能仰体朕意，忘朕面谕之语，转为常青等奏折所惑，竟至畏怯耶？况朕即不为福康安一身之计，宁不为朕一身国家军旅重务熟思筹划耶？

且朕廑念军务，蚤夜思维，但揆之天理，则朕子惠黎元，于台湾百姓一视同仁，并无额外征求之事；而以人事言之，则林爽文以无籍细民，负嵎蚁聚，止系么磨小丑，即云不肖官吏贪黷敛怨，亦俱被伊戕害；且肆其荼毒，地方良民受害者，更复不少，实为覆载所不容，亦断无不速就扑灭之理。昨降旨甚明，福康安于金川军旅大事，亦曾经练矣，岂转于此等么磨小丑，竟至萎靡不振耶？况我国家荷蒙上苍眷佑，军兴之际，即偶遇危难，无不转败为功。如从前兆惠之在锡箔，阿桂经木果木温福挫失之后，亦曾屡经危险，旋俱克成大勋。况回部金川，本其部落，用兵挾

伐，犹不无战胜辟土之心。至台湾本属内地，林爽文止系编氓，适以自取其死。临以大兵，有不如摧枯拉朽，速就殄灭者乎？且柴大纪现在虽被贼匪攻围，势在急迫，而常青业已派委蔡攀龙带兵往援，柴大纪、蔡攀龙素为贼所畏惮，亦皆奋勇可恃。日内常青接奉前旨，若即舍南趋北，诸罗自己解围，军威振作，捷音踵至，亦未可定。福康安何必一见常青等奏报诸罗被围望救信息，辄先事张皇，遽请添调多兵，为此徒乱人意之举乎？且福康安于清江地方发折，距厦门甚远，岂能一蹴而至，途中自必续接常青等奏报。即使诸罗势将不支，必须增添兵力，常青已经具奏，福康安原可驻扎厦门等候官兵齐集，再渡台湾，相机督剿。况续添满汉官兵正在到齐，军威增壮，更可无虑。福康安此时前抵厦门，尚需时日，又何必预存畏难过虑之见，自扰方寸，而乱人衷曲耶？且从前康熙年间，奸民朱一贵纠众滋事，台湾全郡俱陷，经总督满保派令总兵蓝廷珍带兵剿捕，不过七日，即经收复。蓝廷珍以一总兵带兵前往，即能克期扑灭，况现在调派如许重兵，有福康安等带同巴图鲁侍卫督率进剿，又何难迅奏肤功？盖此等刁悍匪徒，一时蚁聚，缓则彼此相助，急则彼此相图，无论林爽文等罪恶贯盈，断无不立遭诛殛。即为万一之虑，逆匪等竟将台湾全郡抢占，而其党恶伙匪，如庄大田等，亦断不肯甘心屈服，自必争为雄长，自相戕害，其势必至内溃，即如从前朱一贵占据台湾后，即有吴姓贼人互相争哄之事。此即前事之证。是林爽文等纵使大肆猖獗，台湾全郡为贼所占，亦无难设法图之，指日授首。况此时贼人占据要隘，我兵前往攻剿，在贼匪转得以逸待劳，若贼匪窃据台湾，官兵分路进攻，则匪徒四处守御，其力亦必难支。此乃反客为主之势，办理更不致棘手，福康安宁未算及此乎？朕之待福康安不啻如家人父子，恩信实倍寻常，福康安亦当以伊父

傅恒事朕之心为心，惟应竭力奋勉，方能其裘克绍。福康安惟当揆度事机，验之天理人情，努力坚定，副朕体恤周至，宵旰焦劳之意，一力担当，全朕用人颜面。若伊遇事辄先涉张皇，不特朕将何所依恃，而伊亦将置身何处耶？且在京大臣中，为朕所依信，素能办事者，如阿桂久经军旅，但已年逾七旬，自难令其远涉重洋，和坤朝夕扈从，在朕前承旨书谕，亦难暂离。此外即令福康安自思，更有何人堪能胜任者？福康安简任有年，为国家屈指可数之人，若伊复有疑难，不能肩此重寄，朕又将简用何人？亦断无为此小事，派福康安前往，又令阿桂、和坤续往，又岂有朕亲征之理乎？福康安此时竟可无庸疑惧，惟当坚持定见，奋勇直前，督率剿捕，以期迅速集事。

就目前情形而论，福康安屡膺军旅，声威素著，今领兵前往，贼人亦必闻知。计大兵自必前抵台湾郡城，诸罗贼匪自必专注二处，以图抵御，而此二处又系久经保守驻兵之所。^①惟鹿港一带，贼势较属空虚，该处距大里杙贼庄甚近，福康安此时不必前赴台湾府城，竟应带领巴图鲁侍卫等，由蚶江配渡，直抵鹿港。若蓝元枚业已前抵诸罗援应，福康安即应接续前进，在后督策，会合进剿。如蓝元枚尚未前往，福康安即当会同蓝元枚，并檄知徐鼎士，或竟前赴大里杙贼巢夹攻，乘虚直捣。俾贼人闻知，自必回顾巢穴眷属，则诸罗之围，可不攻而自解。而南路贼匪亦必闻风惊溃，纷纷解散。此为声东击西之计，使其首尾不能相应，必成擒矣。福康安务须安心镇定，出奇制胜，勉图奏捷，以副朕委任成全之意。将此由六百里加紧再行剴切传谕知之。仍著将接奉昨日、今日二次谕旨定何主见，即行迅速驰奏，以慰

① 《钦定平定台湾纪略》（稿本）卷三十三，有“可保无虞”四字。

座注。

钦此。遵旨寄信前来。

谕钦差大学士阿桂阅看折谕复奏所见

乾隆五十二年八月二十五日 台湾档

大学士和，字寄钦差大学士公阿，乾隆五十二年八月二十五日奉上谕：

前因常青等办理台湾剿捕事宜因循贻误，是以令福康安带同巴图鲁侍卫百余人，驰往督办。福康安为朕亲信大臣，于军旅之事，亦曾经练，朕方倚以集事。乃于途间两次启阅常青等奏报各折，见诸罗被围望救信息，即奏请添调多兵，已略有畏难之意。试思贼匪虽多，皆系乌合之众，易聚易散，若能运筹制胜，将贼首贼目擒获剿除，则其余附从匪徒，自必纷纷瓦解，何难一举扑灭。若因贼匪众多，即欲添兵助剿，设贼有二、三十万，亦将以二、三十万之兵应之耶？福康安所奏殊觉过计，徒乱人意。朕益增烦闷，为之辗转不寐。已两次降旨，反复开导，令其坚持定见，相机督剿，不可先事畏惧。今未至台湾而遂若此进退无据，实增朕南顾之忧，殊为烦懣。著将昨日及本日两次所寄福康安谕旨及朱批福康安原折，俱抄寄阿桂阅看。阿桂更事甚多，其意以为何如，并著即据所见复奏。将此传谕知之。

钦此。遵旨寄信前来。

闽浙总督李侍尧奏募兵及添造军械等情折

乾隆五十二年八月二十五日批 军录

闽浙总督臣李侍尧跪奏，为奏闻募兵情形及添造军械事。

窃臣屡奉谕旨，令于闽省增募新兵，多多益善。臣随于七月十一及二十六日奏请募兵一万，又于本月初二日奏请再募一万，当即行知各营召募去后。今据各营具报，已募得一万有余，其余尚在广为招募。查各处情形，亦有不同。如南澳左营派募四百名，现仅募得二、三十名。经臣严行申饬，令其速为召募，尚未据报。其上游延建一带，亦只兵家子弟应募，而民人入伍者甚少，是各镇协营不能预定额数，均匀配募，只可于易募之处，多增新兵，以备应用。查闽省惟泉、漳二府，民皆好勇尚气，情愿入伍者多。且调发赴台亦最近便，自应于此二府多行召募，（朱批：甚是。）但臣细加体访，漳州民情，究不可信。缘泉、漳久分气类，现在逆匪林爽文、庄大田等，俱系漳籍，是以台地漳人多为贼所诱胁，而拒贼者皆系泉人。内地声息相通，泉民闻募兵杀漳人，尚俱踊跃。若募漳人往剿，势必不能得力。且漳人入伍，难保无会匪混入其中，（朱批：所虑是，然不可露形迹。）而既令食粮，将来事定后，或须量裁减，更有难于办理之处。臣通盘计算，与其多募漳兵，不如多募泉兵。（朱批：好。）是以臣所募兵内，漳州所属，仅照蓝元枚所指营分，共募兵一千。（朱批：妥当。）其余多在泉州及金门、厦门等处招募，此臣办理情形也。

至兵数既增，则军械尤须多备。查鸟枪一项，臣前查奏，

内地各营遗失及不适用者七千余杆。又因上年台匪猝扰，及本年凤山失事，约略共损失三、四千杆。现已动项于福州、福宁、泉州、漳州、厦门分设五局，派文员会同营负，上紧制补一万杆，并节次严催，毋任延缓。今新募多兵，每一兵即须一械，就现募兵数，又须添制鸟枪六、七千杆，刀枪藤牌二、三千件。臣一并严飭各局，昼夜赶造，计两月内，俱可齐全。余俟续募得兵若干，一面配制，亦可应手。至所募新兵，若俟制造器械后，始行操练，徒致旷时玩日。现将旧兵枪械通融应用，使之早为演习，俟新制枪械齐备，则各兵技艺亦可娴熟得用矣！谨缮折驰奏，伏乞皇上睿鉴。谨奏。

乾隆五十二年八月十二日。

乾隆五十二年八月二十五日奉朱批：一切俱妥。知道了。钦此。

谕钦差协办大学士福康安等

江西兵毋庸再调

乾隆五十二年八月二十六日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、两广总督孙、江西巡抚何，乾隆五十二年八月二十六日奉上谕：

据孙士毅奏八月初十日接常青札称，诸罗急须策应，郡城兵力尚单，现在又奏请添调广西兵三千，以资剿捕等因。随飞咨广西巡抚孙永清等，将前此奏请预备兵三千，令将备分带，即日启行。此项兵丁未经一面奏闻，一面檄带，办理拘泥，深为惶悚等

语。此事孙士毅办理无过，系常青之过，已于折内批示。

前据常青奏，诸罗被围紧急，存营之兵不敷调拨，请添派广西、江西兵各三千名。已降旨飭谕，以江西、广西之兵，在绿营中最为无用，若派调前往剿捕，岂能得力？且常青请调官兵，原为救援诸罗起见，此等无用之兵，若资以剿贼，适足虚糜兵饷，轻试贼锋，于事何益？况蔡攀龙已经常青派令带兵往救诸罗，广西、江西之兵派拨前往，正需时日，尤属缓不济急。而府城业已添调浙、粤二省官兵，军势已属壮盛，又何必远调广西、江西之兵？乃常青率行咨调，实属毫无主见。今已据孙士毅咨会，广西令孙永清等派委将弁，带领启程，只可准其调往。

至常青于前次具奏之后，即已咨调广西官兵，其江西省之兵，当亦已行文征调矣。江西之兵，较广西之兵更为平常，且此时添调之兵，不为不多，断可无庸派往。著传谕何裕城，如常青已经檄调，该抚办理尚未起程，即可停止。如业经派拨起程，行抵何处，即于何处撤回，无庸前进。所有兵丁往返资给费用，俱著令常青按数罚出。其已调之广西兵到，若能剿捕得力则已，如不能〔得〕力，所有一切支給费用，亦著常青照数罚出。且常青此番冒昧调兵，原托名救诸罗，试思此兵当两三月方到，诸罗尚可待乎？朕令常青、蓝元枚等，就近速带大兵，往救诸罗，而尔等至今尚未奏起身之期，尚欲待广西、江西无用之兵，于两三月后救诸罗，是诚何意见？著常青明白回奏。

至孙士毅另片称，于抚标等营再凑足一千名，调赴潮州预备增调等语。未免过于急公。粤东节次派调之兵，已及万余。该省亦系海疆重地，若派拨过多，恐不足以资弹压。孙士毅所请预备之兵一千名，竟当停止，毋庸再行拨调。

至福康安所请添派川省屯练及黔楚二省官兵，除屯练兵已经

福康安檄调外，其贵州备调兵二千，亦已有旨，准其调拨。今又添调广西三千，福康安更可胆壮。伊到闽后，若常青等剿捕不能得手，或竟有意外之虞，福康安自必等候屯练及兹新调广西兵到齐，再行前渡台湾，方不冒险。若常青业已领兵向北，诸罗贼势已衰，则川省屯练，远隔数省，行走需时，自应到在广西兵之后。福康安若再稍有游移胆怯，不妨先带此广西兵三千前渡台湾，以壮胆势，似亦可以无惧矣。将此由六百里加紧传谕福康安、常青等，并谕李侍尧知之。

钦此。遵旨寄信前来。

谕钦差协办大学士福康安等已令

保成绩调黔兵二千赴闽听调

乾隆五十二年八月二十六日 台湾档

大学士和，字寄钦差协办大学士总督将军侯福、闽浙总督李，乾隆五十二年八月二十六日奉上谕：

昨据福康安奏请调派四川屯练及湖广、贵州等省兵一折，略有畏难之见，已两次降旨剖切开导，令其安心静镇，毋须过于疑虑矣。台湾剿捕贼匪，自常青接办后，续调官兵不为不多。因常青零星派拨，以致郡城存营之兵止有四千，不敷策应。其实添派浙粤满汉官兵已有二三万，俱经陆续配渡，即日到齐，兵力已为厚集。乃福康安于途次一见常青奏报诸罗被围求救之信，即请添调多兵，未免为常青所惑，是以未即准行。今再四思维，连夕为之不寐。因念福康安受朕深恩，委以军旅重寄，伊并非不晓事之人，于调度机宜，岂有不悉心筹划，何至畏难若此？推原其意，

自因福康安于途次接阅常青等奏报情形，势甚急迫，而伊前抵厦门，尚需时日，若俟到彼后，该处有不得不添兵之势，临期再行奏请调拨，恐致缓不济急，是以预为奏请。朕廑念军务，宵旰靡宁，岂不知厚集多兵，可以迅速完事？如果揆度情形，事在难已，宁于伊等所请或有靳而不予者！此亦福康安所深悉。今既委福康安以剿贼之任，而福康安有必须添兵之请，若固违其意，恐伊以兵力不给，遇事不能卓有定见，转属无益。且朕于福康安恩遇周渥，无不曲加体恤，岂忍置伊于险地，而转于林爽文、庄大田有所姑息，而不欲福康安之速行剿贼无遗耶？今已另降谕旨，令保成、李庆棻等，速将备调黔省兵二千，令许世亨带领，速行赴闽听候调用。至湖广兵，不能如黔省之得力，且远隔数省，道里纡回，此时亦可无须纷纷远调。福康安既有屯练兵二千，又得此黔省兵力，是此四千劲兵，可抵他省四万。加以节次续调之兵，军威已属壮盛，福康安亦可安心镇静，坚持定见，力图奏绩，不必再存畏难怯懦之见。若有此多兵，福康安犹不能无所畏怯，则各省之兵，皆可纷纷檄调，惟任福康安所为而已，朕亦听之。想福康安断不肯如此进退无据也。

现在柴大纪处，虽被贼人围困，然柴大纪素能激励将士，围守数月，未必竟至不支。而常青现已派委蔡攀龙带兵前往援应，蔡攀龙亦奋勇可恃，非魏大斌等可比，看来或竟能破贼解围。而常青、蓝元枚屡经谕令前赴诸罗，此时接奉前旨，自己会合一处，亦未可定。若日内得有捷音，声势联络，军威振作，则黔省之兵，即可降旨停止进发，以免扰累。福康安接奉此旨，倍当鼓勇作气，志力坚定，以期一举集事，无负朕委任成全之意。将此由六百里加紧传谕福康安，并谕李侍尧知之。

钦此。遵旨寄信前来。

諭欽差协办大学士福康安等

应于炮手后紧接短兵

乾隆五十二年八月二十六日 台湾档

大学士和，字寄欽差协办大学士将军侯福、钦差湖广总督将军常、闽浙总督李、提督参赞蓝，乾隆五十二年八月二十六日奉上諭：

前据常青奏派兵援应诸罗一折，已节经降旨飭諭矣。常青接到柴大纪等被围紧急，复派副将蔡攀龙带兵一千六百兵前往策应。因思此事，常青既未亲自统兵往救诸罗，若于前次柴大纪请救时，即派蔡攀龙带兵前往，该副将素能奋勇，为贼所惮，或能将贼匪痛加剿杀，打通前路，所运粮饷火药等项目自不致被贼截断。乃常青计不出此，仅派魏大斌前往接应。魏大斌系浙省派令带兵之员，并非奋勇可恃，以致在鹿仔草遇贼，仅带兵数百名前抵诸罗，并不将粮饷火药竭力护卫同抵县城，使贼人逞其狡计，乘机邀截，诸罗城中徒增吃用之人，而粮饷火药不能接济，转形竭蹶。是常青于此事派委非人，实属错谬。

至蔡攀龙自到台湾后，屡次奋勇杀贼，著有劳绩，甚属可嘉。所有海坛镇总兵员缺，前经李侍尧奏明，令副将李长庚署理，今即著蔡攀龙补授，以示奖励。并著常青传諭蔡攀龙，令其加倍奋勉，杀贼立功。现在带兵援应诸罗，务将府城抵诸罗一带屯聚贼匪，悉力剿除，廓清道路，使粮饷火药随同官兵运送接济，无若魏大斌之被贼邀截，不能兼顾，致诸罗城中又添蔡攀龙所带官兵吃用之费，仍不能破贼解围，岂不为贼所笑？蔡攀龙既

补授总兵，即应将如何杀贼处，由驿速行驰奏。

再，贼匪狡黠，若蔡攀龙领兵前往，未必不又施诳诱魏大斌之计，或故让出道路，以俟官兵过后，复又邀截。蔡攀龙勿为所惑方好。当探知贼匪潜匿处所，前往搜剿，方能痛扫无遗，廓清道路，使粮饷火药军装皆得无阻，此为最要。

至诸罗望援甚切，常青究于何时亲统大兵舍南趋北，剿杀贼匪，直抵诸罗，蓝元枚接到柴大纪之信，于何日发兵往援，蓝元枚是否已经亲带官兵，自北而南，攻破贼围，与常青、柴大纪在诸罗会合一处，总未据续有奏报。著常青、蓝元枚各行迅速复奏。常青处现存之兵，新到者虽止有四千，而其余浙粤等处官兵，亦经陆续配渡，自早已全抵该处，常青何得藉口兵单，一味株守，并不往北进剿！况即以常青所请添调之兵而论，如江西、广西兵，在绿营中最为无用，朕所素知。今复思此二省中武备，如果可观，当必有洊擢至专阃大员者，因将兵部所进提督总兵名单，详加披阅，则现在提镇中竟无一籍隶江西、广西者。可见该二省武艺技勇，实系平常。常青即欲添兵，亦应将黔、楚之兵奏请添调，尚为有用。若江西、广西之兵，怯懦无用，倘派令前往，不免顾恋家室，心悬两地，徒以轻试贼锋，岂能剿捕得力？常青身为大员，而于江西、广西兵之平常无用，亦不能知悉，尚得谓之留心武备者乎？

再昨据孙士毅奏，闻贼匪因官兵枪炮利害，不能抵御，纠集亡命奸徒，潜伏林莽，冲犯我兵，不能预备，尚尔持枪在手，转致吃亏，必须枪手后紧接短兵，如贼匪已在百步之内，即令短兵直前扑杀，方为得力等语。贼人鬼蜮伎俩，狡诈百出。其所畏惮者，系官兵枪炮，正可用以杀贼。乃绿营习气，每有未见贼匪，即行施放枪炮，及贼匪猝然冲犯，转致措手不及，徒有枪炮，不

能得力，最为可恶。著传谕常青、蓝元枚等，严加训饬，或即照孙士毅所奏，于枪手后紧接短兵。若贼匪相距较远，不可令其乱施枪炮，将铅丸火药虚掷无用之地，待贼匪近前，即用短兵扑杀，毋令贼匪得逞狡计。此等处，孙士毅尚能见及，何常青等身历行间，转未能筹备及此耶？

将此由六百里加紧传谕常青等，并谕福康安知之。仍着常青、蓝元枚将何日前赴诸罗会剿之处，迅速驰奏。并着李侍尧得有官兵打仗杀贼信，即速奏。孙士毅原折并著抄寄阅看。

钦此。遵旨寄信前来。

两广总督孙士毅奏续调广西兵

三千名赴台折

乾隆五十二年八月二十六日批 军录

两广总督臣孙士毅跪奏，为军营续请添兵，谨即一面奏闻，一面行调事。

窃臣于八月初十日戌刻，接将军常青来札，内称诸罗急需策应，郡城兵力尚单，现在又奏请添调广西兵三千名，以资剿捕等语。伏思台湾逆匪未靖，臣恐军营或有续调，粤东紧接台湾，海疆紧要，未便再行抽拨。曾于七月二十四、二十六等日，两次附驿请旨，预备粤西兵三千名，恭候朱批俞允，即行飞调。当经密札广西抚、提二臣，预行挑拨停妥，俟准到臣处咨移，即令克日起程。兹接将军常青来札，揆厥情形，必须添调。臣惟有稟遵前奉谕旨，愈速愈妙。飞咨广西抚臣孙永清，提臣三德，即将臣札商预备兵三千名，飭令将备分带，即日启行。复令于各兵随身携

带火药之外，再备三万斤，解赴闽省应用。并檄派东、西两省文武大员，沿途弹压趲催，由水路兼程行走，随到随即点送出境。惟计自文到起程，以至抵厦，尚须一月有余。臣前此若一面奏闻，一面行调，则此时业已在途，乃因私心过计，满汉官兵甫经续调，逆贼自应即日荡平，此项兵丁本系臣臆度预备，或者可以不用。是以恭候谕旨，再行檄调。不料数日之内，军营即已续请添兵。现虽加紧赶办，屈指该兵到闽尚需时日，臣办理过于拘泥，实深惶悚。（朱批：汝无过，常青有过耳！）所有臣现在飞调粤西兵三千名，速即赴闽，并令额外多带火药缘〔由〕，谨缮折由驿五百里具奏，伏乞皇上睿鉴。谨奏。

乾隆五十二年八月十一日。

乾隆五十二年八月二十六日奉朱批：已有旨了。钦此。

两广总督孙士毅奏续拨粤兵一千名赴闽片

乾隆五十二年八月二十六日批 军录

臣孙士毅跪奏：窃臣正在拜折间，接据将军常青寄阅折稿，知诸罗贼匪势尚猖獗，提臣柴大纪又有添兵之请。臣查续调粤东绿营兵七千名内，最后之一千名，八月十五日以前，即已抵厦。此时惟有严催粤西兵三千名，迅速前往，以备军营调遣。但详阅常青等折稿，似诸罗一带需兵甚亟，万一接应稍迟，关系不小。臣实坐立不宁，何敢因粤东附近海口，各营抽调已多，不复再为酌拨。应请于抚标、广协等营，再凑足一千名，飭令将备，速即带领来潮，以备赴台策应，则合之粤西兵，又得四千名，似已足敷剿捕。臣一面请旨，一面将预备缘由，飞咨军营，俟常青等咨

复，现须征调，臣即于粤西征兵未到之前，先令此一千名飞速前进，合并声明。谨奏。

乾隆五十二年八月十一日。

同日^①奉朱批：过于急公矣！钦此。

谕贵州提督保成等所调黔兵二千

即速赴闽省

乾隆五十二年八月二十六日 台湾档

大学士和，字寄贵州提督保、贵州巡抚李，乾隆五十二年八月二十六日奉上谕：

前因台湾逆匪林爽文纠众不法，该处山深箐密，路径崎岖，贵州兵丁于驰涉山险，较为便捷，已谕令该督抚于贵州挑备兵二千，一切军装火药密为妥备，并拣选曾经行阵奋勇干练之将弁带领，听候调拨。昨已据李庆棻奏到，业经遵旨挑兵候调，并密行预备一切矣。今台湾尚须添兵协剿，著传谕保成、李庆棻，即将挑备兵二千名，派威宁镇总兵许世亨为总统，带领速行，分起前进，由广西、广东行走，迅抵闽省，听候福康安调用。所有军装火药等项，俱著妥协备带，勿致稍有缺乏。将此由六百里加紧传谕李庆棻、保成，并谕富纲、孙永清、孙士毅知之。

钦此。遵旨寄信前来。

^① 指乾隆五十二年八月二十六日。

諭提督柴大紀應以保存師旅為要

不必拘泥死守孤城

乾隆五十二年八月二十七日 台灣檔

大學士和，字寄欽差協辦大學士總督將軍侯福、欽差湖廣總督將軍常、閩浙總督李、福建提督參贊藍、提督參贊柴，乾隆五十二年八月二十七日奉上諭：

前據常青奏，接據諸羅文報再請派兵各折，已節經降旨飭諭矣。今復將常青所奏之折，詳細披閱，據稱魏大斌帶兵接應諸羅，中途遇賊，所帶官兵傷有一千一百余名等語。魏大斌帶兵二千七百名，前赴諸羅援應，而所傷官兵至一千一百余名之多。雖據該鎮稟報，因賊眾二万余人猝至，又適遇大雨，不能施放槍炮，彼此鏖戰，以致傷失官兵甚多。但綠營兵丁素為怯懦，往往遇賊即行奔潰，此項損失之兵，是否俱系陣亡，有無潰散，從賊之處，常青折內并未聲敘明晰，殊屬疏漏。福康安到彼，應即詳細悉明辦理。并著常青遇便查明復奏。

又據常青折內稱，諸羅被賊圍困，軍營兵力不足，仰懇天恩，或于江西、廣西兩省各撥兵三千名等語。是常青所請添兵之處，系屬候旨定奪。乃昨據孫士毅奏稱，八月初十日接常青札會，添調廣西兵三千名，以資剿捕，業經孫士毅一面奏聞，一面知會粵西如數撥調，派員帶領起程矣。常青身為將軍，如遇有緊急，實在兵力不敷，原可自行檄調。但應一面檄調，一面據實具奏。乃常青前折止懇請添兵，而于已經札知粵省之處，何以折內并未聲敘？即此可見，其遇事糊塗，漫無主見。但常青此時辦理

诸务，动形竭蹶，正在心神不定之际，只须令其遇便明白回奏。

再，常青折内称，遵旨晓谕附近民人，渐次归庄，已召募壮丁充伍者百余人，并闻尚有贼目来投等语。贼目究系何人，其八月初五日^①续发之折，于贼目有无自行投到之处，并无一语提及，何以疏忽若此？亦著常青一并据实复奏。

至常青，屡经降旨，谕令亲统大兵，速赴北路接应诸罗，会合进剿。现在虽添调广西兵三千，但须两三月后方能到彼，常青岂得坐待兵到，始行北往？想该将军接奉节次谕旨，自不敢仍前株守，再事因循。但究于何日统兵前赴诸罗，迄今尚未奏到。著常青即将起身日期，及剿杀贼匪，打通道路，于何日前抵诸罗之处，迅速复奏。

蓝元枚，亦屡有旨，令其自北而南，直赴诸罗，或会合徐鼎士夹攻大里杙。现经柴大纪屡次请救，蓝元枚是否已带兵往援诸罗，与常青、柴大纪会合之处，亦著速行驰奏。至诸罗被贼攻围紧急，柴大纪督率兵民竭力捍御，其属奋勉，业经常青派令蔡攀龙带兵往援，常青、蓝元枚亦必遵旨，星速统兵前往接应矣。蔡攀龙素为奋勇，又有常青、蓝元枚两路策应，自当破贼解围，会兵一处。万一贼匪猖獗，援应之兵未能会合，诸罗粮食匮乏，火药不给，实有难支之势，则柴大纪当酌量情形，竟率领兵民出城力战，将贼匪乘势剿杀，突围而出，不可拘泥城存与存，城亡与亡之见，固守勿去，致有意外之虞。柴大纪力捍孤城，勇略素著，原非若郝壮猷之遇贼退怯，弃城奔溃者可比。况因兵势单薄，力量不支，透出重围，以图再举，乃审时量力，权宜应变之道，不得谓之委城而去。若过于拘泥，与县城为存亡，设使猝被不虞，既于体统有伤，且转足以长贼人之气，于事无益，特此明白宣

① 《钦定平定台湾纪略》（稿本）卷三十四为“八月十五日”。

谕。柴大纪务须审度机宜，完师整旅，方为两全。此旨著交常青、蓝元枚，酌量何路前赴诸罗为便，即差妥干弁兵护送，星速递投，知会柴大纪，务期必达，毋致中途遗失，转为贼人所得，方为妥善。

将此由六百里加紧各传谕知之。仍著常青、蓝元枚各将前抵诸罗打仗杀贼情形，迅速驰奏。李侍尧得有地方官禀报军营信息及诸罗剿杀贼匪情形，一并速奏，以慰廑注。

钦此。遵旨寄信前来。

云贵总督富纲奏预备黔省赴闽官兵事宜折

乾隆五十二年八月二十九日批 军录

云贵总督臣富纲跪奏，为遵旨密备黔省赴闽官兵事宜，恭折复奏事。

本年八月十四日钦奉上谕：于贵州挑备兵二千，拣选曾经行阵奋勇干练之将备带领，一切军装火药妥为预备等因。钦此。臣查台湾逆匪林爽文纠众滋扰，不过乌合小丑，今当大兵分路进剿，自可克日荡平。但该处山深箐密，路径崎岖。诚如圣谕，若令善于登山涉险之湖广、贵州兵丁前往助剿，自更得力。伏查黔省各营前俱钦遵谕旨，挑备战兵，即一切军装、器械、雨具各项，亦俱如数备齐。经臣与抚、提二臣督率，时加训练，不敢懈怠。今钦奉谕旨，密行预备听候调拨，臣悉心筹划，应于抚、提两标及古州、镇远、清江、都匀、定广、大定、平远、黔西、遵义、贵阳、长寨等镇、协、营备战兵内，分别多寡酌派。查抚、提两标备战兵数较多，每标派兵三百名，余皆一二百名不等，共足两千名。此项兵丁，系于各营备战兵内酌量抽拨，于本营操防，不

致有误。查鸟枪为军营利器，自宜多为挑派。此次每兵百名，派鸟枪兵七十名，炮兵二十名，弓箭十名。其应带火药，从前出师金川，每枪炮兵一名，酌带火药十一斤四两。虽已足用，惟臣前在福建，知该省不产硝磺，制办需时。现在征兵厚集，需药必多。今核计黔省各营，额贮药斤，数甚充裕。且由古州水路而下，携带亦便，似不防宽为备带。今酌定每兵加倍配带火药二十二斤八两，俾资充备。此次带往药斤，臣俟官兵起行之后，即为赶紧办补，以足额贮。其余军械等项，悉照例配带。臣现将所派兵数，及应带火药、军械，分晰开单，密飭预备，务期适用。并将带兵千、把、外委，各于本营内择取挑定，具(俱)具花名清册，通送存核。一面加紧勤练，使兵技更臻精熟。

查有大定协副将岱德，人甚明干勇往，前曾出师滇川著绩，经历行阵，臣即派为统领此次官兵。又长寨营参将札郎阿、清江协游击鲁安邦、遵义协都司杨定邦、古州镇都司朱化英、贵阳营守备刘廷奇、提标守备罗世德等六员，均系才具干练，曾经出师，酌派分起带领。

至此次官兵二千名，拟分作四起行走。各兵均至古州水次乘船，顺流出境。再查黔兵赴闽，应由古州乘船，于丙妹地方出境，至广西怀远县所属之梅寨地方交替。应于梅寨预备小船接载，至怀远始换大船前进。臣思与其于梅寨交替换船，不免耽延，不如即以黔省古州乘坐之船，顺流而下，直送粤西怀远，再行换船前进。在黔省不甚费力，而广西又省一番备船交替之繁，且于兵行更可迅速。所有沿站应需夫船及供应等项，臣现在密飭藩司，就各营经由处所，酌量安设尖宿各站。飭各该地方官妥为预备，毋致临时遗误。臣仍另派道、将大员，分段弹压，照料催趲，俾资妥协。恭候谕旨到日，或接到福康安调文，即当飭令按起遄行。

臣仍飭各该文武，务须慎密，不动声色，毋致稍涉张皇。除咨会广西、广东、福建各省督抚，转飭经由地方一体妥办外，所有遵旨预备黔省赴闽官兵缘由，谨会同贵州抚臣李庆棠，提督臣保成，恭折由驿复奏，伏乞皇上睿鉴。谨奏。

乾隆五十二年八月二十五日。

乾隆五十二年八月二十九日奉朱批：好。知道了。钦此。

闽浙总督李侍尧奏闽省夫船雇价等情折

乾隆五十二年九月初二日批 军录

李侍尧跪奏，为敬陈闽省夫船雇价情形，仰祈睿鉴事。

窃照闽省办理兵差，运送军械等项，除海运外，皆系陆路。逾山越岭，向无车马，惟恃雇募人夫，缘平日另有一种江西及本省游食之人，专以受雇充夫为业。故农民各安田亩，不知有应差之事。即遇有重大差使，农民习以为常，谓各站自有充夫之人，于民间无与。是以州县遇有差务，俱系现雇人夫应用，从不能派及里下。非如陕、甘、云、贵等省，可以按田派夫，使之领价应役。而此等专以充夫为业之人，明知官夫不能签派，乡夫每值差务紧急，辄一各索数名之价，否则不肯就道。地方官惟恐误差，不得不曲徇其意，增给价值，此闽省实在情形也。

至台湾近日雇夫尤为可异，据台湾县王露稟称，府城外乡民冲散，已无可雇。即间有可雇，亦不放心。^① 惟恃府城内惯用之人，雇募应用，既资其力，又免使去而为匪，是以每名雇价二百四十文。

① 《钦定平定台湾纪略》（稿本）卷三十四为“不能无疑”。

台地经贼扰之后，百物昂贵，非此不足以贍身家等语。臣以所开夫价过多，于臬司李永祺前往时，嘱会留心查察是否属实，毋任浮冒开销。若果如该县所禀，则雇价比内地更为昂贵。今闽省内地欲仿陕、甘等省，按田派夫，使农民受雇应役，事非向例所有，或骇听闻。闽省民风久在圣明洞鉴之中，恐猝难办理。惟有仰恳皇上天恩，量增雇价，使人乐于受雇，则虽素不充夫之人，亦皆踊跃趋事。（朱批：止可权宜如此，余有旨谕。）素不充夫之人，既来受雇，则专以充夫为业之人，转不敢刁难，而地方官应付差使，可不致竭蹶。

伏查军需则例，夫价条内，口内每站给价银五分，米一升。口外每站银八分，米一升。口内每站以七十里为率，口外以四十里为率。又注明金川例，正价之外，加给回空口粮折银，口内五分，口外八分，系奉恩旨加给，未便纂为成例。如果需用紧急，正价不敷，承办大臣临时酌核，奏明办理等语。是正价之外，如有不敷，原得随时奏请，今可否闽省内地雇夫，照金川口内之例，正价五分，口粮一升之外，加给回空粮银五分，台地雇夫照金川口外之例，正价八分，口粮一升之外，加给回空粮银八分。设再有不敷，俟事定后，另于通省官员通融摊捐归款。其内外每站里数，另行咨部存案。如此则人夫不患短少，而地方官亦不致支绌矣。

其海运雇船水脚，臣前奏明海水无顺逆，惟以风之顺逆为进止。应即以顺风抵顺水之价，按照军需则例，顺水每石每站三分六厘，而守候回空俱不另支口粮。其官员奉差往来，及运载军装饷银，并递送紧急文报，虽以米石计者，就船之大小，可载若干石之数，照此计算，以归划一等因，具奏。奉朱批：此时惟以渡兵接运军储济用为要，余可徐论，宁可从宽。钦此。臣前奏原拟暂时应用，不日即可竣事，是以守候回空，虽不另给口粮，本港各船户已皆乐从。今增兵添饷，用船正多，兼须雇觅外省来船，

方足敷用。查运脚以顺风抵顺水之价，固不为少。惟守候听差，难以克定时日。如近时满汉兵一万一千，又加以漳兵二千，粤兵一千，续又派本省兵四、五千，陆续配渡，需船三百只，将来又有钦差大臣侍卫等前来，若非预为封雇听候，必致临时贻误，而回空时，台地已无货可载，又不能另得水脚，则事前之守候，事后之回空，均须按照舵水人数，给以口粮，方不致苦累。但不定以限制，又恐开浮冒之端，应请守候口粮以二十日为率，回空口粮以十日为率，庶章程有定，各船户既不致有累，而承办官亦不敢冒开矣！

再，海船全以淡水为要，通海港议皆系咸水，必须向居民购买井泉，贮入水柜，以供日用。而沿海地方，井既不多，有时并须远运山泉，是以买汲雇挑，均需多费。每满一柜，辄需钱十余千。臣在厦门询访，始知实在情形。如此所有载兵之船，多者百余名，少亦数十名，兼之登舟后，或有守风稽搁时日，需水更多。未便责令船户买备，应请每载兵一名，另给船户买水钱一百五十文。其不载兵之船，不得援以为例。是否有当，如蒙俞允，仰恳皇上特降谕旨，敕部施行。谨奏。

乾隆五十二年八月十七日。

乾隆五十二年九月初二日奉朱批：此等细事，今实无暇计及此，且照所请行之。钦此。

闽浙总督李侍尧奏查明台湾

无着库项缘由折

乾隆五十二年九月初二日批 军录

李侍尧跪奏，为查明台湾无着库项缘由，据实复奏事。

窃臣具奏台湾应放班兵饷银，经前守孙景燧垫用无存，请先由藩库拨解一折，于本月初八日接准廷寄七月二十四日奉谕旨：此事失之宽纵，库贮银两，原存为兵饷之用，且系五十年征收钱粮，实贮在库之项，与去岁冬底被贼滋扰官庄无涉，何得称垫用无存。此事既应参奏查办，乃该督请于事竣后再行办理，现已降旨，令琅玕将孙景燧资财，严密查抄，以抵官项。用兵之际，诸事宜严，李侍尧不宜如此做好人也。钦此。跪读之下不胜惶悚。

窃臣先于本年三月十九日具奏，动拨军需银两折内，以台湾府应存库银仓谷，节据该道府禀称俱已用尽，并未将作何动用之处，详悉开报等因。奉朱批：此俟事定后严查者。钦此。嗣据藩司觉罗伍拉纳转据台湾府杨廷桦详称：库项已经前守孙景燧垫用无存，现在兵饷无项可支，请先行酌拨等因。臣随批司转飭该府，将所垫何项，系何员任内垫用，是否垫用军需，抑系孙景燧侵亏，查明以凭参奏，分别追赔去后。一面奏请将应放官兵俸饷银十万二千五百两，先由藩库拨解，以应支放。其亏缺之项，既据杨廷桦禀称系孙景燧垫用，并非侵蚀，则应俟杨廷桦查到方可详核，分别办理。且前曾奉有事定后严查之旨，是以奏请俟军务告竣，再行查办。今蒙皇上指示，适杨廷桦已将该故守垫用各项，逐一查造前来。据开府库应存银十六万一千一百余两，除现贮在库，并垫项内有已经扣还，及虽未扣还，尚有项可扣可追各款抵算外，其余已垫作兵饷，尚未收还之十万九千九百余两，皆系台属各厅县应解之项。又代垫盐贩欠课九千三百余两，系各营贩应缴之项。又府仓应存谷十六万七千七百余石，除现存谷二万九千四百余石，又交过谷价外，实在无着谷十二万五千六百余石，亦系各厅县应买补解府，及各殷户已领过价值，并历任滚交应补之项。皆因上年贼匪滋扰，各厅县仓库尽遭抢毁，即领过谷价之各

殷户及欠课之各盐贩，亦未知存亡，以致仓库俱无着落等因。查钱粮仓谷，既系应行解府之项，自应按期催解，以归实贮。乃该故守于各厅县应解之项，并不及早严催。遇有官兵奉饷，转将仓库旧贮之银谷挪移垫用，而各该厅县于应行解府之项，亦并不按期批解。迨上年冬间贼扰后，则尽归于无着，明系平日已经亏空，上下扶同作弊，挪前补后，致应行实贮之仓库，散失无存。诚如圣谕，即应严办。

查孙景燧原籍，现据浙抚臣琅玕遵旨前往查抄，并咨称该家属尚未回浙等语。该故守家属本年三月中，已据报自台内渡，今既未回籍，是必尚在闽省侨寓。除札会抚臣徐嗣曾并飞飭藩司及署臬司，在省城、泉州等处，速行查明下落，将贓财尽行查封，毋稍隐漏外，其应解不解之各厅县，一并飞咨各原籍查抄，以便变抵归款。所有查明缘由，谨缮折驰奏，伏乞皇上睿鉴。谨奏。

乾隆五十二年八月十七日。

乾隆五十二年九月初二日奉朱批：知道了。钦此。

闽浙总督李侍尧奏察看北淡水情形及
拨兵接应徐鼎士折

乾隆五十二年九月初二日批 军录

闽浙总督臣李侍尧跪奏，为遵旨复奏事。

窃臣于本月十一日接奉谕旨，据徐嗣曾奏，徐鼎士招出白石湖难民三千余人，又于鹿寮、金包里等处招出难民千余人，俱下山归庄。此事李侍尧何以并未奏及？至徐鼎士带兵驻大甲溪，前

已谕令李侍尧拨兵一千，前往接济，此项兵丁于何日配渡前往等因。钦此。臣前接徐鼎士及游击易连，同知徐梦麟等禀报，随将该员等招抚难民，俱已归庄。幸得时雨，晚稻大半布种，惟贼首吴沙窜伏三貂，尚未弋获等因，于六月二十九日附片具奏。奉朱批：览奏稍慰。钦此。

臣察看北淡水情形，地在台湾极北，尚无林爽文腹心党羽，不过林小文、赖树、蔡网、赵喜等小贼。当上年诸、彰倭扰之时，乘机滋事。该处漳州人少，诸贼纠伙不多，势不能敌泉、粤之众，是以贼势易孤，林小文等遂先后被官兵义民拿获。昨讯据自贼中逃出渡回之陈班供称：被贼何桢捉去，派在何马寮内守更。何桢贼寮有十余处，何马寮内不过四、五十人。三貂地方尚有贼目吴沙，本年四月，官兵焚毁何桢贼寮，何桢已逃往吴沙处等语。而何马一犯，近又据驻扎扈尾之守备罗礼璋禀称，该犯逃在内湖庄，经署把总王福等拿获，现交新庄巡检收禁转解等语。是北淡水惟吴沙、何桢二贼逃窜未获，此外已无贼匪。

其所谓难民者，臣细加查访，并参阅各官禀报，大概多系漳人。其中有从贼者，亦有不从贼者，泉、粤之人，因其与贼同乡，遂不分皂白，从而抢杀，以致避难白石湖、金包里等处。今既陆续招抚归业，补种田禾，并据该地文武等出示晓谕，泉、粤民人不得再有戕害。是北淡水地方现已宁贴无事。

至徐鼎士已移驻大甲，该处系淡水南境，与彰化接界，昨据该副将、同知等禀称，林爽文方急攻诸罗，未暇归巢，愚内地拨兵一、二千来，即可自大甲过溪，攻大里代之背等语。臣查该副将处，现据报有兵一千八百名，又有食粮义民、义番七千名，并自备口粮义民一千名。随批令该将等既有兵民几及一万，应即乘机进攻，勿稍观望去后。适接奉谕旨，令臣拨兵一千，即由五虎

门前往接济。臣随于督抚标及水师营、福州城守挑派兵一千名，即由省城出五虎门放洋，并札抚臣徐嗣曾就近料理起程，业于本月初二日将该副将等所禀情形及遵旨派兵缘由具奏。嗣接抚臣札会，已于初四日登舟，至五虎门候风。今厦门各兵船于十六日晚间放洋，想五虎门之船亦必同时开驾。查徐鼎士处既有兵民几及满万，今又增此官兵一千前往，益足添助声势，自当克日进攻矣，谨缮折驰奏，伏乞皇上睿鉴。谨奏。

乾隆五十二年八月十七日。

乾隆五十二年九月初二日奉朱批：此亦牵制匪贼之一法，得有信息，即速奏来。钦此。

谕闽浙总督李侍尧闽省夫船雇价等

皆系细事无庸过虑

乾隆五十二年九月初二日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝，乾隆五十二年九月初二日奉上谕：

本日李侍尧奏到各折，朕以为自系官兵打仗剿贼得胜信息，及详加披阅，惟官兵开洋日期，及徐鼎士移驻大甲，招抚难民，拨兵一千名前往接济各情形，其余如闽省夫船雇价，台湾库项无著等折，皆系细事，无关紧要。此时正在剿捕贼匪之际，该督惟应将调度策应，一切紧要机宜，悉心筹划，及得有官军打仗杀贼信息，随时具奏，以慰廑念。至此等琐细之事，并非目前急务，该督察看情形，遇有应行酌办者，不妨权其轻重，次第办理，何暇

于此时鳃鳃过计，琐屑入告？该督之意，不过以此等无著库项及增雇价值，关系将来报销，惟恐不预行奏明，致伊有赔累之事。殊不思台湾逆匪滋事，皆由前任督抚及地方官侵贪敛怨、废弛贻误所致。李侍尧系接任办理军务之人，将来事定后，其浮用无著款项，有应行赔补者，自当于历任督抚及该地方官名下，查明在任年月，著落分赔，必不令接办之李侍尧有所赔累也。其折内所奏各款，现在实无暇计及此，姑照所请行。李侍尧当明喻朕意，安心筹办军务要件，其寻常细事，无庸过虑，预为将来地步也。

至常青、蓝元枚旬余以来，未据续有奏报。而柴大纪在诸罗被贼攻围，曾否打仗得胜，剿散贼匪，日内总无信息，殊为烦闷。常青、蓝元枚已屡次降旨，令其亲统官兵，速赴诸罗，接应柴大纪，会兵攻剿。伊等究于何日亲往？现据李侍尧奏，调赴常青处之闽粤兵六千，早经前往，满兵三千，现已配渡开洋。蓝元枚处应调之粤兵、漳兵二千五百名，已于七月下旬开渡，其续调之粤兵二千五百名，现已令李化龙统领，向鹿港^①进发等语。是常青、蓝元枚两路兵力，俱已厚集，正当乘其新到锐气，奋勇直前，并力进剿。况徐鼎士在大甲驻扎，招抚难民、义番，食粮充伍者甚多。又经李侍尧派兵一千名前往接济，此一路亦可牵制贼匪，令其首尾不能相顾。若贼匪回顾家属，则诸罗之围自解。常青、蓝元枚尤当趁此机会，迅速带兵直抵诸罗，将沿途贼匪痛加剿杀，打通道路，与柴大纪会合一处，进捣贼巢，以收扫穴擒渠之效。

所有常青等何日统兵前往会剿，及徐鼎士在大甲溪如何相机

① 《钦定平定台湾纪略》（稿本）卷三十四为“鹿仔港”。

攻剿各情形，俱著即迅速复奏，以慰廑注。将此由六百里加紧传谕常青等，并谕福康安知之。

钦此。遵旨寄信前来。

两广总督孙士毅奏续奏调粤兵

一千名速赴诸罗接应折

乾隆五十二年九月初四日批 军录

臣孙士毅跪奏：窃臣前经恭折请旨，预备粤西兵三千名听候军营征调。嗣接将军常青请调粤西、江西两省官兵之信，臣即一面具奏，一面檄会粤西官兵分起前进。八月十一日复接常青寄阅折稿，内有诸罗急需应援等语。臣以粤西兵丁虽经檄调，缓不济急。臣既知军营需兵接应，岂容膜视，是以复就粤东抚标、广协、惠协、和平、惠来等营，奏调一千名，派令将备速带来潮，前赴诸罗，协同搜剿。今钦奉谕旨，令湖南、湖北、贵州各挑兵二千名，听候调遣。臣自应将粤东、西续调兵四千名，暂停候旨。但臣详阅常青等折内情形，逆匪势尚猖獗，我兵似有不敷。今蒙皇上特调楚、黔兵六千名，若再加两广兵四千名，共又得生力兵一万，则福康安到彼，足资调度，剿匪自较得力。臣是以拟俟添调粤兵一千名到潮，仍令速赴诸罗接应。其粤西兵三千，亦未敢遽行停止。此项兵丁到潮时，前次臣由驿之折，早应钦奉朱批训示，即行敬谨遵办，臣不胜冒昧惶悚之至。谨奏。

乾隆五十二年八月十五日。

乾隆五十二年九月初四日，奉朱批：常青竟失于张皇，尔在邻省，自应如此。钦此。

諭閩浙兩廣督臣備調兵丁即行停止調往

乾隆五十二年九月初四日 台灣檔

大學士和，字寄閩浙總督李、兩廣總督孫，乾隆五十二年九月初四日奉上諭：

據孫士毅奏，接到常青寄閱折稿，諸羅急須應援，已檄調粵西兵三千名，復就粵東各營湊調一千名，派令速赴諸羅接應等語。台灣剿捕逆匪，節經派調閩省浙粵滿漢官兵及四川屯練黔省兵前往會剿，兵力實已厚集。乃常青因諸羅被圍緊急，續行咨調廣西兵三千名，實屬過於張皇，因前據孫士毅奏，業已咨會廣西派委將弁，帶領起程，是以准其調撥。其孫士毅所請預備之廣東兵一千名，因該省亦系海疆重地，若派撥過多，恐不足以資彈壓，業經有旨，諭令孫士毅竟當停止，毋庸撥調。想該督接到前旨，自必遵照辦理。在孫士毅以鄰省總督，接到該將軍等札會，自不能不預為籌備。但林爽文等不過一時蚁聚，節經派調官兵并力進剿，諒此么膺小丑，無難立就殄滅。今孫士毅因見常青所寄折稿，有急需應援之語，于檄調粵西兵三千外，又于本省各營湊調一千名，雖為急公起見，未免亦覺張皇。即李侍堯駐紮廈門，于調撥事宜，固應先事籌備，但亦當審度情形，鎮靜辦理，以安眾心。若該督等過於張大，轉致內地民人心生惶惑，殊為未妥。無論林爽文負隅抗拒，揆之天理人事，斷不能日久稽誅。即如从前康熙年間，朱一貴聚眾滋擾，甚至台灣全郡俱陷，彼時不過一總兵藍廷珍，帶兵前渡台灣，即已克期蕝事。況現在官軍云集，又經特派福康安及海蘭察等，帶領巴圖魯侍衛等前往督剿，大兵

所临，势如摧枯拉朽，贼匪等鬼蜮伎穷，谅不能久延残喘。该督等惟当筹度机宜，镇静料理，俾内地民人安心宁谧，方为妥善。将此由六百里各传谕知之。

至常青、蓝元枚两处，旬余以来，总未据有奏报，深为烦闷。并著李侍尧得有官军打仗杀贼信息，及常青、蓝元枚于何日前抵诸罗，打通道路，破贼解围，与柴大纪会合进剿各情形，迅速驰奏，以慰廑注。

钦此。遵旨寄信前来。

谕杭州将军宝琳查办逃兵之父以示惩警

乾隆五十二年九月初四日 台湾档

大学士和，字寄杭州将军宝、浙江巡抚琅，乾隆五十二年九月初四日奉上谕：

据琅环奏，拿获派往台湾出征之驻防逃兵福常一名，讯系中途因病潜逃，畏缩藐法，当即恭请王命，将该犯正法等语。福常系满洲驻防，既经派令出征，即应奋勇争先，力图自效，乃敢中途藉病潜逃，实属可恶。该将军等即将该犯正法，尚为办理得当。至该犯之父，平时漫无管教，致有此等不肖之子，亦不可不查明办理，以示惩儆。著传谕宝琳等，即查福常之父，如系有职弁员，即当斥革。该犯之子，如现在食粮当差，亦即一并革去。或念满洲驻防革退钱粮，家属无可资以养赡，亦应俟该犯子孙一二代后，再行挑食钱粮，方足以昭惩创。至弟兄非父子可比，自可无庸查办也。将此谕令知之。

钦此。遵旨寄信前来。

福建水师提督蓝元枚奏预备往攻斗六门折

乾隆五十二年九月初五日批 军录

福建水师提督参赞奴才蓝元枚跪奏，为遵旨复奏，仰祈圣鉴事。

窃奴才于八月初四日奉到上谕：昨已降旨，令常青、蓝元枚各在府城、鹿港就近召募，无论从贼与否，皆可准其应募食粮。官军多得一人，则贼匪少一党恶，等因。钦此。同日又奉到上谕：蓝元枚接奉前旨，如何设法剿散，分路防御，等因。钦此。仰见圣明指示，无微不烛。查召募百姓食粮，奴才于七月十七日奉到谕旨，当经多缮告示，无论远近贼巢内，俱遣人密去张贴，现在踊跃应募者，已经陆续挑选勇壮一千余名，照兵丁之例，给与钱粮。内有老弱者，即交护同知黄嘉训等查明，归入难民、一体赈恤。奴才访知挑选勇壮一千余名内，即有二百余名系曾经从贼者，但本人自愧知非，不肯认此恶名。伏思皇上即予以自新之路，贷其一死，奴才亦姑听其隐秘。惟是此等匪徒亦难遽信其无假冒投诚，（朱批：最宜留心，若稍有可疑，即行诛之。）万一有变，所关匪细，仍严密稽查防范，以保无虞。

至大甲溪、岸里社义民、熟番先经奴才差弁前去晓谕鼓励，随经差弁带同熟番潘明慈、郡乃等八名，义民首邱子标等十二名，前来求见，佥称各愿勉力杀贼。奴才即赏以银牌、布疋，令其同心奋勇御贼。嗣又据该处民、番来报，有贼攻扰。奴才经拨兵六百名，又飭副将徐鼎士（朱批：此人早有约汝夹攻大里杙之语，何不道及？）带兵一千二百余名，又招募义民三千余名，

同在大甲溪北驻扎。而岸里社熟番在大甲溪之南，声势甚是联络。贼人屡次攻扰，俱被官兵等杀退。且该处路途颇平，可以攻迫贼巢。若与鹿港两路夹攻，实好机会。但近闻贼目颇有互相猜疑，俱将各贼眷属押入大里杙居住。若官兵攻剿太急，势必抵死守御。一时恐难遽破，转费时日。（朱批：此语乃汝推托之词，不能惑朕。）又防贼人占据斗六门，必乘大兵进攻大里杙，从西螺来抄鹿港，难免有后顾之忧。（朱批：如此顾前顾后，将一步不进，学任承恩乎？且彼尚可推兵少，汝今兵亦少乎？）况鹿港现在西南沿海，丰港至鹿场、尖山、北埔五十余里，约大小二百余庄，经奴才遣人分头前去晓谕，所有被贼焚毁村社亦搭盖草寮暂行归庄。此七月二十七、八、九连日大雨，园地俱栽插番薯。而鹿港之东南溪底、孩沙里等庄，离斗六门仅七、八里，该地民人亦有来求见，伫望兵到，各愿纠集乡勇，跟随杀贼。（朱批：如此，汝何不带兵前往？）奴才细筹情形，明知斗六门系贼要隘，势在必争，能来抵死相拒。然际此民心初安，向义从官，似当先乘此机会，多带官兵，先扎西螺。若斗六门一破，正可痛加剿杀，使贼人心惊胆裂，而我军便得长驱直进，似较大甲溪更为要着。奴才已飞咨将军臣常青、提臣柴大纪订期于八月半间会同夹攻。（朱批：柴大纪待救不暇，汝不往救，乃会其与汝夹攻，是何言耶？）

至漳州兵船经收入鹿港，有一千三百余名。其未到兵船，若早晚风顺，亦必陆续进港。奴才正在整顿兵力，前往攻剿斗六门，（朱批：既知如此，何不早发兵前去。且诸罗被贼围急，汝不知乎？）一得胜仗，剿灭贼党，立刻由驿驰奏，以慰圣怀。所有奴才筹办缘由，理合恭折奏闻，伏乞皇上睿鉴。谨奏。

乾隆五十二年八月初六日。

乾隆五十二年九月初五日奉（下缺）。

福建水师提督蓝元枚奏晓谕各社番民片

乾隆五十二年九月初五日批 军录

奴才蓝元枚跪奏。

窃奴才于本年六月十二日奉到谕旨：常青即可先趁此时，悬立赏格，令其缚献首伙各犯，即给以花红布疋，生番贪利，自必踊跃乐从，等因。钦此。仰见睿虑周详，无微不至。奴才查生番性如猿猴，登山涉水，便捷如飞，但各分种类，每种或数十庄社，或百余社不等，皆有熟悉番姓之人，众番俱皆听其呼唤，莫不心服。奴才细访彰化以北生番，有张风华能使生番信服。当即谕令张风华前去晓谕各社生番，擒杀贼匪，自有重赏。于七月二十八日，有张风华亲侄张高飞前来面禀，伊叔张风华业经传谕生番，据众番告称，先前系林爽文叫人来说，大里杙山边俱是大官员，鹿港海边俱是贼，是以叫我去杀贼。今知鹿港是官员，大里杙是贼，自然要杀贼。该生番业于七月十二日杀阿罩雾贼三十余人。至彰化以南生番，据护理番同知黄嘉训面禀，查有岸里社熟番通事潘明慈，为人诚实，兼通生番。当经传谕该通事，令其前往淳切晓谕。嗣据潘明慈禀称：通事前往生番，告以利害，许赏花红。众番社无不喜悦，都说从前被贼哄了，如今才晓得虎仔坑、大里杙都是些贼。将来必定拿来献功，省得贼来戕害，又可以邀重赏等语。此等无知蠢类，一经晓谕，皆知踊跃乐从。是其伎俩早在圣明洞鉴，将见么膺无藏匿之所，不难即日就擒。所有晓谕生番缘由，合并附片奏闻。

乾隆五十二年八月初六日。

乾隆五十二年九月初五日奉朱批：此亦不过擒贼之别法，至尔等大兵，正宜鼓勇前进，看来汝亦不免观望，应改过图功赎罪，莫移初志，勉之，慎之。钦此。

谕钦差协办大学士福康安等

严行申飭蓝元枚

乾隆五十二年九月初五日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝，乾隆五十二年九月初五日奉上谕：

据蓝元枚奏，大甲溪义民、熟番，屡经招集，声势甚是联络。该处路途颇平，可以攻迫贼巢，若与鹿港两路夹攻，实好机会。但斗六门系贼要隘，势在必争，似当多带官兵，先扎西螺。若斗六门一破，便可长驱直进，已飞咨常青、柴大纪订期于八月半间会同夹攻等语。已于折内详悉批示。

前据常青奏，接准柴大纪咨称，诸罗被围紧急，已两次飞咨蓝元枚发兵救援。七月二十七日，接到蓝元枚回札，并未提及有无救援之处等语。已有旨谕令蓝元枚，若能进兵大肚溪，与徐鼎士夹攻大里杙贼庄，使林爽文回顾巢穴，诸罗之围自解，亦是一策。若未能前进，蓝元枚竟应亲统官兵，速赴诸罗，攻透重围，接应柴大纪，方合机要。今诸罗被贼围困，望救甚切。经柴大纪两次请兵往援，该参赞自应带领官兵，星速前往策应。何以回札内，并未提及带兵救援之语？鹿港距诸罗甚近，该处被贼围急，

蓝元枚岂有不知之理？况屡有旨催令自北而南接应诸罗，计此时蓝元枚早应接到，何以折内未曾提及，又不速往援应，乃转称现在咨会柴大纪等订期夹攻，此非推托不救诸罗之意乎？柴大纪处此时正在被围望救，焉有余力与蓝元枚会合夹攻斗六门之理？且蓝元枚折内，既称大甲溪、岸里社义民、熟番声势联络，该处路途颇平，可以攻迫贼巢，又称斗六门系贼要隘，势在必争，当多带官兵，先扎西螺，进攻斗六门，以便长驱直进等语。蓝元枚既有此两路可以相机进攻，即应酌定机宜，留普吉保驻守鹿港，该参赞亲自带兵前往，痛加剿杀，以图进取。乃既不由大肚溪进兵，与徐鼎士会攻，又不径赴斗六门奋力攻击，歼除屯占贼匪，救援柴大纪。而于大里杙贼巢，又称官兵若攻剿太急，贼人势必抵死守御，一时恐难遽破等语。是蓝元枚竟系中无定见，株守鹿港，徒拥兵自卫，并无寸进。若鹿港果有贼匪攻扰，蓝元枚不能前进，犹得有所藉口。该处现在并无贼人滋扰，而蓝元枚处添调官兵又已厚集，乃一味株守，瞻前顾后，并不挪移尺寸，又何所待而观望不前耶？看来蓝元枚明知诸罗被围紧急，拥兵不救，徒以大甲溪、斗六门等处辗转推托，以掩饰其株守坐视之罪，岂能惑朕？蓝元枚之祖父蓝廷珍，以一总兵带兵前渡台湾，剿除贼匪，七日之内，克期奏绩。朕轸念前劳，是以将蓝元枚屡加拔擢，用至提督，又以伊系本省人，必能深悉贼情，畀以剿贼之任，授为参赞，并赏戴双眼花翎。蓝元枚自应倍加奋勉，效法伊祖，克继家声，方为无负委任。今自到鹿港后，迟回观望，一筹莫展。即所称晓谕生番，令其擒贼献功等事，皆非紧要机宜，不过藉词文饰，以为占脚地步。蓝元枚受朕深恩，何得恇怯委靡若此？若再仍前观望，按兵不动，则蓝元枚即为任承恩之续，况尤非若任承恩尚可推兵少也。著先严行申飭。

至常青，亦属有旨令其亲统官兵，速赴诸罗，接应柴大纪，打通道路，会合进剿。现在常青所请添调各兵，早经齐集，军威壮盛，正当鼓勇前进。乃自数月以来，惟知零星派拨，奏请添兵，并未亲往北路，决机制胜，所办何事？现在诸罗尚未解围，常青、蓝元枚既经贻误于前，当此兵力厚集之时，正该将军赎罪图功之日，亟应奋勇前进，收效桑榆，庶不致自罹重咎。总之，此时诸罗若无挫失，即系常青、蓝元枚之福。万一柴大纪竟有不虞，则常青、蓝元枚更何颜面立于人世，不可不慎也。

再，蓝元枚奏，现在招募食粮民人一千余名，内有二百名称曾经从贼者，但本人自愧知非，不肯承认，虽予以自新，贷其一死，但难遽信其假冒投诚等语。此事最宜留心，若稍有可疑者，即应立行诛戮，勿使别生事端，以保无虞为要。

至福康安既经启阅蓝元枚所奏情形，即应将其支吾掩饰，及福康安到彼如何措施之处，据实奏明，何以并未附折具奏？福康安于此等处，岂不能见及？若徒然启阅，仍默无一语，则亦不必先行阅视矣。岂朕委任之意耶？福康安到彼，著将此次谕旨内指出各节，面向蓝元枚严加诘询，令其逐一登答，仍严行查访有无捏词支饰，据实具奏。将此由六百里加紧传谕福康安、常青、蓝元枚，并传谕李侍尧知之。仍著将日内剿贼情形及诸罗信息，各行迅速复奏，以慰廑注。钦此。

福建水师提督蓝元枚因病奏请革职片

乾隆五十二年九月初六日批 军录

奴才蓝元枚跪奏，为奏闻事。

窃照台湾水土颇劣，所带官兵患病甚多，奴才荷蒙天恩，畀以重任，惟时加调摄身軀，筹度机宜，以冀迅擒渠魁，歼灭贼党，仰慰圣怀。但奴才福薄弗称，忽于七月二十二日染患病疾，症，其势尚轻，军务仍照旧办理，冀即日就痊，是以未敢奏闻。至七月二十五日，据报贼人来扰番仔沟，奴才亲带官兵前去堵杀。行至中途，据游击穆腾额来报，贼匪已被该处扎营官兵追赶败走，奴才亦即回营。因是日大风，猝受感冒，渐觉疲倦，尚能勉强经理一切。至八月初八日，又报贼匪一由竹仔脚，一由大肚溪，一由柴坑仔三路出来，奴才闻知，仍力疾亲带官兵前去堵杀。至收兵回营，精神愈觉不支，现在不能起立，饮食顿减。据医生称，奴才系虚弱过甚，尚堪调治，但数日未能痊可，伏思鹿港为海口要地，事无大小，急需办理。况奏添之兵，现在漳州兵已到一千三百余名，广东兵四百余名，兵力颇足，贼势已孤，正当迅速剿灭首伙之际。奴才何人何心能安卧床褥，调摄微軀。兹暂将一切官兵移交普吉保管束进剿，一面飞咨将军常青速拨大员前来经理，奴才虽病，犹得会同筹划，惟是奴才奉职无状，既不能克日擒渠，以伸国法，又何敢抱病恋栈，以负圣恩。伏乞皇上将奴才革职，军前效力，俟台匪剿灭，交部复加治罪。奴才不胜惶恐待命，理合恭折具奏，伏乞皇上睿鉴施行。谨奏。

乾隆五十二年八月十七日。

乾隆五十二年九月初六日奉朱批：病岂为罪？汝且安心调养，余有旨谕。钦此。

谕钦差协办大学士福康安等蓝元枚

患病应火速渡台

乾隆五十二年九月初六日 台湾档

大学士和，字寄钦差协办大学士将军侯福、闽浙总督李，乾隆五十二年九月初六日奉上谕：

昨据蓝元枚奏，现拟多带官兵，先扎西螺，与常青、柴大纪订期夹攻斗六门一折，已降旨严行申饬，并详示一切机宜矣。复思诸罗被贼攻围，势甚紧急，蓝元枚所驻鹿港，距诸罗较近，况柴大纪两次飞咨请教，俱有常青奏折可凭，自系望救甚殷。蓝元枚一得信息，即应就近带兵先赴诸罗，速往破贼解围，接应柴大纪为急，乃转以札会柴大纪等夹攻斗六门为词。试思柴大纪此时望救不暇，蓝元枚并不速往援救，转令其会同夹攻，此非饰词推托而何？鹿港距诸罗较郡城为近，该处被贼围急，蓝元枚断无不闻知之理。况鹿港并无贼扰，蓝元枚何以坐视其困，拥兵不救？即使蓝元枚不能亲往，亦应令普吉保带兵赴援。即或普吉保又难分身，亦应于将弁中择其奋勇可恃者，带兵前往，何以置若罔闻，坐视不救？常青处闻诸罗被围之信，未亲统兵前往接应，已属不是，然犹派委魏大斌、蔡攀龙等先后带兵赴援。而蓝元枚于诸罗竟存膜视之见，是诚何心？

又据蓝元枚奏，近闻贼匪互相猜疑，将各贼眷属押入大里杙居住等语。自系贼首林爽文等与其伙党自相猜疑，恐伙匪纷纷投顺官军，日渐溃散，是以将家属押入大里杙贼巢，以为牵制之计。大里杙内贼众已有一、二十万人，此等贼匪家属又复押入大

里杙居住，试思贼巢内焉有如许地方容此多人乎？蓝元枚闻此信息，正应乘贼众猜疑奔溃之际，率领官兵，由大肚溪与徐鼎士南北夹攻，进捣贼巢，使贼匪腹背受敌，则林爽文等护其巢穴，而贼众等亦各顾恋家室，必致纷纷瓦解，诸罗之围可以不攻自解，方合机宜。乃蓝元枚复称官兵若攻剿大里杙太急，贼人势必抵死守御，一时恐难遽破，转费时日。果尔，则蓝元枚应竟往斗六门，将屯踞贼匪痛加剿杀，廓清道路。乃蓝元枚既不与徐鼎士夹攻大里杙，又并未进兵斗六门，而鹿港现在并无贼匪，又不直赴诸罗援应，乃徒为空言，以掩饰其按兵不动之罪。即欲自占地步，亦应占定一路，庶可藉口。今一味株守，并不带兵前进，其支吾掩饰，实属无可解免。且蓝元枚自七月二十二日发折后，距此次所发之折，中间相隔几及半月。前折不过复奏节奉谕旨缘由，无关紧要。而昨日奏到之折，又尚系筹办往攻斗六门情形，并未见进兵剿贼。此二旬内，所办何事？着福康安于到彼后，将谕旨内指出各节，逐一查询，据实复奏。

再，蓝元枚昨日奏到之折，系八月初六日拜发，驰递几及一月，因查常青上次所到奏折，系八月初五日拜发，已于八月二十三日递到，何以蓝元枚此次之折，至一月之久？随飭查沿途挂号发单，系在未到蚶江以前，海门耽搁十六日之久。向来洋面虽以风信为凭，即或间被风阻，稍稽时日，尚属事之所有，何迟至十六日之多？海面亦闽省所辖，遇紧要文报，该督等自必慎选员弁船只，以便驶渡，断无听其任意迟延之理，着交李侍尧严切稽查，究系何处耽延迟误，是否实系阻风，即行据实复奏。此后遇有军报往来，务须随时留心稽查，严飭该管员弁，慎选夫船，设法星速驰递，毋致稍缓。

本日未刻，又据蓝元枚奏，七月二十二日染患痢疾，二十五

日在番仔沟打仗又受风感冒。八月初八日在竹仔脚地方力疾堵杀贼匪，精神不支，现在不能起立，暂将一切官兵移交 普 吉 保 管束，一面飞咨常青速拨大员前往经理，并请革职效力等语，亦已于折内批示。蓝元枚处，现据奏称，漳州兵已到一千三百余名，广东兵已到四百余名，是兵力已盛。且贼匪互相猜疑，渐有涣散之势，官军正可乘机进剿。乃蓝元枚又因患病不能办理军务，实深焦切。鹿港一路，现驻重兵，最为紧要。蓝元枚既经患病，此时常青处亦无人可以派拨前往统辖。福康安此刻已抵闽省，接奉此旨，即应星夜加倍兼程，竟由蚶江配渡，迅赴鹿港，即带领蓝元枚所统官兵，奋勇打仗，接应诸罗。或与徐鼎士会合，夹攻大里杙。惟当相机而行，不必俟屯练及贵州兵到齐，再行进发。彼时若蓝元枚病症不能痊愈，所有水师提督，即令蔡攀龙署理。蔡攀龙素为奋勇，屡经打仗出力，是以特加擢任。著福康安先行传谕，蔡攀龙务须倍加奋勉，杀贼立功。伊现在自己前抵诸罗，即当由诸罗带兵剿杀沿途贼匪，打通道路，径赴鹿港。如彼时福康安尚未到，蔡攀龙即督率官兵，奋力进剿，不必等候福康安到彼，始行进剿。

至蓝元枚自到鹿港后，办理一切尚为奋勉。后因其拥兵观望，并无寸进，又不亲往援应诸罗，节经降旨飭谕，并令福康安将指出各节向其逐加诘询。今蓝元枚既称患病，难以支持，然犹在番仔沟、竹仔脚等处力疾打仗，堵杀贼匪。如果病疾属实，其情殊可怜悯，现已颁赏大荷包一对，小荷包二对，以示轸念。福康安到彼，即传旨赏给。其应给各条，如蓝元枚已经病愈，即向面诘，令其登答复奏。倘伊病实难支，且毋庸诘询。仍将蓝元枚所奏患病之处，密行确查，是否属实，面见自知，无难察访也。

再，蓝元枚虽因病不能办事，普吉保自当带兵进剿，何得株守坐待？并著福康安将普吉保有无畏怯观望之处，一并查明具奏。将此由六百里加紧传谕知之。所有蓝元枚奏折，亦着发交福康安，俟到彼后，同此旨一并令其阅看，并著李侍尧将近日常青处如何会合进剿，诸罗曾否解围情形，迅速驰奏。

钦此。遵旨寄信前来。

谕福建提督蓝元枚安心调养

不可泄露患病信息

乾隆五十二年九月初七日 台湾档

大学士和，字寄福建提督参赞蓝，乾隆五十二年九月初七日奉上谕：

昨据蓝元枚奏，七月二十二日染患痢疾，因在竹仔脚等处力疾堵杀贼匪，精神愈觉不支，现在不能起立，暂将一切官兵移交普吉保管束等语。已降旨交福康安传旨询问，并赏给大荷包一对，小荷包二对，以示轸念矣。蓝元枚现在患病，尚能督率官兵在番仔沟及竹仔脚等处力疾打仗，堵杀贼匪，殊可怜悯。该参赞自到鹿港后，办理一切尚为奋勉妥协，今既患病，自不能亲历行阵，而于调度事宜，仍当悉心筹划，鼓励将弁，俾皆奋勇出力，以振军威。此时该参赞尤须安心调养，毋庸焦急，以冀速就痊愈。且蓝元枚系军营统领大员，关系最重。所有现在患病情形，不可稍有泄露。非特所属将弁兵丁等渐致懈弛，且恐贼匪闻知，潜生窥伺，于剿捕大有关系。著传谕蓝元枚，务须仰体朕意，善自调摄，慎密静镇，冀望速痊，仍可力图奏绩，以受朕恩眷，副

朕委任体恤至意。将此谕令知之。

钦此。遵旨寄信前来。

谕钦差协办大学士福康安等着

李化龙署水师提督

乾隆五十二年九月初七日 台湾档

大学士和，字寄钦差协办大学士将军侯福、闽浙总督李，传谕总兵普吉保、李化龙、蔡攀龙，乾隆五十二年九月初七日奉上谕：

昨据蓝元枚奏，伊现在患病，暂将一切官兵移交 普 吉 保 管束，一面飞咨常青拨大员前来等语。已降旨谕令福康安星速由蚺江配渡，前赴鹿港督剿，并著蔡攀龙署理水师提督，令其即由诸罗一带剿杀贼匪，直抵鹿港，奋力攻剿矣。

前据常青奏，派令蔡攀龙带兵一千六百名，由海道前往诸罗援应柴大纪，此时蔡攀龙自己早抵该处，接奉前旨，由诸罗前赴鹿港，尚需时日。而蓝元枚一路，现在漳州兵已到一千三百余名，广东兵已到四百余名，又贼党互相猜疑，渐有溃散之势，正是甚好机会，自应趁此官兵新到锐气，鼓勇进剿。而统兵大员忽值患病，反复思之，殊增烦懣。因思李侍尧于八月初九日，曾奏带领续调粤兵之总兵李化龙业已先到，现催令该镇带领已到之兵，即日开驾，速赴蓝元枚一路协剿等语。是李化龙此时早已带兵前抵鹿港，李化龙人尚明白，且曾经行阵，著传谕该镇，如蔡攀龙即时不能前抵鹿港，即著李化龙署理水师提督事务，并著鼓励将弁等奋勇出力，相机攻剿，不得因循株守，致有贻误。其

蓝元枚现在患病情形，勿令贼人闻知，致长奸计窥伺，此为最要。

至普吉保与蓝元枚同驻鹿港，蓝元枚既经患病，又将官兵交伊管束，普吉保即应将蓝元枚患病光景及现在如何督率官兵剿捕事宜，详悉具奏，何以并未据专折奏闻？伊虽至愚，何至于此等处亦不能见及耶？实糊涂不堪。普吉保著传旨严行申飭。并著福康安于到鹿港时，面问普吉保，伊即不能将鼓励官兵进剿事宜具奏，亦应将蓝元枚病势轻重，有无妨碍之处，据实具奏。

至福康安于八月二十八日在衢州途次启阅蓝元枚奏折，即应就伊所见，到鹿港后如何督率攻剿机宜，先行附折奏闻，何以亦未据奏及？独不念朕日夜焦劳乎？计此旨到日，福康安自应早已配渡，前抵鹿港。况现在各处派调官兵，已经云集鹿港一路，军威极为壮盛，贼匪又有互相猜疑溃散之势。现在不患兵少，所最要者，乃统兵乏人。福康安到彼，不必俟四川屯练及贵州官兵到齐，即先奖励将弁，奋勇进剿，不得因途次知蓝元枚现已患病，又稍存畏怯疑难之见。况贼匪不过乌合草窃，大兵一到，摧枯拉朽，自必势如破竹。至鹿港现在各副参游击等官，俱系营伍大员，久随蓝元枚，调度筹办已有章程。此时提督虽经患病，该员等正当各为国家出力，勉图报效之时，何未见有一人同普吉保剿贼者？福康安到彼即应鼓励在彼将弁，统率新到官兵，或会合徐鼎士直攻大里代贼巢，或竟率领官兵径赴诸罗救援，将沿途贼匪痛加剿杀，以期道路肃清，声势联络，军威丕振；并将如何筹办之处，各行迅速具奏。李侍尧得有禀报军营打仗杀贼及诸罗曾否解围信息，并蓝元枚患病情形，亦即驰奏，以慰廑注。

钦此。遵旨寄信前来。

福建陆路提督柴大纪奏打仗获胜等情折

乾隆五十二年九月初七日批 军录

署福建陆路提督台湾镇总兵官奴才柴大纪谨奏，为奏闻事。

窃查逆匪纠合南北贼众，滋扰盐水港、鹿仔草等处，图截通府要路，使文报不通，粮饷莫运，以困诸罗县城。奴才经拨游击杨起麟、守备黄象新等带兵一千余名，驻扎盐水港。又拨千总陈邦材带二百名，驻防鹿仔草，与盐水港互为犄角。又派游击邱能成带兵二百五十名，一路巡哨接应。兹六月初九日，据游击杨起麟报称：探得龙船窝、八老爷庄等处，有贼匪焚抢情事。游击随同守备黄象新等，于初五日黎明带领队伍、义民、番社等，飞赴该处。见有贼匪二千余人，胆敢迎敌。游击等随督率弁兵施放枪炮，打死贼匪多人，余贼退走，旋退旋来。游击商令守备黄象新从左势围攻，游击在右边截杀，贼被大炮打死百余人，贼众败走。追赶十余里，杀死贼匪亦多，割取耳辮四付，并抢获贼旗贼械等项，收兵回盐水港查点，惟番民怡皆一名，腹边被贼箭伤，伤医可痊。又据报六月初七日辰刻，贼众约有二、三千人，分路围攻盐水港。游击督率弁兵、义民施放枪炮，打死贼匪二百余名，贼败，追至后镇地方，杀死贼匪甚多，割取耳辮三十一付、抢获子炮一门、马蹄炮一门、鹿枪一杆、竹牌一十面，及贼旗等项。守备黄象新由南赶至急水溪边，生获贼匪郑对一名，余贼奔窜，随收兵回盐水港。查点惟兵丁郭玉池、曾光辉、曾景龙、郭连生、林光富及义民温玉纘等六名受伤，俱伤医调治。义民翁祖一名阵亡。合将打仗获匪，抢夺炮械等缘由，稟解前来。奴才随

将郑对一名发交署诸罗县陈良翼审明正法。

又六月初九日，据千总陈邦材、武举陈宗器飞报：贼匪万余，聚集附近各庄，欲来攻鹿仔草，乞拨兵救援等情。奴才随拨游击李隆、守备杨彰，于初十日黎明带领弁兵并黄奠邦、吴正兰等各义民，飞往应援。至酉刻该游击回军，报本日奉令带队伍飞赴鹿仔草应援，游击亲率把总李松等带领队伍，同守备杨彰、把总郭得胜、徐建文、杨起鹏等各弁兵，并黄奠邦、吴正兰、许万同、王得禄等各义民，驰赴鹿仔草。至竹仔脚、大崙庄田洋，遇贼匪六七千，蜂拥而出。亦有枪炮，抗拒官兵。游击督令施放枪炮，贼匪四面攻围，官兵、义民奋勇前御，打死贼匪四百余名，杀死贼匪二百余名。自辰至午，打裂大炮二门，贼众抵死冲来，官兵、义民俱拚命鏖战。适游击邱能成带领弁兵亦至该处，并千总陈邦材、武举陈宗器，各带兵丁义民，并来夹攻。打死贼匪数百，贼始逃散，收军回县。游击邱能成等仍回鹿仔草。查点各队内，镇标中营把总郭得胜、南澳左营把总李松二员，外委萧富、许飞凤二员俱阵亡。又铜山营外委陈威一员，未知去向。又阵亡并遗失兵丁陈兴高等共一百三十三名，又阵亡义民郑乾等七十名。俱赏给番银收埋。又受伤兵丁刘国宝等十二名，义民吕云等三十八名，飭医调治。炸碎大炮一门，打裂子母炮一门，遗失子母炮四门，百子炮四门，鸟枪三十杆，腰刀四十八口，单刀二口等情，具报前来。

又本月十三日据游击邱能成报称：六月十二日辰刻，贼匪五六千人，由东势角来攻鹿仔草。游击带领千总陈邦材并兵丁义民向前抵敌，用枪炮连环轰击。自辰至未，打死贼匪多人，杀获贼首三十八颗，抢获子母炮、行营炮共三门，鸟枪五杆，令旂五枝，竹牌三面，斧头等项。生获贼匪庄敏、黄蒲、黄鼎、吴佛、

冯二、李希、林周、曾喜等八名。因四处贼匪思欲抢犯，难以起解，即将该犯庄敏等八名，在于军前正法。查惟义民叶斌、吕常二名阵亡，黄郎、刘可味、刘金、童阵、曾海、侯哲等六名被贼炮伤，伤医可痊等情。具报前来。俱各通报在案。

再，奴才原带官兵一千九百三十名，往诸罗克复城池，续于四月二十一日，蒙将军臣常青派拨参将潘韬，带兵一千余名前来接济，共兵二千九百余名，除分派盐水港、鹿仔草防守以及阵亡外，奴才营盘止有兵一千余名，兵力单薄。贼匪每来侵犯，已咨请将军臣常青再添兵应援，合并声明。谨将据报各处打仗获贼正法等缘由，由驿六百里驰奏，伏乞皇上睿鉴。谨奏。

乾隆五十二年七月初二日。

乾隆五十二年九月初七日奉朱批：即有旨谕。钦此。

钦差湖广总督常青奏俟援兵到后

再往接应诸罗片

乾隆五十二年九月初七日批

《钦定平定台湾纪略》（稿本）卷三十五

常青奏言。八月十六日亲带兵起程，因恐贼匪乘间侵扰府城，是以密为预备，定于十六日起程，先令官兵扬言于十三日前往北路，看贼动静。此言传出，果有贼匪五、六千人，潜伏竹箐，窥探府城，当经带兵杀散。若官兵往北路，止留梁朝桂一人带兵千余驻守，实属可虞。应俟广东、浙江驻防满兵三千名一到，即留一半守城，常青、恒瑞即带领一半，先剿杀南路贼匪，再行往北接应诸罗。

福建陆路提督柴大纪奏诸罗打仗得胜折

乾隆五十二年九月初七日批 军录

奴才柴大纪谨奏，为奏闻事。

窃照本年六月十九日，探闻浙江温州镇总兵魏大斌，奉将军臣常青、参赞臣恒瑞军令，带兵一千六百名接济诸罗。十七日到鹿仔草，十八日即带兵四百名并带拨防鹿仔草官兵义民，同往大崙、埔心等庄剿捕，与贼打仗，施放枪炮，打死贼匪甚多，官兵义民亦多损伤等情。奴才随差妥人往查确实去后。

詎二十日巳刻，贼匪万余蜂拥来攻诸罗四门营盘，随令放起号炮，官兵义民协力抵敌，枪炮齐轰。奴才飞马往来各门营盘督战。自巳至申，打死贼匪共计有数百名，打裂大炮一门，杀死贼匪亦多。其东、南、北三处贼匪，俱已败走。惟西门外贼众尚抵死冲来，督令官兵竭力鏖战。贼匪退而复来者三次，义民似觉稍怯，奴才随飞调游击林光玉，带兵由东杀来，两处枪炮齐发，用力夹攻，各义民亦皆奋勇争先。枪炮打死贼匪二百余名，杀死贼匪约有百余名。内杀死执大旗贼一名，打死骑红马贼一名，贼始四散远窜。因天色已晚，田水泥泞，收军回营。查点军士，兵丁黄得等一十五名阵亡，义民苏全等十四名阵亡，赏给番银收埋。又兵丁蒋麟等十三名，义民周瑞元等四十一名，俱被贼枪打伤头面手脚，赏给番银医治。抢获大旗一面，上写五个雷字，四角写天、地、日、月字样。又大旗一面，斩获贼匪耳辮三十七付，并竹牌、皮牌等械。

二十一日，据拨防鹿仔草游击邱能成禀称：本月十七日，有

温州镇魏总兵带兵一千六百名往诸罗。是日到地住宿，因前途大崙、埔心等庄有贼匪屯聚截路，十八日即带兵四百名，谕令游击亦带水陆官兵，并武举陈宗器等义民，随往该庄剿捕，与贼打仗，施放枪炮，打死贼匪甚多。詎料贼众万余，四面围来。官兵、义民拚命抵敌，至申刻杀出重围，游击左手中指被贼刀伤见骨，坐马前胸亦被刀伤，收兵回鹿仔草。查点军士，魏总兵所带官兵阵亡千总一员、把总二员，兵丁遗失一百五十余名。游击所带官兵阵亡把总武成烈、刘连升二员，水师额外委包定邦一员，水陆兵丁阵亡遗失共二百二十九名。义民遗失三十余名，未知存亡等因。接阅之下不胜忿恨。即差干练兵丁，查探贼情，殊^①逆匪因我官兵已派出分守盐水港、鹿仔草，诸罗营盘兵力单薄，总兵魏大斌接济之兵，又不能到，益肆鸱张，图侵县城愈急。奴才窃思诸罗系四面受敌之地，现今贼多兵少，随会商署诸罗县陈良翼，并武举黄奠邦，拔贡郑天球，生员吴正兰，监生蓝应举、许英俊，武生高云琼，义民首甘光珍等，环营开沟设险，昼夜并工，多方鼓励，官兵、义民协力堵御。

二十四日巳刻，贼匪万余分攻西、北两门营盘，东、南亦各有贼匪六、七百。察看情形，此系贼人诈谋牵制东、南，意实专攻西、北。奴才放起号炮，各营盘大炮齐发，贼炮亦与对放，奴才飞马往来西、北两处，亲督枪炮，各兵按定准头施放，打死贼匪约共三百余人，贼众犹冒死前来。奴才督率官兵、义民，奋勇鏖战，北门打死骑马贼一名，又打伤骑马贼一名，打裂大炮一门，杀死贼匪七、八十名，贼败远窜。查西门外贼匪，虽被大炮打死二百余人，尚不肯退，复亲带炮队飞往，协力堵杀，贼众恃

①. 《钦定平定台湾纪略》（稿本）卷三十五无“殊”字。

有枪炮，不特当面对打，且分攻右边番社。其番社界在西、北之间，早已拨外委赖连升带枪炮手五十名，番弓箭手三十名，在竹围内埋伏。贼匪将近，枪炮弓箭齐发，伤毙贼匪十余人，贼随俱扰西门，任我枪炮轰击，竟然抵死不惧。查东、南贼匪俱经参将潘韬，游击李隆、林光玉等杀退，随飞调游击李隆、林光玉等，带兵由东杀来，并力夹攻，杀死贼匪百余名，至黄昏贼始退去。迨定更时，贼复喊杀逼近营盘，与官兵对放枪炮，相持一夜。至二十五日黎明，贼众复攻四门，奴才往来各营盘督战，俱用大炮轰击。南门外打死贼匪数十人，其余俱退。东、北两门，贼匪被大炮打死各二百余人，打死骑白马贼一名，骑黑马贼一名，随率官兵义民，奋勇追杀。杀死贼匪数十名，贼逃，追过溪收军。惟西门外贼匪愈杀愈多，虽经大炮接连打死无数，仍然拚命来攻，复分作二起，一由当面冲来，与官兵对杀；一由番仔沟拥入学舍，傍墙围内，多凿穴空，放枪打入营盘，兵丁义民多受其伤。若用大炮轰击，仅可透墙毙贼，因文庙伊迓，神所凭依，奴才与署诸罗县陈良翼、教谕江浩同在督战商议，未敢施放大炮。查南门贼匪已退，随飞调游击李隆，带兵前来夹攻，枪炮打死贼匪百余名，打死骑马贼二名，杀死贼数十名。至申刻，贼众四散奔逃，值大雨如注，收军。此两日一夜与贼打仗，官兵不暇造饭，俱系城内绅耆铺民，挑饭送各队伍。（朱批：此等义民可嘉之至，已有旨加恩。）并挑送凉水，兵丁得不饥渴。查点军士，南澳左营额外委廖廷高一名阵亡，兵丁郑良弼等二十七名，义民赖玉坤等一十三名，俱皆阵亡，赏给番银收埋。又镇标右营把总罗奋勇向前，肚脐下被贼铅子重伤。右营外委丁朝龙，右脚被贼枪伤。兵丁张祈福等三十一名，义民吴锦等一十八名，俱被贼枪刀伤，医治可痊。抢获毙马二匹，马鞍一付，贼旗五杆，竹牌七面，长

刀等项。

又二十八日辰刻，贼匪万余复来侵犯四门营盘。奴才来往各门督战，飭令官兵义民，并力抵御，齐放大炮轰击，俱能多中，至午刻共打死贼匪三四百人，官兵义民奋勇争先，杀死贼匪百余名。东、南之贼先已败去，惟西、北门外贼匪不退。时奴才在北门外，见有骑赤马贼率众冲来，甚是鸱张，即亲照准头，令大炮手连放两炮，立见人马俱倒，并打死贼匪数十人。正欲追赶，适参将潘韬、守备杨彰等，均飞差报称，西门外贼势猖獗，数次逼近营盘，官兵义民俱有损伤。奴才随飞马往援，并调游击李隆、林光玉等，均到西门并力夹攻。至申刻贼匪被枪炮打死百余人，打裂大炮一门，杀死贼匪数十名，贼始四散远窜。乘胜追杀，斩获贼首三十余颗，生擒贼匪林再、何水二名，因受伤重，解至军营，旋即身死，照例戮尸。抢获贼旗四面，牛皮牌三面，竹牌五面，令旗五杆，长柄刀二把，因天色已晚，未便远追，收军回营。查点军士兵丁郑振贤等一十七名，番民呼靴一名，俱皆阵亡，给银收埋。又兵丁陈国泰等二十一名，义民林奕、张彬等一十八名，番民阿汉眉滚等一十二名，被贼枪刀所伤，俱给银医治可痊。

除通报将军督抚提督外，合将六月二十、二十四、二十五、二十八等日打仗得胜缘由，由驿六百里恭折驰奏，伏乞皇上睿鉴。谨奏。

乾隆五十二年七月初二日。

乾隆五十二年九月初七日奉朱批：汝等实属出力，可嘉可悯，余有旨谕。钦此。

閩浙總督李侍堯奏藍元枚身故飛檄

李化龍等籌辦攻剿折

乾隆五十二年九月初七日批 軍錄

臣李侍堯跪奏，為奏聞事。

竊臣于本月初八日接將軍常青初五日抄寄折稿后，旬日以來，總未得台灣文報，臣惟恐鹿耳門、鹿仔港兩處口岸或有梗阻，隨兩次遣派兵役前往探听，俱尚未回。僅于十四、十九兩日，有船兩只，一自鹿耳門回廈，一自鹿仔港回廈。詢知兩處口岸，俱屬安靜，並無他故。惟因連日颶風頻作，是以往來船少等語，然總未有文報。二十一、二等日，始連接台郡及鹿港各官文稟。正在具奏間，二十三日復接常青十五日來札，并抄錄清字折稿，知諸羅之圍尚未得解，常青本欲赴援諸羅，而府城外之賊，又乘間窺伺。惟恐出兵后，府城萬一有失，則進退失据等語。看此情形，是常青實有不能移營之勢。而諸羅被圍日久，刍糧鉛藥日少一日，甚為可慮。此間滿漢兵登舟者，不下八、九千，總以風汛不常，連日停泊，不能開駕，直至十六日始行放洋。放洋后，風又時順時逆，未必能一帆趕到，計目下當可到齊。常青得此新兵，或當分兵駐守府城，親自率兵前往，打通諸羅道路。臣前詢問船戶陳榮昌，據稱：聞得有牌腹村義民，運糧接濟諸羅城中等語。若果如此，則諸羅尚可堅守待援也。

鹿港一路，昨于一日間連接普吉保及同知黃嘉訓、彰化令宋學灝各稟。普吉保稟系初十日所發，內稱該鎮扎營在馬鳴山，本月初八日有賊來扰，該鎮率兵剿御，自辰至未，賊猶不退。藍參

赞遣游击琢灵阿带兵接应，贼始败散。官兵乘势追杀，斩获甚多等语。黄嘉训、宋学灏禀系十三日所发，内称初四日粤兵已到四百六十名，漳兵亦到一千三百余名。初八日，贼由马鸣山等处三路来扰。蓝参赞亲出番仔沟剿杀，三路贼俱被官兵杀退。蓝参赞于十一日先遣游击叶有光带兵一千前赴二林，同原驻之兵八百，预备进剿。俟彰(漳)兵、粤兵到齐，即由东、西螺进攻斗六门。惟蓝元枚参赞染患病疾，正在医治等语。查漳兵二千，久已起程，其未到之六百余名，想因风阻在途，不日亦即可到。而左翼镇总兵李化龙带领粤兵二千五百亦于十六日放洋，兵力骤增，正可协力进剿。诂本日午后又接蓝元枚十七日咨称，病势甚重，已飞咨将军常青，速派大员前来经理。旋又接同知黄嘉训禀称，蓝参赞于十八日身故(朱批：可惜。)等语。查蓝元枚到鹿港后，联络民番，布置似有头绪。一旦身故，群情未免失所倚恃。适增调之粤兵、漳兵，计目下亦必全到，则事机尚可相接。惟普吉保、李化龙两总兵恐难相统辖。(朱批：已有旨，令李化龙署提督，庶事权归。)府城既有满汉兵新到，想常青自必亲自带领赴援诸罗，则恒瑞或须留守府城，不能分往鹿港督率。臣一面飞檄普吉保、李化龙，务当和衷商度，酌量一人驻守，一人即统兵进剿斗六门等处，(朱批：是，一得捷音，即速奏闻。)与柴大纪会合，勿得各存意见，以致误事。想普吉保等亦决不因统率无人，遂稍存观望。

臣接前途来信，福康安、海兰察等约计九月初间即可到厦。臣现已预备船只等项，俟一到即可登舟。所有粮饷火药，惟有宽裕筹备，上紧运送，以期应手，不敢稍有迟误。谨缮折驰奏，伏乞皇上睿鉴。谨奏。

乾隆五十二年八月二十三日。

乾隆五十二年九月初七日奉朱批：即有旨諭。欽此。

諭欽差协办大学士福康安等

应策励将弁奋勇前进

乾隆五十二年九月初七日 台湾档

大学士和，字寄欽差协办大学士总督将军侯福、欽差湖广总督将军常、闽浙总督李、福建陆路提督参赞柴，乾隆五十二年九月初七日奏上諭：

据柴大纪奏，龙船窝、盐水港、鹿仔草等处贼匪滋扰，派拨弁兵剿杀，及贼匪攻扰诸罗，督率官兵义民堵御截杀两折，实属出力可嘉，已于折内批示。但所奏情形，俱系七月以前之事，业经常青、李侍尧等先后具奏。而诸罗被贼攻围以后，常青又派蔡攀龙等带兵往援，如何杀贼解围之处，尚未得有确息，殊深廑念。

同日，又据常青奏，接奉諭旨，得原似于八月十六日亲带官兵起程，因恐贼匪乘间侵扰府城，是以密为预备，定于十六日起程，先令官兵扬言于十三日前往北路，看贼动静。此言传出，果有贼匪五六千人潜伏竹箐，窥探府城，当经带兵杀散。若官兵往北路，止留梁朝桂一人，仅带兵千余驻守，实属可虞。应俟广东、浙江驻防满兵三千名一到，即留一半守城，常青、恒瑞即带领一半，先剿杀南路贼匪，再行往北接应诸罗等语。现在诸罗被围紧急，望援甚切，常青等自应遵旨带兵亲赴北路，接应柴大纪。而伊等又因府城存贮粮饷火药，兼之难民甚多，惟恐大兵起程后，贼匪乘间侵扰府城，请俟浙、粤驻防满兵到后，酌留一半

驻守府城，带领一半先净南路，所办亦觉未中肯綮。此项驻防兵三千，前抵台湾后，军势壮盛，正当乘其锐气，以全力直趋北路。今又分派一半驻守府城，一半带往南路剿贼，是兵力又以分而见单。但此时常青等如已带兵前赴南路，果能将贼匪大加剿杀，擒获庄大田，恢复凤山，肃清后路，俾无返顾之虞，亦固属甚善。但必当奋力搜剿，将屯占贼匪歼戮无遗，庶不虚此一举。不可徒分兵力，以致两处耽延，方为妥善。

又据奏官兵若往北路后，府城止留梁朝桂驻守，未免可虑一节。常青既已见及于此，自应令恒瑞同梁朝桂固守府城营盘，常青亲自带兵迳趋北路，剿杀沿途贼匪，会合柴大纪，自不当只令一总兵梁朝桂在郡城驻守也。此旨到时，如常青、恒瑞业已带兵同往则已，如候兵到尚未启程，竟应遵照前旨，令恒瑞驻守府城，常青仍带兵往援柴大纪为是。

又据李侍尧同日奏到，蓝元枚于八月十八日患病身故一折，览之深为轸惜。蓝元枚自驻扎鹿港以来，调度督率，均属奋勉出力，后因其久驻鹿港，未能统兵进剿，又未往救诸罗，曾经降旨飭谕，此亦策励之道，不得不然。今因偶患痢疾，仍奋勉打仗，竟至身故，殊为可悯。除已另降谕旨从优恩恤外。

至鹿港现驻重兵，方图进剿，又贼党互相猜疑，渐有溃散之势，正是极好机会。本日早间已续降谕旨，令福康安星速兼程，由蚶江配渡，前抵鹿港，相机督率进剿。现在鹿港添调之兵已陆续到齐，而统领官兵参赞大员，忽因病身故，恐军心不无惶惑，将弁等不无懈弛观望，并恐贼人闻知蓝元枚病故信息，生心窥伺，最关紧要。李侍尧所奏之折，福康安在途次已经启阅，自悉该处情形，不可因蓝元枚身故，鹿港一路无倚仗得力之人，心中不无惶急，稍存畏惧疑难之见。唯当坚持定见，不必俟川黔两省

之兵，及早驰抵该处，整顿兵力，奋勇进剿。且今日即降旨催此四千劲兵速往矣。此旨到日，福康安自己早抵鹿港，即应策励将弁，督率兵民，遵照即降谕旨，酌定机宜，奋勇前进。倘福康安尚未能克日前抵鹿港，即应先发札谕，以该参赞虽经身故，但官兵厚集，声势壮盛，福康安现在前赴鹿港，即日可到。李化龙、普吉保及将弁官兵等，务须倍加奋勇，努力自效，杀贼立功。俾军心镇定，将弁等咸知振奋，以期鼓勇直前，士气百倍。其所调屯练及黔省兵，现又有旨催令该督抚等迅速派调起程，克期进发，并令沿途加紧行走，以期早抵军营。但此时鹿港续调之兵，业已陆续到齐，兵力已足。况福康安及海兰察等所带巴图鲁侍卫等百余人，最为勇健，尤足以一当千，更可恃以无恐。惟当就现有之兵，速即统领进剿。将来屯练及黔省兵到彼时，俱系生力，岂不更足以资剿贼耶？至水师提督业经降旨令蔡攀龙署理。又因蔡攀龙未能即抵鹿港，是以令李化龙署理，以期事权归一。今据李侍尧奏，已经檄普吉保、李化龙二人，应留一人驻守鹿港，一人带兵进剿斗六门，与柴大纪会合。想普吉保等亦不敢因统率无人，稍存观望等语。自应如此办理。厦门距鹿港不远，李侍尧之信早到，李化龙、普吉保二人中何人驻守，何人进剿，自己早经商定，即行各据实驰奏。

又前据蓝元枚奏，鹿港招集充裕民人一千余名，内有二百余名系曾经从贼者，难遽信其无假冒投诚之事等语。已有旨谕，令留心防范。倘有可疑者，即先诛之。今蓝元枚已经病故，此事关系紧要。并著福康安督同李化龙、普吉保，加意严防，随时稽察。倘有心怀叵测者，即当正法，毋致别生事端，此为最要。

再，现据李侍尧、柴大纪奏，官兵剿捕贼匪时，各处义民多有

送饭帮粮者，已另降谕旨查明赏给官职，并普免台湾来岁钱粮，以示奖励。福康安等务须遍贴誊黄，通行晓谕。但各处义民益加踊跃，而附从贼匪之人，亦必闻风投出，急公图效，于激励义民，解散贼党，两有裨益。

至蔡攀龙自己前抵诸罗，于何日破贼解围，常青于何日启程，或南或北，是否得有胜仗，擒获贼匪，各行迅速驰奏，以慰悬注。将此由六百里加紧各传谕知之。

钦此。遵旨寄信前来。

谕内阁赏为首之诸罗城绅民以官职并

再蠲免台湾府明年钱粮

乾隆五十二年九月初七日 台湾档

乾隆五十二年九月初七日内阁奏上谕：

据柴大纪奏，官军在诸罗城外剿杀贼匪两日一夜，官兵不暇造饭，俱系城内绅耆铺民挑送饭米，并送凉水，兵民得不饥渴。又据常青，李侍尧奏，牌腹村义民运粮接济诸罗各等语。该处民人当官军剿杀贼匪之时，能各知大义，踊跃奉公，深堪嘉尚，自当特沛恩膏，以示奖励。著福康安、常青、李侍尧，即行查明首先倡率之义民头目，一面奏闻，一面酌给官职。第念该处义民众多，若仅将头目给官嘉奖恩施，犹未普遍，前曾降旨蠲免台湾本年应征钱粮，著再加恩将五十三年分台湾府属应征钱粮，亦概行豁免。并着该将军等即行普贴誊黄，俾全郡民人咸知感激，倍加奋勉急公，以副朕优奖义民有加无已至意，该部即遵谕行。钦此。

谕内阁赏蓝元枚太子太保并赐银一千两

乾隆五十二年九月初七日 台湾档

乾隆五十二年九月初七日内阁奉上谕：

福建水师提督蓝元枚，于台湾逆匪林爽文纠众滋事以来，屡经统领将弁奋勇直前，剿杀逆匪，并筹划一切，皆有条理，特降旨授为参赞，以示奖励。昨据蓝元枚奏，染患痢症，屡次力疾统兵，勇往堵剿，复降旨赏给大小荷包，用昭体恤，方冀速就痊愈，迅奏肤功，以承恩叙。兹据李侍尧奏，蓝元枚于八月十八日病故，闻之深为悯恻。蓝元枚著赠太子太保，并赏银一千两，以示朕轸念勤劳，优恤戎臣之至意。所有应得恤典，著该部察例具奏。钦此。

大学士阿桂奏请宽福康安过急之咎折

乾隆五十二年九月初七日批 军录

臣阿桂谨奏，为遵旨复奏事。

本月初一日接奉上谕云云等因。钦此。臣跪读之下，知因台湾剿捕事宜未能妥速告蒧，上烦宵旰焦劳，至于废寝，下怀萦切，梦寐难安。臣与福康安前在金川军营相处日久。四十九年又同在石峰堡剿贼，深知其于办理军务，及临阵克敌，并非畏葸怯懦之人。此次奉命前赴台湾督办，其主见如何，臣虽无由得知，恭阅抄录奏折并悉心揣度，其奏请添兵，自为速于完事起见。缘

逆匪林爽文等滋扰以来，为时既久，前后调往官兵虽已不少，然其中如福建本省兵丁，竟难深信。即如该提镇等遇贼打仗，屡报多兵不知下落，此项兵丁岂尽死伤逃亡？未必不因与贼同乡，遂尔附从。此外浙兵素又软弱。所可信者，惟驻防满兵及粤兵二项，统计不过一万四千余名。现在贼匪猖獗鸱张，设福康安到彼后，现有兵力尚不敷剿捕，维时再请添调，台湾远隔重洋，往返动需数月，迟一日调发，则迟一日到台。倘不能于冬春藏事，则台地炎热雨湿，办理弥形棘手。福康安身肩巨任，思欲克期戴工（功），故有预行调备之请。方今帑藏充盈，皇上于办理军务，从无靳惜。所有福康安请调之黔、楚兵六千名，俱可由水路赴闽。沿途应付，似亦不至于劳费。其另片称郡城留兵过少，恐贼乘虚滋扰，不足以备剿捕应援之用等语，亦不过为多添数千官兵，以备留防后路起见。盖台湾路径丛杂，贼人现据山麓，可以绕道四出，前邀后截。前此林爽文攻犯府城，嗣闻鹿港官兵将到，即回顾大里杙巢穴。近据徐鼎士禀报，林爽文又在诸罗攻扰。其南北往来，并不专由诸罗、府城大路，官兵可以迎头堵截。此次常青等拨兵往援诸罗，其存营之兵，除患病外，现仅有四千。福康安或因筹计及此，必先于紧要处所，安设官兵。察其实可以防守无虞，再带可战之兵，一鼓直前，捣其巢穴，战守并用，不得不宽为调备。此臣揣福康安奏请添兵之意如是。现蒙皇上反复开导，谕令坚持定见，福康安自能仰体圣意，倍加镇定。计福康安九月底、十月初可抵台湾。臣愚以为可否求皇上宽其过急之咎，俟福康安到后，亲历军营，察看情形，所奏自更确切。皇上亦可以随时指示，俾得遵循妥办。

至臣受恩深重，既未能前往为圣主分忧，荷蒙垂询，似此行军重务，愚见所及，虽不能自信其是与否。但有所见，断不敢自

昧本心，不直陈于君父之前，恭候裁夺。谨就愚昧之见，遵旨恭折复奏，伏祈圣慈垂照。谨奏。

乾隆五十二年九月初二日。

乾隆五十二年九月初七日奉朱批：正当用人之际，蓝元枚竟病故，诸事不顺利，深切焦急。余有旨谕。钦此。

谕钦差大学士阿桂所见甚合机宜

已令福康安迅赴鹿港

乾隆五十二年九月初七日 台湾档

大学士和，字寄钦差大学士公阿，乾隆五十二年九月初七日奉上谕：

据阿桂奏酌筹台湾事宜一折，内称福康安请调之黔、楚兵六千名，不过为多添官兵，以备攻剿防御起见等语。台湾剿捕贼匪，兵力自应厚集，朕已节次降旨，调拨川省屯练兵二千及黔兵二千，令其迅速赴闽矣。川省屯练最为趑健，而黔兵于涉山履险素称便捷，此四千兵实足当数万之用，于剿捕事宜已为得力。至楚省之兵，较之四川、贵州二省之兵，自为稍劣，且远隔数省，是以未经调拨。想阿桂自未知朕又添调川省屯练降番，并令其速往也。

再据阿桂另片奏称，目下急务总在打通诸罗为要。诸罗一通，则南北声势联络，即可捣穴擒渠，自易藏功等语。所见甚合机宜，朕早如此降旨福康安矣。至台湾军务未藏，正在用人之际，本日复据李侍尧奏称，蓝元枚已于八月十八日患病身故，闻之殊为怜惜。现已令福康安迅速前进，径赴鹿港，悉心调度，鼓

励将弁，俾军营壁垒一新，以振兵威，而寒贼胆。惟期福康安仰体朕意，力图进取，迅奏肤功。所有本日常青，李侍尧奏到之折，及先后所降谕旨，俱著抄寄阅看。将此谕令知之。

钦此。遵旨寄信前来。

福建按察使李永祺奏遵旨到台办理军需折

乾隆五十二年九月初七日批 军录

福建按察使臣李永祺跪奏，为遵办台湾军需，恭折具奏，仰祈圣鉴事。

窃臣仰蒙皇上天恩，以臣在川省道府任内，曾办军需，命臣速赴台湾办理，当经督臣李侍尧委令，派在泉州办事之盐法道戚蓼生署理臬篆。该道于七月初七日到省，臣将一切应办事件，即日移交，于初八日起程，十三日到厦门稟知督臣，随于十八日登舟候风，二十一日开行，八月初五日由鹿耳门到台湾府城。查军需一切，先经督臣李侍尧委员源源运送，尽属充裕。所有粮饷、药铅等项，除台湾府道支放外，现在存贮饷银二十一万两有零，兵米六万一千余石，火药八万九千余斤，枪子六万一千余斤，炮子一千八百余颗，火炮一十二万三千四百余盘，均足敷应用。

臣到后，连次赴城外营盘，见将军常青精神依旧强健，参赞恒瑞同在一处。旋于初七、八等日，接到廷寄，将军等遵旨亲统官兵前赴诸罗，与参赞柴大纪、蓝元枚等会合，进剿贼巢。恐南路之贼闻我兵赴北，潜来窥伺，留兵交镇将等另扎营盘，严加防守。臣飭令府县，雇募人夫，接运粮米军装，随军前进，将军常青、参赞恒瑞，定于八月十六日起程前往。詎贼匪于十三日辰时，

分东、南、北三路来扰营盘。将军参赞亲督镇将，率领官兵、义民，分路迎击，枪炮并施。至未酉二刻，贼众先后败散。闽浙粤两省驻防官兵，指日即到。将军等俟满兵到之后，再相机办理。

臣查城外营盘，甚为整齐严肃。城内居民安贴，铺户贸易如常。臣不敢疏于防范，现与台湾道永福，同文武各官，督率义勇兵民。日则慎密稽查，夜则严谨巡逻，与城外官兵，相为声应。凡存贮军火处所，拨兵防守。臣等仍不时亲往查看，以免疏虞。

至鹿仔港军营，应需一切粮饷药铅，臣前经过厦门时，查阅总局内档案，所有历次委员拨运过银米、子药并火绳、炮子等项，甚属宽裕。兹蒙圣明远虑，又添兵五千，亦足敷用。臣一面飞查支存各数，以备考核，仍一面飞移内地总局，再行拨运，务使充足有余，不敢稍有缺误，军需重务，臣惟有竭尽驽骀，妥协办理，以期仰副圣主委任至意。所有臣已至台湾督办军需缘由，理合恭折具奏，伏乞皇上睿鉴。谨奏。

乾隆五十二年八月十五日。

乾隆五十二年九月初七日奉朱批：览奏欣慰，余有旨谕。钦此。

谕钦差协办大学士福康安当到鹿港

鼓勇前进并令常青往攻南路

乾隆五十二年九月初八日 台湾档

大学士和，字寄钦差协办大学士尚书总督将军侯福、钦差湖广总督将军常、闽浙总督李，乾隆五十二年九月初八日奏上谕：

昨据常青奏，南路贼匪尚在窥伺，官兵扬言欲往北路，贼人

即潜伏竹箐，思欲侵犯府城。又南潭一带，亦有贼滋扰。请俟浙粤驻防兵到，带领一半先净南路，再往诸罗接应等语。附近府城南潭一带屯占贼匪，前据常青等奏，经官兵将贼人蓬寮草屋悉行烧毁，竹箐随路砍伐，贼目庄大田已有潜逃之信，常青等即应乘势搜剿，痛加歼戮，方得机要。乃即行撤兵，转与贼人以暇，以致现在该处尚有贼匪纠聚窥伺，不能径趋北路。今常青既因府城存贮粮饷火药，及难民甚多，恐官兵往北，贼又乘间窥伺，难免后顾之忧之虞，意欲先清南路贼匪。就目前情形而论，亦只可如此办理。常青此时竟当胸有定见，留恒瑞驻守府城，亲自速领官兵，先将南潭一带贼匪奋力歼除，所有贼寮竹箐悉行焚毁，擒拿贼目庄大田，即趁势恢复凤山县城，俾府城以南道路肃清。计彼时福康安，已由鹿港前抵诸罗，破贼解围，与柴大纪会合矣。且川、黔两省之兵，自己早到该处，军威更为壮盛。其时常青自己将南路廓清，即带领大兵，自南而北，迎杀沿途贼匪，径赴诸罗，与福康安，柴大纪合兵一处，会同直捣大里杙贼巢，以成破竹之势，首恶渠魁自可指日授首。常青务须倍加奋勉为要。

至福康安已屡经有旨，令其速赴鹿港，督率将弁，奋勇剿贼。此时兵力厚集，又该处贼伙互相猜疑，渐有涣散之势，福康安正当乘此机会，统率新到官兵，及巴图鲁、侍卫、章京等，决策制胜，断不可因蓝元枚已经病故，鹿港无可倚仗得力之人，稍存畏怯疑难之见，昨降谕旨甚明。况蓝元枚平日在彼督率调度，虽有条理，但究不敌福康安、海兰察二人之智勇兼济。且蓝元枚所辖将弁等，亦远不如舒亮、普尔普等之久经行阵，奋勇可恃。加以巴图鲁、侍卫、章京等百余人，骁勇趯捷，俱可一以当千。福康安统领如许勇将劲兵，又当贼匪猜疑涣散之势，何坚不摧，何险不破，又何所疑畏，稍有瞻前顾后之见耶！且朕前派福康安等

前往督办时，初不料蓝元枚猝有疾病，不能办理军务之事。而蓝元枚今忽因染病遂致不起，设非早派福康安等前往，则鹿港一路，统率竟至无人，其势必致掣肘。今甫有蓝元枚身故之信，而福康安已即日可抵鹿港督率筹办，又值新调官兵云集，士气振作，壁垒更为一新，此即上天嘉佑默牖，朕衷于端倪未兆之时，而有先事预备之计，朕实感谢天恩，默深庆慰。即以此事会而论，实属机宜凑合，已有成功先兆。谅此么磨草窃，又有何伎俩，岂能久延残喘，负隅抗拒乎？福康安尤当坚持定识，乘机鼓勇，以期迅奏肤功，副朕委任，承受恩眷。将此再由六百里加紧传谕福康安、常青、海兰察，并谕李侍尧知之。

钦此。遵旨寄信前来。

谕钦差协办大学士福康安等严办劫船者
并招徕投诚乘势进击

乾隆五十二年九月初八日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞蓝、福建陆路提督参赞柴，乾隆五十二年九月初八日奉上谕：

据李侍尧奏洋面贼船劫去米石兵器及运米接济缓征钱粮各折内称，浙省运闽米船，于七月初八日在洋面遇贼船，劫去数十担，并鸟枪、腰刀各一件。又，新城县运闽米船，亦在洋面被盗窃去鸟枪二杆，腰刀二口，其米石并未被抢。又，船户装运兴化府米石，在崇武澳亦被盗窃去鸟枪、腰刀等物，并未抢夺米石等语。此等盗犯胆敢在洋面行劫官运米船，实属目无法纪。而该船户所

遇之盜，又有不搶米石，止搶鳥槍腰刀者，或竟系賊黨潛出滋擾，亦未可定。該地方文武向視巡緝為具文，並不實力查拿，以致盜賊毫無忌憚，肆行劫掠，自應从严查辦。着李侍堯督飭所屬員弁，務須上緊設法勒限查拿務獲，并于拿獲盜犯時，親行提訊，是否系海洋劫盜，抑系賊人伙黨之處，嚴切跟究，務得實情。用兵之時，不必按例具題，一面奏聞，一面正法。并著拿獲一案，即將審辦情形，先行具奏。其未獲者，俟拿獲審訊明確，再行隨案續奏。

至漳、泉二府应征錢糧，據奏虽于二月間具報開征，并未報司完解，現在出示曉諭，除已征者即提解司庫，其未完錢糧及屯米概行緩征等語。漳、泉各屬，虽已具報開征，而各州縣因承辦兵差，未及催征報解。所有未完錢糧及屯米，業經該督遵旨出示緩征，務須督飭所屬嚴行稽察，實力查辦，俾閭閻得受實惠，以紓民力，毋任吏胥影射滋弊。

又據李侍堯奏，藍元枚處派往兵力，已為壯盛。兼聞賊中被脅之徒，多有急欲自投者。兵勢一振，賊黨自當解散等語。此是極好消息。前據藍元枚奏，在彰化地方傳旨曉諭，即有民人從賊巢投出，自訴并非賊黨。該參贊詳加開導，皆知歡欣鼓舞，共慶更生。今李侍堯又聞有被脅民人急欲自投之信，可見賊黨漸已离散。但李侍堯所聞之信得自何人，著即詳悉復奏。至賊中被脅民人，現既紛紛投出，常青等務須乘此機會，設法招徠，廣為曉諭。一經投出，或令其入伍食糧，或令其歸農安業，務使聞風踊躍，投效爭先，俾賊黨日就离散，勢如瓦解，此為最要。

又據奏查訊彭喜、賴樹二犯被獲緣由，此等匪犯既被官兵義民拿獲，其為黨惡無疑。況現在正須嚴拿逸犯之時，其有形迹可疑者，即被兵民誤拿，亦不得為冤抑。若向將弁兵民逐一跟詢推

求，将弁兵民心怀疑畏，必致观望束手，逸匪等转多漏网。着传谕李侍尧、常青等，此后拿获匪犯，除实系良民被兵民挟嫌索诈诬陷，及本系义民曾经随征出力，确有可据者，自应照例宽释外，其余被获之犯，竟无须再行跟送，以致转得疏纵也。

至常青处所请添调官兵，其先派往之闽、粤兵四千，久已到彼，其余各兵陆续配渡开行，此时自己齐到。蓝元枚处应添兵五千，亦经李侍尧派拨前往，两处兵力愈为壮盛。现在南路贼匪，经官兵搜剿，贼目庄大田已有潜逃之信。今据李侍尧奏，北淡水一路，渐觉宁贴，时有米船到彼，粮价平减。是南北两路，于剿捕之事，俱有转机，道路自己疏通，声势联络。该将军等亟应趁贼匪溃败之时，乘官兵新到，及锋而用，各亲自统领南北两路，会合柴大纪，擒拿贼首贼目，进捣贼巢，迅速蔽功。常青、蓝元枚自前次奏到后，已阅旬余尚未有续奏。柴大纪于魏大斌等援兵到后，自必乘势剿杀，打仗得胜。亦久未据该参赞奏报，朕盼望捷音，日切悬注。著常青、蓝元枚、柴大纪，即将近日剿贼得胜情形，速行驰奏，以慰廑念。

至李侍尧所奏，守备罗礼璋、外委陈皋，在大屯山有挑运私磺匪徒，率兵前往查拿，该匪弃担而逃，不知去向等语，是何言耶？该守备既见有挑运私磺之人，自系贼匪，即使带兵不多，不能尽获，亦应擒拿一、二人，以便跟究严办，何至竟任该匪悉行逃散。罗礼璋、陈皋殊属无能，着蓝元枚严行申饬。此二人遇有劳绩，不准记功，以示惩戒。

再，据李侍尧奏，请将福宁镇何俊暂署水师提督一折，何俊如果熟悉海疆，足资弹压，自可令暂署，否则前次派出赴闽之王柄，人亦明白，著该督于此二人内，酌其才具，实堪胜任者量委一人署理水师提督，于巡缉稽查，更当得力。

将此由六百里加紧谕令知之。仍着常青等将于何日会合进剿得胜情形各行驰奏，并着李侍尧续得地方官禀报两路得胜信息，一并速奏。朕日夕盼望捷音之至。并谕福康安知之。

钦此。遵旨寄信前来。

钦差湖广总督常青等奏台湾府知府

杨廷桦病故暂委杨廷理署理片

乾隆五十二年九月初九日批 军录

臣常青、臣恒瑞跪奏：窃查台湾府知府杨廷桦自抵台湾任事，一切堵御、巡防经理粮饷，均属得力。嗣于七月十五日感冒风寒，病势沉重。当据台湾道永福验报，臣等以该府承办军需员缺紧要，随咨会督臣李侍尧遴员署理，列衔具奏在案。兹据该道禀称，该员杨廷桦于八月初六日病故等情前来。除臣会商督臣李侍尧暂委台湾府海防同知杨廷理署理外，谨附片奏闻。伏祈圣鉴。谨奏。

乾隆五十二年八月初十日。

乾隆五十二年九月初九日奉朱批：已有旨了。钦此。

谕内阁将杨廷理补授台湾府知府

乾隆五十二年九月初九日 台湾档

乾隆五十二年九月初九日内阁奉上谕：

据常青等奏，台湾府知府杨廷桦现已病故，所遗员缺，暂委

海防同知杨廷理署理等语。杨廷桦自抵台湾任事后，于一切堵御巡防，及经理粮饷等事，均属奋勉出力。杨廷桦著给还布政使原衔，以示优恤。杨廷理随营剿捕，甚属奋勉，前已降旨赏戴花翎，所有台湾府知府员缺，即著杨廷理补授。钦此。

福建汀州镇总兵普吉保奏请速派大员

会同办理折

乾隆五十二年九月初九日批 军录

奴才普吉保跪奏，为奏闻事。

本年八月十七日，承准参赞提督臣蓝元枚移知，将一切官兵交奴才带领。查蓝元枚于七月二十日沾患痢疾，尚可支持，七月二十五日及八月初八等日，连次出阵，病势渐增。奴才于十七日亲赴大营，见其精神困倦，起立不能，尚复力疾办事。奴才面加劝慰，冀其调理速痊，一面移咨督臣李侍尧，并飞禀将军臣常青指示机宜，速拨大员迅来鹿港，会同办理。（朱批：汝非大员乎？没志气，无用之物。）奴才仍回马鸣山军营，迨于十八日，据行营中军参将福兰泰禀称，参赞提督臣蓝元枚于本日巳时病故。奴才驰赴鹿港大营，当将钦颁福建水师提督印一颗，钦颁福建陆路提督印一颗，敬谨封固，飭交行营中军参将福兰泰收贮，并飭地方官一面料理殓殓外。

伏查派添漳州、粤东之兵，漳州兵已到一千三百余名，粤东兵仅到四百六十名，其余船只想因连日风雨，未知停泊何处，现飭各路稽查，俟兵力到齐，将军派拨之员到港，奴才自当听候指示，悉心筹度，相机进剿。（朱批：不成话。）实力奋勉，仰慰

圣慈之廑念。断不敢稍涉因循，致罹重谴。惟是贼匪诡譎多端，若竟由西螺进攻斗六〔门〕，此时蓝元枚甫经病故，添助之兵，又未到齐，鹿港一带军营，统理乏员，诚恐匪逆乘虚来扰，关系匪轻。奴才不得不先事预防，故仍驻马鸣山军营，以为鹿港捍卫，俾居冲要，庶各营易于麾使。其沿海一带口岸，严飭各员弁留心堵御稽查，以候常青派拨大员，并添调之兵到日，会合攻剿，无难一举殲事。所有参赞提督臣蓝元枚病故，及奴才勉力督率官兵缘由，理合恭折驰奏，伏乞皇上睿鉴。谨奏。

乾隆五十二年八月十八日。

乾隆五十二年九月初九日奉朱批：览。钦此。

钦差湖广总督常青奏亲统官兵前赴诸罗折

乾隆五十二年九月初九日批 军录

将军湖广总督臣常青、参赞福州将军宗室臣恒瑞跪奏，为钦遵谕旨亲统官兵前赴诸罗，恭折复奏，仰祈圣鉴事。

窃臣等于八月初五日奉到六月十六日、二十三日两折朱批，又于初七日奉到六月二十六日一折朱批，并节次奉到谕旨：朕偶阅通鉴辑览，见魏司马懿破襄平一事，乃兵家声东击西之法，等因。钦此。又奉到谕旨：此时常青或已亲自领兵前往南潭等处进剿，不能分身，何不于镇将内酌派一员，等因。钦此。又奉到谕旨：常青此时或于总兵、副将内酌派一员固守营盘，常青等竟领侍卫章京、将备直趋北路，等因。钦此。又奉到谕旨：南路贼匪四处屯聚，牵缀官兵，常青等应将各路营盘酌量收小，以便堵御，等因。钦此。又奉到谕旨：提督柴大纪督率官兵义民奋勇杀

贼，调度合宜，著授为参赞，等因。钦此。又奉到谕旨：此时前调之兵早到，常青等趁此生力官军，遵照前旨，舍南趋北，与柴大纪会合，等因。钦此。又奉到谕旨：绿营怯懦，动称贼有万余及十数万，等因。钦此。又奉到谕旨：据常青、恒瑞奏，加派官兵应援诸罗，所办著著皆错，等因。钦此。又奉到谕旨：据刘峨奏，准常青咨拿台湾贼匪高文麟等，供出从贼之各犯姓名，于海口严缉，等因。钦此。钦遵各到臣。

伏念臣等督师剿匪，未能速擒渠逆，叠荷圣恩，添调满汉官兵，军威已为壮盛。惟因贼匪四出滋扰，臣等派拨分投抵御，转为贼人牵缀，实属昏庸失策，又不知事体轻重，于远省咨缉余匪，而现未妥速前进，均蒙皇上鸿慈矜宥，不即加诛，传旨严行申饬，复蒙指示淳切。臣等跪读之下，仰见睿谟，制胜于数千里外，悉皆洞烛机宜。而臣等漫无布置，办理错谬，上廛宵旰图维。臣等负罪难安，愧悔无地，惟有遵照奉到谕旨，直趋北路，前抵诸罗，以期合兵一处，捣穴擒渠。现已派令总兵梁朝桂，副将丁朝雄，参将宋鼎、曹贵，游击左渊等，再留兵二千名，同道府共守营盘郡城。适八月初七日添调粤省绿营兵一千名已到军营，臣等即将派守府城内外各弁兵，交梁朝桂等妥协防护。一面将因雨冲坏城棚守固，一面将关帝厅各营盘收小，即于八月十六日统领侍卫章京镇将等，带兵五千名起程，由旱路三坎店、木栅、湾里溪一带赴北，一至铁线桥，将附近盐水港等处匪众歼除，即知会柴大纪内外夹击，直达诸罗。此时蓝元枚亦必前来会合，以大兵全力往攻贼巢。

至柴大纪仰荷天恩，授为参赞，更可与臣等悉心筹办。以及同知杨廷理、杨世纶俱蒙赏戴花翎，并于军务告竣送部引见，该员等跪叩天恩，感激难名，益加奋勉。

再，臬司李永祺已于八月初五日到台湾府城，臣等现赴诸罗，一切军需要务，更可倚恃。又查附郡民庄，前已渐有归庄耕种者，而沿海小港汊，亦有可通粮食之处，是以郡城粮价不致昂贵。

今又奉旨著督臣李侍尧派令官兵前往东港剿除贼匪，而蓝元枚从笨港前来，自必将踞港之贼乘势剿捕，则两处粮路自可打通。臣等仍责成鹿耳门将弁，毋使贼匪抢占海边船只，则郡城粮食可期流通充裕。

至附从贼匪民人，臣等前已遵旨出示晓谕，现复刊刻誊黄，于各路通行晓谕，使贼中附从之众咸知悔罪。现又招募民人入伍，已得六百余名，分派能事将弁带领打仗，仍留心察看。惟查山猪毛义民一千三百余名来至军营，臣等冒昧未经遣回，兹蒙谕旨严飭，仰见皇上仁周海宇，视民如伤，臣等何敢饰词回护，自取重戾。但该处来投义民实与他处义民不同，又未便没其忠诚。兹据该义民副理刘绳祖、周敦、纪曾秀等二十余人连名呈称：粤民等祖父自康熙六十年、雍正十年逆匪朱一贵、吴福生等先后倡乱，屡从征剿，皆邀议叙职衔，因号为怀忠里，又建立忠义亭嘉奖匾额，此诚感恩有日，报德靡涯也。今贼首林爽文、庄大田等南北肆扰，上年十二月间凤山初陷，粤民未及防备，被贼烧毁沿边各庄粤民，等因。遵康熙、雍正年间各义民祖父设堆堵御之例，推举人曾中力为总理，分设六堆。统计义民八千余人，屡经打仗杀贼，今闻大兵齐集，怀忠各里，公议挑出一千三百余人。（朱批：可嘉，已有旨了。）俱各安顿家室，情愿随营征剿立功。今将军参赞传旨护送粤民等仍回本处，自为守御，粤民等仰戴皇仁，无不深感流涕。但现在义民在家公议时，誓愿杀贼，若非倚仗官军声势，恐难以伸其公愤。至其家室，里中公同照料，即本

处各庄防御事宜，人众心齐，贼匪已不敢轻犯，仍恳准令随征等语。臣等察其实系真情，乃于前次夹片内并未声叙明晰，上烦睿座，实皆臣等粗疏错谬，咎无可辞，合无再恳圣恩，仍准伊等随营报效立功。至臣等现赴北路，到处皆有义民投到，惟遵照谕旨，令其各在本庄防守，于官兵剿贼之时，共助声势。

再，解京狡供之廖东、胡番二犯，臣等并未向兵丁义民等查询，惟查取原咨原供，已于七月二十九日复奏在案。现查派赴应援诸罗之副将蔡攀龙、贵林等因风雨阻滞，尚未得有到彼信息。数日内诸罗亦无文报，臣等先经谕令驻扎盐水港之游击杨起麟，务须设法将火药送往诸罗。兹据该游击禀称，已密差兵丁押同番民，间道零星运送等语。是诸罗铅药尚可接济，（朱批：果如是，亦可慰。）一俟臣等起程前抵盐水港等处，即将剿贼情形先行奏报外，所有节次奉到谕旨遵办各缘由，谨合词恭折复奏，伏祈皇上睿鉴。谨奏。

乾隆五十二年八月初十日。

乾隆五十二年九月初九日奉朱批：此奏到于十五日奏折后，无可更谕。钦此。

谕钦差协办大学士福康安等

抵诸罗后即长驱深入

乾隆五十二年九月初九日 台湾档

大学士和，字寄钦差协办大学士总督将军侯福、钦差湖广总督将军常、领侍卫内大臣参赞侯海、闽浙总督李，乾隆五十二年九月初九日奉上谕：

据常青等奏亲统官兵前赴诸罗一折，此奏到于十五日奏折之后，无可更谕，已于折内批示。昨据常青奏到，南路贼匪尚在窺伺，惟恐往北后，贼匪在府城一带滋扰，拟先将南路贼匪剿除，再往诸罗等语。业经降旨，令常青竟留恒瑞驻守府城营盘，如果能亲统官兵将南潭一带贼匪奋力歼除，擒拿贼目庄大田，乘势恢复凤山县城，俾南路肃清，无虞后顾，即统兵自南而北，前抵诸罗，与福康安、柴大纪会合，进捣大里杙贼巢，亦属常青之功，固为甚善，想常青此时自早起身，伫盼捷音之至。

至所奏山猪毛粤东义民呈请随营征剿立功一节。该处义民闻知贼匪滋扰，公议挑出一千三百余人，俱各安顿家室，随同官军打仗杀贼，随营报效，实属义勇可嘉，自应优加抚奖，令其杀贼立功。所有总理此事之举人曾中力，著常青等查明，如系文举人，即酌量赏给文官，若系武举，即赏给武弁。如果人才可用，即予以实缺，亦无可。此外义民中尚有充当头目、队长者，亦着查明，量给顶戴，以示奖励，俾伊等倍知感奋，踊跃从事，以广招徕。

又据奏游击杨起麟禀称，现将火药，差兵丁番民间道零星运送诸罗，不致缺乏等语。诸罗被贼围扰，前据柴大纪咨报常青，城中火药渐形短缺，今该游击已将火药密差兵民从间道运送诸罗，正可以资接济。想柴大纪自能保护无虞，略为慰藉。

福康安、海兰察等此时自己前抵蚶江，即应遵照屡降谕旨，配渡速赴鹿港，统兵前赴诸罗，破贼解围，与柴大纪会合进剿。而常青廓清南路，亦即可由南往北，剿杀沿途贼匪，前抵诸罗，官军会合一处，声势联络，即可长驱深入，直捣大里杙贼巢。福康安等务须倍加勉力，鼓勇直前，以期捷音速奏。

同日又据普吉保奏，蓝元枚病故情形一折，内称一面移咨李

侍尧、常青等，速拨大员，迅来鹿港，会同办理，俟派拨之员到港，即当听候指示，相机进剿等语。所奏殊不成话。普吉保驻守鹿港，并未寸进。及蓝元枚患病，已将官兵交伊管束，伊并未将该处情形如何料理处，专折具奏。昨已有旨飭谕，并令福康安到彼后，向普吉保面加诘询。至蓝元枚患病身故，普吉保正应激励将弁，督率兵民，悉心筹办，奋力自效，即自欲见长亦所当然。乃转移咨常青等派拨大员，前赴鹿港。试思普吉保身系总兵，岂非大员？于剿捕贼匪，宁非伊分内之事？即使提督印信不敢擅用，亦岂得旁观坐视，一筹莫展？伊在彼所司何事？著福康安将此情节，一并向普吉保面加诘询，令其明白登答，据实复奏。看来普吉保竟没志气，系一无用之物，将来在彼，恐属无益。即总兵亦不能胜任，徒令坐享俸廉，不足示儆。俟事定后，福康安即飭伊回京候旨，令其前往新疆换班，以赎前愆。

计福康安刻下已抵蚶江配渡，直赴鹿港。想李侍尧自有奏报在途，指日可到。并著传谕该督，得有军营禀报情形，及常青前赴南路剿杀贼匪，恢复凤山，并诸罗曾否得胜之处，即迅速驰奏，以慰廑注。将此由六百里加紧各传谕知之。

钦此。遵旨寄信前来。

谕留京办事王大臣等将本旨及蓝元枚

遗折给黄仕简阅看命其回奏

乾隆五十二年九月初十日 台湾档

大学士和，字寄留京办事王大臣、刑部堂官，乾隆五十二年九月初十日奉上谕：

前据蓝元枚于八月十七日具奏，因染患痢疾，复感冒风寒，力疾打仗，精神愈觉不支，暂将一切官兵移交普吉保管束，并自请革职，留军前效力等语。旋据蓝元枚于十八日具奏遗折，览奏之下，深为怜惜，已另降谕旨，加赠太子太保，赏银一千两，敕部优加恩恤，并即令伊长子蓝诚承袭世职，于百日后，送部带领引见矣。蓝元枚自驻鹿港以来，办理一切军务，督率调度，甚有条理。伊自患病后，屡次亲带官兵与贼打仗，及至精神不支，难以力疾视事，仍自请革职效力，次日即已身故。可见伊病势沉重之时，犹知以军务为重，所奏毫无虚饰，甚为悯恻。

至黄仁简身为公爵，受朕厚恩，较之蓝元枚更为优渥。且伊在提督任，亦较蓝元枚更久，伊从前株守郡城，一筹莫展，即据称实系患病，亦应即奏明，将军务另派人料理，如蓝元枚据实陈奏，自请罢斥效力，方为稍有人心。乃何以计不出此，一味因循怙怯，借病支饰，辜负朕恩，其罪实无可解免。着将蓝元枚前后奏到之折，抄寄留京办事王大臣会同刑部堂官，即监提黄仕简，将此旨并二折给与阅看，并严加诘讯，令其明白登答，据实具奏。将此谕令知之。

钦此。遵旨寄信前来。

谕钦差协办大学士福康安等鹿仔草

等处留兵未可轻撤

乾隆五十二年九月十一日 台湾档

大学士和，字寄钦差协办大学士总督将军侯福、钦差湖广总督将军常、参赞恒、闽浙总督李、两广总督孙，乾隆五十二年九

月十一日奉上諭：

本日据常青等奏，分统大兵援应诸罗，及搜剿贼匪情形各折，系八月二十二日拜发，因船只被风打至广东潮州，经孙士毅另由江西一路加紧驰递奏到，颇为迅速，所办甚好。朕盼望军报，日深廑切，此次常青奏折，若因风打至潮州后，仍令由闽省发递，则往返稽延，转多时日。今孙士毅即由江西一路迅速递到，实属晓事可嘉。著赏给大荷包一对，小荷包二对，鹿肉一分，以示奖励。仍著该督得有台湾剿贼信息，随时速奏。

至常青奏，添调浙、粤满兵，计日即到，恒瑞已亲带侍卫章京等，于八月二十二日起程，带兵援应诸罗。常青即带现有之兵五千余名，搜剿南潭、中洲一带贼匪，擒拿庄大田等语。常青等久驻府城营盘，未得寸进，其因循观望，实应自知惭愧。今恒瑞既亲带官兵前往，即应由陆路顺便剿杀沿途贼匪，打通道路，会合柴大纪。倘由水路去，是避府城北之贼，殊不知意。而常青统兵先赴南路，将南潭、中洲一带屯占贼匪悉力剿捕，以清肘腋，则恒瑞前往北路，可无后顾之忧，亦只可如此办理。常青务须督率将弁，奋力前进。若能将贼目庄大田擒获，即属常青之功，可赎前愆。常青、恒瑞分路进兵后，即著将南路剿杀贼匪及接应诸罗破贼得胜各情形，迅速驰奏。至所奏恒瑞应援诸罗，仍由海道前赴盐水港等处，相机进剿一节，现在诸罗被贼围扰，望援甚切。恒瑞自应由陆路前往，遇有贼匪即痛加剿杀，速抵诸罗。今转由海道行走，竟是避贼，且道里纡回，未免又致迟缓。著常青等即将何以不由陆路往援之处，据实具奏。

又所称接据柴大纪咨称，欲暂撤鹿仔草、盐水港之兵，以救诸罗。俟诸罗围解，再行分兵驻守等语。鹿仔草、盐水港二处，系府城前往诸罗要路，现尚有贼滋扰，自应留兵驻守，未可轻

撤。若此时该二处尚未撤兵，即不必轻易撤动。倘柴大纪因县城围急，已经调往，则恒瑞于带兵往援时，即应分派将弁，酌留兵丁，在彼加意驻守为是。

又据常青等奏，贼匪在鹿仔草、盐水港攻扰，俱经游击邱能成、杨起麟领兵杀退等语。邱能成、杨起麟屡经带兵杀贼，甚属奋勉。邱能成已由守备超擢，其游击杨起麟，著交福康安查明，如遇有参将缺出，即奏明升补，以示鼓励。至蓝元枚所遗水师提督员缺，朕意欲即令柴大纪调补水师提督，今因鹿港一路乏人经理，是以先令蔡攀龙署理。又恐蔡攀龙未能即抵鹿港，续经降旨，令李化龙暂行署理。至陆路提督一缺，朕意蔡攀龙屡次带兵剿贼，且为贼匪所畏，最为出力，将来自可擢用。但伊甫由游击超擢副将，又升总兵，为时不过几月，若遽任提督，未免稍骤。并著福康安留心察看，如果蔡攀龙实能打通诸罗道路，接应柴大纪，打仗奋勉，著有劳绩，即奏明将伊升擢。否则，于军前总兵内，择其实在奋勇出力者，保奏一员，补授陆路提督，以示奖励。常青所奏，在三坎店与贼打仗，广东义民随同官兵杀贼，颇为出力。其阵亡者，皆当查明赐恤，而随军之义兵，亦应给予口粮。

再，据奏蔡攀龙应援诸罗，为风雨所阻，已阅两旬，此时可到该处等语。蔡攀龙究于何时前抵诸罗，杀散贼匪，会合柴大纪，并著福康安、常青等，得有信息，即行驰奏。现在府城、鹿港二处，添调各兵皆已早到，恒瑞已统兵自南而北，福康安亦即日前抵鹿港，正当统率大兵，乘锐进剿。而常青廓清南路，擒拿庄大田，收复凤山后，亦即可统兵前进诸罗，会合一处。福康安等务须乘此兵势联络之时，督率将弁，奋力鼓勇，进捣大里杙贼巢，以期一举集事。又据常青奏，该处溪水涨发，道路泥泞。虽系台湾地方非北方可比，但此时已届深秋，天气日渐高爽，雨水

亦已稀少，正应迅速进兵，擒渠扫穴，不可藉词稍有迁延，致失事机，此为最要。

又，本日据镶蓝旗都统奏，接准李侍尧等咨文，将该旗被贼戕害之原任同知长庚家产查封一折。此事李侍尧等所办殊属漫无区别，著传旨申飭。前因孙景燧在台湾府任内，将库贮银两侵亏，至十余万之多。该员贪黷敛怨，酿成事端，又复任意亏缺，其罪甚重，不得以其身故，即置不问。是以降旨将伊家产查抄，以备抵项。至此外被贼戕害各员，究属因公被害，如在任内并无别项劣迹，尚应仍予恩恤，用昭激劝。至长庚止系同知，自不应有经管库项，今已被贼害，若又将伊家产查封，则该员等既不能仰邀恤典，转致家产抄没，岂为事理之平？除已另降谕旨，令该旗将长庚家产即行给还外，其任所贻财，著李侍尧毋庸查办。此外被害各员，并著李侍尧一体查明，如伊等任内实有侵贪款迹者，自应奏明，将其家产查抵；若并无别项劣迹者，俱著毋庸咨查办理。

将此由六百里加紧各谕令知之，所有本日常青奏折，著抄寄福康安阅看，仍著常青、恒瑞等，将两路进兵打仗得胜及诸罗杀贼各情形，一并速奏，以慰廑注。

钦此。遵旨寄信前来。

钦差湖广总督常青奏府城诸罗等处情形折

乾隆五十二年九月十一日批 军录

将军湖广总督臣常青、参赞福州将军宗室臣恒瑞跪奏，为搜剿得胜，并诸罗等处御贼情形，恭折奏闻事。

窃臣等于八月十五日，业将南路实在贼情，及未能遽趋北路

缘由，清字恭折奏明在案。查八月以来，秋雨连旬，至十六日稍霁。十八日探有贼人聚集府城北门外十里之三坎店一带焚劫，臣等于十九日卯刻亲率侍卫章京、镇将、协领等，各带弁兵，前抵离营十里之大湾塘扎住队伍。当派乌什哈达、岱森宝、郭尔敏色、希明、陆廷柱、谢廷选、杨廷理等带兵二千五百名，城内义民一千，广东义民一千，于辰刻到三坎店。有贼三、四千人，胆敢对放枪炮，移时不退。因该处溪水涨后，周围泥泞，是以贼人恃险。但泥水只深一、二尺，乌什哈达、岱森宝、希明等，带领官兵直淌过河，枪炮并施，冲扑掩杀，贼人败逃。计枪炮弓箭共毙贼二百余人，割献首级七颗，发辫耳记三十五个，夺获虎尾炮一尊，贼械二十余件，烧毁贼寮二百余间，地瓜干六十余担，米二十余石，分赏义民。阵亡千总徐得升一员，广东义民二名，（朱批：皆当赐恤。）受伤兵丁二名，广东义民五名，照例赏恤注册。

臣等带兵五百名，正在大湾塘接应，令镇将等分路追剿。旋据梁朝桂、官福差报，南潭、中洲一带有贼三、四千攻犯营盘，并分攻桶盘栈。臣等随带兵五百名，飞赴营盘迎击。当经梁朝桂等施放枪炮，将贼打退，其小南门之桶盘栈，有副将丁朝雄、参将宋鼎并司道李永祺、永福共率兵民，排齐枪炮，贼即不敢前进，退入竹箐。时已未刻，地尽污泥，收兵回营。

至派赴应援诸罗之参将孙全谋，十五日来禀，该参将系初五日已到新店，现拟与驻扎鹿仔草之游击邱能成，商同将先到兵八百名前往盐水港，与游击杨起麟会救诸罗，而副将贵林、蔡攀龙、都司杭富俱未见到。嗣又据杨起麟、邱能成连日来禀，初九、初十、十二等日，贼匪在盐水港、鹿仔草攻扰，俱经该游击等杀贼多人，贼即退去。但均未禀及曾否已通诸罗之路。兹十九日接据参赞柴大纪十三、十五等日小字文报，内称贼匪四处搭寮，逼近

县城外庄，现在激励兵民，竭力固守。又称欲暂撤鹿〔仔〕草、盐水港之兵，以救县城，（朱批：此二处似不应撤，若县城甚急，已经调往，则恒瑞之兵即当派人分守此二处为是。）俟县城围解，再行打通道路，分兵驻守等语，是诸罗贼势仍未少减。查副将贵林、蔡攀龙等，虽阻风雨，今阅两旬，计此时亦必齐到。又有杨起麟、邱能成合兵向前，定可直透诸罗，痛歼贼众。

又臣等于二十日接据参赞蓝元枚咨，称因患病疾，调治未能即愈，暂将官兵移交汀州镇普总兵管理等因。并据鹿仔港署同知黄嘉训禀称，蓝参赞患病疾沉重，于八月十八日病故等语。伏查鹿仔港添有粤省、漳州等兵，一切进剿事宜，正须加意经理。臣等已飞札普吉保，并广东镇将李化龙等，（朱批：早有旨令李化龙署理，以待福康安。）用心防守，另图进剿。

再，臣等遵奉谕旨，刊刻眷黄，通行晓谕远近民人，咸有再生之乐。其呈请归庄者，当即散给腰牌，令其各安本业，并有连庄具呈，俟大兵一到，情愿齐心扑贼者。至沿海安平等处，投充入营者颇多。已据守备林登云募得年壮新兵一千余名，又郡城义民首亦时有呈送入伍，并有欲来投诚之人。虽少费稽查防范，然从此离间解散，自有得力之处。

又查添调之粤省绿营兵，已到军营。浙、粤两省满兵，现俱在洋，皆可先后进口。一经到齐，臣等先将附近之南潭、中洲、茑松、大穆降各贼巢，歼除净尽。并驰赴南路剿扑庄大田，（朱批：若生擒此贼，亦可将功折罪矣！）以清肘腋，即统兵趋北，进攻斗六门，直捣首逆林爽文贼巢。所有现在搜剿得胜，并诸罗御贼各情形，谨合词具奏，伏祈睿鉴。谨奏。

乾隆五十二年八月二十二日。

乾隆五十二年九月十一日奉朱批：即有旨谕。钦此。

钦差湖广总督常青奏拨兵应援诸罗等情折

乾隆五十二年九月十一日批 军录

臣常青、臣恒瑞跪奏，为遵旨分统大兵应援诸罗事。

窃臣等接奉谕旨：本日询问常青赍折差弁，据称：南潭距桶盘栈只有五里等因。又奉谕旨：贼匪于屯据处所，挖有沟濠，埋藏竹签，止系自守之计。因酌留一人固守营盘，一人统兵速兵（赴）诸罗等因。又奉谕旨：据常青等奏，副将林天洛、参将廖光宇病故，已经委员署理，等因。钦此。伏查诸罗请援，臣等即应遵照节奉谕旨，亲统大兵前往。只因南路贼匪屯聚窥伺，难以遽离郡城。兹复仰荷训示谆切，谨遵谕旨办理。

现在添调浙、粤满兵，俱已陆续渡海。江宁将军永庆、广东副都统博清额，于二十一日已到军营。带到满兵四百余名，其在后满兵二千余名，亦计日即到。臣等悉心筹酌。臣恒瑞即亲带侍卫章京岱森宝、富克精额，副将谢廷选，游击林起凤、刘越等，共统领满、汉官兵三千名，于八月二十二日起程，应援诸罗，仍由海道前赴盐水港，到鹿仔草相机前进。（朱批：此竟是避贼矣！何不由旱路遇贼进剿？）若副将贵林、蔡攀龙，参将孙全谋等所带兵丁一千六百名，已同驻盐水港游击杨起麟、驻鹿仔草游击邱能成等，已将围困诸罗之贼杀散，臣恒瑞即将沿途贼踞之庄，悉力剿除，使道路通顺，前抵诸罗，与柴大纪面商，或派官兵防守盐〔水〕港、鹿〔仔〕草，或调鹿仔港新到之兵，夹攻斗六门，均俟临时酌定。

臣常青仍带现有之兵五千余名，搜剿南潭、中洲、大穆降一

帶賊巢。虽賊目庄大田往来向无定处，亦必设法擒拿。南路一清，即会剿首逆林爽文大里杙巢穴。至臣常青赍折差弁饶成珑，系省城人，一到台湾即经出差，误以臣等营盘在桶盘栈，不知桶盘栈在大南门外。臣等驻营之关帝厅，在大东门外，距府十余里，南潭又距大营十余里。但十余里亦非甚远，臣等未能速清肘腋，实属无所辞咎。（朱批：应惭愧耳。）

再，臣等据柴大纪原禀，有庄民奔报賊目蔡福、叶省炮伤拾回等语。臣等未经询明具奏，亦属糊涂。但现在已被賊踞之庄，其庄民未必尽皆坚心从賊。如南路賊庄内亦时有投出之人，是以臣等亦每得賊中消息。（朱批：得消息而不前往，何用？）兹打猫街、牛稠山奔报之庄民，或系有心投出，亦未可定。除俟得有打通诸罗确信，及臣恒瑞前抵诸罗，星即驰奏外，所有奉到諭旨遵办缘由，谨合词恭奏。谨奏。

乾隆五十二年八月二十三日。

乾隆五十二年九月十一日奉朱批：览。钦此。

諭欽差协办大学士福康安查詢常青

恒瑞處置純繆等情

乾隆五十二年九月十二日 台灣檔

大学士和，字寄欽差协办大学士总督将军侯福，乾隆五十二年九月十二日奉上諭：

昨据常青等奏，现在浙、粤满兵三千名，计日到齐，恒瑞即亲带侍卫章京等，统兵于八月二十一起程，应援诸罗，仍由海道前赴盐水港，到鹿仔草相机前进。并接据柴大纪咨报内称，賊

匪四处搭寮，逼近县城，欲暂撤鹿仔草、盐水港之兵，以救县城，俟县城围解，再行打通道路，分兵驻守等语。朕披览之下，即觉其办理纒缪，已降旨训谕，令其不可轻撤，若已经撤动，著恒瑞即酌派将弁留兵驻守矣。

今复辗转思维，此事大有关系。柴大纪乃有筹算之人，伊岂不知从前魏大斌前往诸罗时，将军装火药留于鹿仔草，交邱能成等看守，若官兵一移，贼匪必致抢劫。乃为此撤调之言，明系因诸罗围困救援不至，常青等总不肯发大兵往救，故为此言，以激动常青等之意。而常青不但见不及此，亦茫无筹划，并未给与主意，无所可否，仅以一奏塞责，实为负朕委任。若常青等稍有见识，自当将鹿仔草现存军装火药甚为紧要，若将官兵撤动，转被贼人抢去，更属不成事体之语，飞檄柴大纪，令其不可轻撤，一面即自统官兵由府城至诸罗陆路，速往救援，仍遵前旨，留恒瑞驻守府城，方合机要。乃竟计不出此，常青不往北而往南，恒瑞又不由陆而由海，绕道避贼，竟置鹿仔草、盐水港于不问。且前此蔡攀龙等数次接应，皆由海道绕往，已为非是。恒瑞亲统三千大兵，何向不克，正可将沿路贼匪痛加歼戮。纵使少迟一二日再到诸罗，方无后顾之忧。而乃又踵恒怯故辙，绕海前往，断不能将鹿仔草军装火药带往。是诸罗又添三千吃饭之人，岂不又成笑话？且折内又不将是否撤调军装火药，有无妨碍，及因何由海道绕往，不由陆路剿除之处，详晰奏闻。看来伊二人于军旅之事，全然不能措置，即留于台湾亦属无用，著传谕福康安，到鹿港后，督率官兵接应诸罗，打通道路，与常青等会合一处之时，将此旨向常青、恒瑞面加诘讯，令其逐层登答，据实具奏。

现在海兰察等及各镇将多人，不乏领兵之员。福康安当察看情形，若南路实带兵乏人，不妨留伊二人在彼，令其立功赎罪。

若实在不能得力，留彼亦属无益，即一面据实具奏，一面令其回京候旨。但常青等昨日奏到之折，系上月二十二日所发，计接到此旨，又须二十余日，是来往已在四旬之外，诚恐缓不济急。朕既思及此处，知常青等办理失策，不得不明切指示。著福康安于抵诸罗后，将盐水港、鹿仔草之兵曾否撒动，前游击杨起麟、邱能成具报将火药由间道陆续运送是否完竣，及恒瑞何以不由陆路剿杀贼匪，绕海避贼之处，严行查询，据实具奏。仍著将福康安于何日已抵鹿港，督率官兵前赴诸罗，及筹划一切军务，整饬调度之处，迅速由驿复奏，以慰廑注。将此由六百里加紧传谕知之。

钦此。遵旨寄信前来。

钦差协办大学士福康安奏

即赴台湾申明军纪折

乾隆五十二年九月十二日批 军录

臣福康安跪奏，为奉到谕旨，恭折复奏事。

窃臣于九月初一日接到八月二十三日奉上谕：常青初到台湾，尚有振作之气。及不能取胜，又见贼多，竟致年老无用，一筹莫展，等因。钦此。又接到二十四日奉上谕：前因常青等办理剿捕事宜，怯懦因循，是以特派福康安前往更换督办。今阅奏到之折，福康安不免为常青所感，略有畏难之意，等因。钦此。并跪读朱批奏折，仰见我皇上指示周详，谆切训谕，实深感激惶悚。伏念臣自幼承受天恩，至优极渥，实非他人可比。从前屡蒙任使，惟有勉竭愚忱，稍图报称，久在圣明洞鉴之中。兹以臣曾经军旅，特派前赴台湾统兵进剿。当此重任，宁敢先形惶怯，坐失

机宜。况逆匪林爽文滋事以来，黄仕简等既观望贻怯于前，常青又复怯懦因循于后，以致贼匪久未扑灭，上烦圣虑。臣在热河三日，召见军机大臣七次，谆谆训谕，皆系指授进兵方略。臣亲见皇上宵旰焦劳，具有人心，断不敢稍存畏难之见，复蹈常青等故辙，自取重戾。臣因南路逆匪既未剿除，诸罗被困危急，常青等株守郡城，尺寸不能前进，调度失宜，兵气馁弱，似应征调得力新兵前往进剿。臣原拟先行速渡台湾，激励将弁，相机办理。若于此项兵丁未到之前，已经摧破贼巢，即可飞咨停止。设或尚稽时日，彼时再行征调，更恐缓不济急。且贼党多籍隶漳、泉，内地消息颇通，见官兵添调甚多，先声所至，必闻风胆落。是以将臣管见所及，专折直陈。今蒙训示，始知前奏实属冒昧。

连日启看南来军报，据常青、恒瑞奏称：于十六日前往诸罗，留兵二千交梁朝桂看守府城，扬言十三日起程，而贼匪即于是日各要路四出拦截，仍复收军，不能前进等语。窃思南路贼匪尚在屯聚，该将军等自当一人留驻郡城，廓清南路。一人带兵直抵诸罗，方为妥协。乃常青、恒瑞一同前往，毫无措置。且起身日期定于十六日，倡言于外，正应移后数日，使贼人猝不及防。乃声称十三日起程，转令贼匪预先准备，以致梗阻道路。而柴大纪被困诸罗，只能尽力捍御，但所称贼匪于六月二十五日并力来攻，拥入学舍，若用大炮轰击，尽可透墙毙贼，因文庙伊迹，未敢施放，尤为不知事理轻重。至环营刨挖沟壕，系扎营后即应办理之事，何至受困日久，始令武举黄莫邦等尽办及此。看来常青、恒瑞、柴大纪于行军之事，措置均属乖方，茫无头绪。即此数端，已可概见。（朱批：此三人中，柴大纪尚为出力可怜，不必过责。）蓝元枚驻守鹿港，又已患病身故，此时南北两路官兵，仅能株守支持，断难望其振作。该将军等奏折递到，圣心自必更

深焦急。（朱批：何用说。）臣筹思及此，时刻难安，惟有赶赴厦门，相度情形，（朱批：更有何相度，速至鹿仔港整励兵威，解救诸罗为正办。）速往台湾，另行申明军纪，立使该处弁兵，气象改观，一洗从前委靡之习。并与海兰察等通盘布置，整顿兵力，（朱批：是，勉为之。）先操必胜之势，务期初次接仗，即将贼匪痛加剿杀。（朱批：自应如此，佇俟捷音。）一面追捕，一面出示，剴切晓谕，妥为安抚，解散贼党，想贼首贼目不难即就歼擒。总之，剿捕事宜，臣既蒙委任，惟当殚心竭力，妥速藏事，早慰圣怀，以尽臣职，固不敢冒昧轻进，亦不敢过于持重，（朱批：应如是。）以仰副圣主训诫之至意。所有奉到谕旨缘由，理合恭折复奏，伏乞皇上睿鉴。谨奏。

乾隆五十二年九月初二日。

乾隆五十二年九月十二日奉朱批：彼处兵已不少，恨无用兵之人耳！汝等如许能用兵之人去，更有何惧。钦此。

谕钦差协办大学士福康安等速解诸罗之围

乾隆五十二年九月十二日 台湾档

大学士和，字寄钦差协办大学士 总督将军侯福、闽浙总督李，乾隆五十二年九月十二日奉上谕：

本日因恒瑞带兵应援诸罗，由海道行走，甚为错谬。又柴大纪咨报常青，有欲将鹿仔草，盐水港官兵撤调之事，常青竟不置可否，仅以一奏了事，已详晰降旨训谕，并令福康安向常青、恒瑞面加诘询。正在封发间，复据福康安复奏，接奉谕旨筹办缘由各折，已于折内批示。

现在台湾府城昨据常青奏，添调浙、粤满兵，俱已陆续渡海。永庆、博清额已到军营，带到满兵四百余名。其在后满兵二千余名，亦计日即到。其鹿港一路，粤兵、漳兵此时亦已到齐。是南北两路兵力，已为厚集。今福康安所请川、黔两省之兵，亦已照数调拨，又益以广西兵三千。除台湾前调各兵外，统计新调之兵，又已不下二、三万。是此时不患兵少，所最要者，乃统兵乏人。福康安正当坚持定见，无庸疑虑，鼓勇直前，奋力进剿。乃折内尚称现在兼程驰赴厦门，察看情形，如鹿港有机可乘，即由蚶江配渡等语。是福康安不免尚有犹豫之见，览奏殊为烦闷。

鹿港一路，现在蓝元枚病故，李侍尧奏拜之折，福康安业经启阅，该处统兵无人，普吉保又系一无用之物，而李化龙亦止系一总兵，虽曾经历行阵，恐不可恃。况台湾郡城，常青、恒瑞在彼驻守，虽不能督率进剿，数月以来，亦尚能保护无虞。该处现已续到多兵，更有何虑？福康安此时必应遵照节次所降谕旨，决计迅赴鹿港，统领官兵，安定人心，振作士气，使壁垒一新，速赴诸罗，剿杀贼匪，援应柴大纪，与恒瑞等会兵一处，直捣大里杙贼巢，方合机宜。此乃一定不易之理，岂可尚有游移？福康安未免当局者迷，想接奉此旨，自即已由蚶江配渡，直抵鹿港，朕盼望甚切，宵旰靡宁。福康安于何日前抵鹿港，著即迅速驰奏，以慰廑注。

福康安之意，不过惑于常青等贼多兵少之说，未免心存瞻顾。殊不思剿扑台湾逆匪一事，以天理而论，朕于台湾百姓惠爱抚绥，与内地一视同仁，并未因该处地土丰饶，有丈量加赋之事。而逆匪林爽文，以愚贱编氓，乃敢于光天化日之下，纠众倡乱，劫县戕官，荼毒百姓，实为覆载所不容。岂有上苍不默鉴朕衷，仁爱斯民，而转令此等逆匪肆意滋扰，久延残喘之理？即以人事而论，林爽文不过么麀乌合，一时蚁聚，其伙党虽多，止系被贼逼胁，

无奈听从，岂肯甘心从贼？即如现在台湾情形，广东、泉州义民，皆知激发义愤，随同官兵剿贼，在各村庄率众堵杀。是林爽文党羽不过漳州一处之人，为之抗拒官兵，较之粤东、泉州义勇百姓，仅止三分之一，即以台湾之人攻台湾之贼，已属事半功倍。况加以如许官兵，更复何往不克，又况陆续添调之兵，源源接应耶？且林爽文所有粮食、火药等项，止系在台湾各处抢掠，随用随尽，岂能久支？而官兵粮饷军械、铅弹火药，络绎运送，用之不竭，是贼人之力量有尽，而官军之接济无穷，贼匪又何能负固一隅，相持日久乎？此福康安尤可恃以无恐者。此时大兵云集，诸路会合，此等从贼匪徒，或剿或抚，自必纷纷解散。即投出充伍之人，或有大兵过后，扰乱后路者，即可趁此军威，回兵剿杀。则贼党日见解体，逆首林爽文自必穷蹙无归，无难速奏扫穴擒渠之绩。福康安又何所畏怯疑难，而不速行进剿耶？福康安既以朕心宵旰靡宁为念，倍当决机鼓勇，迅速筹办，以慰朕怀。福康安果能胸存成见，一力担当，布置一切，得有把握，福康安之志定，则朕之心亦安。福康安不可不善体朕意，勉图奏绩。

至恒瑞带兵援应诸罗，转由海道行走，反复思之，实为错谬。诸罗被贼围急，恒瑞既带兵往援，自应由陆路行走，既不致稽延时日，而于沿途贼匪痛加歼戮，使诸罗贼匪闻风奔溃，其围自解，则沿途杀贼，即所以援应诸罗。况前此蔡攀龙等由海道前往援救，所带兵丁止一千余名，或恐陆路一带贼匪梗阻，难以前进。今恒瑞带领大兵，声势壮盛，非蔡攀龙等可比。乃亦由海道绕往，自系恒瑞心存怵怯，不敢与贼打仗，为此迂道避贼之计，是示贼以弱也。使其由海道径至诸罗，而府城迤北至诸罗一带，仍被贼匪占据，是诸罗又添一魏大斌，徒增廩给，仍属无益。恒瑞身为参赞，何得退怯若此？

再，柴大纪咨报常青，欲撤鹿仔草、盐水港之兵，以救县城一节。柴大纪系有筹算之人，宁不知鹿仔草一带，魏大斌所带军装火药在彼存贮，该处驻守兵丁未可轻撤，且即将该二处官兵撤调，亦属无多，柴大纪岂必恃此项兵丁，以为御贼之用？自系因屡次向常青等请兵救援，而常青等茫无筹划，并不亲身速往援应，故为此撤调之言，以激动常青等之意。而常青于鹿仔草、盐水港撤兵之处，漫无可否。柴大纪被围之时，尚有此等筹运，设法请救，而常青等竟全无知觉，何至糊涂若此？著福康安将以上指出各情节，向常青、恒瑞严加诘询，令其明白登答，据实具奏。

看来目下情形，台湾郡城有常青等在彼带兵搜剿，柴大纪处已有蔡攀龙等及恒瑞先后往援，此二处转可无虑。而朕之所最悬念者，实在鹿港一路。蓝元枚系漳州人，今甫经病故，该处统兵乏人，贼匪自必闻知，心生窥伺。设使鹿港稍有疏虞，则诸罗之势自更孤，倍难守御，所关甚重。朕日夕廑念不置，福康安竟当不须游移，直由蚶江速赴鹿港，激励官兵，鼓勇直前为是。

前据李侍尧奏，檄令李化龙、普吉保二人，一留驻守，一往斗六门剿捕等语。想李化龙此时自己早接此信，何人驻守，何人前往剿扑之处，并著李侍尧一得鹿港禀报信息，即速行驰奏，以慰悬念。将此由六百里加紧各谕令知之。

钦此。遵旨寄信前来。

闽浙总督李侍尧奏蔡攀龙等应援诸罗折

乾隆五十二年九月十四日批 军录

闽浙总督臣李侍尧跪奏，为奏闻事。

窃照诸罗被围日久，前接将军常青来札，知又遣副将贵林、蔡攀龙，参将孙全谋等，带兵一千六百名，前往应援。嗣于二十四、五等日，接台湾各官禀报，因八月以来暴风频作，各兵由水路沿海往盐水港，去而复回，兼有失风耗损者，八月十四日尚未到齐。柴大纪等在诸罗尚在固守，惟粮食已无，甚为竭蹶，扎盐水港之游击杨起麟（朱批：此人甚为出力。可嘉。）先雇番民四人，各带火药二十五斤，番银四、五十圆，晚间伏地而往。后又雇十一人如前运送，俱得到诸罗。拟再多雇，暗运接济。十五日以后，风势稍息，贵林、蔡攀龙等料可俱抵盐水港进发。该道永福又令盐水港随营之县丞徐英等，多雇义民数千，协力前进，谅必打通道路等语，但尚未得蔡攀龙等到盐水港确信。二十八日，有自台回厦船户，据称二十五日浙、粤满兵各船，尚在澎湖守风。二十九日又有船到厦，询知蔡攀龙等已于二十日前后到盐水港。查该处及鹿仔草，本有府城遣往运送粮饷之夫役五、六千名，今该道又在盐水港雇义民数千，协同前进，是力量亦已厚集。且盐水港、鹿仔草亦俱有官兵驻扎，蔡攀龙等见前此魏大斌等轻进被截，自必步步为营，接续前进，不至为贼所诱，定可打通道路。至永庆等兵船，已至澎湖，不日料亦可入鹿耳门。则府城兵力益壮，常青或更分兵亲自前往解围，可与柴大纪会合，再图进剿矣。谨先将近日探得情形，缮折驰奏，伏乞皇上睿鉴。谨奏。

乾隆五十二年九月初一日。

乾隆五十二年九月十四日奉朱批：览奏略慰。即有旨谕。钦此。

谕钦差协办大学士福康安等

坚持定见奋勇直前

乾隆五十二年九月十四日 台湾档

大学士和，字寄钦差协办大学士总督将军侯福、闽浙总督李，乾隆五十二年九月十四日奉上谕：

据李侍尧奏诸罗近日情形一折，内称柴大纪现在固守，经游击杨起麟先后雇番民运送火药番银，俱得到县接济。询之船户，知蔡攀龙已于八月二十前后到盐水港等语。览奏略慰，已于折内批示。诸罗虽被贼围，粮饷火药不无短缺，经杨起麟雇番民运送接济，实为出力可嘉。杨起麟前已降旨，遇参将缺出，即令补用矣。

至台湾贼匪，只系么麇乌合，常青等已因贼众较多，心存惶怯。而福康安于途次启阅常青等节次奏报，亦未免为其所惑，过于疑畏。殊不思贼人伙党虽众，止系一时迫胁，无奈听从，岂肯甘心附贼？现据李侍尧奏，台湾道永福已令盐水港随营之县丞徐英等，雇觅义民数千人，协力剿贼。可见该处百姓皆知贼匪立就殄灭，无不急公投效。若大兵一到，或剿或抚，贼党自必纷纷解散，日就穷蹙。谅此等被胁民人，岂有不愿为良善子民，而转肯为贼出力之理？况官兵粮饷火药，源源运送，接济无穷；而贼人所抢劫者，随用随尽，势断不能久支，何虑不即时瓦解，束手就擒耶？且蓝元枚未经患病之先，朕早已令福康安前赴台湾督办军务，机宜凑合，实为成功先兆。即此揆之天理人事，贼匪断无不刻期扑灭，速就歼擒者。屡经降旨甚明，福康安尤当深信不疑，恃以无恐。福康安现在自己前抵鹿港，各处添调之兵，俱已齐

集。惟当志坚心定，激励将弁，振作军威，统率巴图鲁侍卫章京等，直前打仗，将贼匪痛加剿杀，则附从党伙，自必望尘奔溃。不特贼人解体，而投顺民人并可使之随同官兵打仗杀贼，岂有不如摧枯拉朽，所向克捷者乎？福康安务须坚执定见，奋勇直前，速奏捷音，以慰廑注。

至恒瑞带兵应援诸罗，由海道行走，实属大错。前此蔡攀龙由海道往救诸罗，伊止带兵一千余名，或恐中途被贼梗阻，难以迅速前进，尚属有因。今恒瑞统领大兵，正应由陆路速往，遇贼即行截杀无遗。即以解救诸罗，乃绕道避贼，非畏葸不前而何？此一节著福康安至诸罗，面向恒瑞严加诘询，令其明白登答，据实复奏。

至将来柴大纪调补水师提督后，所有陆路提督一缺，朕意现在台湾带兵总兵内，蔡攀龙打仗杀贼最为奋勉出力。前因其由游击甫擢副将，即升总兵，不过数月，若即用为提督，未免稍骤。今思该处带兵总兵，如李化龙等俱不若蔡攀龙之奋勇。而蔡攀龙系本省人，在闽最久，该处情形较为熟谙，自不若即以蔡攀龙补用陆路提督，更为得力。著传谕福康安、李侍尧，留心察看。如蔡攀龙果能奋力破贼，打通道路，援救诸罗，即先将蔡攀龙传旨补授陆路提督，以示鼓励。现在柴大纪处既有蔡攀龙、恒瑞先后带兵前往援应，杨起麟又雇番民运送火药军饷，又于盐水港雇有义民数千，协力前进，声势壮盛，自己杀散贼匪，直抵诸罗，看来该处已可无虑。惟鹿港一路，值蓝元枚病故之后，统领乏人，贼匪自必闻知，生心窥伺，殊深悬念。著福康安于速抵鹿港后，即将该处情形及如何统兵杀贼打仗得胜之处，迅速具奏。李侍尧得有鹿港、诸罗信息，亦著即行驰奏。

再，徐鼎士前此约会蓝元枚，由大肚溪进兵，伊由大甲溪进

兵，夹攻大里杙贼巢，本为佳策。蓝元枚未即前往，即已身故。现在该处究竟作何筹办接应，徐鼎士是否尚在淡水，抑已与李化龙等会同进兵大甲溪，总未据续有奏报，并著福康安、李侍尧各将徐鼎士一路近日攻剿情形，迅速复奏。将此由六百里加紧各谕令知之。

钦此。遵旨寄信前来。

广西巡抚孙永清奏官兵三千名起程赴台折

乾隆五十二年九月十四日批 军录

广西巡抚臣孙永清跪奏，为奏闻事。

窃臣于八月二十五日接准督臣孙士毅咨称，现准将军常青知会，奏请添调粤西官兵三千名赴台协剿。若恭候朱批，未免缓不济急，自应飭令即日起程等因。臣思台湾贼匪滋事不法，经官兵剿捕，犹敢抵死抗拒，实属罪大恶极，人人切齿，恨不立磔其躯，而歼其类。既准咨会到粤，自应即行派兵协剿，以期迅速扫除。查本月十三日先准督臣孙士毅密札，预备官兵三千名听候调遣。当经札商提臣三德，在腹地各标、协、营，照数挑派，所有应用军火器械等项，一律备齐，遴选勇练将弁，分起带领。其例应支借银两，及水路乘坐船只，陆路需用人夫，亦经密飭两司，及各地方官暗为预备。兹准到督臣来咨，即飞咨提臣会飭原派各营将弁，立即带兵自营起程，扣算路途远近，勒限均到梧州汇齐，分起启行，并委护盐道李镜图，驰赴平乐，左江道汤雄业前往潯州，分头督催照料。其柳州府一带，即飭右江道陆苍霖就近督催。臣于八月二十八日亲赴梧州府点送出境，务期迅速趲行，俾

早到一日，则军营早收一日之效。除俟全数出境另折具奏外，所有粤西官兵接准咨会，现饬起程缘由，理合由四百里恭折奏闻。并将派拨各营兵丁起数及领兵将弁名单，恭呈御览。伏乞皇上睿鉴。谨奏。

乾隆五十二年八月二十八日。

乾隆五十二年九月十四日奉朱批：知道了。钦此。

广西巡抚孙永清奏咨调各兵宽备火药片

乾隆五十二年九月十四日批 军录

臣孙永清跪奏：窃臣接准督臣孙士毅咨会，于各枪兵随带火药十斤之外，在附近营分再备三万斤解赴闽省备用等因。臣查鸟枪最为军行利用(器)，火药铅弹等项，自应宽为预备。粤西各标协营，现存预储三年火药，共二十七万有零，为数颇多。臣现在商札提臣三德，再添拨二万斤，共成五万，并配就枪子铅弹，于官兵行走之后，委员解赴潮州，听候督臣转解赴闽备用。理合附片奏闻。谨奏。

乾隆五十二年八月二十八日。

同日①奉朱批：览。钦此。

① 指乾隆五十二年九月十四日。

闽浙总督李侍尧奏请赴台兵丁

加给盐菜银折

乾隆五十二年九月十四日批 军录

闽浙总督臣李侍尧跪奏，为请旨事。

窃臣准将军常青咨商，台湾各路军营，食物昂贵，各兵日用不敷。据镇将等稟，清查照出口之例，官兵每名每月支盐菜银九钱之外，加给银四钱，委系实在必需，似应照伊所稟，俾得日用宽裕。再，满汉官兵，事同一体，并应划一办理，希即会衔具奏等因。并据台湾道永福等亦详称，现在台地薪蔬等项，无一不贵，应恳奏请照出口之例加给，庶各兵不致拮据等语。臣查征兵月支盐菜银元九钱之外，加给四钱，系出口之例。查台湾本隶闽省，似未便率请循照。但地隔重洋，且驻兵日久，一切薪蔬等项，不免昂贵。每有自台差来之兵弁，及解饷回厦之官员，臣细加访问，兵丁日用不敷，委系实在情形。可否照出口之例每兵每月额支盐菜银外，加给四钱之处，出自皇上天恩，臣谨会同将军臣常青，合词缮折驰奏，伏乞皇上睿鉴训示。谨奏。

乾隆五十二年九月初一日。

乾隆五十二年九月十四日奉朱批：著照所请行。该部知道。钦此。

钦差湖广总督常青奏复令广东庄义民回庄折

乾隆五十二年九月十四日批 军录

臣常青跪奏，为遵旨速行回奏事。

窃臣于八月二十三日奉到谕旨：常青等接奉昨日旨，即应遵照传谕，令义民等速回本庄，毋再迟延贻误，仍即速行回奏，等因。钦此。臣查瑚图里自山猪毛带领官兵义民来营，当因该义民等情愿随营征剿。臣等夹片附奏时，并未将广东庄设堆堵御，共有义民八千，除保守本庄外，又挑出一千余人，俱各安顿家室，公议来营各缘由，详晰声叙，实属错谬。嗣于初八日钦奉谕旨，严飭臣等即传旨护送该义民等回庄守御，该义民等感戴皇仁，益愿随营报效。当有义民副理刘绳祖等二十余人，连名具呈恳准随征，又经臣等于初十日据呈具奏在案。伏思瑚图里等由小路翻山前来，臣等未曾亲率大兵会剿南潭，已为失策，咎无可辞。若此等义民来营，并非出〔自〕本心，臣等或少有勉强，以致贻误，更属自取重戾。缘广东各庄士民，其祖父于康熙、雍正年间，曾为义民，随征逆匪，均邀褒奖（朱批：既有此等情节，何不奏明？今既奏明，昨已降旨矣！）故公同议明，挑出千余人来投大营，庶得倚仗官军声势，以伸公愤。所以节次打仗，尤为得力。至其本庄人众心齐，分设六堆，仍有七、八千人，不但自能防御，且有泉州庄民挈眷赴广东庄避难者。然惟山猪毛广东庄力能向义，若他处义民，仅能自守，原不能随征，此实在情形也。再此项义民，臣剿捕南路，即顺便令伊等各回本庄。（朱批：此又何必？太拘泥矣！可传旨嘉奖唤回，令其出力，图功赏用。）

又二十三日据盐水港守备黄象新禀称，副将贵林、蔡攀龙，参将孙全谋等，带领官兵一千六百名，已于十九日自盐水港起行前往诸罗等语。现虽未接柴大纪等文报，但参赞恒瑞又带满汉大兵三千名，于二十二日起行，声势更盛，诸罗定可无虞，道路自必通畅。至浙省满兵俱已到齐，粤省满兵虽未到齐，亦已陆续前来。臣惟有乘新兵锐气，速擒南路贼首庄大田，（朱批：此亦一策，今获庄大田否？速奏来。）即赶赴北路，会攻贼首林爽文大里杙贼巢，必不敢因循贻误，自干重咎。缘奉谕旨，理合恭折复奏，伏祈皇上睿鉴。谨奏。

乾隆五十二年八月二十四日。

乾隆五十二年九月十四日奉朱批：即有旨谕。钦此。

谕钦差湖广总督常青令山猪毛

广东民人仍回军营

乾隆五十二年九月十四日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李，乾隆五十二年九月十四日奉上谕：

本日据常青奏，仍令山猪毛广东义民各回本庄一折，所办又属拘泥，已于折内批示。前因常青等具奏瑚图里将山猪毛义民带回大营，即留营助剿，并未将该义民等本庄有八千余人业已安家室，无虞贼扰，及该义民等具呈恳请效力各缘由，详晰奏明，是以节次降旨飭谕，并令将该处义民即行送回本庄。嗣据常青将广东庄人数甚众，及该义民等情愿随同剿贼之处具奏，已降旨嘉奖。并令常青将义民中之总理举人曾中力，查明赏给官职；其充

当头目队长者，亦酌量赏给顶戴。乃常青既自知前此声叙未明，系属错谬，而于奉到续降谕旨之后，又欲将该义民等送回本庄，何不晓事体若此？该庄人众心齐，既自能防御，而挑出随营之一千余人，又能激发义愤，愿随官兵助剿，常青正当听从所请，令其随同杀贼立功，正可以助官军声势。今复行拘泥遣回，岂不阻伊等急公投效之心？著传谕常青于接奉此旨，即派瑚图里前往该庄传旨嘉奖，并谕以此事系属常青办错，现已有旨申饬。该义民等仍当前赴军营，随同官军征剿。如能杀贼立功，即当邀恩得赏官职。除前次到营之义民一千余名可仍随同前往，以助军威，令瑚图里明白宣谕，俾该义民等益加踊跃从事，更可得力。所有义民副理刘绳祖，并即著一体赏给官职，以示奖励。

再据常青奏，浙省满兵俱已到齐，粤省满兵亦陆续前来。常青乘新兵锐气，速擒南路贼首庄大田，即趋北路会攻贼巢等语。现在接应柴大纪之蔡攀龙等，据常青奏，已于八月十九日自盐水港起行，自己即日前抵诸罗。恒瑞又带兵续往，是该处军势已属壮盛，不但诸罗之围已解，而盐水港、鹿仔草一带，亦可无虞。今常青乘官兵新到锐气，自^①统领，先将南路屯占贼匪剿杀无遗，擒拿庄大田，此亦先清后路一策。常青务须奋力搜剿，以清肘腋，俾官兵前往北路，可无后顾之忧。其贼首庄大田是否业经拿获，即速行具奏。至恒瑞往援诸罗，不由陆路行走，转绕海道，实属错误。现在蔡攀龙已由盐水港前抵诸罗，若恒瑞彼时由陆路前往，正可将鹿仔草沿途一带贼匪迎头截杀，打通道路，会合柴大纪，俾声势联络。乃转由海道行走，岂不迂回迟缓？此时恒瑞自己由盐水港前进，而柴大纪处已得蔡攀龙接应之兵一千余

① 《钦定平定台湾纪略》（稿本）卷三十七为“亲自”。

名，兵力已为厚集。若与恒瑞合力攻击，先将盐水港以南，府城以北一带贼匪痛加歼戮，廓清道路，俾中间毫无梗阻，固属甚善。否则，或竟合兵一处，径捣大里杙贼巢，擒拿首恶，亦可期迅速集事。其如何定计前往攻剿之处，著即速行驰奏。

看来现在情形，诸罗、盐水港、鹿仔草一带，俱可放心。惟鹿港一路，蓝元枚于上月十八日病故后，无大员统领，恐贼匪生心窥伺，殊深悬切。但鹿港果有贼滋扰，李侍尧自必业已奏到。今并未据该督奏及，是鹿港谅亦无虞。福康安此时自己前抵鹿港，不必等候川、黔等省兵到，即当迅速督率将弁，鼓勇前进，直抵诸罗，会兵一处，相机进剿，速奏擒渠扫穴之绩，以副委任至意。将此由六百里加紧各谕令知之。

至此次常青奏折，又因风打至潮州，仍由孙士毅处转行递到。孙士毅办理妥善，不致迟误。但此折福康安未经启看，著一并抄寄阅看。

钦此。遵旨寄信前来。

谕钦差协办大学士福康安等查处

魏大斌被截兵溃一事

乾隆五十二年九月十五日 台湾档

大学士和，字寄钦差协办大学士将军侯福、闽浙总督李，乾隆五十二年九月十五日奉上谕：

前据常青奏，魏大斌带兵一千五百名援应诸罗，在鹿仔草被贼拦阻，将火药粮饷截断，魏大斌止带官兵四百余名前抵诸罗，损失官兵一千一百名等语。魏大斌经常青派令带兵前往援应诸

罗，既不能将沿途屯占贼匪奋力剿杀，打通道路，以致堕贼狡计，故将魏大斌放出去路，截断火药粮饷，魏大斌所带官兵损失至一千一百余名之多，是名为援应诸罗，其实城中徒增虚糜廩给之人，魏大斌竟属无用，前已有旨，谕令福康安确切查明，据实具奏。今思魏大斌到诸罗后，已阅月余，而鹿仔草被截粮饷火药，尚未能运送到县，魏大斌自应亲带官兵出城，将诸罗至鹿仔草一带贼匪，奋力往来剿杀，开通道路，接应粮饷火药，方可稍赎前愆。乃惟知株守城中，安然坐食，专待他人救援，伊竟袖手旁观，一筹莫展。试思魏大斌前往诸罗系为何事？且伊系总兵，非若偏裨将弁，必听柴大纪调度派委者可比。似此一味株守，又安用该总兵前往援应耶？看来魏大斌竟系心存畏怯，为一无用之物。著福康安到诸罗后，切实查明，将该镇恒怯贻误之处，即行据实参奏。

至魏大斌所带官兵损失至一千一百名之多，此项兵丁未必皆系阵亡，恐其中临阵脱逃，甚至有溃散从贼者，不可不查明严办。又前此凤山溃散兵丁，未经投出者甚多。俱著福康安于事定后，详细查察。如此等兵丁，后如实系遇贼打仗，被杀害者，自应照阵亡例议恤。即遇贼冲败溃散脱逃者，固有应得之罪，尚有一线可原。若既行溃散，复甘心从贼，抗拒官兵，则即与贼匪无异，拿获后不特该兵丁等按律正法，即其家属亦应查明缘坐，方足以申纪律，而示惩戒。并著李侍尧飭属于内地沿海一带严密查拿，如有溃散逃回及从贼者，即应讯明，分别按律严办，勿致倖逃法网。

现在诸罗已有蔡攀龙、恒瑞先后带兵前往援应，并据杨起麟等雇觅番人，运送火药饷银，看来柴大纪处自可保护无虞，转为放心，惟鹿港一路统兵乏人，恐贼匪生心窥伺，深为悬廛。并著

李侍尧得有该处禀报信息，及福康安于何日在蚶江配渡，何日前抵鹿港，并如何督兵进剿之处，各行迅速驰奏，以慰廑注。将此由六百里加紧各谕令知之，仍即速行复奏。

钦此。遵旨寄信前来。

大学士和珅奏黄仕简等赴台带兵情形及 台湾现有兵力片

乾隆五十二年九月十六日 台湾档

查前此黄仕简于本年正月初四日前渡台湾，至三月初九日解任送京，在台湾共计两月有余。常青于三月初九日前渡台湾，至今共计六月有余。至黄仕简渡台湾时，带兵二千名；常青渡台湾时，带兵五千名。再鹿港一路，从前任承恩等原带兵三千八百名。嗣后蓝元枚添调广东、漳州兵五千名，共有兵八千八百名。如福康安到后，再加现在添调川黔广西各兵七千名，计鹿港共有兵一万五千余名。谨奏。

谕钦差协办大学士福康安等 一抵鹿港即奋力进兵

乾隆五十二年九月十六日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李，乾隆五十二年九月十六日奉上谕：

前经屡降谕旨，令福康安由蚶江配渡前赴鹿港，即带领该处

官兵，直抵诸罗，会合柴大纪，相机进剿。计此时福康安自己前抵鹿港矣。因思鹿港前后派拨官兵，已有万余，该处不患兵少，惟患带兵将领不得其人。今福康安与海兰察带领巴图鲁侍卫章京百余人前往，皆骁勇趑捷，以一当千。现据琅玕奏，海兰察等与福康安于八月二十九及九月初四等日先后出浙江境入闽，想海兰察等抵蚶江时，自必等候福康安一同配渡，齐抵鹿港，激励将士，整顿兵力，军威振作，壁垒一新，即日前抵诸罗，合兵进剿。惟是常青一路，现在统兵搜剿南潭、凤山一带贼匪，擒拿贼目庄大田。该处带兵镇将，如蔡攀龙等，已经常青派令援应诸罗，恒瑞亦已接续前往，其余将弁，恐无奋勇可恃之人。应于所带巴图鲁侍卫等酌派一二十人，令其前赴南路，交常青派委，带兵擒拿贼目庄大田，更为得力。但福康安初抵鹿港时，该处至府城道路，或尚未通顺，难以派令遄往。应于前抵诸罗，杀散贼匪，与柴大纪会兵一处后，再行派往。彼时恒瑞、蔡攀龙自己早经会合，将诸罗以南、府城以北屯占贼匪，悉行剿杀，廓清道路。所派巴图鲁侍卫等，亦可迅速前往，不虞梗阻。至福康安抵诸罗后，其南路贼目庄大田，谅已经常青擒获，则其余贼自必望风而靡，凤山一带之贼，即可扫除净尽。常青统兵自南而北，已无后顾之忧，福康安自应与柴大纪等会合，直捣大里杙贼巢，擒拿贼目林爽文，迅速集事。若福康安抵诸罗时，常青尚未将庄大田拿获，福康安自当会合，统领大兵径趋大里杙，以为捣穴擒渠之计。不可因常青尚未得手，转置大里杙而先赴南路攻剿，舍近就远，使贼首得以负固稽诛，此为最要。福康安惟应将林爽文设法擒拿，巢穴倾覆，则其余贼匪无难速就歼擒。

再，徐鼎士前拟由大甲溪进兵，与蓝元枚夹攻大里杙，亦属善策。现在李化龙等曾否进兵会攻，昨已降旨询问矣。徐鼎士

处，前曾谕李侍尧添拨兵一千名，徐鼎士又招集义民熟番数千人，正可乘机攻击。福康安亦应于所带巴图鲁侍卫内，酌派数人，前往帮同带兵合剿，更可期得力。并著福康安於到鹿港后，即行酌量办理。

至常青自三月初间抵台湾后，在彼已阅半载，较之黄仕简在彼止有两月，耽延更为日久。且黄仕简止带兵二千余名前渡台湾，而常青渡台湾时，所带之兵已有五千余名，今又陆续添调多兵，是兵力较之黄仕简多至数倍。乃坐守郡城，毫无寸进，其因循株守之罪，实难解免。若此时常青能将庄大田拿获，收复凤山，俾南路肃清，即属常青之福，尚可将功抵罪。倘福康安等已将大里杙贼巢攻破，首恶就擒，而常青尚未能拿获庄大田，收复凤山，仍须福康安统兵前往剿捕蒧事，则常青之罪甚重，恐难邀宽宥矣。福康安一抵鹿港，务即督率官兵，相机筹办，速赴诸罗，奋力进捣贼巢，擒拿贼首，迅奏肤功，以副委任。仍著将如何派拨，何日与柴大纪会合攻剿得胜各情，迅速驰奏，以慰廑注。至福康安与李侍尧面晤后，于何日配渡前抵鹿港，及李侍尧得有军营禀报各情形，即行迅速驰奏。将此由六百里加紧各谕令〔知〕之。

钦此。遵旨寄信前来。

谕钦差协办大学士福康安等将魏大斌革职

蔡攀龙等分别奖赏

乾隆五十二年九月十七日 台湾档

大学士和，字寄钦差协办大学士总督将军侯福，钦差湖广总督将军常、闽浙总督李，乾隆五十二年九月十七日奉上谕：

据李侍尧奏报诸罗解围一折，内称接据杨廷理禀称，八月十七日贵林、蔡攀龙等到盐水港，领兵前进。二十日贵林、杨起麟、邱能成、蔡攀龙、孙全谋分为二队，一路进剿，经柴大纪带兵接应入城。于二十二日，仍复自诸罗杀出，以通道路。至恒瑞所统兵三千，因船少不能尽载，二十二日先往一千六百名，余亦即连日续进等语。览奏略慰。已于折内批示。

诸罗被围日久，经蔡攀龙等带兵援应，分队进剿，已于八月二十日直抵县，会合柴大纪。又复自诸罗领兵出城，往来剿杀贼匪，打通道路。蔡攀龙等实属奋勇出力，可嘉之至。柴大纪谋略素著，督率兵民捍御有方，著加恩赏给御用玉搬指一个，大荷包一对，小荷包二对。蔡攀龙已由游击屡加超擢，升至总兵，并已赏戴花翎、巴图鲁名号。俟大功告竣，另行加恩外，著先赏给大荷包一对，小荷包二对，以示优奖。副将贵林、参将孙全谋、游击杨起麟、邱能成，与蔡攀龙协力攻剿，杀散贼围，俱属出力可嘉，亦应加恩升赏。前此魏大斌带兵一千五百名援救诸罗，在鹿仔草被贼拦阻，将火药粮饷截断，止带兵四百入城，余俱损失。而抵诸罗后，又只知坐守县城，虚糜廩给，并未出城剿贼，已屡经降旨交福康安等查参。魏大斌畏葸无用，即著革职，仍交福康安留于军营，戴罪效力。若再仍前怙怯，不知奋勉自赎，即著拿交刑部治罪。所遗浙江温州镇总兵员缺，即著贵林补授。贵林所遗广东罗定协副将员缺，即著孙全谋升补。杨起麟前已有旨，令福康安查明，如有参将缺出，即行升补。今孙全谋所出广东大鹏营参将员缺，即著杨起麟补授。其邱能成著交福康安，遇有参将缺出，即奏明升补。除贵林已经赏戴花翎外，著赏给大荷包一对，小荷包二对。孙全谋、杨起麟、邱能成俱著各赏戴花翎，仍各赏大荷包一对，小荷包一对，以示奖励。

至恒瑞带兵三千名，不由陆路剿贼，绕由海道接应诸罗一节，实属错谬。现在蔡攀龙等已带兵直抵诸罗，复出城往来杀贼，若彼时恒瑞径由陆路前进，正可与蔡攀龙等南北分投截杀，沿途屯占贼匪，即无难乘势歼戮无遗。况恒瑞带领多兵，非若蔡攀龙止带兵一千余名，或虑贼匪梗阻者可比。乃转绕由海道，既致纡回迟缓，又因船少不能尽载，只带兵一千六百名先往，全不能得力。似此畏怯无能，又安用此大员带兵前往为耶？著福康安于抵诸罗后，即严切查明，据实参奏。

现在诸罗道路业已打通，各路策应之兵自己齐抵诸罗。福康安到鹿港后，自亦即日前往，与柴大纪等会兵一处，军威振作，声势联络，乘此得胜之势，合力直捣大里杙贼巢，贼首林爽文无难指日就擒。因思福康安等剿捕贼匪，除临阵歼戮不计外，其拿获首逆及有名大头目，自应解京尽法处治。其贼人小头目及伙匪等，若概行解京，长途押送，未免徒劳驿传。著福康安、李侍尧于获犯后，酌量轻重，如系贼匪助恶大头目，可备究讯者，应即派员解京；若不过随同伙犯，即著在该处申明正法，以免烦扰。至厦门地方，为拿获台湾匪犯解送经过要地，不可无满兵弹压。除另降清字谕旨，令李侍尧派调闽省驻防满兵一千名或五百名前住。今思五百名，恐兵少不足以示威重，竟应调拨一千名为是。朕为军旅要务，晓夜思维，凡所以代为筹划之处，无微不到。李侍尧自能仰体朕意，遵照妥协办理也。

至常青现在带兵前往南潭一带搜捕贼匪，今诸罗道路已通，福康安等即日会剿贼巢，常青亟应勉力奋勇，将贼目庄大田迅速拿获，收复凤山，肃清南路，统领大兵速赴北路，会合攻击大里杙，擒拿贼首，庶可稍赎前愆，毋得仍前延缓，自貽伊戚。

将此由六百里加紧各谕令知之。仍著福康安将于何日已抵鹿

港，前赴诸罗，与柴大纪会攻大里杙，常青曾否擒获庄大田，廓清南路，恢复凤山之处，各行迅速驰奏，伫盼捷音之至。李侍尧续得地方官禀报信息，亦即随时速奏，以慰廛注。

钦此。遵旨寄信前来。

闽浙总督李侍尧奏据报诸罗解围折

乾隆五十二年九月十七日批 军录

闽浙总督臣李侍尧跪奏，为据报诸罗解围事。

窃臣于本月初二日接将军常青抄寄折稿，知诸罗道路尚未打通，副将贵林、蔡攀龙等为风雨所阻，尚未有到诸信息，恒瑞又领兵三千前往接济等因。臣正在盼望信息，兹于初四日接署知府杨廷理禀称，中秋前后，军营连接柴大纪来文，并外间侦探消息，知诸罗尚在固守，尚可取土熬煎，米亦尚有出处。十七日贵林、蔡攀龙等到盐水港，十九日领兵前进，二十日贵林、杨起麟、邱能成为头队，蔡攀龙、孙全谋为二队，一路前剿。正遇大雨，贼又乘势包围，幸柴大纪带兵接应入城，兵民尚无大折。又探得到诸之兵，于二十二日仍复自诸打出，以通道路。（朱批：此是蔡攀龙之功，可嘉之至。胜于魏大斌远矣！）至恒瑞所统兵三千，因船少不能尽载，二十二日即先往一千六百名，余亦连日续进等语。查诸罗被围已逾两月，魏大斌等赴援，复被贼围，迨蔡攀龙等再往，久无信息，臣实为焦急，兹据杨廷理所禀，则蔡攀龙等已杀进诸罗，又行杀出，是道路已得打通。且前据台湾道永福禀称，已多雇夫役，将粮饷火药，随同前进等语。蔡攀龙等进兵时，自必一齐进发。是诸罗现已得势，即途次尚有贼匪伺

间出扰，而蔡攀龙等已可往来剿杀，断不至如魏大斌之再入围中，适恒瑞所带兵三千名，又已续到，兵力既可接济，军势亦益壮盛。数日内，恒瑞与紫大纪等自必会合面商，先将诸罗城外之贼剿洗，即可克期直攻大里杙矣！谨恭折具奏，伏乞皇上睿鉴。谨奏。

乾隆五十二年九月初四日。

乾隆五十二年九月十七日奉朱批：览奏略慰。余有旨谕。钦此。

谕新调福建水师提督柴大纪等

将如何筹划进兵速奏

乾隆五十二年九月十八日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、新调福建水师提督参赞柴、新授福建陆路提督参赞蔡，乾隆五十二年九月十八日奉上谕：

昨据李侍尧奏诸罗解围情形一折，蔡攀龙等带兵直抵县城，往来剿杀，实属出力可嘉，已明降谕旨，著柴大纪调补水师提督；其陆路提督员缺，即著蔡攀龙补授，并授为参赞矣。

诸罗被贼攻围日久，现经蔡攀龙等带兵杀贼解围，复自县城杀出，柴大纪、蔡攀龙自必乘势将诸罗以南、府城以北沿途屯占贼匪，悉数歼除，肃清道路。而诸罗迤南附近村庄义民，更可安辑。柴大纪等自必妥为抚慰，整顿军威，以图进取。计此时福康安已应由鹿港前抵诸罗，自可合兵进剿。但柴大纪，蔡攀龙于剿散沿途贼匪后，自即应定计，统兵往北，直攻大里杙贼巢，以为

扫穴擒渠之举。柴大纪、蔡攀龙现在彼此相商，作何筹划，著即将办理情形，迅速具奏。至杨起麟，既与蔡攀龙等同抵诸罗，其鹿仔草存贮粮饷火药等项，断无尚留该处，是否官兵运送诸罗县城？

又前据柴大纪奏，前此诸罗被贼侵扰时，有绅耆舖民挑送饭米凉水，分给官兵，已有旨令福康安等查明首先倡率之义民头目，酌赏官职。至帮同官兵固守诸罗县城之义民头目及义民等，亦应酌量加恩。并著柴大纪查明首先倡率及实在出力者，奏明分别酌赏职衔恩赉，以示奖励。

至柴大纪自驻守诸罗以来，激励兵民，竭力捍御，朕心时切轸念。今蔡攀龙等援兵一到，柴大纪即带兵接应入城，复与蔡攀龙自县城杀出，剿散贼匪，勇气振奋，朕心深为嘉奖，已赏给御用玉搬指及大小荷包，用旌劳绩。该处既得有胜仗，兼之道路已通，何以尚未见柴大纪奏报？柴大纪务须将该处如何打仗得胜情形，随时速奏。再，蔡攀龙现已擢任提督，授为参赞，是伊尽有奏事之责。该参赞在彼如何定计攻剿，打仗杀贼之处，亦著随时迅速具奏。

至杨起麟，现已升补广东参将，但伊系闽省人，在台湾日久，打仗出力，于该处情形自为熟悉，将来即应留于台湾，更为得力。著福康安俟大功告竣后，遇有台湾参将缺出，即行调补，以收驾轻就熟之益。

至常青现在带兵前往南潭一带搜捕贼匪，今诸罗道路已通，福康安等即日会剿贼巢，常青亟应督率将弁兵民，奋力擒拿庄大田，收复凤山，立功自赎，收效桑榆。其贼目庄大田曾否拿获，及如何收复凤山之处，并著迅速驰奏，以慰廑注。将此由六百里加紧传谕福康安等，并谕李侍尧知之。并著速行回奏，朕计日以

待之矣。

钦此。遵旨寄信前来。

福建汀州镇总兵普吉保奏候李化龙
到鹿港即进攻西螺斗六门折

乾隆五十二年九月十九日批 军录

奴才普吉保跪奏，为奏闻事。

窃奴才于本年八月十八日，将参赞提臣蓝元枚病故，并飞禀将军臣常青速派大员来港经理缘由，业经恭折奏闻在案。伏查逆匪屯聚诸罗一带，道途梗塞，文报不通。奴才前因鹿港为海口要地，逼近贼巢，若竟带兵前进，诚恐贼匪乘虚掩袭，关系匪细。且查各营业无可以驻镇弹压之员，是以飞禀将军臣常青，速拨大员前来经理，奴才得以请示机宜，可期一举蕲事。兹于八月二十二日据广东抚标中军参将张朝龙带兵来港禀称，粤兵二千名，统领系左翼镇李化龙，同于初七日齐抵厦门登舟，于十五日早一同乘风放洋出口。因风汛不定，到有不齐。今风势已顺，约计数日内即可到齐等语。奴才伏思前以鹿港统理乏员，关系甚大，不得不俟将军派拨之员来港。然后进发。今镇臣李化龙既经带兵前来，是统理有人，奴才一俟伊到，即可共为筹度，相机进剿。第该镇臣李化龙初到鹿港，于地势贼情难以深悉，奴才一面将此地情势详悉告知，乘此兵力已足，应留该镇臣李化龙在鹿港固守调度，奴才即亲带官兵前往西螺、斗六门一带，奋力剿杀，务期打通道路，捣穴擒渠，上慰圣念。其鹿港及各路防堵官兵，均关紧要，依旧分拨，合并奏闻。谨将筹划进剿缘由恭折具奏，伏乞皇上睿

鉴。谨奏。

乾隆五十二年八月二十四日。

乾隆五十二年九月十九日奉朱批：即有旨谕。欽此。

大学士和珅奏询问常青恒瑞赍折差弁片

乾隆五十二年九月十九日 台湾档

臣等询问常青赍折差弁水师右营千总李得恩，恒瑞赍折差弁委署骁骑校富亮。据李得恩称，我于本年三月初九日随常将军到台湾。富亮称我于五月十八日随恒参赞到台湾，每次跟随打仗，在府城东门外关帝厅沙港扎营。数月以来，屡次打仗。三月二十七、八等日，杀的贼人很多，每次约有六七百及千数不等。又六月十八日，贼匪万余人分路来犯府城，常将军、恒参赞一同带兵与贼打仗。此次杀贼千余人，其余带兵搜捕，贼人躲避树林竹箐，又沿路放水，道路泥泞，刨挖沟壕，阻挡官兵。官兵俱系步行，又路径生疏，难以追杀。七月内，将军等在南潭带领官兵追杀，贼人逃避，将贼人草屋篷寮俱行烧毁。因路径丛杂，处处可通，恐防贼人绕出攻犯府城，是以收兵回营。此后每日下雨，营盘俱有积水，未能前进。至二十九日，就差我们赍折渡洋，以后的事，我就不能知道。台湾地方每年五、六、七月雨水最多，土人谓之做秋，交八月后天气就渐晴爽，就可进兵杀贼人了。府城到诸罗道路，中间村庄俱被贼匪焚烧占住，数月不通信息。所有文报往来，俱系由海道至盐水港一带递送。南路贼匪为首的是庄大田，他的伙党传说有数万人，内中系百姓被贼胁迫的居多。贼人最怕的是官兵连环枪，贼人虽有鸟枪，不多。官兵遇贼打仗，贼人

即四散躲避，官兵掣回后，他又出来滋扰。大营内只有兵四、五千人，总因府城为重，恐防贼人抄犯，不能深入，这是实情。以后恒参赞、蔡总兵带兵往救诸罗，我等俱已起身，那里道路，我等俱是初次到台湾的，不曾走过。后来恒参赞因何由海道前往诸罗，我等实不能知道等语。谨奏。

谕钦差协办大学士福康安等抵鹿港后

即乘机进攻大里杙

乾隆五十二年九月十九日 台湾档

大学士和，字寄钦差协办大学士总督将军侯福、闽浙总督李，传谕福建汀州镇总兵普吉保，乾隆五十二年九月十九日奉上谕：

据普吉保奏，现在李化龙统领粤兵二千名，即可抵鹿港，一俟到齐，将该处情势详悉告知，留李化龙在鹿港固守，普吉保即亲带官兵往西螺、斗六门一带奋力剿杀等语。鹿港一路，前因蓝元枚病故后，深恐贼匪闻知，生心窥伺，而普吉保于蓝元枚将官兵移交该镇管束后，并未将该处情形及如何筹办进剿之处，详悉具奏，是以降旨饬谕。今据奏，一俟李化龙前抵鹿港，普吉保即带兵往西螺、斗六门一带攻剿，所奏较合机宜，殊觉改观。是鹿港现属安静，无虞贼扰。现在福康安已即日前抵鹿港，又有李化龙在该处驻守，普吉保自应乘粤兵新到，亲督将弁，速往西螺、斗六门一带奋勇攻剿，力图自效。

至福康安屡有旨谕，令由蚶江配渡，迅赴鹿港。福康安接奉谕旨后，自必加紧趲程，计此时已抵该处。现在诸罗一路，经蔡攀龙等带兵杀贼解围，与柴大纪会合，又自县城杀出，打通道路。

而恒瑞所带兵三千名，又接续前进，声势联络，军威已壮。其南路屯占贼匪，现经常青在彼领兵搜捕，自可指日廓清，将贼目庄大田擒获，收复凤山，仍往北路会剿。而鹿港现在情形甚属宁贴，李化龙到后，普吉保自己前赴西螺、斗六门剿杀贼匪。又此时台湾正值秋凉晴爽，道路已干，添调之兵陆续到齐，是南北两路剿捕俱为得手。福康安到鹿港后，自更无可畏虑，亟应趁此机会，带领巴图鲁侍卫章京等，速统大兵，直捣大里杙贼巢，将贼首林爽文一鼓成擒，以期克日蕲事。福康安尤须坚持定见，倍加奋勉，鼓勇直前，一得捷音，即迅速驰奏，以慰廑注。普吉保带兵进攻西螺、斗六门等处，如何打仗得胜情形，及李侍尧得有地方官禀报军营信息，俱著一并速奏。将此由六百里加紧谕令知之。

钦此。遵旨寄信前来。

闽浙总督李侍尧奏普吉保进兵斗六门折

乾隆五十二年九月二十三日批 军录

闽浙总督臣李侍尧跪奏，为据报鹿港进兵日期事。

窃臣前据普吉保咨称，俟左翼镇李化龙到港，该镇即带兵进攻斗六门等语。兹于本月初十日据理番同知黄嘉训，彰化县宋学灝，守备刘光国等禀称，李化龙已到鹿港，该二镇面商定义，李化龙留在鹿港驻守，普吉保带领粤兵二千，浙兵五百，漳兵二千，泉建（衍字）兵一千，定于初六日起程，由西螺进攻斗六门等语。查南北两路，半年以来，俱系堵御，并未进剿。而斗六门南接诸罗，北通大里杙，尤为贼匪往来要隘。今普吉保因粤兵、漳兵已到，即统领前进，及锋而用，看来必能得手。而诸罗之南，现有

蔡攀龙等打通道路，恒瑞又统兵三千前往剿杀，是兵力已俱集诸罗一带，不日定当会合进攻贼巢。（朱批：但伊等折奏总未到，为之焦急，而盼常青捷音，更不可言矣！）至北淡水为大里杙之背，前奉旨调兵一千，由五龙门出口，往徐鼎士处接济。臣即于督抚标及城守营内，凑派足数，并札知抚臣在省城就近料理配渡。八月十五日，已经放洋。嗣据报各船在洋遭风，间有飘泊各口岸者，今到淡已有七百余名。查徐鼎士处本有兵一千八百名，食粮民番七、八千名，今更得此兵一到，声势益壮。是以臣飞飭该副将星速进攻，以期乘虚捣穴，（朱批：好，此攻其背，亦足乱贼人心也。）勿得稍有观望。为此缮折驰奏，伏乞皇上睿鉴。谨奏。

乾隆五十二年九月初十日。

乾隆五十二年九月二十三日奉朱批：即有旨谕。钦此。

闽浙总督李侍尧奏柴大纪奏折

屡次迟延缘由折

乾隆五十二年九月二十三日批 军录

闽浙总督臣李侍尧跪奏，为遵旨复奏事。

窃臣于本月初八日接奉廷寄谕旨：昨据常青奏，令蔡攀龙等由海道赴援诸罗，似府城至诸罗陆路已被贼梗阻，等因。钦此。查本年正月中，柴大纪自府城领兵克复诸罗时，系由陆路进发，后于何时梗阻之处，并未见各官禀报。第查四月中常青遣参将潘韬带兵赴诸罗协守时，因陆路不通，改由海道坐船进盐水港，至鹿仔草上岸，陆行二十余里始至诸罗，是四五月间府城至诸罗已不能从陆路直达。惟盐水港、鹿仔草两处有柴大纪所派游击杨起

麟、邱能成等分兵驻守，是以水路尚无疏虞。（朱批：此系柴大纪之功，此两处若有疏虞，诸罗必不能守。常青昨奏柴大纪欲调此二人守诸罗，朕谓军机大臣，此乃柴大纪吓常青不救彼之言，虽笑谈，汝以为如何？将来与福康安亦可定常青罪案也。或常青能擒庄大田，亦可以功赎罪，但愿如此耳！）嗣后魏大斌、田蓝玉、张万魁及蔡攀龙四次前往应援诸罗之兵，俱由府城乘船至盐水港。而鹿仔草至诸罗之陆路二十余里，则已俱为贼人占据，非复如潘韬前往时之尚无障碍。魏大斌等赴援与贼接仗，即在此二十余里之内。

其外委段昭明等赍回柴大纪之折，想久在鹿仔草守候，迨魏大斌等进兵时，随同前往，被贼杀害，以致遗失。至柴大纪送出之奏折文报，前据台湾各官禀称，多系雇募社番从间道黑夜送到鹿仔草转递。其文书率系小字密封，大仅寸许，尚易得出。至夹板奏折益难赍送，是以五月二十三日之折，至六月二十日方至厦门。六月初八日之折并至七月十九日始行到厦。昨又据杨廷理禀称，八月^①初三日柴大纪雇社番三人到郡，内赍折一人被贼冲散，人折俱失，惟二人得至等语。则柴大纪文报遗失者必多，惟皇上所颁谕旨，皆系递到台湾郡城，再由盐水港、鹿仔草转递。从前路既未通，杨起麟等必不敢轻率递送。昨蔡攀龙、杨起麟等已于八月二十日杀入诸罗，二十二日又行杀出，是道路已通，自必将历次谕旨赍交柴大纪矣！至内地发往台郡之谕旨，并朱批奏折及紧要文书，从前系由厦门同知遣家人衙役等配船投送，臣以事关紧要，惟恐或^②有差失，特派佐杂千把八员^③轮流更替押送

① 《钦定平定台湾纪略》（稿本）卷三十七为“六月”。

② 同上书，为“惟恐复有”。

③ 同上书，系“千总八员”。

台郡，所有此次交臣转寄柴大纪之谕旨，已派妥弁资送。查蔡攀龙等既打通诸罗道路，恒瑞又领兵三千前往，自必将沿途贼匪更加剿洗，可无虞梗阻矣！为此谨缮折复奏。伏乞皇上睿鉴。谨奏。

乾隆五十二年九月初四日。

乾隆五十二年九月二十三日奉朱批：即有谕旨。钦此。

谕钦差协办大学士福康安等速将近况驰奏

乾隆五十二年九月二十三日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福建水师提督参赞柴、福建陆路提督参赞蔡，乾隆五十二年九月二十三日奉上谕：

本日据李侍尧奏报鹿港进兵日期，及复奏诸罗道路已通，嗣后文报无阻等因两折，已于折内详晰批示矣。蔡攀龙前经带兵应援诸罗，分队进剿，已于八月二十日直抵县城，会合柴大纪，又复领兵出城剿杀贼匪，打通道路。该处既得有胜仗，道路已通，自应定计，统兵径趋北路，直捣贼巢。乃自李侍尧奏到后，已阅数日，不但常青、柴大纪应将打仗情形随时奏报，而蔡攀龙现由总兵擢任提督，授为参赞，有奏事之责，亦应迅速具奏。乃伊等折奏未到，深为焦急。

至本日李侍尧之折，系九月初十日拜发，朕意其时福康安早应行抵厦门，与李侍尧会晤，定期配渡，何以本日奏到折内，并未提及？或福康安于途中少有耽搁，朕心转为悬注。

再，自府城至诸罗陆路未能直达，惟盐水港、鹿仔草两处，有

柴大纪所派杨起麟、邱能成等分兵驻守，是以水路尚无障碍^①，蔡攀龙等得由海道前往援应诸罗，打通道路。此皆由柴大纪能先时筹及，预行派员防守^②。是此次柴大纪之功，实为第一。何以常青并未能筹虑及此，由府城委派官兵前往防守耶？若盐水港、鹿仔草二处或有疏虞，则诸罗即难以保守。昨据常青奏，柴大纪欲调此二处官兵往守诸罗，朕谓军机大臣，此乃柴大纪因常青等并不亲统大兵往救，故为此恐吓之词。李侍尧之意，以为如何？恐竟不出朕所料耳。

至恒瑞带领多兵接应诸罗，自应由陆路前进，遇有沿途贼匪屯占处所，正可迎头截杀，何得由海道绕往，转避贼锋，为贼匪所笑。况恒瑞所带兵丁有三千名，非若蔡攀龙只带兵一千余名，或虑梗阻者可比，岂非懦怯而何？前谕福康安于抵诸罗时，查明参奏，但此等情节，朕于披览奏章之下，其功罪已属昭然，何待查奏始能明乎？朕屡经（朱改：历年。）办理军务，于万里之外情形皆如目睹。（朱改：时刻留心。）今恒瑞之畏葸无能，情节显著，即令恒瑞将来自行陈奏，亦属无可置喙。此事原不待福康安再行查询也。

至徐鼎士处，现据李侍尧奏，前所添调兵丁一千，今到淡水者已有七百余名。该处本有兵一千八百名，又招集义民熟番数千人，今得此兵一到，声势益壮。该处在大里杙之背，徐鼎士若带兵乘机攻击，纵未必能捣穴擒渠，亦可以牵缀贼势，以乱其心。况贼匪精锐俱在诸罗，其大里杙守护贼巢匪众，自系老弱。现在柴大纪、蔡攀龙等早应定计进攻，恒瑞又统兵三千前往接应，是该处

① 《钦定平定台湾纪略》（稿本）卷三十八为“阻隔”。

② 同上书，为“驻守”。

兵力既已厚集，正可乘此锐气，直攻大里杙。福康安此时谅已前抵鹿港，急应趁此机会带领巴图鲁侍卫章京等，速统大兵，奋力进剿，将贼首林爽文等一鼓歼擒，克日藏事。常青前经带兵亲赴南潭一带剿贼，若能将贼目庄大田擒获，收复凤山，肃清南路，统兵速赴北路，会合攻剿擒拿贼首，不但收效桑榆，将功抵罪，并可仍邀恩眷，该将军不可不加倍奋勉，力图自效。但据报起程前赴南路，其曾否擒获庄大田尚未奏到，为之悬切耳。

将此由六百里加紧各谕令知之。仍著福康安于何日已抵鹿港，前赴诸罗，与柴大纪、蔡攀龙会攻大里杙，及普吉保曾否将西螺、斗六门一带贼匪剿散，会攻大里杙，并常青曾否擒拿庄大田，廓清南路，恢复凤山之处，各行迅速驰奏，伫盼捷音之至。李侍尧续得地方官禀报信息，仍即随时速奏，以慰廑注。

钦此。遵旨寄信前来。

闽浙总督李侍尧奏台湾近况折

乾隆五十二年九月二十七日批 军录

臣李侍尧跪奏，为奏闻事。

窃臣于本月初四日接署台湾府杨廷理禀称：副将贵林、蔡攀龙等，直抵诸罗，复又杀出等因，当即具奏在案。数日以来，总未得各官续报。将军常青亦未有信息，正在日夕盼望，兹于十四日接常青来札，并将恒瑞折稿寄来。臣查厦门驿站尚未有恒瑞奏折过境，想因风水不顺，吹往别处口岸，不能即到。臣谨将原稿进呈，惟是臣阅恒瑞折稿，蔡攀龙等抵诸罗后，仍未能杀出。随同进兵之贵林、杨起麟等，并不知下落。是此次赴援之兵，又未

得手。（朱批：恐是如此。）幸恒瑞先带兵一千五百，已到盐水港，水路尚可无虞。缘经月以来，海洋东风甚大，内地船只不能放洋，昨所奉廷寄，令柴大纪如果势甚危急，只管杀出再图进兵之谕旨，已到厦门数日，亦尚不能赍送。臣所派赴援盐水港之本省兵三千，先已开驾一半，其续出之一千五百名，到厦仅迟两日，即为风阻，屡出屡回，至今尚未出港。臣实深焦急，寝食难安。俟风势稍平，即催令速发外，现准孙士毅咨称，粤西兵三千，本月二十以外头起可以入闽境。臣自当料理，令其随到随即登舟，以资接济。

至海兰察等日内已陆续到厦，福康安兼程行走，已过省城，不日亦即可到。所有一切事宜，臣与之悉心商酌，再行具奏。谨先将接到常青札会并恒瑞折稿缘由，缮折驰奏，伏乞皇上睿鉴。谨奏。

乾隆五十二年九月十五日。

乾隆五十二年九月二十七日奉朱批：正尔焦急，即有旨谕。钦此。

谕钦差协办大学士福康安等

以直捣大里杙为妥

乾隆五十二年九月二十七日 台湾档

大学士和，字寄钦差协办大学士总督将军侯福、钦差总督将军常、参赞福州将军恒、闽浙总督李，乾隆五十二年九月二十七日奉上谕：

据李侍尧奏，于九月十四日接常青来札，并将恒瑞折稿寄

阅，内称蔡攀龙等抵诸罗后，仍未能杀出，其随同进兵之贵林、杨起麟等，并不知下落。是此次赴援之兵，又未能得手，幸恒瑞先带兵一千五百已到盐水港，水路尚可无虞等语。前据李侍尧奏，蔡攀龙等已抵诸罗，复又带兵出城杀贼，而常青、柴大纪总未具奏，连日盼望军报，甚为焦急。今据李侍尧奏到各情形，〔是此次赴援之兵，又未得手〕^①。现在尚未据恒瑞奏报递到，自系被风所阻。但其折稿已据李侍尧附折进呈，即伊原折奏到情形，亦不过如此。贵林、杨起麟系随同蔡攀龙带兵援应诸罗，今蔡攀龙虽经柴大纪接应入城，仍未能杀出，而贵林、杨起麟又无下落，自系被贼匪拦截，若有意外之虞，岂不可惜。恒瑞折稿又未提及贵林、杨起麟下落，殊不可解，尤深廛念。

福康安于本月初五日已抵建溪，计程早应前抵厦门，与李侍尧会晤商办一切具奏。今李侍尧所发之折，系十五日拜发，而福康安尚未到彼，或系途中有疾，是以行走迟缓。但海兰察等现据李侍尧奏，已陆续前抵厦门，则福康安亦当相距不远，何以此次李侍尧之折福康安又并未启阅？岂中途或适相左，未经遇见耶？朕心深为廛注。以此时情形而论，蔡攀龙入城后，虽未能得力，而恒瑞已带兵到盐水港，并据恒瑞折稿内称，已札会普吉保，令其派员带兵三千前赴诸罗接应。而普吉保前已具奏，留李化龙驻守鹿港，伊亲带官兵由西螺、斗六门前进剿，此时自必在途。想普吉保接到恒瑞札会，自必星赴诸罗策应，较之派员带兵，更为得力。看来盐水港尚可无虞。惟恒瑞折稿内称，八月二十五、六等日新店、鹿仔草、盐水港等处，俱有贼匪滋扰，民人被贼胁从者甚多。贼匪奸计欲哄诱官兵前进，仍将后路截断。恒瑞现

① 据《钦定平定台湾纪略》（稿本）卷三十八增补。

在盐水港扎营，分兵在新店等处防守，一面探听柴大纪信息，俟恒瑞所带兵一千五百续行到齐，将后路分投严防，再相机进剿，接应诸罗等语。看来盐水港附近沿海村庄，虽有被贼胁从民人，而义民自行固守及请兵救援者，尚复不少，可见百姓向义者颇多，而从贼之人亦不过迫于贼势，并非甘心效逆。若大兵军威壮盛，得有胜仗，则人心自定，较易招徕。恒瑞此去，如闻蔡攀龙等杀出，将道路廓清，伊必胆壮前进。今闻蔡攀龙等又蹈魏大斌覆辙，而贵林等尚无下落，未免稍存疑畏，是以不敢前进，权在盐水港驻扎，转令普吉保拨兵接应。殊不思魏大斌、蔡攀龙前抵诸罗时，未将盐水港一带后路肃清，是以堕贼奸计，仍被截断。恒瑞此时既到盐水港，自应将附近海口及诸罗迤北屯聚贼匪，悉力歼除，庶官兵前抵诸罗，无虞后顾。若不先将沿途贼匪剿杀净尽，即使恒瑞能抵诸罗，又与魏大斌、蔡攀龙无异，不过坐糜廩饷，于剿贼机宜仍无裨益。

至福康安此时自早已由蚶江配渡前抵鹿港，朕为福康安计算，该处有新到漳州兵二千，又有李化龙带往粤东兵二千，俱系生力之兵，又经李侍尧两次派调闽兵四千名，现又有旨催令四川屯练及广西、贵州兵共七千名，星速前进，是鹿港兵力极为壮盛。福康安此时竟可不必游移，总以直捣贼巢为妥。现在徐鼎士处已有兵二千八百余名、又招集义民熟番数千人，该处在大里杙之背，徐鼎士现在相机进剿。此时福康安竟当派拨巴图鲁侍卫章京二十人令舒亮带领前往，同徐鼎士奋力攻击。若徐鼎士已由大甲溪进兵，舒亮等即速往帮同剿贼。即徐鼎士尚未进兵，亦应令舒亮速往会同攻击。而福康安一面同海兰察等，统领巴图鲁侍卫章京，督率大兵，以全力往大里杙进剿。大里杙系贼匪巢穴，一闻大兵攻击，贼首等自必回顾巢穴，则诸罗之围不解而自解。福康安应

预先知会柴大纪等，如贼匪回救巢穴，即令柴大纪、恒瑞、蔡攀龙等，领兵出城，由后跟踪追剿，而福康安即由大里杙迎头截杀，使其首尾受困，自可悉数成擒，倘贼匪仍在诸罗，不顾巢穴，则福康安于扫平大里杙后，即回兵移救诸罗，贼匪见巢穴已倾，自可不战而溃，最为善策。此即从前谕旨内所引魏司马懿欲擒公孙渊，先破襄平之计，福康安不可不决机制胜，以期一举蕲事。至普吉保前已据奏带兵五千名，由西螺进攻斗六门，若已能打通道路，会合诸罗，固属甚善；若普吉保尚未能趁势前进，仍在西螺一带驻守，福康安不妨将普吉保撤回鹿港，与李化龙协同防守，福康安竟带其五千兵，进捣大里杙，则兵力既加，更可鼓勇前进，惟在福康安相度机宜，斟酌妥办。

再，柴大纪处于蔡攀龙抵县城后，曾否打仗得胜，贼匪情形若何，总未据有奏报。现在恒瑞所驻盐水港，距诸罗甚近，著即派委妥干员弁，设法前往诸罗，令柴大纪、蔡攀龙将该处实在情形及如何筹办之处，详晰声叙。仍遴委能事员弁，设法赍送，即行迅速驰奏。又前据李侍尧奏，官兵援应诸罗，贵林、杨起麟为首队，蔡攀龙、孙全谋为二队，一路进剿。是贵林、杨起麟带兵在前，何以恒瑞折稿内称蔡攀龙已抵县城，而贵林、杨起麟转无下落，殊不可解。著福康安查明据实具奏。又，恒瑞折稿系由常青处转寄李侍尧，则常青接阅恒瑞折稿后，自必具折陈奏，恒瑞亦应折奏，何以并未奏到？常青一月以来，亦必有拜发在途之折。恒瑞既有折稿，其所发原折，想均系因风阻滞，究在何处延搁，并著李侍尧一并查明速奏。将此由六百里加紧各谕令知之。仍著将现在福康安与李侍尧会晤商办一切情形，并诸罗、盐水港等处及南路打仗杀贼信息，各行速奏，以慰廑注。

钦此。遵旨寄信前来。

谕钦差大学士阿桂阅看折谕并据实具奏

乾隆五十二年九月二十八日 台湾档

大学士和，字寄钦差大学士公阿，乾隆五十二年九月二十八日奉上谕：

本日据恒瑞奏，带兵前抵盐水港，闻知魏大斌，蔡攀龙到诸罗后，贼匪仍将道路阻截，鹿仔草又被贼焚烧，其沿海一带村庄，已拨兵协同村民防守。现在必须将附近盐水港各处贼匪剿除净尽，始能进兵，前往诸罗等语。看来前日李侍尧所奏，蔡攀龙等援应诸罗入城，又复杀出之语，竟不可信。批览之下，实深焦切。现已降旨，令福康安于抵鹿港后，相度机宜，直捣大里杙贼巢，使诸罗之围可不解而自解。所有昨日、今日所降谕旨，并李侍尧、恒瑞、柴大纪奏到各折，著一并抄寄阅看。阿桂于军旅之事素所熟谙，就现在情形而论，如有所见，即当据实具奏。

至豫省漫工，昨据阿桂奏，约于二十六、七日可以挂缆合龙，日内想已蒧工竣事，伫盼佳音。将此传谕知之。

钦此。遵旨寄信前来。

福建陆路提督柴大纪奏水堀头等处

道路被截断片

乾隆五十二年九月二十八日批 军录

再奏者：窃照逆首林爽文纠集南路贼匪，屯聚水堀头、老

店、月眉潭、大崙、牛稠山、打猫等庄，截断通府各路，自六月初十以后粮饷莫运，文报难通，连日率匪来犯，虽被我兵杀退，仍然四面昼夜拦阻。兹七月十四日，据游击邱能成禀称：本年六月十二日，外委段昭明赍送皇赏，并回折一件。二十五日外委沈贤赍到回折二件，并各开（弁）陆续带到公文，俱存鹿仔草，因道路不通，敬谨收存，未经赍送诸罗。兹七月十三日，温州镇总兵魏大斌等大兵赴诸罗应援，随飭该外委段昭明，沈贤等，赍捧皇赏并回折，随同大兵赴诸罗交收，合就禀明等因前来。奴才查总兵魏大斌等，是日所带官兵中途遇贼打仗，外委段昭明，沈贤被害，其赍捧皇赏回折，均未得到。奴才自愧福薄，未得承受皇恩。然仰邀优渥之施，弥切感激之忱。所有遗失回折，俯俟查明另缮补奏，恭请训示。又扯获伪示一纸，合并附片具奏，伏乞睿鉴。谨奏。

乾隆五十二年八月二十六日。

同日^①奉朱批：览。钦此。

署福建陆路提督柴大纪奏林爽文

攻打诸罗等情折

乾隆五十二年九月二十八日批 军录

署福建陆路提督奴才柴大纪谨奏，为奏闻事。

窃照本年七月初四日巳刻，逆贼纠集匪伙万余复来攻打诸罗东、西、北三门营盘。奴才往来督战，官兵义民奋勇迎敌，各营盘枪炮齐发，俱能多中，打死贼匪甚多。至未刻，东、西门外贼

^① 指乾隆五十二年九月二十八日。

匪俱被官兵杀退，惟北门贼匪尚冒死冲来，随飞调游击李隆、参将潘韬从番社后转出夹攻，枪炮打死贼匪约有百余名，赶过牛稠溪，复杀死贼数十人，贼始四散逃窜。缘田水涨满，鸣金收军。查点军士，兵丁胡得喜等十五名，义民张升等四名俱阵亡，给银收埋。又兵丁徐得禄、许连春等二名，义民陈万等九名，俱被铅子打伤，给银医治。抢获贼旗五杆、鸟枪二杆、长刀、藤牌等项，割取耳辮一十七付，斩获贼首三颗，生擒贼匪罗蓝、张本、赖众等三名，发交署诸罗县陈良翼收审。据贼匪赖众供称：上月二十八日贼众来攻诸罗，贼目伪后将军叶省在北门外与官兵打仗，被大炮打伤肚腹，至二十九日身死。其妻黄玉娘散银纠众，欲来报仇等语。

初六日又探得逆匪林爽文自上月二十八日败后，复纠集南路水底寮等处带（率）匪约三千余名，合共万余要来决战^①，奴才陆续招集义民，共六千余名，除归鹿仔草、盐水港等处守御外，尚有四千余名。兹遵将军臣常青军令，将各义民等分别赏给顶带（戴），义番首猫哑一名赏给外委顶带（戴）。内武举黄奠邦、陈宗器实属出力，俱给予守备顶带（戴）。即咨请将军给发委札，并多方鼓励。官兵义兵莫不感激踊跃，愿效死力。初七日寅刻，贼众果来环攻四门，其势比前更属鸱张，俱用车轮大木牌挡我大炮。奴才飭命官兵静以待动，俟贼将近，照定准头齐放大炮。诃贼匪恃有挡炮之具，逼近各营盘，大炮连发，车轮倒转，打死贼匪无数，大木牌击碎^②。奴才往来督率官兵义民，奋勇力战，自寅至未，东、南二门贼匪打死甚多，又杀死五、六十人。贼退，惟西、北二处贼匪抵死不惧，旋退旋来，随令大炮叠轰，

① 《钦定平定台湾纪略》（稿本）卷三十八为“欲来侵犯”。

② 《钦定平定台湾纪略》（稿本）卷三十八为“将大木牌击碎”。

枪手齐出，连环进步，义民分路夹攻。至酉刻打死骑马贼一名，共打死贼匪约二百余名，杀死贼匪百余名，贼众逃散，追赶五、六里，时因大雨收军，生擒贼匪柯招、林镇、柯杖、徐永等四名，随将该犯发交署诸罗县陈良翼收审。是夜复大雨淋漓，料贼必以我枪炮难施，潜来劫营。随令各义民留驻营盘，协同官兵四面埋伏。时将三更，果有贼匪数千，拥至西门外，伏路兵丁回报，营盘内放起火号，照见贼来，左边学舍内、右边番社内两处伏兵齐出，施放枪炮，接连轰击，打死贼匪无数，贼匪不能相顾，自相践踏，死者数十名，贼尽逃去。

初八日黎明贼复率众来攻东、南、西三门营盘。奴才飞马往来督饬各营盘官兵，照定准头，施放大炮，继以鸟枪连环进步，打死贼匪甚多。官兵义民乘势争先，杀死贼匪多人。至午后，东、南门外贼已败走，惟西门外贼尚不退。战至未刻，打死贼匪百余名，杀死贼匪数十名，贼俱逃窜，各令收军。

初九日辰刻，东门外万人冢山，突出贼数千，与官兵对放枪炮，随令游击林光玉率领兵丁义民极力堵杀。又据游击李隆飞报，南门外草地尾有贼数千，从山仔顶来攻营盘。奴才随飞饬参将潘韬同各义民飞往协剿，而番仔沟、北社尾等处亦有贼二三千人，来攻西门。奴才飞往督饬守备杨彰连施放大炮轰击，饬把总蔡〔开〕祥等带兵丁、义民从学舍边抄出，守备曾绍龙亲带官兵义民由番社内杀出，贼匪不及提防被杀二百余人，打死骑马贼一名，贼始远窜。其东、南二处贼匪，俱经游击李隆、林光玉，参将潘韬等杀退。因天色已晚，均令收军。

初十日卯刻，贼匪又来环攻。其西门外之贼俱带沾油草把，直冲番社，欲图放火。奴才督令官兵施放大炮，番社内原有埋伏，枪箭一齐并发，打死贼匪数十名，贼势稍怯，即令枪手向

前，义民长刀随后追来，毙贼数十名。贼皆尽弃草把远逃。而东南门外之贼，尚与官兵鏖战，奴才飞马往来两处，督令枪炮连环轰击，打死贼匪甚多，杀死贼匪五六十名，贼始四散奔逃，打裂大炮二门。署北路左营守备李进得被贼枪打伤面上右牙，外委黄春阳被贼枪打伤左腿。十一日寅刻，贼复率众环攻。奴才放起号炮，各营盘枪炮齐发，官兵义民奋力战，自寅至午，东、南之贼打死百余名，杀死亦多，各自逃窜。北门外之贼被大炮打死数十名，亦退。惟西门外之贼尚拼命冲来，复用大炮接连轰击，打死贼匪百余人，贼怯，官兵义民向前赶杀。诂贼众身藏尖刀二、三把，俱拔出回身掷来，兵民间有受伤，随伤令义民内牌手尽行抽出，与队伍牌手一并在前，挡其掷刀。次以枪手连环叠进，再以义民长柄刀紧随，一齐奋勇追去，毙贼无数，其余四散奔窜。追过三苞竹外，将贼寮烧毁。天色已晚，收军回营。

查点军士自初七日起至十一日止，连日打仗，共阵亡兵丁林滔等三十八名，义民刘极等十二名俱阵亡，给银收埋。又兵丁薛名进等十二名，义民潘尾等一百四十八名，番民他匏伦等五名俱被贼枪刀伤，给银医治。抢获贼旗六杆，竹牌八面，半斩刀长刀等项，割取贼匪耳辮共四十一付。

再，连日打仗，官兵不暇造饭，仍系绅耆铺户煮饭送各队伍，并挑送凉水。官兵义民得免饥渴，所有生擒罗蓝、张本、赖众、柯招、林镇、柯杖、徐永等七犯，随经县申明，恭请王命就地正法。通报将军、督抚、提督外，令将七月初四、初七、初八、初九、初十、十一等日打仗得胜缘由，由驿六百里驰奏。

再，六月十二日官兵在麻豆庄打仗，义民拿获匪犯林狮权一名，解交县申明正法。查前折尚未禀入，合并声明。伏乞皇上睿鉴。谨奏。

乾隆五十二年八月十六日。

乾隆五十二年九月二十一日。奉朱批：尔等实属出力，可嘉可悯之至意，笔不能宣。但此皆八月十六日以前之事，近来光景如何，尚未接奏，益加焦切耳！余有旨谕。钦此。

谕钦差协办大学士福康安等应慎重

处理出力绅民情事

乾隆五十二年九月二十八日 台湾档

大学士和，字寄钦差协办大学士总督将军侯福、钦差湖广总督将军常、福建水师提督参赞柴，乾隆五十二年九月二十八日奉上谕：

本日寅刻接到恒瑞及柴大纪奏报各折，已降旨将一切机宜详悉指示矣。复思常青在南路剿捕贼匪，前此仍令山猪毛广东义民各回本庄一事，最为失算。常青前奏该义民留营助剿时，并未将其本庄有八千余人业已安顿家室，无虞贼扰，及该义民具呈恳请随营效力之处，详悉奏明。因恐该义民本庄止留老弱，被贼摧残，转使急公报效者闻风畏阻，是以令其将义民等送回本庄，自行守护家宅田产，以安其心。常青于奉到谕旨之后，自应将各情节奏明，仍将该义民留营效用，以遂其向义图报之心。乃拘泥前旨遣回，转使该义民等无由伸其义愤，所办实属错误。已节经降旨，令常青将办理错谬，奉有申饬之处，向义民等明白宣谕，并传旨嘉奖，该义民仍令其随同官军剿贼，如有能杀贼立功者，即当赏给官职，俾令加倍踊跃从事。常青接奉此旨后，是否仍令该义民回赴军营，及义民等如何感奋出力之处，尚未据奏到。著传

谕常青，即将办理此事情形，迅速据实复奏。

至福康安现已令其由鹿港直捣大里杙贼巢，但鹿港至大里杙沿途地方，所有村庄民人，其中帮助官军以安分良善者固多，而心怀叵测，或于官军过后潜出滋扰转为贼用者，恐亦不少，此为最关紧要。福康安进剿大里杙时，该处距鹿港甚近，仅止四十里，或尚可酌留兵丁防范。若将来前往诸罗，或相距较远处所，设皆处处留兵守御，则兵力又分，于剿捕不能得力。著传谕福康安，于经过各庄时，务须留心察看，密行体访。如系义勇良善，诚实可信者，自当妥为抚慰，令其自行守护，并可助官军声势。倘有心怀反侧，附近从贼党者，一经查出，竟应于大兵经过时，即将此等奸徒强悍者悉行歼戮，止留老弱听其在庄居住，庶无后顾之虞。福康安当随处留心，慎重妥办，此为最要。但不可冒昧办理，先露风声，转坚其从贼死守之心，尤为非计。

再，柴大纪固守诸罗，屡被贼扰，连次督率兵民剿杀贼匪，实为奋勉出力，节经降旨嘉奖。嗣因魏大斌、蔡攀龙等，虽经接应入城，道路仍被贼梗阻，惟恐救援不至，稍有挫失，殊属不值。是以节次谕令柴大纪，酌量情形，若诸罗势难固守，不妨带兵出城，痛杀贼匪，或往南北两路会合福康安、常青，或于盐水港等处与恒瑞合兵，再图进取。在柴大纪勇略素著，非至万不得已，自断不肯委城而出。若果力有难支，不得不率兵突出，则该处义民甚多，其中如黄奠邦等。现经柴大纪搜获贼匪伪示，有必欲甘心之语。若柴大纪带兵远去，此等义民必致受贼荼毒，朕心更为不忍。既使助义出力之人无辜受累，且恐他处义民闻而生畏，阻其踊跃投效之心，大有关系。著传谕柴大纪，如诸罗已无他虑，自应悉力固守，以待援应。万一实难守御，必须出城，另图进取之时，务将城内义民及其家属，妥为捍卫，先行送出，然

后振旅出城，俾该处义民不致失所，被贼戕害，方为妥善。将此由六百里加紧再行传谕知之。仍即迅速复奏，以慰廑注。

钦此。遵旨寄信前来。

谕钦差协办大学士福康安等宜首尾

夹攻直捣大里杙

乾隆五十二年九月二十八日 台湾录

大学士和，字寄钦差协办大学士总督将军侯福、钦差湖广总督将军常、福州将军参赞恒、闽浙总督李、福建水师提督参赞柴、陆路提督参赞蔡，乾隆五十二年九月二十八日奉上谕：

本日据柴大纪奏到，节次打仗杀贼情形，及魏大斌带兵前抵诸罗各折，皆览过之事，已於折内批示。诸罗被贼攻扰，柴大纪在彼激励军民，设法堵御，并连次剿杀贼匪，实属出力，朕既嘉其绩，复轸其劳，非笔墨所可宣谕。但所奏皆系八月十六以前之事，现在蔡攀龙已抵诸罗县城，柴大纪等作何筹办及如何打仗杀贼之处，尚未据续有奏到，益深焦切，柴大纪惟当倍加勉力，迅速成功，承受恩赏也。

又，同日据恒瑞奏，八月二十八日有贼万余，将鹿仔草村庄三面攻扰，经游击董秉璘、刘钺，守备林世元等，带兵堵御。正在打仗时，村内火起，村民惊惧跑逸，贼匪趁势进村，官兵不能拒守，於是日晚间尽行退出，其被伤及阵亡官兵，共有一百数十人。又，前此魏大斌、蔡攀龙两次接应官兵，虽到诸罗，已伤亡大半，贼匪仍行梗阻道路，粮饷不能转运，现在安抚村民尽力防守，俟续调官兵到鹿，再行酌量进剿。并请将董秉璘降为守备，

刘钺降为都司，林世元革去守备，仍留军营效力等语。看来鹿仔草一带贼匪尚在猖獗。昨已有旨，令福康安於抵鹿港后，即令舒亮带同巴图鲁侍卫章京二十人，帮同徐鼎士，由大甲进攻大里杙之北。福康安同海兰察等，统领官兵，直击大里杙贼巢，使贼匪回顾家属巢穴，以解诸罗之围。今据恒瑞奏到情形，则鹿仔草等处仍有贼匪梗阻，恒瑞虽驻扎盐水港，所带之兵尚未到齐，不能前进，未免心存疑惧，漫无主见。若盐水港复被贼扰，稍有疏失，则沿海水路亦致阻隔，所关非细。因思鹿港距大里杙虽不过数十里，但沿路村庄恐有贼匪屯聚，官兵即往大里杙攻击，恐贼匪又乘间潜出滋扰鹿港，或将后路拦截，则官兵难免返顾之虞，不可不虑。福康安此时应酌量情形，固不可心存畏难，亦不可轻率前进，应探明普吉保如已由西螺进攻斗六门，打通道路，直抵诸罗，与柴大纪会合，则大局已定，固属甚善。福康安即同海兰察及巴图鲁侍卫章京等，带领鹿港新到之漳州粤东兵，径捣大里杙贼巢，使其首尾不能相顾，方为上策。鹿港自蓝元枚病故后，并无贼匪滋扰，该处新到之兵，尚未与贼人打仗，俱系生力新兵，锐气方盛，正可及锋而用。若此时普吉保尚未能得手，仍在西螺一带驻扎，则徒守无益。福康安竟应将普吉保调回鹿港，令其与李化龙协力防守。现在川省屯练及广西、贵州兵，俱有旨催令迅速遄行，自可陆续前抵该处。福康安察看光景，如鹿港既有普吉保、李化龙在彼，已可无虞，即带漳州粤东兵前捣贼巢，并知会徐鼎士两路夹攻。若鹿港现存之兵尚不敷用，或稍待川、广、黔省之兵到后，再行统领前进。而於鹿港至大里杙一带地方，仍派巴图鲁侍卫章京等数十人，酌带弁兵沿途分布堵御，截杀净尽，勿使贼人梗阻道路。总之，大里杙系贼人巢穴，一闻大兵攻击，贼首等自必顾恋家属，诸罗之围可不解而自解。福康安应预

先知会柴大纪等，如贼匪回救大里杙，即令柴大纪、恒瑞、蔡攀龙等，领兵竟蹶其后，跟踪追剿，而福康安直扼其前，迎头截杀，使其首尾不相救应，无难一鼓成擒。即使贼匪竟不回顾巢穴，而福康安已将大里杙扫平，贼人巢穴倾覆，退无所归，自必望风惊溃。此为目前最要机宜，福康安惟当相机慎重妥办。其所带官兵，总宜合力全注一处，鼓勇直前，不可又如常青等之四处派拨，以致兵力分而见单，方为妥善。

现在福康安等统领大兵，分路进剿，原不难克期蒞功，惟鹿仔草现有被贼滋扰之事，诚恐军心未免稍馁，福康安惟应仰体朕意，整顿兵威，策励将弁，以期迅速集事。虽系么麽草寇，亦不宜冒昧涉险也。

至柴大纪固守诸罗，极为奋勇，前已有旨，令其酌量事机，若势难守御，不妨督率兵民杀出县城，再图进取。今蔡攀龙等虽经接应入城，来路仍被贼拦截，不能得力。柴大纪若悉力拒守，设或救援不至，官兵稍有损失，殊属不值。自应遵照前旨，与蔡攀龙领兵出城，将滋扰贼匪奋力剿杀后，柴大纪完师整旅，或前往福康安、常青处，或径赴盐水港、鹿港一带，会同恒瑞合兵进剿，再图收复，亦无不可。总在柴大纪相机而行，固不可稍有懦怯，亦不必过于拘泥也。

再，本日据琅玕查明前次常青报匪递送迟延一折，内称常青奏折递至龙游县，经福康安启阅后封发，计停三时等语。福康安在途启阅奏折，一经阅过，即可封发，何以停留三时，宁不知朕於军营文报，时切悬盼耶？至福康安抵厦门后，自己与李侍尧会晤商办一切，今尚未据福康安将筹备情形奏到。或系福康安在途有疾，何以李侍尧亦尚未奏及，殊增悬念。著即将于何日会晤及如何商酌筹办之处，迅速驰奏。

本日又据徐嗣曾奏，台湾米石内运无多，恐将来民食稍歉，

已札商督臣约得米二、三十万石，可敷平糶之用。前经督臣筹定奏闻等语。各省运闽之米，统计已有一百数十万石，现在源源运到，是该省军糈民食均有充裕，何以徐嗣曾于平糶米石尚在札商筹办？此事亦尚未据李侍尧奏到，著该督即将闽省运到米石，是否已经足用，及曾否办理平糶之处，一并据实复奏。

至常青前已据奏起程前赴南潭搜捕贼匪，如何打仗杀贼及曾否拿获庄大田之处，已阅一月，何以未据续有奏报？著即行迅速驰奏。

再，台湾全图前福康安起身时已绘出一分，令其带往。今再将鹿仔草至大里杙一带经朕指示之处，另绘一图发往，并路径地名粘签注明，易于展阅。福康安接奉后，更可按图遵照办理。将此由六百里加紧各传谕知之。仍著筹备攻剿情形及鹿仔草是否收复，各行迅速复奏，以慰廑注。

钦此。遵旨寄信前来。

参赞恒瑞奏鹿仔草失陷将守将

董秉璩等降革折

乾隆五十二年九月二十八日批

《钦定平定台湾纪略》（刻本）卷三十八

恒瑞奏言：八月二十八日有贼万余，将鹿仔草村庄三面攻扰。经游击董秉璩、刘钺，守备林世元等带兵堵御。正在打仗时，村内火起，村民惊惧跑逸，贼匪趁势进村，官兵不能拒守，于是日晚间尽行退出。其被伤及阵亡官兵，共有一百数十人。又前此魏大斌，蔡攀龙两次接应官兵，虽到诸罗，已伤亡大半。贼

匪仍行梗阻道路，粮饷不能转运。现在安抚村民，尽力防守，俟续调官兵到鹿仔港，再行酌量进剿。并请将董秉璩降为守备，刘钺降为都司，林世元革去守备，仍留军营效力。均奏入。

（发文日期不详。）

署福建陆路提督柴大纪奏近日诸罗战况折

乾隆五十二年九月二十八日批 军录

署福建陆路提督总兵官奴才柴大纪谨奏，为奏闻事。

窃照贼匪率众万余，连日环攻诸罗县城。虽被官兵杀退，但粮饷缺乏，咨请将军臣常青添兵应援，经蒙三次添兵，俱停驻鹿仔草，未得前来。奴才将来诸罗路径难易，贼匪多寡之处，绘图贴说，密行札知总兵魏大斌等，并令预将起程日期，先行通知，以便带兵前往接应，詎魏大斌等并无回字。兹本月十三日卯刻，贼匪七、八千^①复来攻县东、西二门营盘。奴才督率官兵义民，奋勇堵杀，至午后贼始退去；适远闻炮声连响，料系总兵魏大斌等带兵来县，中途遇贼打仗，随飞飭参将潘韬、游击李隆带领队伍前往接应。奴才亲带官兵义民继进，至外三苞竹、刘厝庄地方，果见官兵被贼围困。即督飭官兵奋勇向前，齐放枪炮，义民并力冲杀，打死贼匪数百，将贼杀退，接护魏大斌，侍卫德成额、官保，参将特克什布及带兵之副将詹殿擢，游击田蓝玉各官兵等，陆续前来。又参将张万魁在外三苞竹田洋坠马，被贼抢去，正在危急，义民郑乃生奋勇救出，亦护送到。复有台斗坑、

① 《钦定平定台湾纪略》（稿本）卷三十八为“六、七千人”。

水堀头两路贼匪赶来，喊杀震天。奴才一面分拨官兵义民引护总兵魏大斌等官兵进城，一面督率官兵分投抵御，枪炮齐放，又飭官兵义民绕出城（贼）人之后，并力夹攻，打毙贼匪数百，旋即退散。因雷雨如注收军。查点兵丁王世宾等十二名，余丁洪降一名，义民卢元登等二十九名俱皆阵亡，给银收埋。受伤兵丁郑春等十七名，义民林嘉等二十名给银医治。抢获贼匪大旗三面，鸟枪十三杆，长柄刀十六把，割取耳辮九付，及杂械等项。

再，查魏大斌等三起官兵，据称除留鹿仔草看守军装外，共带兵二千六百七十八名来县，中途遇贼打仗，阵亡遗失等一千二百一十名，现到诸罗共兵仅有一千四百六十八名，内受伤兵丁七十五名，患病兵丁二十名，器械均不全备，药铅、火绳俱无。其千、把员弁损失亦多。又据兵丁林锋稟称，外委段昭明、沈贤等赍送三次回折，并自六月初十起，台湾府及内地发来公文俱交外委段昭明、沈贤管带，因该弁中途遇害，并皆遗失。又据署诸罗县陈良翼回称，据巡检邵宗尧家丁苏容哭稟：蒙本官将委员史映彩交存盐水港饷番银一万圆，于初十日送到鹿仔草。十三日跟随大兵来县，不料行至老店地方，被贼拥截冲杀。家丁郑荣并挑夫二名被贼杀死，余役逃散，家丁拚命同挑夫极力护饷，番银二桶计一千圆到县，余俱被贼抢去等语。

再，查奴才连日与贼打仗，虽大小铅子就诸罗熔铸，尚足敷用，而火药一项，自六月二十日起至今已用去万余斤，正苦匮乏，今总兵魏大斌等带到之兵，药铅又复全无，兼之粮饷两缺，愈觉难处。现在会商诸罗县设法备办，以应急需，并咨请将军臣常青再拨精兵来诸应援。奴才合将总兵魏大斌等所带官兵实到名数及是日打仗各情形，由驿六百里驰奏。

再，义民郑乃生能于贼围中救出参将张万魁实属勇往，即赏

给把总顶戴，以示鼓励。又官兵义民抢获枪刀器械等项，分给新到兵丁配用，又前月抢获贼匪青马一匹，给张万魁坐骑。合并声明，伏乞皇上睿鉴。谨奏。

乾隆五十二年八月十六日。

乾隆五十二年九月二十八日。奉朱批：知道了。钦此。

谕钦差协办大学士福康安等将因何

延时到厦等情驰奏

乾隆五十二年九月二十九日 台湾档

大学士和，字寄钦差协办大学士总督将军侯福、钦差湖广总督将军常、福州将军参赞恒、闽浙总督李、两广总督孙、福建水师提督参赞柴、福建巡抚徐，乾隆五十二年九月二十九日奉上谕：

昨据李侍尧奏到九月十五日拜发一折，内称福康安兼程行走，已过省城，不日可到厦门等语。福康安自九月初五日在建溪发折后已逾半月，计程已应早抵厦门，与李侍尧会晤面商一切，乃总未据续有奏报，自必系福康安途次偶有疾病，是以行走迟缓。而福康安惟恐朕心廕念，不肯自行陈奏，又不令李侍尧、徐嗣曾具奏，皆未可定，转增悬念。著李侍尧、徐嗣曾将福康安在途是否曾有疾病，及因何耽延之处，速行驰奏。至福康安若在途并无疾病，计此时自己早经配渡前抵鹿港，昨已降旨，将现在紧要机宜详晰指示。惟柴大纪处，虽经蔡攀龙接应入城，道路仍被贼梗阻，未能得手，已有旨令柴大纪酌量情形，如县城可无他虑，自应固守待援；万一实难守御，不防带兵出城，再图进取。但城内义民甚多，其中最为出力黄奠邦等，尤为贼所切齿，虽已令柴大

纪于万不得已必须杀出县城之时，务将该义民及家属等妥为捍卫，先行送出，既免致被贼摧残。反复思之，究弗释怀。福康安到鹿港后，如普吉保已由西螺进攻斗六门，打通道路，直抵诸罗，则大局已定。柴大纪处自可无虑。设普吉保未能前进，诸罗仍在望援，朕若令柴大纪坚守弗去，或救援不至，以致柴大纪及将弁兵丁稍有挫失，朕心实为不忍。若柴大纪振旅而出，而城内义民及家属等不能护送保全，受贼荼毒，此等义民久经奋勉出力，转致无辜受累，朕更有所不忍。反复思之，竟属两难。著福康安与常青、恒瑞、普吉保，彼此熟筹，力为策应，并知会柴大纪。如诸罗尚可固守待援，自仍以坚守县城为是。设诸罗力竟难支，而柴大纪有不得不出城再图进取之势，福康安、常青、恒瑞、普吉保等务宜多方筹划，设法办理。俾柴大纪或守或出，官兵与义民家属皆获保护无虞。总期事出两全，方为妥善。并著福康安密遣妥人，侦探诸罗确信，而恒瑞驻扎之盐水港，相距甚近，必知实在情形，著即各将诸罗是否可守无虞之处，据实迅速复奏。

又，现在台湾剿捕贼匪，调拨广东兵已有一万数千。粤东与福建毗连亦系海疆重地，沿海口岸甚多，在在需兵巡逻防守。而台湾剿贼事务，尚未藏功，或将来尚不无添调官兵之处，闽、粤系属邻省，遇有调拨较为近便，自应预为筹备。此时粤东调赴台湾之兵甚多，该省存兵较少，将来事竣后，或再改归实额，均无不可。孙士毅应于此时附近潮州一带地方，广为招募，勤加训练，不妨多多益善。既可资该省巡防之用，设遇有调拨，亦可就近派往。但须密筹妥办，不可稍涉张皇，此为最要。至粤省前后调赴台湾官兵，必有子弟人等随往。该兵丁内，有在台湾病故损失者，自尚悬额未补，应即于该兵丁随行子弟内，拣选补额，一

体充伍食粮，随营效用，亦可增添兵力。著交福康安、常青即行遵照办理。并著李侍尧得有南、北两路官兵打仗得胜信息，及诸罗如何剿杀贼匪，鹿仔草曾否收复，道路已通之处，即行迅速驰奏，以慰廑念。将此由六百里加紧各传谕知之。

钦此。遵旨寄信前来。

谕钦差协办大学士福康安等严缉海口

以防林爽文等逃逸洋面

乾隆五十二年九月三十日 台湾档

大学士和，字寄钦差协办大学士总督将军侯福，钦差湖广总督将军常、福州将军参赞恒、闽浙总督李，传谕汀州镇总兵普吉保，乾隆五十二年九月三十日奉上谕：

前据柴大纪奏到，搜获贼匪伪札内，有防守海口要隘，及被官兵耻笑等语。因思贼人伙党内，既称被官兵耻笑，自系贼匪抗拒时，屡被官兵剿败，心存畏惧之言。其所称防守海口，亦必系虑及将来穷蹙之时，希图窜逸入海。况前据孙士毅奏，访闻贼有暗造船只之事，业经降旨，令常青等预为防范。今贼匪伪札既有防守海口之语，可见贼人气馁，已预思逃窜之计，将来官兵四路追剿，贼匪自必由海口遁逸，不可不加以严防。著传谕福康安、常青等，务须严飭弁兵，于沿海各口岸要隘处所，梭织往来巡逻稽察，毋使贼人抢占船只，得以逃往洋面，致搜捕有稽时日。

又，前据李侍尧奏，鹿耳门、鹿港等处，已拨派舢舨船分驻。嗣又据奏，所派船只尚觉单薄，又调取舢舨船只，并拨枪兵二百名前往协守等语。此项舢舨派往驻守之后，该二处有无贼匪在洋面

滋扰，兵丁等曾否拿获贼船，总未据李侍尧奏及。著该督即将该处情形据实复奏，并飭该官兵等务须实力巡防，毋致稍有疏懈。

再，普吉保前据李侍尧奏，定于九月初二日，由西螺进攻斗六门，已阅两旬有余，曾否得有胜仗，打通道路？恒瑞驻扎盐水港，如何剿杀贼匪，将鹿仔草收复，前抵诸罗，与柴大纪会合，亦尚未据奏报。著恒瑞、普吉保即将近日打仗杀贼，曾否前抵诸罗，即行迅速复奏。至福康安于本月初五日自建溪发折后，按日计程，即使行走稍缓，亦可于十五日以前行抵厦门，乃迄今半月有余，尚未接到福康安奏报，自必系途中偶遇疾病，恐朕廑念，不肯自行陈奏，又不令李侍尧等奏闻。但朕于军营文报，日夕悬念，福康安久侍内廷，宁不知仰体朕宵旰焦劳之意，何以奏报迟缓若此？著福康安、李侍尧即将于何日前抵厦门，会晤商办，及因何行走迟滞缘由，据实速奏。将此由六百里加紧谕令知之，日夜望不休，当速即奏闻。

钦此。遵旨寄信前来。

谕钦差协办大学士福康安速奏因何

行走迟缓及各处近日战况

乾隆五十二年十月初二日 台湾档

大学士和，字寄钦差协办大学士总督将军侯福、钦差湖广总督将军常、福州将军参赞恒、闽浙总督李，传谕汀州镇总兵普吉保，乾隆五十二年十月初二日奉上谕：

前据常青九月十一日奏到折内称，现在添调浙粤满兵，俱已陆续渡海，计日即到台湾。恒瑞带兵三千名援应诸罗，常青仍带

现有之兵五千名，搜剿南潭、中洲、大穆降一带贼匪，设法擒拿庄大田。俟南路一清，即会剿首逆林爽文大里杙巢穴等语。计恒瑞带兵前赴北路后，常青自必亲统官兵，往南潭、中洲一带搜剿贼匪。乃常青日内续到之折，只系复奏山猪毛广东庄义民情形，而于何日起程，并未据奏及。此折奏到后，迄今又半月有余，该将军究于何日起程，及如何打仗杀贼，曾否拿获庄大田，收复凤山之处，自应随时奏报。乃一月有余，总未据奏报，其故殊不可解！

又，恒瑞奏，于八月二十五日已抵盐水港，鹿仔草又被贼匪焚占。该参赞候续到之一千五百名兵到齐，即行相机前进等语。自奏报以后，迄今又越月余，想此时在后之一千五百名兵早已到齐。该参赞于何时由盐水港进剿，是否已达诸罗，与柴大纪会合一处，及鹿仔草占据贼匪曾否杀散收复之处，亦应随时速奏。乃至今总未奏及，朕心深为悬念。

又，前据普吉保奏，于九月初六日带兵由西螺进攻斗六门。此折系九月十九日奏到，嗣又据恒瑞奏，抵盐水港后，复札会普吉保，令其派员带兵接应诸罗。而普吉保自鹿港起程进兵后，曾否将西螺一带贼匪剿散，进击斗六门，打通道路，接应诸罗，与柴大纪等会合之处，亦总未据续有奏报。何以迟缓若此！

至福康安自九月初五日由建溪驿发折后，按日计程，早应前抵厦门。本日询问李侍尧奏折差弁姚成基，据称于初九日在建宁府遇见福康安等语。建宁距厦门十三站，福康安若兼程行走，六七日可到，亦应于十五、十六等日到彼，与李侍尧会晤。且检查李侍尧春间前赴福建时行走程期，系于二月初二抵杭州，十七日即抵泉州，行程仅止半月。此次福康安系于八月二十六日行抵杭州，即照李侍尧行走日期计算，九月十一、二日即应前抵厦门。

乃上次李侍尧奏到之折，系九月十五日拜发，尚未据奏报福康安到彼。福康安较李侍尧年力壮盛，在途行走自应倍加迅速，乃较李侍尧行程转为迟缓，自必系福康安在途偶遇疾病，是以行程不能迅速，又恐朕廑念，不肯自行陈奏，并不令李侍尧等奏闻，节经降旨询问。朕盼望军营文报，宵旰焦劳，无时或释。福康安如果系中途患病，岂竟能隐默不奏？乃迄今几及一月，并无奏报，转增朕心萦系。福康安久直内廷，岂尚不能仰体朕意？何以迟之又久，总未具折耶？著福康安将因何行走迟缓，是否果系途次患病，于何日与李侍尧会晤商办，何日由蚶江配渡前抵鹿港之处，迅速驰奏。并著李侍尧将福康安途次行走情形，及于何日会晤配渡之处，一并据实速奏。

其常青、恒瑞、普吉保在各该处如何剿杀贼匪，得有胜仗，曾否将鹿仔草收复，及诸罗与南路近日剿贼各情形，各行迅速驰奏。并著福康安、常青、恒瑞、普吉保等，嗣后每隔四、五日，即行发折一次，毋致迟缓。李侍尧一得地方官禀报，毋论虚实，均应将南北两路军营情形，及诸罗信息，仍即迅速驰奏，以慰廑注。将此由六百里加紧各传谕知之。

钦此。遵旨寄信前来。

谕内阁授成都将军鄂辉为参赞大臣

令其赴台进剿

乾隆五十二年十月初四日 台湾档

乾隆五十二年十月初四日内阁奉上谕：

成都将军鄂辉现在带领四川屯练兵丁，赴台湾剿捕贼匪。

鄂辉久历行阵，于军旅较为谙习，亦著授为参赞，协同福康安悉心筹办进剿，以期迅奏肤功。钦此。

谕闽浙总督李侍尧复奏查挖林爽文祖坟情形

乾隆五十二年十月初四日 台湾档

大学士和，字寄闽浙总督李，乾隆五十二年十月初四日奉上谕：

前因贼首林爽文纠众谋逆，罪大恶极，该犯系漳州人，其祖坟自必近在漳州一带，早经降旨令李侍尧密委妥员，将林爽文祖坟先行刨挖，剉骨扬灰，以损贼势。所有前降谕旨，系八月十七日由六百里发往，计李侍尧于九月初间即应接奉，何以迄今月余尚未据该督复奏？著传谕李侍尧，将于何日查明林爽文祖坟处所，及如何办理之处，迅速复奏。将此谕令知之。

钦此。遵旨寄信前来。

谕钦差协办大学士福康安迅速渡台

沿途搜剿确保通道

乾隆五十二年十月初四日 台湾档

大学士和，字寄钦差协办大学士总督将军侯福、钦差湖广总督将军常、福州将军参赞恒、福建水师提督柴、闽浙总督李、两广总督孙，乾隆五十二年十月初四日奉上谕：

本日据福康安奏到，于九月十七日前抵厦门，接阅台湾各官

稟报贼匪情形各折内称，据臬司李永祺等稟报，台湾府城附近村庄尽被贼胁，不惟诸罗受困，即郡城亦在围中，甚为可虑。现在福康安即由厦门速渡鹿港，探视贼踪所至，沿途搜剿。将贼匪屯聚相联之处，并力截断，痛加剿杀，使其首尾不能相顾，官兵所过之地不致旋通旋塞。即酌量情形，或带兵直抵诸罗，或进逼大里杙贼巢，则诸罗之围，不攻自解，贼匪虽多，无难克期歼灭等语。所见已得要领，略为欣慰。连日因福康安自入闽境后，总未据有奏报，即虑及福康安或在途次偶有疾病，行走不能迅速，日夕悬注，屡经降旨询问。今据奏已于十七日前抵厦门，与李侍尧会语商办，一切俱合机宜。又闻疾已全愈，稍为慰藉，已于折内详悉批示矣。

所奏台湾府城贼匪现在窥伺一节，俱系地方官稟报之语。但前此蔡攀龙带兵援应诸罗时，先据地方官稟报，已将道路打通，直抵诸罗，复自城内杀出。而续据恒瑞、李侍尧奏报，则蔡攀龙抵诸罗后，仍被贼梗阻道路，并未能出城剿杀。可见该处地方官稟报之词，好否皆未必尽系确实。今府城虽有贼滋扰，或亦未必竟如所稟情形。岂有该地方官稟报官兵得胜则未能尽实，而于贼匪猖獗之处即为可信耶！惟常青处兵力虽厚，但先后派拨魏大斌、蔡攀龙等援应诸罗，已不免分势，而恒瑞又带兵三千赴盐水港，常青处现存之兵，以分而见单，所存无几，贼人乘间侵扰，亦属事之所有。常青前经具奏，亲带官兵往南潭、中洲等处搜剿贼匪，如府城附近贼势稍增，想常青自揣兵力有限，不能直前搜捕，亦断不能轻离该处。府城从前未添兵以前，尚能守护无虞，又有常青在彼，自当更无他虑。总须俟常青等奏到，方得的实。常青自九月十四日以后，总未据奏，伊即不能往南路进剿，亦应将该处筹办情形，据实奏闻。现在是否实系被围，及因何不能前

往之处，何以并未奏及？柴大纪处自蔡攀龙入城后，亦应彼此相商，带兵出城剿杀沿途贼匪，岂可株守县城！又普吉保带兵由西螺进攻斗六门，曾否打通道路，直抵诸罗，久未据奏报。恒瑞驻扎盐水港，如何筹划进剿，曾否将鹿仔草收复，均未据续奏。著常青、恒瑞、柴大纪、蔡攀龙、普吉保等各行速奏。

现在府城一路又有贼匪滋扰之信，而蔡攀龙等既抵诸罗以后，仍被贼梗阻，不能杀出，想诸罗有柴大纪等设法守御，亦不致有意外之忧。看来常青、柴大纪两处局面，尚能支持防守，所忧官兵或因屡有挫失，不免气馁，于剿捕未能得力。惟鹿港自蓝元枚病故后，该处尚无贼人滋扰，其漳州、广东兵未经与贼打仗者，计共有五千名。而徐鼎士拟由大甲溪夹攻大里杙贼巢，该处陆续调往之兵，及徐鼎士所招集义民，几及一万，亦尚未与贼接仗，其气正为锐盛。今福康安即由厦门配渡前赴鹿港，仍声言由鹿耳门前进，使贼匪猝不及防，所办甚好。其所称常青等调度失宜，官兵多有损失，及南北两路贼匪处处相通，而我兵相距辽远，声势不能联络各情节，实为切中肯綮。福康安于抵鹿港后，振作士气，镇定人心，探视贼踪所至，沿途搜剿，实为此时要着。至贼人狡猾伎俩，往往于官兵过后阻截道路，今福康安拟将贼匪屯聚相联之处，并力截断，使其首尾不能相顾，是即因贼人之巧计，用以攻贼，俾官兵所过之地，不致旋通旋塞，深合机要。此事初起时，若早派福康安前往督办，自早已蔽功。乃黄仕简、任承恩贻误于前，继而常青等又茫无把握，以致旷日持久，尚未办理完结，朕悔之无及。

今福康安到彼，声势壮盛，又有巴图鲁、侍卫、章京等百余人，带领已到蓄锐之兵进剿。且续调之屯练二千、黔兵二千、广西兵三千，现据保宁、李庆棻、浦霖、何裕城、孙永清先后奏报

起身过境日期，约计十月底俱可到齐。现经节次降旨，催令迅速前进。此项兵丁内，川、黔两省兵最为矫捷，临山涉险，骁健可用。虽广西之兵稍逊于此二省之兵，然于南方潮溽之地，水土相宜，尚可期得力。又李侍尧派赴盐水港兵三千名，今据已先有一半放洋，其一千五百名现经总兵郑国卿带领，候风过渡。又鹿港现存漳州兵二千，及李化龙所带广东兵三千，又徐鼎士驻守淡水之兵，并招集番勇义民共有万人。此等各项兵丁，皆系生力，锐气方盛，正可及锋而用。合之常青、恒瑞、柴大纪、普吉保等所带之兵，统计不下五、六万，是先后派调之兵，为数已多，加以府城及鹿港招集义民，又有五、六千名，自足敷剿捕之用。况我朝定鼎之初，止用满州劲旅，所向克捷，无不以少击众，戡定海内，奄有万方。况此等么麽草窃，即云为数稍多，只不过一时乌合。以现在如许多兵，统领进剿，岂尚有不敷！即云遍地皆贼，断无须一兵抵一贼之理！福康安惟当督率将弁，奋勇前进，勉图奏绩。

前经降旨令李侍尧、孙士毅于福建漳泉，及广东潮州等处，添募官兵，以备调遣。该督等竟当广为召募，多多益善。粤东与福建接壤毗连，设遇有调拨，可就近派往。而附近游手无籍之徒甚多，令其食粮充伍，既可安戢地方，又可预备调拨。福康安察看情形，若剿捕贼匪实有必须添调之处，除远省旷日持久不便纷纷檄调，致滋拨累外，而闽省粤东之兵，不妨一面奏闻，一面即就近拨调，以期应手，此时朕所倚以集事者，惟福康安一人。福康安应坚持定见，悉心筹办，相机持重办理。务须计出万全，一举集事，如此上天必垂嘉佑。福康安或带兵直抵诸罗，或进逼大里杙贼巢，惟在福康安酌量机宜，奋勇督剿，克期蒞事，以副委任。总之贼匪虽多，正须奋力剿杀，连得胜仗。其渠魁首恶，先

行擒获，其余伙匪，自成破竹之势。惟福康安折内所称沿途搜剿一节，贼匪到处屯聚，所遇村庄，民人多被迫胁。今福康安统兵进剿，其经过地方，固应乘势扫除，不使于官兵过后潜出滋扰。但所过村庄，其中民人附从贼党，心怀叵测者，固不可留，其并非贼党，而心持两端者，亦所不免。大概见官兵势盛，即起为良民，见贼匪稍张，即去而从贼。若悉行歼戮，恐一处村庄被官兵剿洗，而他处村庄闻风畏惧，为贼拒敌，是驱使从贼，转坚其助逆之心。若不能留心防范，而于所过村庄，听其聚处，又恐奸猾之徒，于官兵过后生心梗阻，致为肘腋之患，不可不熟筹妥办。福康安务须随时体访，加意密防，于所过地方，酌量剿抚，使良善得安其心，而奸宄无由逞其伎俩。固不可过于张皇，致人怀反侧，亦不可稍涉大意，容留余孽。惟当使之畏威怀德，庶可乘胜长驱，无后顾之忧。此为最要。再如鹿仔草等处，本系杨起麟、邱能成在彼驻守，嗣因调往援应诸罗，该处兵单，为贼所占。福康安统兵前进，所过之处，其原派驻守官兵，不可轻易撤调。即鹿港亦应遵照昨降谕旨，于普吉保、李化龙二人内，酌留一人驻守，以免疏虞。

至常青前据奏称，于搜捕南路贼匪后，再行前赴北路会剿。近日剿贼情形，何以总未据奏报？今府城既有贼匪滋扰之信，恐常青在彼未能得手，福康安当酌量情形。常青能将府城附近贼匪悉行剿灭，前往南潭一带擒拿庄大田，收复凤山，固属甚善，设使兵力有限，而贼匪正在窥伺府城，即应令常青带兵驻扎府城，专委以守城之事，不必轻离该处，以致或有疏虞，办理更为棘手也。

至京营劲旅，朕非靳于调拨，惟念自京至闽，道里遥远，即如川黔等省调派之兵，到彼尚须时日。若调动京兵，更属缓不济急，兼恐有骇听闻。且各省官兵到台湾后，尚因彼处气候水土不

能服习，多有染患疾病〔者。若京兵到彼，更不相宜。即派往亦恐用非所长，〕^①不能得力，是以不复调遣。福康安意以为何如？现在鄂辉带领川兵前赴台湾，已有旨授为参赞。伊人尚明白，而于军旅之事，亦为熟谙，福康安与之酌商办理，自属有益。

至贵林、杨起麟，前据李侍尧奏，并无下落，今据稟报闻已被贼害。此二人是否实系阵亡，著福康安即行查明速奏。其邵宗尧探有信息，即行稟报。虽稍有不实，亦无容加以责备。

至李侍尧奏称再拨军需银两，已敕部于邻近省分速行拨解。其郑国卿所带闽兵一千五百名，派赴常青处协助，所办亦好。至川、黔、广西三省兵到后，务须随到随即配渡，径赴鹿港，以速为要。将此由六百里加紧各谕令知之。仍著福康安将于何日得风配渡，前抵鹿港，定于何路进剿，及常青、恒瑞、普吉保等各路打仗杀贼，并诸罗、鹿仔草近日情形，俱著迅速驰奏。李侍尧得有稟报信息，亦即行速奏，以慰廑注。

钦此。遵旨寄信前来。

谕户部于邻近福建各省内调拨银

三百万两以备军需

乾隆五十二年十月初四日 台湾档

乾隆五十二年十月初四日内阁奉上谕：

现在台湾剿捕逆匪尚未竣事，所有军需等项，动用较多，著该部于邻近福建各省分，酌拨银三百万两。令各该督抚派委妥

^① 据《钦定平定台湾纪略》（刻本）卷三十九补。

员，迅速解往闽省备用。钦此。

谕钦差大学士阿桂阅看福康安奏折复奏所见

乾隆五十二年十月初四日 台湾档

大学士和，字寄钦差大学士阿，乾隆五十二年十月初四日奉上谕：

本日据福康安奏到，于九月十七日，前抵厦门，与李侍尧会晤商办一切情形，所见尚得要领，已有旨详悉指示。至其折内所称，接据地方官禀报，台湾府城附近村庄，俱被贼胁，不惟诸罗受困，即郡城亦在围中等语。常青处所有官兵不为不多，节经派令魏大斌、蔡攀龙等接应诸罗，恒瑞又带兵三千，前赴盐水港，府城兵力未免分而见单。或贼匪乘间窥伺，亦事之所有，但地方官禀报之词，未可全信。即如前此蔡攀龙带兵援应诸罗，先据杨廷理等禀称已将道路打通，直抵诸罗后，自城内杀出。旋据恒瑞奏报蔡攀龙入城后，仍被贼匪梗阻道路，蔡攀龙并未出城杀贼。可见该地方官禀报，俱系得自传闻，未为确据。朕意府城久经保守无虞，今该处兵力虽分，而常青在彼，即不能往南路搜捕，亦尚能固守郡城，总须俟常青报到，方见的实。惟常青自九月十四日奏报后，至今总未据有续奏，甚切悬盼。现在剿捕事宜惟望福康安即日配渡，前抵鹿港，统领新到各兵，相机进剿，以期迅速集事。

所有本日福康安奏到之折，及所降谕旨，俱着抄寄阿桂阅看，伊意以为何如，即就所见，据实复奏。至豫省漫工，昨据阿桂等奏报，因风狂水涌，两坝陡失两埽。幸引河仍前畅注，目下

上紧镶筑，自尚易于蔽工。现在口门水势是否平缓，以工计日，约于何时可以合龙，深为悬注。着即将该处情形，据实速奏，以慰悬念。将此随报便谕令知之。

钦此。遵旨寄信前来。

谕两广闽浙等省督抚催令援台官兵趲程前进

乾隆五十二年十月初四日 台湾档

大学士和，字寄两广总督孙、广西巡抚孙、闽浙总督李，乾隆五十二年十月初四日奉上谕：

本日据何裕城奏，鄂辉等带领四川屯练兵丁，于九月二十四日全数抵九江境等语。至广西、贵州兵丁，前据孙永清、李庆棻奏，已于九月初九、十六等日，全数出境，谅日内自可陆续趲发。已节经降旨，催令趲行。现在福康安已抵厦门配渡，亟须官兵接济，合力攻剿。著传谕沿途各督抚，于前项官兵抵境，务须妥为照料，趲程前进，（愈）速（愈）妙。并著李侍尧于海口预备船只，俟官兵一到，即行配渡，前赴鹿港，毋致稽迟。将此由六百里各谕令知之。

钦此。遵旨寄信前来。

闽浙总督李侍尧奏请再拨军需银两折

乾隆五十二年十月初四日批 军录

闽浙总督臣李侍尧跪奏，为恳恩再拨军需银两事。

窃照闽省办理军需，先在本省藩库动拨银一百二十七万两。嗣经臣奏拨浙粤近省银一百四十万两，又蒙皇上敕部再拨一百万两。除节次解往台湾南北各路军营一百五十余万两外，其内地办理兵差夫船各价，及一切制备军装、借给官兵俸饷等项支用亦多，虽现在解往军营之项，及奉旨续拨之一万两，俱尚未用完。但大兵正当进剿，宁可宽为备办，若俟需用时始行奏请，恐致稽迟。合与仰恳皇上天恩，敕部再拨银两二三百万两，以备接济。如军事得早完竣，仍可留作善后事宜各款之用。

至本省岁需官兵俸饷等项一百四十万余两，奉准部咨，在藩库额征地丁银内支給。而藩库自动拨军需后所存无几，兼以漳、泉二府，奉旨缓征共银二十七万余两，是以额支兵饷亦属不敷。据布政使觉罗伍拉纳详请，于盐道库内拨银四十万两以供支放，似亦应照详动拨，合并奏明，伏乞皇上督鉴训示。谨奏。

乾隆五十二年九月十九日。

乾隆五十二年十月初四日奉朱批（下残）

闽浙总督李侍尧奏拟派臬司李永祺

赴鹿港料理军需等情折

乾隆五十二年十月初四日批 军录

闽浙总督臣李侍尧跪奏，为奏闻事。

窃臣于本月十五日接将军常青来札，内有恒瑞折稿。臣查恒瑞奏折尚未过境，随即具奏，将伊折稿进呈在案。嗣又接臬司李永祺及杨廷理、杨绍裘等禀报府城及鹿仔草一带情形，正在缮折具奏，适福康安于十七日来至厦门，面询情形。臣即将各禀与之

阅看。福康安现在具奏，臣毋庸再叙外，福康安今遵旨竟赴鹿仔港。缘臣于未奉旨之前，所备船只马匹等项，俱在厦门。海兰察等亦俱在厦门。今若将各船驾至蚶江，再行配渡，未免转致纡折稽迟。是以福康安等即日由厦登舟，一俟风顺，即刻开驾。（朱批：好，知道了。）查鹿港既近贼巢，则与其在南路进兵，自不如在北路进兵，攻其所必救，诸罗之围即可解散。圣明指示，最为扼要。前据鹿港各官稟报，普吉保定于本月初六日进兵。但是否得利，至今尚未续得信息。（朱批：大奇。）今将军亲往督率，鼓励官兵义民，自必益加踊跃。俟粤西兵到，臣即随到随令配渡，（朱批：以速为贵。）以资接济。

查鹿港所运粮饷铅药等项，本俱充足，今更当源源运送，务期宽裕。（朱批：是。）惟是该处粮饷向来只系同知等官办理，今将军参赞等全向此路，将来续调之川、黔兵到来，亦俱由此进剿，则粮饷不可与大员经理。臣拟即檄臬司李永祺由海道前赴鹿港。（朱批：好。）但据福康安告称，此时尚声言由鹿耳门前进。臣俟福康安开洋后，再饬知该臬司前往，仍须慎密，不可稍露端倪。其府城有永福、杨廷理等料理，亦可不致有误。

至府城一带地方，亦属紧要。现在常青等在彼堵剿，料可无虞。惟官兵屡次赴援诸罗之后，该处存兵又稍觉单薄。（朱批：虽不能进剿，但守城尚可无虞耳。）查臣所派赴援盐水港之兵三千名，已先有一半放洋。其续到之一千五百名，现在总兵郑国卿带领尚在厦门守风。臣与福康安面商，将此一千五百兵仍赴常青处协助。（朱批：好。）则南路兵力，亦益厚集，足资剿杀矣！谨缮折驰奏，伏乞皇上睿鉴。谨奏。

乾隆五十二年九月十九日。

乾隆五十二年十月初四日奉朱批：览。钦此。

钦差协办大学士福康安奏抵厦门

酌定赴鹿港进剿折

乾隆五十二年十月初四日批 军录

臣福康安跪奏，为行抵厦门询问贼匪情形，酌定径赴鹿港缘由，恭折奏闻事。

窃臣自入闽省以来，沿途不见柴大纪文报，知诸罗围困更为危急，及阅看恒瑞奏稿，所带赴援之兵，于二十五日行至盐水港，不能前进，尚未与柴大纪会合。而常青株守府城营盘，南路贼匪仍行四出攻扰。臣沿途细加询访，虽传闻之辞不一，大约南北两路官兵，仅可支持防守，（朱批：竟是如此局面，可恨！）至今尚未得手。臣心倍加焦急，于十七日驰抵厦门，晤见李侍尧，询以贼匪情形。亦言近日又屡接台湾各官禀报，贼势似更猖獗，正拟据禀具奏，并将各禀与臣阅看。据臬司李永祺禀称：府城周围十里之内，村庄尽被胁从，不惟诸罗受困，即郡城亦在围中。郡城兵丁除拨往诸罗七千名外，其余呈报病故者殆无虚日，现在卧病者尚有一千数百名，兵势日益馁怯。南潭贼匪距城甚近，其地附近大穆降、莺松、冈山等庄，皆系贼匪聚处，此时郡城甚为可虑。又据永福、杨廷理、杨绍裘等禀称：诸罗城西十里地名汤元店，贼匪众多，历次赴援之兵，皆于此处被截。今蔡攀龙等救援诸罗，会同游击杨起麟等前进，行至该处，亦被贼人阻截。惟蔡攀龙、孙全谋、邱能成带兵七百名到县，其余多有损失。副将贵林、游击杨起麟等闻已被害。而附近盐水港之树林头、鹿仔草、新店等处，于二十六、二十八、二十九等日，已被

贼匪抢占，盐水庄民，大半从贼各等语。臣查各员所禀，鹿仔草等处被贼占据，及将弁兵丁损失各情节，（朱批：此事已知。）俱系巡检邵宗尧禀报之词。又称常青接到恒瑞来字，亦有此语。何以常青、恒瑞并未具奏。（朱批：至今并无常青一字至。）或系该员等张大其词，亦未可定，必须亲至该处目击情形，方可相机筹办。（朱批：甚是，然不可不持重。）窃思台湾贼匪，原系乌合之众，易聚易散。但该将军等调度失宜。（朱批：实因如此，悔之无及！）官兵多有损失，贼势固结蔓延，日肆猖獗。而该将军等节次奏报之折，仅以支持堵御情节，敷衍塞责。而于贼匪出没屯聚实在情形，及官兵打仗损失之数，并未详悉陈明，一味支吾掩饰，以致久未蒇功。此时若再事因循，稽延时日，更恐上烦圣虑。臣受恩深重，非他人可比。兹蒙委以军旅重任，剿捕事宜尤臣专责。凡有见闻，不敢不据实入告。

现在台湾地方，据臣所闻，自凤山以至彰化要隘处所，多被贼匪占据，道路梗塞。近山一带如布袋尾、双口坑、大穆降、九芎林、头湖、二湖、三湖皆系贼巢。是以南北两路贼匪，处处相通。而官兵各守一方，相距辽远，声势转不能联络。（朱批：病实在此。）且进兵道路窄狭，数人不能并行。贼匪潜伏道旁庄内，伺我兵经过，行至半途，即突出从中抄截。领兵将弁不知探明路径，设法防备，以致屡中贼匪狡计。即奋勇如蔡攀龙，救援诸罗，亦不能全师直抵县城，是其明验。看来贼匪不过鬼蜮伎俩，惯于中途邀截。若我兵探视贼踪所至，沿途搜捕，连得数次胜仗，其技立穷。（朱批：此语得之，亦曾谕汝矣！勉为之。）无如自用兵以来，办理不合机宜，益长贼人之智。每每官兵赴救，冲过贼庄道路，旋被阻截，以致郡城、诸罗两处，受困日久。村庄港社，告急频闻。全郡官弁兵丁，俱不免心怀惶惧。现在鹿

港一带，蓝元枚已经病故，贼人闻知必致乘虚窥伺。（朱批：早虑及此，幸贼尚未出此。）普吉保、李化龙俱非堪以倚任之人。臣若遥揣情形，指示一切，又恐与该处形势不尽符合。臣惟有速渡鹿港，钦遵训示，立定主见，以镇人心，而壮军势。（朱批：此最要着，立定此心。）臣前于途次已飞檄各营，严切晓谕，申明军纪，尽改委靡之习。（朱批：上天必垂眷佑。）一到鹿港，即选择勇往弁兵，激励出力义民，（朱批：好，勉为之。）相度地势，整兵奋勇前进，务将贼匪屯聚相联之处，并力截断，痛加剿杀，使其首尾不能相顾，（朱批：是，以彼巧计攻彼，此语得之。）官兵所过之地，不致旋通旋塞。（朱批：如此方好。）即当酌量情形，或带兵直抵诸罗，或进逼大里杙贼巢，则诸罗之围不攻自解。要领既得，乘胜直前，虽贼匪众多，无难克期歼灭。

（朱批：仍以安民为先，解其胁从。既安之后，仍当防之。）

至臣前赴鹿港，本应由蚶江配渡，而李侍尧所备船只、马匹、帐房等项，先已齐集厦门，若复调往蚶江，转稽时日。查厦门至鹿港海道，本属相通。自应即由厦门前往，（朱批：是。）以期迅速。惟现在飓风频作，连日不止。建宁镇总兵郑国卿兵船开驾四次，仍回厦门停泊。臣昼夜焦思，益深愁闷。兹已于十九日拜折后，登舟即在大担门候风。一俟风信稍顺，即刻放洋径渡。臣此时仍声言由鹿耳门前进。（朱批：甚好。）临时再谕知船户，令其直赴鹿港，使贼匪猝不及防，亦声东击西之一法。所有行抵厦门登舟日期，及酌定径赴鹿港缘由，恭折奏闻，伏乞皇上睿鉴。谨奏。

乾隆五十二年九月初四日。

乾隆五十二年十月初四日奉朱批：待汝此折，日夜焦急。即知汝病，今大愈否？今严催广西、贵州、四川兵速进。此兵一到，

当得力进剿全功矣！伫俟捷音。钦此。

谕钦差协办大学士福康安等将招抚谕旨

刊刻誊黄遍行张贴

乾隆五十二年十月初五日 台湾档

大学士和，字寄钦差协办大学士总督将军侯福、钦差湖广总督将军常、领侍卫内大臣参赞侯海、福州将军参赞恒、福建水师提督参赞柴、陆路提督参赞蔡、闽浙总督李，乾隆五十二年十月初五日奉上谕：

昨据福康安奏，前抵厦门，与李侍尧商办情形，已将一切机宜详晰指示。此事初起时，朕未免稍存大意，未即派令福康安前往督办，以致日久未径办结，方以为悔。现在福康安前抵鹿港，相机进剿，自可即日蒞功。惟思从前剿捕朱一贵之时，皇祖曾经降旨，将协从之众，许其自新。即贼首贼目，若能悔罪投诚，亦当贷其一死。今林爽文、庄大田等罪大恶极，实为天理所不容，一经擒获自当尽法处治，以申国法，而快人心，断难宽贷。至贼众或系无籍穷民，或系被贼威胁，无奈听从者，并非出于本愿，自应急为开导，广示招徕。现经明降谕旨，恺切晓谕。但此间尚不便宣示，以启众疑。著福康安、常青、李侍尧等接奉后，即刊刻誊黄，于台湾南、北两路远近村庄，及漳泉一带地方，遍行张贴。使被胁之人，知有自新之路，得以去逆效顺。即贼伙亲党，见有示谕，互相传布，贼中匪犯闻知，尤足以解其负固之心。于剿捕机宜，更属有益。

至福康安统兵进剿时，经过村庄，仍须酌量情形，妥为剿

抚。昨已有旨详示。反复思之，此事实关紧要。此等村庄民人，附从贼匪，心怀叵测者固多，而并非贼党，心持两端者恐亦不免。若悉行诛戮，既恐良善庄民闻风生畏，转驱使从贼，适以坚其助逆之心。若不留心防范，又恐容留余孽，于官兵过后，潜出梗阻，复为肘腋之患。必须严密防范，计出两全，方为妥善。福康安须与海兰察等，彼此熟商，设法筹办。固不可过于张皇，尤不可稍涉大意。总以安定良善之心，而仍免后顾之忧，方为万全。特此再行传谕。

福康安等即将接奉前旨后，如何酌筹办理之处，迅速复奏。并著常青、恒瑞、柴大纪等，将南北两路打仗杀贼情形，一并各行速奏，以慰廑念。将此由六百里加紧各传谕知之。

钦此。遵旨寄信前来。

谕钦差湖广总督常青等速奏现况

乾隆五十二年十月初六日 台湾档

大学士和，字寄钦差协办大学士总督将军侯福、钦差湖广总督将军常、领侍卫内大臣参赞侯海、福州将军参赞恒、福建水师提督参赞柴、陆路提督参赞蔡、闽浙总督李、两广总督孙、福建巡抚徐，传谕汀州镇总兵普吉保，乾隆五十二年十月初六日奉上谕：

昨据福康安奏，九月十七日抵厦门后，接阅台湾各官禀报，府城附近村庄尽被贼胁，不惟诸罗受困，即台湾郡城，亦在围中等语。已降旨询问常青等矣。台湾相隔重洋，地方官禀报俱系得之传闻，或未尽实。但常青处先后派拨魏大斌、蔡攀龙等援应诸

罗，恒瑞又带三千名前赴盐水港，府城之兵或以分而见单，贼匪乘间侵扰，亦未可定。朕心深为悬念，专盼常青报到，方得确实。乃常青自九月十一日奏到带兵五千名前往南潭、中洲一带搜剿贼匪缘由，又十四日续奏到山猪毛广东庄义民情形后，计期又二旬有余。此数旬内在彼何为，伊究于何日起程前赴南路剿贼之处，并未据续奏及。今府城既有贼匪之信，常青即不能前往南路进剿，亦应仍回至府城，将该处筹办情形及现在是否果系被围之处，据实具奏。何以许久未见奏报？岂不知朕廑念军务，宵旰焦劳，无时或释耶？

至柴大纪，自蔡攀龙进抵县城后，道路仍被贼梗阻，伊二人自必彼此相商，设法带兵出城，剿杀贼匪。其近日竟作何筹办，有无应援兵到，能否出城杀贼，及诸罗保守无虞之处，亦应间道差人送至鹿港奏闻，亦久未具奏，殊切悬盼。再恒瑞驻扎盐水港后，其在后之一千五百名兵，自早已到齐。该参赞究于何时由盐水港进剿直达诸罗，会合柴大纪，及鹿仔草屯占贼匪曾否剿散收复，亦应随时速奏。又普吉保九月十九日奏到带兵由西螺进攻斗六门，嗣经恒瑞札令派员带兵接应诸罗。普吉保自鹿港起程进兵后，曾否将西螺一带贼匪剿杀，进击斗六门，打通道路，及如何接应诸罗之处，至今几及两旬，未据续奏。前已节次降旨垂询。着常青、恒瑞、柴大纪、普吉保等，即将现在情形，各行速奏。

至福康安于九月十九日登舟，待风候渡。究于何日放洋，何日前抵鹿港，及与海兰察等如何商办，定于何路进剿，亦着即行速奏，以慰廑注。今发去孔雀翎，蓝翎各十枝，交福康安抵鹿港后进兵剿贼时，如将弁内及带去巴图鲁人等，有打仗出力者，即酌量分别赏戴，以示鼓励。

再李侍尧自前次奏报后，台湾地方官自必续有禀报。台湾府城滋扰之信，是否确实，诸罗、鹿仔草等处现在情形若何，及福康安于何日放洋之处，俱着随时速奏。再，常青、柴大纪等日久未有奏到，自必系在途耽搁。著李侍尧即行严查，是否系在洋阻风迟误，抑系内地驿递延缓？若内地驿站果有迟误，自即应查明参处。即系海洋阻滞，亦应催令设法，岂可听其任意守候稽迟耶！至徐嗣曾系本省巡抚，亦必接有台湾地方官禀报军营信息，何以近来总未奏及，视若漠然？着传谕该抚，如得有禀报南北两路官兵打仗情形，毋论虚实，俱着随时具奏。又孙士毅驻扎潮州，相隔较近，于台湾剿贼情形，亦必得有信息。何以近日未有奏报？并着传谕该督，得有传闻，亦毋论虚实，即行驰奏，以慰廑念。将此由六百里加紧各再谕令知之

钦此。遵旨寄信前来。

谕钦差协办大学士福康安

抵台后即领兵进击

乾隆五十二年十月初七日 台湾档

大学士和，字寄钦差协办大学士总督将军侯福、钦差湖广总督将军常、领侍卫内大臣参赞侯海、闽浙总督李，乾隆五十二年十月初七日奉上谕：

据福康安等奏到接奉谕旨酌筹复奏一折，内称登舟数日，风信靡常，现仍在大胆门守候。近日以来，发往廷寄谕旨，及批回奏折，俱因守风未能递送，而台湾亦久无内地渡回船只。此时难以开行，日内若得稍顺之风，即行放洋，以期速渡等语。已于折

内详晰批示。向来海面九月内风色不正，尝闻传说，今果如此，原不可过于焦急，轻易冒险。但十月向称平顺易渡，福康安于九月十九日在厦门登舟候风过渡，计此时早交十月，想已得有顺风，久经放洋，前抵鹿港矣。

台湾剿捕贼匪，前后派调兵丁，不为不多，而常青等运筹调度，不能得有把握，以致东派西拨，兵力见短，贼势尚在各路滋扰。幸而朕先事预筹，早经降旨将四川屯练及贵州、广西兵预为调度。此项官兵内虽广西兵稍觉软弱，然较之他省，已为健勇。其川、黔二省兵，最为赳捷，于驰涉山险，尤为骁勇可用。此时台湾各路之兵，未免因日久稍疲，而新调川、黔、广西之兵，皆系生力，待其接续前到，正资剿捕之用。此刻虽稍稍待，然俟此兵威壮盛，机宜凑合，未始非成功先兆。福康安于此时转不必过于焦急，轻易涉险也。

所有川省屯练，及广西、贵州兵已早据保宁、孙永清、李庆棠等先后奏到，全数出境，由江西、广东接续前进。又节次降旨严催该督抚等沿途催趲，迅速遄行。约贵州兵可于十一月初间抵彼，其屯练及广西兵，不过本月内可以全数前抵台湾。现在鹿港已到之漳州、广东兵，未经打仗，俱属生力。又有李侍尧派令郑国卿带往本省兵三千名，亦在大担候风，自即与福康安一同渡洋。此内一千五百名，前据李侍尧奏，拟拨往常青处。此时福康安到鹿港后，即日相机进剿，其郑国卿所带兵三千名，竟可全数俱赴鹿港，不必拨往南路，更为壮盛。福康安既有鹿港原存之漳州、广东兵，又有郑国卿新带兵三千，加以川、黔、广西兵共七千名，合计新兵已及二万，而徐鼎士一路又有兵二千八百余名。并招集义民番勇七八千人，共合又是万余，皆系生力，可资剿贼之用。福康安到彼，即同海兰察等，带领巴图鲁、侍卫、章京等百

余人，鼓勇前进，与徐鼎士会合夹攻，何向不克？谅此么磨乌合，自无难速就扑灭。

再，七月间曾据常青奏，游击黄鸣凤带领弁兵义民，在鹿耳门洋面巡缉，了见贼船八只，随率兵民追捕，杀贼二十二人，余匪逃窜，贼船贼寮尽被焚烧等语。曾谕令常青等于各隘口分派员弁，实力巡查，严密防范。何以前此贼匪潜出滋扰时，当被巡缉官兵即时追捕剿杀，而近日鹿仔草一带近海口岸，转被贼匪肆出骚扰，焚抢屯占，并不能随时剿捕？著福康安到彼后，严飭沿海各隘口官弁兵丁等，务须梭织巡逻，认真查缉，毋使贼匪得以乘间滋扰劫夺船只，此为最要。

至常青、恒瑞、柴大纪等，自前此奏报后，迄今各阅数旬，声息无闻。即寻常塞责之语，亦并无奏到者。该处九月内风暴甚多，内地文报不能前渡，想伊等奏折亦必系因风阻滞。现在早交十月，风色顺利，想台湾文报仍可照常驰递，悬盼尤为殷切。至普吉保前在鹿港于蓝元枚病故后，仅咨请常青派拨大员接办，并不督率兵民奋力进剿。曾经降旨饬谕，并令福康安面加诘询。嗣据该镇奏到李化龙即可抵鹿港，该镇即亲带官兵进击西螺、斗六门，尚属出力。正欲观其后效，乃于前次奏到后，已阅两旬，其如何进兵攻击，及西螺一带曾否打通道路，接应诸罗之处，并未据有续奏。又系因风阻隔，亦未可定，颇为悬念。普吉保在彼带兵，是否实能奋勇出力，著福康安秉公查明，据实复奏。人才难得，福康安亦不必因前旨预存成见也。

将此由六百里加紧各传谕知之。仍着福康安将于何日得风放洋前抵鹿港，并定于何路督兵进剿，及南北两路近日打仗杀贼情形，一并迅驰奏，以慰廑念。

钦此。遵旨寄信前来。

钦差协办大学士福康安等复奏筹办军务折

乾隆五十二年十月初七日批 军录

臣福康安、臣海兰察跪奏，为钦奉谕旨酌筹复奏事。

窃臣福康安行抵厦门，即将登舟日期，及询问贼匪情形，恭折奏蒙圣鉴在案。兹于舟次陆续奉到初六日至初九日谕旨，令臣等速行配渡，前抵鹿港。又以蓝元枚现已病故，特谕臣福康安，不可因无倚仗得力之人，稍存畏怯疑难之见。圣训谆谆，至为明切。

伏查鹿港一路，距彰化较近。从大肚溪一带前进，可以进逼贼巢，攻其必救，诸罗自可解围。或带兵直抵诸罗，亦可与柴大纪会合，并力进剿。较之由北路进兵，更为扼要。且现在蓝元枚病故，该处统率无人，正须臣等迅速前往，以壮军势。前蒙圣明烛照几先，已经指示及此。仰见睿算如神，事机符合。谅此乌合匪徒，成擒当在指日。臣等跪诵谕旨，实深钦服。臣福康安恭膺恩命，委以军旅重任，仰藉天威，军声益当壮盛。林爽文等不过蚁聚一时，原无足畏。军营将弁兵丁等，惟在得人调遣，皆可励其奋勇之气，督率进攻。况又有巴图鲁侍卫章京等，均系久经行阵之人，一可当千，即使蓝元枚尚在，亦不藉伊一人办理。今伊业经病故，断不敢因倚仗无人，即存疑难之见，畏怯不前，自取重戾。惟是登舟数日，风信靡常，现仍在大胆门守候。（朱批：此实不可冒昧强行者，闻得九月竟不可渡海，十月风汛最佳，兹已十月，当蒙神佑矣！敬诚感通可也。）近日以来，发往廷寄、谕旨及批回奏折，俱因守风未能递送。（朱批：此实可烦闷，然

亦无奈何！）而台湾亦久无内地渡回船只。询之船户等，皆称九月内风暴最烈，谓之九降，倏东倏西，一日数易。此时断难开行。下怀焦急寝食难安。（朱批：此时虽觉少迟，未尝非待贵州番兵之嘉兆，不必焦急。）日内若得旁面稍顺之风，可以折钱行走。即令开驾放洋，以期速渡。

再，台湾各处义民，随营打仗，接济诸罗粮食，最为急公出力。兹蒙特降谕旨，赏给义民头目官职，并将乾隆五十三年应征钱粮，通行蠲免。俾得均沾恩泽。现已发给厦门道厅等，刊刻誊黄，送至舟中。一经登岸，即于南、北两路普行张挂。并一面出示，剴切晓谕，宣扬德意。义民等益当感戴恩施，倍加奋勉。即被胁民人，亦必闻风投出。贼中党羽，自可纷纷解散。其鹿港新招充伍之人，前据蓝元枚奏称，内有二百余名，曾经从贼，恐有假冒投诚之事。谕令留心防范，如有可疑，即当正法。窃思此项充伍新兵，从前曾经从贼，悔罪来归，固不必过于追究，以广招徕。而留在营中，自应随时防察，此亦军营寻常应办之事。蓝元枚因坐守鹿港，无可陈奏，故以日行事件，琐屑奏闻。（朱批：所谕亦为此，何必咎他，应行奏闻者，只管奏。朕不以为烦也！）臣等到军营后，钦遵训示，凡有就抚之人，自当优加鼓励，外示宽大，仍密飭该管将领，不时留心察看。若果有心怀叵测，形迹可疑者，即行遵旨办理。如现在调派漳州兵丁二千名，素性桀骜不驯，又与贼匪同乡，多言其不可深信。然此时只可分派各营各队，严加约束。仍不可稍露端倪，致令自怀疑惧。（朱批：甚是。）至义民人数众多，难保无贼人混入其中，亦当责成义民头目，实力查察。（朱批：更要。）臣等惟有随地留心防范，务须不动声色，反侧潜消，断不别滋事端，上烦圣虑。至普吉保，人本平常。（朱批：已（以）前原怪他，后见其奏，领兵欲取斗六

门，尚为出力，但此奏后，至今无信息，又为悬念。毕竟如何，秉公查办，人才难得，不可存成见也！）见蓝元枚病故后，一筹莫展，仅请派拨大员督办，并不带兵亲自打仗，即云鹿港无人驻守，亦应调遣将备等官，前往攻剿。观其办理毫无主见，已极无能。且途中启看该镇所发奏折，只称李化龙带领粤兵即可到，俟到后再行进剿等语。并未将现在贼匪情形，及如何筹办之处，详悉声叙。乃一味敷衍空言，屡次由六百里驰奏，希图塞责，实属藉端推诿。（朱批：近来声息无闻，即塞责之奏亦无，令朕何以为情！）容臣到彼后，面加诘询，看其如何登答。并查明有无错误之处，再行据实具奏。合并声明，伏乞皇上睿鉴。谨奏。

乾隆五十二年九月二十四日。

乾隆五十二年十月初七日奉朱批：即有旨谕。钦此。

大学士阿桂遵旨复奏筹划台湾军务折

乾隆五十二年十月初七日批 军录

臣阿桂跪奏，为遵旨据实复奏事。

本月初二日接奉上谕：以蔡攀龙到诸罗后，贼匪仍将道路阻截，并在鹿仔草滋扰。李侍尧所奏进城后复行杀出之语，竟不可信。如有所见，即据实具奏。又恭读二十七日谕旨：令福康安总以直捣贼巢为要，现在徐鼎士相机进剿，福康安等督兵攻剿大里杙，使贼回顾巢穴，则诸罗之围不解而自解，等因。钦此。又恭读二十八日谕旨：以鹿港距大里杙虽不过数十里，但沿路村庄恐有贼匪屯聚。若官兵即往大里杙攻击，恐贼匪乘间潜出，难免返

顾之虞。福康安固不可以存畏难，亦不可轻率前进，等因。钦此。

查大里杙为贼巢穴，此时官兵能直捣贼巢，使贼闻而回顾，则诸罗之围不解而自解，实为决机制胜之善策。惟臣就现在情形悉心审度，盐水港距诸罗不远，贼匪在鹿仔草攻扰诸罗，道路即为之梗阻。鹿港与大里杙虽同在彰化，而沿途各村庄诚如圣谕，恐亦有贼匪屯聚。福康安由鹿港进攻大里杙，不特廓清道路，围攻贼巢，须用多兵，即留防后路以及沿途护送粮饷、火药等项，在在咸资兵力。且福康安与海兰察等久历戎行，声威素著，非常青等可比。今奉命前往，为众心所倚赖，必得一临其地，每战必克，所向披靡，方足以寒贼胆而振军威。若急于前进，设未能长驱直入，途次稍有濡迟，不副众望，所关匪细。台湾节次调往之兵，虽已不少，但分路剿捕及派拨防堵，势已见单。且其中亦少可用之兵。而鹿港原驻兵力，又不及府城。至义民、熟番等，各护其身家。大约以之守御则可资其力，以之攻剿，则但能助势。即如剿贼以来，义民、乡勇到处打仗，伤亡俱较兵丁甚少，于此可见。徐鼎士带兵不过二千余各，即由大甲溪进剿，恐亦难深恃。计福康安到厦门、蚶江一带，当在九月二十左右。台湾每年九月向多飓风，船只难于配渡。若福康安到彼略需等候放洋，则现调之屯练、降番，与黔省兵丁，随后可到。福康安亲带前往，声势较壮。若福康安到厦门、蚶江一带，即扬帆径渡，似宜就该处现有兵力，先于诸罗、盐水港等处剿杀匪党，廓清后路。俟屯练、降番与黔兵到齐，兵力稍充，整顿前进时，再饬知徐鼎士由大甲溪克期夹攻，庶捣穴擒渠，可以得手。现蒙皇上谕令，酌量情形，不必冒昧涉险，仰见圣明筹示，早已洞烛机宜，臣不胜钦服。想福康安一入闽境，留心询问，又与李侍尧面为讲论，即可

悉该处情形，自必另有一番筹划，详晰具奏。

就臣愚见，台湾现在剿贼，必得可用之兵二万，专为捣穴擒渠之用，办理方有把握。福康安到彼，如原有及现调各兵，足敷攻剿，自不肯再请添调。倘兵力尚不敷用，仍须奏请添调湖广兵丁，或竟于原备楚兵之外，尚须续添黔兵数千，仰恳皇上即照所请，准其调用，并飭令遄进。缘台湾炎热雨湿，官兵速到，总得于春令完事，则办理不至棘手，臣愚昧之见，即令臣躬任其事，舍此亦别无办法。盖以贼虽无能，但附从甚多，奸良不一，且道路丛杂崎岖，实有不得不然之势。伏念逆贼久稽歼灭，上烦圣心筹虑，无时或释。臣受恩深重，下怀紫切，梦寐难安，今荷垂询，复何敢自昧本心，不直陈于圣主之前，恭候裁夺。谨就臣愚见所及，遵旨据实复奏，伏乞皇上慈鉴。谨奏。

乾隆五十二年十月初三日。

乾隆五十二年十月初七日奉朱批：与朕所见略同，屡谕福康安矣！钦此。

两广总督孙士毅奏赴台兵丁棉衣

等项于途被劫片

乾隆五十二年十月初八日批

《钦定平定台湾纪略》（稿本）卷四十

孙士毅奏言：委守备沈德清、千总庄大进带同兵丁三十二名，将赴台兵丁棉衣、鞋、裤、帐房等项，分载两船，运送厦门。九月初五日，在粤东澄海县开行。九月十八日接护南澳镇副将郑元好禀称，前赴闽省铜山沿海一带巡查，至虎仔屿收泊。沈德清

等船只亦收至虎仔屿，告知于十五日湾泊铜山营〔宫〕仔汛港。三更有贼船四只，每只数十人、前来行劫。千总庄大进船内装载鞋裤帐房等项，被劫去一百余篓，并失去随带兵器数件，千总戳记一个。因贼多兵少，兵丁三名被打落水。千总及各兵，均各受伤。其守备沈德清船内装载棉衣，未曾被劫等因。臣查该护镇郑元好既在闽省铜山沿海一带巡哨，何至一任盗贼充斥，毫无顾忌。其铜山营汛是否该护镇所辖，抑另有专管之员，应听闽省查明参办外，臣现于粤东境内各海口一体委员，上紧蹙缉，严密查拿。奏入。

谕闽浙总督李侍尧实力查拿劫持

运台军需物品者

乾隆五十二年十月初八日 台湾档

大学士和，字寄闽浙总督李、两广总督孙、福建巡抚徐，乾隆五十二年十月初八日奉上谕：

本日据孙士毅奏，拿获邻境海洋盗犯二十七名，已明降谕旨，将拿获各犯之通判何钟等二员，送部引见。并将该督及在事出力各员，交部从优议叙矣。又另片奏称，运送台湾官兵之绵衣鞋裤等项船只，于九月十五日在铜山营宫仔汛港湾泊，是夜三更，有贼船四只，纠伙前来行劫。千总庄大进船内被劫去鞋裤帐房等项一百余篓，并失去随带兵器数件、千总戳记一个，兵丁三名被打落水，千总及各兵均各受伤，贼亦被伤退逃等语。

该督所奏拿获邻省劫杀兵船盗犯一案，即系前日琅玕所奏温

州玉环地方兵船被劫之事。现经粤省拿获，讯据盗首供明，实系海洋屡次行劫盗犯，官仔港被劫一案，似非林爽文党羽。至铜山营船内装载鞋裤帐房等项，俱系运送台湾军装物件，被劫至一百余篓之多，看来竟系林爽文伙匪在洋面潜出邀劫，不可不严拿究办。所有首伙各犯，除孙士毅现于粤东境内委员踪缉外，至此案被劫系在闽省洋面，李侍尧自应饬属一体严拿。但该督驻扎厦门，办理军务，照料官兵配渡，事务繁多，无暇兼顾。徐嗣曾现在省城，并无经办要件，此案竟着责成该抚督率所属，实力查拿，务期按名弋获，毋使漏网。徐嗣曾于台湾剿捕事务，初时尚知留心，随时陈奏。后见贼匪肆扰日久，一时未能办结，未免心存畏难，转似置身局外，缄默不语，若与己无干，则大不可。徐嗣曾系本省巡抚，何得漠不相关若此？着传旨严行申饬！所有此案行劫盗犯，该抚务宜上紧严拿，克期务获，以赎前愆。并将疏解文武各员，查明参奏。若再仍前延玩，致要犯日久稽诛，惟该抚是问！恐不能当其咎也。将此各传谕知之。

钦此。遵旨寄信前来。

大学士和珅奏黄仕简任承恩

依律拟斩立决折

乾隆五十二年十月初九日批 军录

大学士臣和珅等谨奏，为遵旨审拟具奏事。

窃照台湾逆匪林爽文纠众滋事，提督黄仕简、任承恩等不能亲临行阵，定期会攻，以致迁延贻误一案。前于本年三月二十一、四月初四等日，先后奉旨将任承恩、黄仕简革职，拿交刑部

治罪。嗣据将军常青等委员，于六月十四日、十六等日、将该犯等解赴热河行在，节次严讯。该犯等贻误军机，俱已自行供认不讳，业经奏闻，奉旨著解赴刑部监禁在案。

兹于本月初八日奉旨：大学士九卿会同严审定拟具奏。钦此。臣等当即监提该犯黄仕简、任承恩等，逐加研鞫。该犯等愧惧悚惶，伏地叩头痛哭。据黄仕简供：我今年正月初四日到台湾府城，彼时林爽文纠众滋事，我自应立刻带兵进剿。后来凤山、诸罗被贼占据，我更应亲领弁兵前往歼杀，乃因患病糊涂，只知株守郡城，仅派柴大纪、郝壮猷等分带官兵，零星打仗。又将蔡攀龙所带兵八百名撤回，并扣留潘韬所带兵三百名防护，以致贼匪蔓延日久，未能歼灭，上烦圣主宵旰焦劳。总因我颠倒错乱，并不力疾追剿，坐失机宜，如今后悔无及。况我世受国恩，蒙皇上格外成全，尤非寻常提镇可比。种种贻误，实在辜负天恩，只求皇上将我立正典刑，就是恩典了，还有何辩呢。

任承恩供：我于正月内到鹿仔港，那时林爽文回据大里杙，贼匪四出滋扰，虎仔坑一带贼众更多。我身为提督大员，即应亲自带领将弁，立刻进剿。乃仅知株守鹿仔港，派拨弁兵，分头堵御，零星打仗，并不会同黄仕简合力进攻，以致贼势蔓延，至今未能立就歼灭，上烦圣虑焦劳。总因我畏葸无能，因循贻误所致。况我受恩深重，幼年即蒙皇上栽培，擢至提督。又系自行奏请前往台湾剿贼，乃不能奋勇立功，辜负天恩，实属万死莫赎。只求皇上将我立时正法各等语。

查例载统兵将帅，玩视军务，苟图安逸，故意迁延，不将实在情形具奏，致误军机者，拟斩立决等语。今黄仕简、任承恩世受国恩，身任提督大员，若能于逆匪滋事之初，一经前往，即各奋力剿捕，自可迅速藏事，净绝根株，不致蔓延至此。乃黄仕简

等当台湾逆匪林爽文等纠众扰害，攻城杀官之时，黄仕简拥兵郡城，任承恩驻扎鹿港，并不亲临行阵，定期会攻，竟彼此观望，株守一隅，仅派委将弁等，零星打仗。林爽文得以鸱张滋蔓，贼匪胁从日多，遂致南北两路梗阻不通，提臣柴大纪被困诸罗，旷日持久，逆犯等未能即就歼除。是林爽文等肆意滋扰，积渐蔓延，劳师糜饷，以致上廑圣怀，宵旰焦劳，皆由黄仕简、任承恩因循畏缩，坐失机宜。其负恩昧良，实属罪无可逭。若不拟置重典，无以儆玩误而励戎行。黄仕简、任承恩应依统兵将帅致误军机例，拟斩立决，以为将帅大员畏葸无能、贻误军旅者戒。所有臣等遵旨会审定拟缘由，理合恭折具奏请旨。

（发文日期缺。）

乾隆五十二年十月初九日奉旨：黄仕简、任承恩著从宽改为应斩监候，秋后处决。钦此。

参赞恒瑞奏盐水港进退两难折

乾隆五十二年十月十四日批

《钦定平定台湾纪略》（稿本）卷四十

恒瑞奏言：盐水港附近民人，多有从贼。九月初四日，有贼匪二、三千猝至，恒瑞督令岱森宝屡次堵御。初五日早又有贼万余前来滋扰，恒瑞督率富克精额奋力剿杀，贼匪人数众多，官兵不能抵御，富克精额被炮打伤阵亡。恒瑞欲进不能，即欲弃盐水港退回常青处亦不能达。现在续到兵五百名，唯有悉力固守盐水港。奏入。

（发文日期不详。）

谕钦差协办大学士福康安盐水港官军失利

待大兵到齐再作行动

乾隆五十二年十月十四日 台湾档

大学士和，字寄钦差协办大学士总督将军侯福、钦差湖广总督将军常、领侍卫内大臣参赞侯海、福州将军参赞恒、闽浙总督李、两广总督孙、福建水师提督参赞柴，乾隆五十二年十月十四日奉上谕：

据恒瑞奏，盐水港附近民人多有从贼，九月初四有贼匪二、三千猝至，经恒瑞督令岱森保屡次堵御。初五日早又有贼万余前来滋扰，恒瑞督率富克精额奋力剿杀，贼匪人数众多，官兵不能抵御，富克精额被炮打伤阵亡。恒瑞欲进不能，即欲弃盐水港退回常青处亦不能达。现在续到兵五百名，惟有悉力固守盐水港等语。已于折内批示。

前据恒瑞奏，鹿仔草村庄被贼焚占，沿海一带村庄已拨兵防守，必须将附近盐水港贼匪剿除，始能前进。朕心正切悬廑。今据奏到各情形，是该处贼势尚在猖獗，恒瑞兵力有限，未免进退掣肘。幸所带之兵又续到五百名，可资接应，恒瑞此时亦不必过于焦急。惟当在盐水港悉力固守，以待福康安到。若贼匪众多，势难守御，不妨竟弃盐水港，回至常青处，再图进取，亦是一策。但用兵之道以攻击为先著，堵御为后著，今官兵所到转被贼人攻扰，我兵日以抵御为事，是官兵只办接应，著著落后，而贼人转得占先，客主之势岂不倒置！恒瑞此时既不能带兵前抵诸罗，又不能回至府城，亦断无在彼株守之理。况恒瑞在彼，贼匪

不时滋扰，仍须堵御剿杀，不得休息。与其贼来始应，何若侦探附近贼匪村庄，何处贼匪单薄，有隙可乘，即带兵直前攻剿，使贼人救应不暇，以成反客为主之势，岂不甚善！此系朕于无可如何之中，代为筹划之举，恒瑞当察看光景，酌量妥办，亦不必过于拘泥遵旨也。

至福康安自九月二十四日在大担门发折后，迄今未据续有奏报。前于陛辞时，曾有旨令福康安到厦门后察看情形，如台湾府城及诸罗设有疏虞，福康安应俟添调官兵到齐，再行放洋前进。计此时福康安自早得有顺风，径渡鹿港，但现在盐水港有贼滋扰，恒瑞势不能支，倘此旨到日，福康安尚在守风待渡，竟当俟川、黔等省官兵到齐，再行开驾。若已得风配渡，前抵鹿港，该处现在情形甚为宁贴，福康安到彼亦自可无虑。况鹿港现有之漳州、粤东兵数千，俱未与贼打仗，而郑国卿所带闽兵三千，自己与福康安同抵鹿港，均系生力新兵，可资剿贼。其川、黔、广西兵计程于十月底俱可全抵厦门，现又降旨添调湖南兵二千，令其迅速前进。福康安到鹿港后，不妨稍为等候，俟川、黔、粤西官兵陆续到彼，鹿港新旧之兵约有二万，声势壮盛，再行统领进剿。或先赴盐水港一带剿杀贼匪，援应恒瑞，或径由鹿港直攻大里杙贼庄，使贼回顾巢穴，前后牵缀，则盐水港等处贼匪自必纷纷解散，其围不攻自解。福康安不必拘泥遵旨，惟当审度机宜，于何路进兵可以决机制胜，牵掣贼势，即由何路前进，以期所向克捷。不可畏难，亦不可冒险轻进，总以持重为要。所过村庄，务须留心防犯，或剿或抚，使后路肃清，可无肘腋之患。勿令贼匪于官兵过后，又复潜出滋扰，阻梗道路，方为妥善。

至福建、广东二省，前经降旨令李侍尧于漳、泉一带，孙士毅于潮州一带，广为召募新兵，多多益善。但此项新募之兵，未

经训练，若即用以剿贼，难期得力。著谕李侍尧、孙士毅，如遇福康安续有添调之处，先将各营练习之兵，派令前往，其新募之兵，留于该省巡查防守。仍一面督饬将弁，将新兵上紧训练，务期精熟可用，庶于战守均为有益。

至常青处，前据福康安奏，接阅台湾各官禀报，有府城附近村庄均被贼胁之语，朕心深为廕念。乃常青一月以来，竟无奏报，看来府城或被贼围。福康安、李侍尧亦未据奏到该处信息，自系因九月内风信靡常，台湾文报阻滞之故。但二十八日已交立冬，洋面风色自当顺利，福康安等一得该处禀报确信，务即迅速驰奏。

又徐鼎士处早拟由大甲进兵，攻击大里杙之背，嗣又经李侍尧拨兵一千前往，以助声势。而徐鼎士究竟曾否由大甲进攻，总未据李侍尧等续有奏报。就目下情形而论，如贼匪尽往南路，大里杙贼庄只系家属老弱，则徐鼎士自应由大甲溪乘虚进捣贼巢，以分贼势。若北路贼匪屯聚尚多，徐鼎士且勿轻进，又致后路被贼拦截，转为未妥。福康安到鹿港后，距彼更近，自悉该处确信，其应如何筹办之处，即当檄知徐鼎士遵照办理。并著李侍尧将徐鼎士曾否由大甲进兵之处，先行驰奏。

再，贵林、杨起麟，前据恒瑞奏，蔡攀龙带兵前抵诸罗后，伊二人并无下落。业经有旨询问，其贵林、杨起麟是否均系阵亡，著福康安等即行查明，据实具奏。

至现在川、黔、广西兵，已节次催令遄行，计算可以全抵厦门。李侍尧务须多备船只，妥为照料，随到随即配渡，以速为妙。此次恒瑞奏到之折，因风飘至粤东，由孙士毅处转递，福康安自未启阅，并著将原折抄寄阅看。将此由六百里加紧各谕令知之。仍著福康安将于何日渡洋前抵鹿港，及常青、恒瑞、柴大

纪、蔡攀龙各该处近日剿杀贼匪情形，各行迅速驰奏。李侍尧、孙士毅一得军营信息，无论虚实，亦即各行随时速奏，以慰廑注。

钦此。遵旨寄信前来。

谕署湖广总督舒常等调湖南兵赴台增援

乾隆五十二年十月十四日 台湾档

大学士和，字寄闽浙总督李、署湖广总督舒、湖广提督俞、江西巡抚何、湖南巡抚浦，乾隆五十二年十月十四日奉上谕：

台湾逆匪林爽文纠众不法，前经降旨，令浦霖于湖南省挑选兵二千名，以备征调。该抚接奉谕旨后，自己预为挑备。今台湾剿捕逆匪尚未蒇事，现须添兵协剿，该省兵丁从前调赴金川军营，于驰涉山险较为便捷，今调往台湾助剿，自更得力。著传谕舒常、浦霖，即将挑备兵二千名，派镇草镇总兵尹德禧为总统，并著于副将内曾经身历行阵者，酌派一二员，随同带兵前往。亦照运米路径，由江西一路迅速赴闽，听候福康安调用。所有军装、火药等项俱著妥协备带，勿致稍有缺乏。

至湖南凤凰厅地方，前因苗匪滋事，甫经该镇尹德禧搜捕净尽，该处系苗疆紧要，必须大员在彼驻扎，以资弹压。著传谕俞金鳌，即行前往该处驻扎，兼理总兵印务。并著传谕何裕城，於湖南兵丁抵境时，务须妥为照料，撙(趲)程前进，愈速愈妙。并著李侍尧于海口预备船只，俟官兵一到，即行配渡，前赴福康安处听调，毋致稍有稽迟。将此由六百里加紧各谕令知之。

钦此。遵旨寄信前来。

谕钦差协办大学士福康安必须

厚集兵力并注意招抚

乾隆五十二年十月十五日 台湾档

大学士和，字寄钦差协办大学士总督将军侯福、钦差湖广总督将军常、领侍卫内大臣参赞侯海、福州将军参赞恒、闽浙总督李，乾隆五十二年十月十五日奉上谕：

据图萨布奏，闽省委解军需试用知县王履吉报称，奉委解送饷银火药铅弹等项，前赴淡水。八月二十三日在斗米山放洋，次日狂风大作，将桅舵折断，随风飘荡。至九月初七日，船遇礁石撞破，有渔船赶到救护，抢出银八桶，三鞘火药、烘药、铅子各一桶，鸟枪四杆，腰刀七口，湿米三百六十五簍。其同时在闽省放洋之饷米船二十五号，被风失散等情，经委员查验属实。其同时配驾各船，曾否已抵淡水，现飞咨闽省查明办理等语。该委员解送军需，在洋面遇风飘荡，几及半月。在粤东地方船只沉溺，经渔船救护，殊堪怜悯。已明降谕旨，将该员王履吉俟事竣后送部引见，所有沉失米石等项，免其赔补矣。其同时放洋之饷米船只，现在曾否已抵淡水之处，何以未据李侍尧奏及？自系因海洋风阻，未能得有信息。著即查明，据实具奏。

至福康安自九月二十四日在大担门发折后，迄今两旬未据续有奏报，计此时自己得有顺风放洋，前抵鹿港。即或因风色不顺，尚在大担门守候，现在各处添调之兵，陆续云集，福康安在彼等候顺风，虽少需时日，正可俟官兵到齐，带领前进。兵威壮盛，于事机转为凑合。若已得风前抵鹿港，亦当在该处略为等候，俟

川、黔、广西等省添调之兵俱已到齐，再为酌量进剿为是。此时福康安惟当筹划万全，持重办理，转不必过于性急，轻率前进。总须厚集兵力，于初次打仗，即将贼匪痛加歼戮，俾贼人胆落，望风披靡。以后自当势如破竹，无难克期蒞事。

至贼匪肆出滋扰，到处迫胁平民，附从者日聚日多，亟应先行解散，俾贼势日孤，于剿捕更易办理。前经明降谕旨，剴切晓喻，除林爽文、庄大田罪在不赦外，其胁从附贼民人，若能投出，归农入伍，断不究以既往之罪。今福康安到彼，更当多发告示，广为宣布，明白开导。以该民人等践土食毛，均系国家赤子，休养生息百有余年，受恩已久，该民人等具有天良，断无自外生成，转甘心从贼之理。不过因贼人逼胁，若不附从，必立遭戕杀，且致家室妻孥被其荼毒，是以无奈听从。今大兵一到，指日荡平，尔等宜急思改图，自谋生路。如有能将贼首贼目擒缚献出，不但无罪，而且有功，并当加以奖赏官职荣身。其一闻官兵信到，自行投出归诚，亦可复为良善。即或被贼胁从，随同抗拒，而临阵之时，若能弃械各行散去，亦可见其从贼非出本心，并当予以生全，断不罪其既往。倘始终不悟，大兵所至，刻即扫除，必当骈首伏法，戮及妻孥，悔将何及。如此详悉开喻，该民人等自必相率投归。既将贼人党羽解散，则贼匪势孤力弱，日就穷蹙，无难克期授首。若必存一除恶务尽之心，将胁从附和民人概予歼戮，不特诛之不可胜诛，且转坚其从贼之念，于剿捕殊多未便。福康安务须相机妥办，以解贼势，而安众心。仍以兵过后贼或绕路及村民又复从贼，不可不防，此为最要。

至福康安统兵进剿，所带官兵多系派调劲旅，其闽省本地兵丁，屡经挫失，自不能如川、黔兵丁之得力，但现在台湾统兵大员内，如蔡攀龙等，即籍隶闽省，其余偏裨千把籍隶本省者，谅

复不少。福康安仍当加以策勉鼓励，俾伊等各思振奋，勉图出力。不可因现带巴图鲁、侍卫、章京等皆骁勇绝伦，所调各兵俱系生力可恃，遂置闽省官兵于不齿，致阻伊等效用之心。况现在各省调往兵力虽多，于该处路径、民情未能熟悉，亦须本省兵丁为之向导。福康安务须随时留意，于闽省将弁兵丁中，视其出力者鼓励数人，以作其气，而收其用，不可稍存岐视也。

再，前据常青等奏，官兵与贼打仗，屡因遇雨路窄，不能摆列队伍，收兵回营等语。该处路径丛杂，多有深林密箐，两旁又系水田，自难整队长驱。但我兵因路窄难行，不能整队，岂贼人独能悉众全来，坦行无阻？且我兵因雨水泥泞，难以前进，何以贼众独不避雨水泥泞，时出滋扰？殊不可解！著福康安到彼详悉查明该处实在情形，其应如何相度机宜，随时调度，俾官兵不致因路径雨水，辄有阻碍之处，著福康安悉心筹划，务出万全为要。

至常青等节次所调官兵，不为不多，因调度失宜，东分西拨，以至单弱。现在各处派调官兵，其川、黔、广西兵七千，计程十月底可全抵厦门。昨又降旨添调湖南兵二千名，令其迅速前进，加以鹿港现有之漳州兵二千，粤东兵三千，及郑国卿所带闽省兵三千，又徐鼎士处现有兵二千八百名，合计该处番壮已二万有余，声势壮盛。福康安统领巴图鲁、侍卫、章京等及如许重兵，惟当并集一处，用其全力，或先赴盐水港、诸罗一带剿杀贼匪，援应恒瑞、柴大纪，或径由鹿港直攻大里杙，捣其巢穴。总须兵力厚集，鼓勇直前，以期所向克捷。不可又零星派拨，以致兵势分而见单，最为要紧。

此时久交冬令，洋面风色自必顺利，福康安于何日前抵鹿港，如何定计进剿，常青、恒瑞、柴大纪各该处近日剿贼情形，

俱著即迅速驰奏。李侍尧一得军营禀报信息，亦即随时速奏，以慰廑注。将此由六百里加紧再行传谕知之。

钦此。遵旨寄信前来。

钦差协办大学士福康安奏到台之后

拟各路大举进攻折

乾隆五十二年十月十六日批 军录

臣福康安跪奏。为奏闻事。

窃臣守风旬日，洋面风信频作，并无船只往来，久不见台湾文报。正深焦急，适有载送臬司李永祺回空船只，驶至大担门，当传该船户陈阵过船询问。据称：我于八月二十九日自台湾开船，在澎湖守风二十余日，又飘至将军澳地方，才收到海口的。我在府城时听得贼匪于二十八日来攻大北门，经副将丁朝雄带兵堵御，打死贼匪二百余名，贼即败退等语。查府城北门一带为通往诸罗要路，数里之外即系贼人屯聚。该处既得胜仗，若能乘胜穷追，步步进逼，道路渐可开通。此信如果确切，实属极好机会。但数旬以来，未见常青奏折。恒瑞、（朱批：恒瑞近又被围，信自广东来，有旨谕汝矣。）柴大纪亦无递到文报。现在诸罗光景若何，究无确信。敬惟皇上廑念军务，捷音不能速至，自必更劳圣虑。（朱批：何待言！）臣寸心焦灼，尤切难安。现令船户等昼夜候视风色，一得旁面稍顺之风，立刻放洋。恐开驾时行走迅速，不及缮折奏闻，李侍尧得信自必由驿驰奏。

臣此次由鹿港进剿，必须南北两路并力攻围，使贼匪处处防备，疲于奔命。（朱批：此计固好，但恐兵分，又觉力少，究以

慎重为要。) 贼势既分，军威壮盛，不难一鼓歼擒。现已缮就咨文，俟放洋时差人乘坐哨船，知会常青、恒瑞、柴大纪、蔡攀龙等。约计臣到鹿港之时，各路大举进攻鹿港，大兵即可乘机迅发，直抵诸罗，将沿途贼匪痛加剿杀。(朱批：此为最要。) 一面抚谕附近被胁民人，令其各保村庄，杀贼自效。不必零星派拨，逐处留兵，道路自无虞梗阻。(朱批：甚是，但后路亦不可不防，慎之！) 中路既通，声势益加联络，然后整兵进逼大里杙，约会淡水官兵，由乌日庄夹攻。另派巴图鲁侍卫数员，带兵在牛骂、快官等庄，杜其奔窜之路。巢穴既倾，南路贼势益孤，歼擒更易为力。臣遥揣情形，似应如此办理。到彼处如有应行布置之处，再当相机妥办，以期迅速蒧事。(朱批：所见已得要，勉为之。) 至恒瑞、蔡攀龙先后救援诸罗，均未解围，而情节各有不同。蔡攀龙虽所带弁兵不无损失，尚能突围出入往来杀贼，(朱批：此事确否？查奏。) 究属奋勉出力。恒瑞则统领重兵非蔡攀龙可比。(朱批：原未经军旅，无能之人，是朕错用了。) 因何亦由海道前往，及行抵盐水港地方何以被贼拦阻不前，至今并无进攻消息，容臣到军营后严切查明。如有恒怯玩误之处，即行据实参奏，断不敢因谊属姻亲稍存瞻顾。(朱批：是。) 再，厦门地方，为将来解送贼匪必经之地，且各处解到银米，多集该处配渡，自应酌派官兵，以资弹压。兹奉谕旨，令臣及李侍尧派拨满兵一千名，驻守厦门。仰见圣明，先事预筹，无微不到。臣现在舟中，不及与李侍尧面商，已札会该督，令其钦遵办理，合并声明。伏乞皇上睿鉴。谨奏。

乾隆五十二年十月初三日。

乾隆五十二年十月十六日奉朱批：即有旨谕。钦此。

闽浙总督李侍尧奏调派满兵及

密访林爽文祖坟折

乾隆五十二年十月十六日批 军录

闽浙总督臣李侍尧跪奏，为复奏事。

窃臣于本月初一日接奉廷寄上谕：将来拿获台匪，多系漳人，解送内地，必由厦门经过，不可无满兵弹压，著李侍尧派调闽省驻防满兵一千名，以示威重。钦此。又奉清字谕旨：所派满兵系因福康安前赴军营，恐又须添调，亦未可定，是以将此兵调赴厦门预备，实在情节，不可宣露。钦此。仰见圣明洞烛几先，无远不到。臣愚昧未能计及，实不胜感愧。查闽省驻防满兵，除恒瑞带领一千赴台郡外，尚有一千五百余名。省城地方亦属紧要，若分拨八百名来驻厦门，亦足资弹压。随飞移副都统鄂岳，令其如数调派，并明谕各兵，以将军现赴台湾，恐将来或需派拨，是以先调至厦门预备。俟至厦后，仍飭随时操演，既不稍露端倪，亦已足壮声势。

至将军福康安即赴鹿港，将来解送要犯，或由蚶江入口。该处附近泉州，有陆路提标兵自足弹压，可毋庸分拨满兵驻扎。其漳州一带地方，尤当静镇，是以臣诸事只照常办理，不露形迹。遇有盗劫等事，辄严飭缉捕。如近日粤东解台兵丁，衣履被劫一案，现已拿获二十八人，尚严究伙党，不使一名漏网。至词讼内有借会匪名色捏陷者，并飭地方官速就案完结，如审系被诬，立即省释。如此明示，以有犯必惩，有疑必释。庶使地方既知畏法，亦免怀疑。现在又因该处被旱歉收，拨米前往平糶，贫民皆

得接济，极为欢悦，看来尚属宁贴。

至臣前奉旨，令将逆匪林爽文祖坟刨掘，以绝祸根，臣随密飭平和县查对去后。嗣据禀称，林姓各支多者千余丁，少亦数百丁，从前有迁居台地者。现有进士林屏南称，康熙年间有林恪者，只身无食，渡台营生。后即家于大里杙。乾隆四十年，屏南之堂侄林伍观往台贩易，寓大墩林访家，该处距大里杙不远，曾有大里杙人林爽，年约二十以内，常来间游，洵系林恪之孙。现在造逆之林爽文，或即是此人。但事隔多年，彼此不通信息，是否的系此人，不能知其确实。该县随密传林伍观面询，供亦相符。该县恐其尚有隐讳，再三究诘。据供若有隐讳，何不将遇见林爽之事，一并讳匿等语。臣查漳、泉土风，往往人名有两字者，只呼一字，以便称谓。今林伍观所遇之林爽，既居大里杙，当即系现在之逆匪林爽文，则伊祖林恪以上坟墓，即应刨掘。但据林伍观所供，林恪之孙与现在逆匪是一是二，尚未有的据。该姓支族甚多，方且各怀畏惧，未便因疑似之间，遽行办理，恐益致惊疑不安。容臣再行密访，务得确切根据，（朱批：所见甚是，况此亦恨彼无聊之思，于事究无关系。）办理具奏外，谨将调派满兵及密访逆匪祖墓缘由，缮折驰奏，伏乞皇上睿鉴。谨奏。

（发文日期缺。）

乾隆五十二年十月十六日。奉朱批：如此方是。钦此。

谕钦差协办大学士福康安等应集兵先救诸罗

乾隆五十二年十月十六日 台湾档

大学士和，字寄钦差协办大学士总督将军侯福、钦差湖广总

督将军常、领侍卫内大臣参赞侯海、福州将军参赞恒、福建水师提督参赞柴、陆路提督参赞蔡、闽浙总督李，乾隆五十二年十月十六日奉上谕：

据福康安奏，在大担门守风旬日，现令船户等昼夜候视，一得稍顺之风，立刻放洋。此次由鹿港进剿，必须南北两路，并力攻围。现已缮就咨文，俟放洋时知会常青、恒瑞、柴大纪、蔡攀龙等，届期各路大举，鹿港大兵即可乘机迅发，直抵诸罗，将沿途贼匪，痛加剿杀，并抚慰附近被胁民人。中路既通，然后进逼大里杙，约会淡水官兵夹攻等语。已于折内详晰批示。所奏筹办剿捕事宜，与朕节次所降谕旨，虽有大同小异，然已俱得领要。

现在添调川省屯练兵，本日据何裕城奏，已于十月初八日全抵闽省崇安县境，计程不过七、八日即可前抵厦门。若福康安在大担门守风，尚须数日放洋，则此项兵丁当已陆续到彼，福康安即可带领一同渡洋。即福康安已得顺风，先行开驾，而屯练兵随后配渡，计其前抵鹿港，亦不过于福康安到后一二日即可到齐，其贵州、广西兵亦当接续全到。是福康安守风待渡虽稍需时日，而各路官兵沿途行走迅速，毫无阻滞，到彼适当需用之时，似此机宜凑合，即是成功先兆，福康安闻之，应为喜慰。且福康安前此原请添调四川、湖北、湖南、贵州兵各二千，今湖北之兵虽因路远未经调发，但朕已预为筹及，派调广西兵三千，现又添调湖南兵二千。而川、黔之兵，于福康安未经奏调之先，亦俱预为调派，此时俱可络绎前抵该处，正资进剿。福康安得有如许生力新兵，声势壮盛，并力攻剿，何虑不所向克捷耶？惟恒瑞在盐水港有被贼滋扰之信，该参赞前日奏到之折，系由广东转递，福康安未经启阅，自尚未得信，已降旨详谕一切。而常青处前据福康安奏，台湾附近村庄，俱被贼胁，府城亦在围中，朕心甚切廛念。

今据福康安奏，询据船户称，在府城时，听得八月二十八日贼匪攻扰大北门，经副将丁朝雄带兵堵御，打死贼匪二百余名，贼即败退等语。此信如果确实，是常青处虽未能带兵前进，府城尚可保守无虞。就此时情形而论，自先以援救诸罗为要。福康安到鹿港后，等候川黔广西兵齐到，即统领前进，将沿途贼匪痛加剿杀，直抵诸罗，与柴大纪、蔡攀龙会合，彼此互相商酌。柴大纪、蔡攀龙在彼日久，于该处情形自为熟悉，福康安当与之悉心筹划。若能趁官兵全力打通路径，先趋南路，与常青协力会剿，使声势络绎，再整兵进攻贼巢，亦是一策。若未能乘势长驱，诸罗距大里杙较近，该处系贼人巢穴，贼匪即肆出滋扰，其家属老弱岂能携带随行，自必留在贼巢，则福康安竟不必兼顾府城，当与柴大纪等直趋大里杙，乘虚进捣。贼人护其家属，自必纷纷回顾，首尾不能相应。退无所归，巢穴既倾，则其余屯聚贼匪，自成瓦解之势。至台湾府城，现在常青在彼，看来虽未能进取，而自守尚属有余。即使府城守御难支，或竟有疏虞之事，亦不难再为收复。福康安不必因身当重寄，但不能将郡城保全，即为有负任使，心怀疑虑，以致顾此瞻彼，转不能并力一处，决机制胜。若常青能将府城守护无虞，固属甚善。万一力不能支，竟有意外之事，朕亦不怪福康安之不救也。总之，此时若能将贼匪要隘处所先行摧破，则贼众解体，无难一鼓歼擒，克期集事。福康安惟当酌量机宜，慎重办理，不可稍分兵力，又致单弱，此为最要。况所带巴图鲁、侍卫、章京等皆系久经行阵，于行军机要皆能熟悉。统兵进剿时，其旁路后路或有贼匪潜出滋扰，伊等自能随时察看，预行防范，不致堕贼狡计也。

至福康安奏蔡攀龙援应诸罗，虽所带官兵不无损失，尚能突围出入，往来杀贼等语。前据恒瑞奏，蔡攀龙自抵诸罗后，道路

仍被贼阻，并未能出城杀贼，是福康安所奏或尚系从前李侍尧误听台湾地方官禀报之语。若蔡攀龙于入城后果又能突围杀出，是蔡攀龙更属奋勉可嘉，则诸罗一路尚能剿杀贼匪，不致被围紧急，尤为极好消息。此事是否确实，著福康安即行查明速奏。至恒瑞未经军旅之人，今在盐水港被贼拦阻不能前进，已有旨令其该处固守，以待接应，或杀出往常青处合兵矣。

又，同日李侍尧复奏，密访林爽文祖坟，尚未得有确据，若遽行办理，恐其支族各怀畏惧，益致惊疑等语。所见甚是，得大臣办事之体。此事因林爽文罪大恶极，是以欲将伊祖坟刨挖，以泄众恨。今既访无确据，自未便因疑似之间，概行刨挖，转致林姓支族闻信惊疑。应俟查有确切根据，再行办理。即使一时未能查出，亦无甚关系，不妨稍从缓办也。

至福康安此时自己早已早得顺风放洋，该处交冬令后，洋面风色顺利，文报自必常通。福康安开驾甚速，倘或不及缮折，即著李侍尧将福康安究于何日渡洋，前抵鹿港，续调官兵于何日到厦配渡，及台湾各路近日如何打仗杀贼之处，一并随时迅速驰奏。福康安到鹿港后如何定计攻剿，及南北两路情形，亦即先行速奏，以慰昼夜廑注。将此由六百里加紧各谕令知之。

钦此。遵旨寄信前来。

谕钦差协办大学士福康安严防

林爽文军从海口逃走

乾隆五十二年十月十七日 台湾档

大学士和，字寄钦差协办大学士总督将军侯福、钦差湖广总

督将军常、闽浙总督李、两广总督孙、福建巡抚徐，乾隆五十二年十月十七日奉上谕：

据孙士毅奏，前于咨调广西兵三千名外，又于粤东凑调一千名，实属张皇失当，其粤西兵三千于十月初四日全数照料入闽，黔兵二千计日应抵粤东境内等语。前因孙士毅接阅常青折稿，有急需应援之语，于檄调粤西兵三千外，又于本省凑调一千名，未免稍觉过当。今台湾剿捕贼匪尚未能克期竣事，正需兵力，则孙士毅预行派拨以听调遣，殊为得用，甚资其力，何必引以为罪耶！至福康安此时若尚在大担门候风，则屯练兵二千计此时已抵该处，而粤西兵三千于初四日全入闽境，亦已早抵厦门，合之郑国卿候风待渡之兵，又有八千生力雄兵。福康安与海兰察及巴图鲁、侍卫、章京等带领，与之同渡鹿港，更为声威壮盛，实为成功先兆，甚好机会。即福康安于此项未到厦门以前，先得顺风径渡，亦不过于鹿港二、三日后，此兵皆可陆续到齐。加以鹿港原有之漳州兵二千、广东兵三千，以及义民番社，而以巴图鲁、侍卫、章京等分领进剿，何向不克。但恐将来大功垂成，贼匪势穷力绌之时，此辈狡狴性成，断不肯束手待毙，或思由海道抢船避窜。该处笨港、盐水港、鹿仔草一带，俱曾被贼匪焚抢，此等处均系通海口岸。将来贼匪避窜时，其大里杙巢穴留存家属甚多，贼人顾恋家室，自必思抢夺船只同载逃逸。若俟其逃往洋面，大海广阔，踪迹匪易，岂有福康安亦驾船追捕之理？福康安等务须预行留心。今兵力既多，如沿海口岸一经将贼杀散，即拣派水陆弁兵严行看守，并留一、二大员往来稽察，勿被贼人抢占。若有商贩船只，亦当全行调开，勿令近岸。其运载军需兵米等项船只，即令原船仍回内地，使贼人无船可夺，绝其逃窜入海之路，方为妥善。

再，昨据徐嗣曾奏称，漳、泉二府属晚禾收成歉薄，台湾米石内运无多，恐粮价渐昂，请于运到兵米内，先拨三万石运赴漳、泉平糴等语。漳、泉各属向藉台湾运米接济，今台湾被贼滋扰，虽米石不能源源运送，但该抚现称内运无多，则是台湾地方小民，尚能耕种，有米运至内地。且昨据福康安奏，常青在府城与贼打仗情形，其信息即系得之船户，可见该处商贩虽少，尚有船只，不乏往来。其台湾产米是否常有运送内地者，为数约计若干，著李侍尧、徐嗣曾即查明具奏。至现在台湾南北两路何处尚照常耕种，并著福康安、李侍尧于便中访查，据实具奏。至该处军糈民食，节经降旨，于四川、湖广、江南、浙江、江西等省陆续措运米石，已有一百数十万，自当络绎运到，想军民接济均属宽裕，自可无虞缺乏也。将此由六百里加紧速发，各谕令知之。

钦此。遵旨寄信前来。

谕钦差协办大学士福康安等

预筹台湾善后事宜

乾隆五十二年十月十九日 台湾档

大学士和，字寄钦差协办大学士总督将军侯福、闽浙总督李，乾隆五十二年十月十九日奉上谕：

朕披阅刑部进呈秋审册内金蟾桂等旧案，台湾地方奸民纠众械斗之事，非止一次，皆由该处多系漳、泉二郡及广东民人在彼居住，而漳、泉两郡民人素有嫌隙，又与广东民人彼此不睦，其里居田土互相错处，往往纷争搆衅，械斗滋事。而地方官并不

实力查办，惟思将就完案，以致奸民无所敬畏，因而酿成事体。此次林爽文等倡乱不法，劫县戕官，亦即因纠众倡会而起。今福康安等统领大兵鼓勇进剿，自可克期蕲事，惟该处刁民恶习相沿已久，若将来撤兵之后，数年后未免故智复萌，办理匪易。现经此番大加惩创，不可不悉心筹办，妥为经理，以期一劳永逸。因思广东、漳、泉三处民人互相构衅，若能令其彼此分处，各不相涉，自属甚善。但伊等在彼居处多年，各有田产，安土重迁，一时概令离析，势有所难。将来贼匪荡平后，福康安应酌量情形，设法妥办。如义民内住居山猪毛广东庄者，久〔经官〕^①给怀忠里、效忠里匾额，该处义民最为奋勇急公，自应令其照旧安居，各守本业。此外各处义民，实在随同官兵打仗杀贼者，即经奋勉出力，岂可转令迁徙，失其世业？若贼匪庄业，例应入官，当召募别处良善之民居处。至各近处村庄民人，虽无从逆实迹，而与贼匪同住一庄，心持两端者，究不可信。事定后当谕以该庄民人半为贼匪，伊等于贼匪滋扰时并不能助力剿杀，今不治其既往之罪，或趁此兵威，将该处村庄民人酌为迁徙。其籍贯分隶广东、漳、泉者，令其各为一庄，俾相离较远，以杜争端。至台湾府城为五方杂处之区，自难逐一清厘，转滋烦扰。况镇道大员俱驻府城，原可随时弹压，无虞滋事，则不必办及。

至台湾南北各处村庄，多被贼焚毁，民人俱遭戕害，并贼人头目及被威胁从之众所遗田土房产，既未便仍拨给漳、泉之民，令其徒享利益，且恐游手无籍之徒，从而聚处，又致滋事。自应将其田产查明入官，另行分拨。因念该处熟番向化日久，此次逆匪滋事，熟番并无从贼者。且淡水等处现在招集番勇甚多，莫若将

① 据《钦定平定台湾纪略》（稿本）卷四十增补。

此项入官田产，如四川屯练之例，即给与熟番耕种，按则升科，令其安居管业，自为守护。既可以示绥戢，又可招抚生番，岂不一举两得。

至诸罗、彰化等处地方辽阔，亦须酌量添设兵丁，以资防御。该处原止设知县一员，恐职分较小，不能弹压，或应酌添丞倅将弁，在该处驻扎，更为有益。此皆朕早夜軫念军务，于焦劳不寐时预为筹及者，今一一指示，著福康安等归入善后事宜酌办，不必过于拘泥。将来应行筹办之事甚多，若令李侍尧渡洋前往办理，恐内地乏人，而常青于此等要务未经谙练，恐亦不能筹办裕如。福康安既远涉重洋，于该处整顿地方，戢暴安民^①，一切善后之事，正应乘此大兵得胜之后，妥为区划。不必因念切瞻觐，且离家日久，急于回京。总当悉心拨度斟酌尽善，以期永靖海疆，方为无负任使。至海兰察及巴图鲁、侍卫、章京等，事竣后自应令其先行回京，不防酌留数人，以资臂指。其闽浙驻防满兵，亦应令其各回本处。惟屯练黔兵既经远调到彼，将来办理善后事宜，或有应须兵力镇抚之处，亦不防暂留该处，于诸事办完后应撤（撤）回时，再行撤（撤）回可也。将此由六百里加紧各谕令知之。

现在早交冬令，海岸风色顺利，著福康安将抵鹿港后如何定计攻剿，及常青、恒瑞、柴大纪各处近日剿贼情形，迅速驰奏。李侍尧一得地方官禀报信息，及续调各省官兵于何日配渡放洋之处，一并速奏，以慰廑注。

钦此。遵旨寄信前来。

① 《钦定平定台湾纪略》（稿本）卷四十为“安良”。

谕钦差协办大学士福康安留心察查

兵丁功过并速报军情

乾隆五十二年十月二十一日 台湾档

大学士和，字寄钦差协办大学士总督将军侯福、闽浙总督李，乾隆五十二年十月二十一日奉上谕：

现在川、黔、广西等省兵丁，即日陆续前抵鹿港。伊等远涉数省，行走奋勉安静，自应酌加奖赏，以示鼓励。此内屯练兵丁屡经派调，素为得力。但此次甫经新到，尚未与贼打仗，独著劳绩，既未便先加恩赏，转使他省闻时调拨之兵不无觖望。且台湾节次所调粤东、浙江及闽省满汉官兵甚多，久经在彼防守堵剿，其中伤亡病故，及疲弱不能得力者，一时亦难分晰查明，普行给赏。自应核其功过，分别赏罚，用示劝惩。着福康安到彼后，于打仗时务须随时留心查察，除兵丁内有临阵退缩脱逃者，即应按律正法，其寻常过犯较轻者，随时量加责惩外，至新旧派调各兵，即以一省兵丁而论，有打仗出力者，亦有怯懦不前者，福康安于进剿时，应将各该省中奋勇骁健之兵临时查明，酌加赏赉，庶出力者倍加感奋，而怯懦者亦知所激励，争先效用，于剿捕机宜方可收臂指之效。

至福康安此时自早得顺风，前抵鹿港，究作何调度，定于何路进剿，尚未据有奏报，盼望綦切。常青处自九月十四日报到后，迄今一月有余，并无续奏。府城前有贼匪滋扰之信，果否确实，近日曾否剿散贼匪，肃清南路；恒瑞在盐水港驻扎已阅月余，所带兵丁自早到齐，伊在彼如何堵御，能否将贼匪杀散，打

通道路；柴大纪在诸罗与蔡攀龙如何商酌，能否带兵出城杀贼，亦久无信息。又普吉保由西螺进攻斗六门，究于何日进兵，如何打仗杀贼，及徐鼎士在淡水曾否已由大甲进攻大里 杙 贼 巢 各情形，均未据续有奏报。现在久交冬令，海岸风色顺利，文报自可常通。著福康安即将各该处近日如何剿杀贼匪、打仗得胜之处，迅速驰奏。并著李侍尧一俟台湾各处文报渡过内地，即令加紧驰递。及得有禀报信息，一并迅速具奏，以慰廑注。将此由六百里加紧谕令知之。

钦此。遵旨寄信前来。

谕内阁普吉保收复笨港应予奖赏

并通谕大兵即日进军

乾隆五十二年十月二十三日 台湾档

乾隆五十二年十月二十三日内阁奉上的谕：

普吉保奏，九月初六日带领官兵，由大突溪前往笨港援应诸罗，十三日行抵麦子寮，有贼数千，苛派良民银米，不能应付，贼匪欲焚毁村庄，百姓正惊惶无措，适官兵踵至，贼众奔逸，百姓欢声动地。随密探贼匪均集笨港，是夜贼匪暗放火号，并闻诸罗炮声彻夜不绝，当飭将弁分作三队，直前冲杀，贼众蜂涌（拥）迎拒。普吉保督率官兵奋勇攻杀，枪炮并施，打死贼匪数百人，生擒贼伙杨意、苏妈、张固三犯，夺获器械三十余件，鞭炮二门，耳记十八个，米谷薯（薯）干百余石，并焚烧坂头厝等贼庄七处。是日又有贼匪数百人攻犯大营，经官兵奋力堵御，杀贼十余人，烧毁贼庄，贼众退散。现在与恒瑞、柴大纪订期三路会

合，并力夹攻，贼匪可克期殄灭等语。

台湾逆匪林爽文等纠众不法，肆出滋扰，抢占村庄，实为罪大恶极。今普吉保督率将弁兵丁，由大突溪一路侦探贼踪，奋勇剿杀，焚毁贼寮，生擒贼伙，夺获器械银米甚多，收复笨港，实为出力可嘉。普吉保著交部议叙，出力兵弁著福康安查明咨部，一体议赏。并赏给普吉保玉扳指、大小荷包以示奖励。数旬以来，因海洋风色不顺，台湾府城及诸罗、盐水港三处俱被贼扰，文报不能常通，朕心正深廑注。今普吉保已将笨港收复，失散贼匪，该处距诸罗止二十里，距盐水港三十里，声息密迹。普吉保乘胜直前，诸罗、盐水港两路形势联络，恒瑞、柴大纪自可接应会合。而常青处前此曾有被贼滋扰之信，今据李侍尧奏据台湾地方官等报，常青因恒瑞在盐水港被贼拦阻，未能前进，即派委总兵梁朝桂、副将谢廷选带兵一千，前往策应。恒瑞处原有兵三千，今复得此一千接济，自更可统领剿贼。而常青既能分兵应援恒瑞，则府城兵力充足，自守有余，可知无虞贼扰。是诸罗、盐水港及台湾郡城三路，均可自为保护，乘机攻剿。且贼匪在麦子寮苛派良民银米，焚毁村庄，可见贼众粮银将次就尽，已有溃散之势。而百姓一见官兵踵至，欢声动地，更可见民心效顺，不肯从贼。即日大兵分路进剿，谅此么磨草窃，无难一鼓成擒。

福康安既据李侍尧奏尚在大担门候风渡洋，而新调广西兵三千已抵厦门，四川屯练早入闽境，不日可到，而贵州湖南兵亦接踵而至。福康安正可带领劲兵，扬帆同渡，径抵鹿港，督率进剿。且台湾府城及诸罗、盐水港三处，于福康安未到之前，俱各保守无虞，今福康安又带领锐勇新兵，并总兵郑国卿所带之闽省兵丁，共计生力官兵又有万余，且有海兰察及巴图鲁、侍卫、章京等分队统领，军威振作，士气百倍。即日与常青、恒瑞、柴大

纪、普吉保等南北会合，直捣贼巢，自可扫穴擒渠，肤功迅奏。伫待捷音之至。将此通谕知之。钦此。

福建汀州镇总兵普吉保奏攻克笨港折

乾隆五十二年十月二十三日批 军录

福建汀州镇总兵官奴才普吉保跪奏，为恭折奏闻 克复笨港事。

窃奴才带领官兵于九月初六日，由大突溪前往笨港援应诸罗，因溪水泛涨，车辆輻重至初八日陆续过竣。初九日驻扎二林，连日差人侦探贼情，贼匪于附近各庄不时出没。奴才亲督官兵分路剿捕，留游击叶有光带兵八百名防守粮道后路。十三日行抵麦仔寮，有贼众数千苛派良民银米，民苦不能应，贼克期次日烧庄，百姓惊惶无措。适官兵踵至，贼众奔逸，百姓欢声动地。是日扎营该处，仍一面分兵侦探追逐。十五日扎营元长庄，离笨港八里，密探贼匪均屯集笨港及前途一带村庄。至夜贼匪暗放火号，继以炮声，并闻诸罗一带炮声彻夜不绝，奴才当飭将弁严为戒备。时近四鼓，乘其不备，将兵分作三队，奴才带领都司马元勋由中路直冲贼巢，游击海亮由西路夹攻，护副将琢灵阿为之响应，参将张朝龙带领守备宋国兴、署守备沈勇云从东路横冲。贼众蜂拥迎敌，奴才督率官兵奋勇攻杀，枪炮并施，打死贼匪数百人。生擒贼伙杨意、苏妈、张固三名，经发交署同知黄嘉训审讯，供认助贼不讳。缘非贼目，即于军前正法。夺获器械三十余件，鞭炮二门，耳记十八个，辫子三十七根。米谷、薯干约计百余石，当分散出力各官兵乡勇。焚烧坂头厝等贼庄七处，火烟起

后，诸罗炮声亦遂不闻。查游击海亮奋力督兵，（朱批：告之福康安升用。）复用枪炮打毙逃散贼匪数人。正在收军，据探马报称，有贼匪数百人乘大路前进，由崙仔顶路来犯大营。经署同知黄嘉训督率乡勇，（朱批：亦告之福康安。）会同游击夏承熙，带领官兵，奋力堵御，杀贼十余人，当将崙仔顶贼庄烧毁，贼众退散。

伏查笨港地方分南北二港，离诸罗二十余里，离盐水港三十里，离海口三十里。自五月失陷后，北港竟成片土，南港一带搭盖草寮约计二百余间，悉系贼巢，贼匪得以肆行无忌。今顿遭焚杀，贼众未必不为丧胆，若径乘胜直逼诸罗，似觉便捷。第恐贼匪诡计多端，一俟我兵前进，从而绕袭其后，阻隔粮路，贻害匪轻，故仍扎住元长庄，（朱批：竟是。）并可以觐贼匪动静。奴才一面亲督官兵，焚烧一带贼庄，痛加剿锄，廓清后路，（朱批：应如是。）一面密遣妥人，移咨参赞将军臣恒瑞与参赞提臣柴大纪，订期三路会合并力夹攻，（朱批：好。勉为之。）谅么磨不日殄灭矣！（朱批：即闻捷音。）所有受伤官兵乡勇，容俟查明另报外，谨将克复笨港及订期会攻缘由，恭折由六百里加紧驰奏，伏乞皇上睿鉴。谨奏。

乾隆五十二年九月十九日。

乾隆五十二年十月二十三日奉朱批：即有旨谕。钦此。

闽浙总督李侍尧奏台湾现况及各船配渡折

乾隆五十二年十月二十三日批 军录

闽浙总督臣李侍尧跪奏，为据禀台湾情形并备船配渡事。

窃照九月以来，海风连作，台湾各官，久无文报，本月初九日始接同知吴元琪九月初六日来禀。内称初一日柴大纪有信至府城，称蔡攀龙等援兵，惟蔡攀龙、孙全谋带兵七、八百名，及运送粮饷之义民三千名到诸罗。其贵林、杨起麟、杭富俱在正音庄阵亡。

（朱批：可惜，已加恩矣！）初四日又有柴大纪信，称贼在诸罗城十数里外周围邀截，使道路不通，米粮不入。现在米价甚贵，且无买处等语。该同知又称闻得近县各庄田禾正熟，贼与庄民分收运归斗六门。官兵常出城截用，似尚可支持。恒瑞在盐水港连日打仗。常青又派梁朝桂、谢廷选带兵一千，前往应援等语。

查该同知所禀，核之恒瑞折稿，看来诸罗仍未解围。而盐水港又多贼匪滋扰。梁朝桂等到彼虽可增助兵力，万一贼益鸱张，将盐水港水口截断，则恒瑞等进退两难，或有疏失，益不成事体。是以臣飞札常青，速派水师鸟枪兵数百名，驾船数十号往盐水港。倘贼由水路来扰，即行截杀，（朱批：好。）务当保住水口，兼可作万一退步之用。臣因风吼不顺，特令厦防厅选募舵工、水手，将此信冒险折戢前往，但未知是否必能迅速送到。至普吉保处亦久无信息，臣实深焦急。（朱批：今日有信来，竟好。已有旨矣！）正在缮折具奏间，接奉九月二十七日廷寄谕旨：令福康安速由鹿港进捣大里杙贼巢，攻其所必救。并令臣预备船只，俟粤西及川黔兵到，即速配渡。钦此。臣查渡载官兵船只，久已齐备，在蚶、厦两处粤西兵三千，现已到齐登舟。缘东风甚大不能放洋，福康安等亦尚在大担候风。臣询之船户，据称：每年八、九月间，俱是如此。十月已届小春，风势当渐平顺等语。川省屯练，本月初二日，头起兵亦已入闽境。此项兵系从江西取道省城而来，应即从蚶江配渡，其船只亦已预备妥当，俟将

到时，臣即前往蚶江料理。（朱批：好！）贵州兵闻已在途，想亦迅速可到。福康安等一得顺风，自当即行开驾。其余续到之川、黔兵，随即进发，兵力益壮，军声亦益振。兼有巴图鲁、侍卫等率领进攻，彼贼匪乌合之众，究未尝一当大阵，今有此重兵，全力进剿，但得痛杀一、二阵，则贼势自衰，即可迅奏肤功矣！

（朱批：是。）所有接到台湾文禀，及现在备船配渡各缘由，谨缮折驰奏，伏乞皇上睿鉴。谨奏。

乾隆五十二年十月十一日。

乾隆五十二年十月二十三日奉朱批：即有旨谕。钦此。

谕内阁议恤在台阵亡之总兵贵林等人

乾隆五十二年十月二十三日 台湾档

乾隆五十二年十月二十三日内阁奉上谕：

据李侍尧奏，接同知吴元琪禀称，九月初一日柴大纪有信至府城，称蔡攀龙等援兵，惟蔡攀龙、孙全谋带兵七、八百名，及运送粮饷之义民三千名到诸罗，其贵林、杨起麟、杭富俱在正音庄阵亡等语。贵林等前经常青派赴诸罗援应，奋勇打仗，甚为出力，是以降旨将贵林补授总兵，杨起麟补授参将，并俱赏带花翎。今贵林、杨起麟，同都司杭富因剿捕贼匪，临阵捐躯，殊属可悯。贵林著照总兵例议恤，杨起麟前在盐水港一带堵御防守尤为出力，著加等照副将之例议恤。其都司杭富，亦著照例议恤，以示悯恤。钦此。

谕钦差协办大学士福康安等抵台后相机进军

乾隆五十二年十月二十三日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李、福州将军参赞恒、提督参赞柴、传谕总兵普吉保，乾隆五十二年十月二十三日奉上谕：

本日普吉保奏，克复笨港，现在觐贼动静，亲督官兵焚烧附近贼庄，廓清后路，即咨会柴大纪、恒瑞三路夹攻等语。所办好！已于折内批示矣。并明降谕旨，交部议叙，赏给普吉保搬指荷包，以示奖励。笨港离诸罗止二十余里，离盐水港亦止三十里，该处经普吉保带兵收复，与诸罗密迩，声息相闻，是诸罗县城尽可无虑。而盐水港亦距笨港甚近，恒瑞处有续到之闽兵一千五百名，又经常青派令梁朝桂等带兵一千名前往援应，则盐水港一路军势亦已大振。至常青处既能分兵援应盐水港，看来府城自必防守裕如，均可慰心。

同日又据李侍尧奏，广西兵已全抵厦门，川省屯练兵已入闽境，贵州兵亦已在途，迅速可到等语。计福康安此时谅已得顺风前抵鹿港，其四川、广西兵自己与福康安先后放洋。福康安统领多兵及巴图鲁、侍卫、章京等前往督剿，又经笨港收复之后，军声倍振，诸罗盐水港及台湾郡城现俱保守无虞。福康安到彼，惟当督率将弁，相机进剿，鼓勇一战，贼匪胆落，势如破竹，自可一举集事，迅奏肤功。其普吉保现在与恒瑞、柴大纪如何并力夹攻打仗得胜之处，著即先行驰奏。

普吉保折称行抵麦仔寮，有贼众数千，苛派良民银米，民苦

不能应贼。贼人定期烧庄，百姓惊惶无措。适官兵踵至，贼众奔逸，百姓欢声动地等语。该处民人被贼匪勒索银米，焚烧住庄，不堪其苦，一闻官兵到彼，喜获更生。可见贼匪经过地方，其附从民人本非甘心从贼，特因贼匪逼迫，无奈听从。即如麦仔寮地方，幸官兵前往该处，民人得所倚仗，否则必致被威胁从。是前此业已从贼民人，其中为贼所迫勉强附从者，自复不少。福康安此时尤应将安分良民，妥为抚慰安戢。即已经从贼者，亦应设法招徕，分别办理。不可因其业已从贼，概予歼除，转致阻其自新之路，坚其助逆之心，此为最要。

再，贵林、杨起麟、杭富，已据李侍尧奏，查明实系阵亡，业经降旨优恤。其贵林所遗温州镇总兵员缺，著福康安于带兵勇往之副将中徐鼎士、谢廷选，并此外奋勇出力者保举一员，奏明升补。又普吉保所奏游击海亮、署同知黄嘉训督率兵民，鼓勇杀贼，均属奋勉，亦著福康安查明酌量升用，以示奖励。

至李侍尧奏减价平糶一折，所办甚是。该省因台湾贼匪滋扰，米谷运入内地者较少，又因漳、泉雨泽稍稀，市价较为昂贵，自应减价平糶，以资接济。即使平糶后市价略减，不妨再将官价酌减，俾小民口食益为宽裕。

再，朕阅雍正年间实录，旧例闽粤民人往台湾耕种者，所有妻眷一概不许携带，止许只身居住台湾，而全家仍住本籍。嗣经高其倬疏请将在台湾垦田耕种及有房屋民人，准其搬眷居住，经九卿议驳。自因台湾系海洋重地，是以不令内地民人挈眷前往。今台湾民人俱有家属，与前定之例不符，其准令携带眷属起于何时，著福康安、李侍尧查明具奏。即如现在林爽文等纠众滋事，设其家属俱在内地，贼首等自必有所牵顾，何至敢于肆逆若此！是台湾民人禁止搬眷居住，未必非杜渐防微之一法。将来事定

后，应如何趁此兵威，酌定章程，妥协办理，抑或从来已久，有所不能之处，并著李侍尧归入善后事宜，一并妥议。将此由六百里加紧各谕令知之。

此次普吉保奏折，福康安现在大担门守风，自未启阅，而本日李侍尧奏到之折，亦称尚未得普吉保信息。著将普吉保原折，抄寄福康安、李侍尧阅看。仍著福康安将于何日得风放洋，前抵鹿港，如何定计攻剿，及普吉保何日与恒瑞、柴大纪会合夹攻，并常青在府城近日剿杀贼匪情形，各行迅速驰奏。李侍尧续得地方官禀报信息，亦即速奏，以慰廑注。伫待捷音之至。

钦此。遵旨寄信前来。

谕钦差协办大学士福康安于大担门

等候各路官兵同渡

乾隆五十二年十月二十四日 台湾档

大学士和，字寄钦差协办大学士总督将军侯福、闽浙总督李，乾隆五十二年十月二十四日奉上谕：

据福康安奏，在大担门屡次令船户设法开驾，总因风狂浪急，未能移动。十一日清晨见风势略平，强令放船行走，未十数里，仍被顶风打回。一俟风色稍顺，即刻放洋等语。已于折内批示，海洋风信顶阻，未能克期开驾，福康安在大担门停泊多时，甫经放船，又被逆风折回，自不免心怀焦急。但现在添调广西兵已全抵厦门，川省屯练亦已早入闽境，黔兵业已在途，亦不日可到，现又添调湖南官兵，计福康安放洋开驾时，其先到之广西、四川兵五千俱可同时配渡。又贵州兵二千，及郑国卿所带闽省兵

三千，福康安统领到鹿港时，声势壮盛。此项生力劲兵约有万余，足可一以当百，贼匪自必闻风胆落，无难迅速藏功。是福康安在大担门守风，虽少需时日，正是上苍默佑，天妃助灵，俾福康安得以等候新兵，扬帆同渡，未始非极好机会，为成功先兆，朕方转愁为慰。福康安惟当益加敬感，切弗因放渡稽迟，稍存尤怨也。

至折内称询之船户，十月初九日自鹿港开船，闻得总兵普吉保于九月半前，亲自带兵前往诸罗，曾否打仗得胜，不能知道等语。昨已据普吉保奏报，九月十六日带兵克复笨港，杀死贼匪数百名。现在驻扎元长庄觐贼动静，一面将附近〔贼〕庄焚毁，廓清后路。一面咨会恒瑞、柴大纪，三路夹攻等语。昨已有旨谕知福康安等矣。笨港距诸罗止二十余里，声息相闻，与盐水港相距亦止三十里，兵势已为联络，是诸罗、盐水港两处俱可无虞。且检查恒瑞前奏，盐水港有贼匪滋扰，系九月初四、五两日情形，而普吉保昨日奏到克复笨港，系九月十六日之事。计普吉保在笨港发折时，已在恒瑞发折之后十日，是盐水港一路，尤可放心。至常青处前曾传有被贼滋扰之信，但昨据李侍尧奏称，常青闻知恒瑞在盐水港被贼拦阻，已派令梁朝桂等带兵一千名，前往援应。则常青处自守有余可知，亦可无虑贼扰。看来府城及诸罗、盐水港三路，于福康安未到之前，俱已保护无虞。福康安统领新到锐兵，前抵鹿港，又有海兰察及巴图鲁、侍卫、章京等分队带领，惟当相机筹办，鼓勇进剿，于初次打仗时，即将贼匪痛加歼戮。俾贼众丧胆，自当势如破竹，可以克期藏功，旦晚即盼捷音之至。

至普吉保现已克复笨港，即日与柴大纪等定期会攻，则诸罗兵气自己振作，可无他虑。前曾谕柴大纪自行酌量，如诸罗力难

守御，不妨全师出城，乃系就彼时情形而言。今普吉保一路即已得手，柴大纪等正可内外应合，并力会攻。所有前后寄信谕旨，俱无庸给与阅看。

再普吉保昨日奏到之折，是否由蚶江登岸，抑系由厦门转发，何以福康安未经相值，而李侍尧亦未得有信息？著李侍尧将此次普吉保奏折系由何路驰递之处，便中查明具奏。此后军营奏报，均应于递到何处，即由何处迅速转递，勿得因有此旨拘泥，令其转至厦门，以致耽搁，方为妥善。

至此次福康安发折时尚在守风待渡，是由厦门至鹿仔港系属顶风，而由台湾至内地则当系顺风，何以常青处亦未据有递到奏报？著李侍尧一俟常青文报递到，即飭驿站加紧迅速驰递为要。将此由六百里加紧各谕令知之。仍著福康安将新调官兵于何时到齐，福康安带令何路官兵一同放洋，及到鹿仔港后如何定计攻剿，并南北各路情形，先行迅速驰奏。李侍尧得有稟报，亦即随时速奏，以慰廑注。

钦此。遵旨寄信前来。

广东左翼总兵李化龙奏到台及 与普吉保会商攻战折

乾隆五十二年十月二十五日批 军录

署广东左翼总兵官奴才李化龙跪奏，为奏闻事。

窃奴才于乾隆五十二年七月初五日承准两广督臣孙士毅檄，委统领官兵赴闽。奴才遵于七月初六日自虎门起程，二十二日抵闽粤交界之黄冈地方。复承准两广督臣孙士毅照会，统领粤省官

兵前赴厦门，听候闽浙总督李侍尧飭渡台湾，会剿贼匪。奴才于八月初二日带领粤兵自黄冈起程，初七日至福建厦门，承准闽浙督臣李侍尧照会，飭令统领后到粤兵二千名，前往鹿仔港参赞臣蓝元枚军前剿匪。奴才即于初八日登舟候风，十五日由厦门出口放洋。缘风旼不顺，二十五日到鹿仔港，官兵于九月初四日到齐登岸。其后调粤兵一千名，系广东右翼镇标左营游击张会元统领，亦已到港登岸。内饶平营把总郑廷斌管带该营兵丁七十九名配船一只，尚未进口，现在飭查。并知参赞臣蓝元枚已于八月十八日病故，所有一切官兵系福建汀州镇臣普吉保暂行统理。随会商普吉保，乘此新兵锐气，奴才即欲亲带官兵进剿。兹于本月初四日奉将军臣常青、参赞臣恒瑞札开，留普总兵防守鹿港，李总兵即带领官兵前赴诸罗应援。并牌行知照，委汀州镇臣普吉保护理水师提督印务，统领闽浙粤官兵各等因。奴才登即驰赴普吉保营盘，面询机宜，以便带兵进剿。而普吉保以奴才初到鹿仔港，于地势贼情未能深悉。且鹿仔港系内渡要口，逼近大里杙，距首逆窝巢仅三十里。四隘官兵需员统理，留奴才在鹿仔港驻镇，以固地方。普吉保定于初六日带兵前进，并示以业经先期奏明在案。奴才窃思贼匪亟应剿除，而鹿港地方虽为紧要，奴才曾经出师金川、云南，蒙皇上天恩，不次拔擢，当此逆匪不法，正宜痛加剿杀，稍伸报效，乃署提臣普吉保已经先期奏明，留奴才在鹿港经理。奴才因普吉保既系统领闽浙粤官兵，则一切机宜自应听其调度，业经稟请将军臣常青、参赞臣恒瑞。一俟派有大员前来经理，指示机宜，奴才即统兵接应，分路进剿，痛歼渠逆，上慰圣怀。合将统兵到港日期，及会商留驻情由，缮折恭奏，伏乞皇上睿鉴。谨奏。

乾隆五十二年九月初六日。

乾隆五十二年十月二十五日奉朱批：汝要去的固是，但普吉保知彼处情形，更当去，汝二人皆可嘉。今福康安不日即到，汝随彼效力可也。钦此。

闽浙总督李侍尧奏严密防察出海各港口折

乾隆五十二年十月二十五日批 军录

闽浙总督臣李侍尧跪奏，为遵旨复奏事。

窃臣于本月十二日接奉上谕：据柴大纪奏，搜获贼匪伪札内，有防守海口之语。恐贼匪将来逃窜时，抢占船只入海，以致搜捕稽迟。前据李侍尧已拨缁船，分驻鹿耳门、鹿仔港。该二处有无贼匪在洋面滋扰，兵丁等曾否拿获贼船，著李侍尧据实复奏，等因。钦此。臣查鹿耳门、鹿仔港两处，为官兵渡台最要口岸。臣前闻笨港被贼抢占，惟恐贼匪出海滋事，于运送粮饷大有关系。曾两次派往缁船四只，水师鸟枪兵四百名，令游击叶有光、守备李得胜管带分驻该二处，查拿贼匪，防获饷船。后又奉旨：澎湖等处亦系紧要，并须预为防范。臣又派兵六百名前往，令其澎湖及台湾沿海各港口，随同叶有光等兵船，往来梭织，以备不虞。数月以来，惟北淡水之大安港，七月初八日有红头船二只，停泊外汕，遣水手三人，驾小船上岸，被澳甲人等拿获。该红头船望见小艇被拿，即驾帆逃走。该同知徐梦麟讯据现获三犯张进年、徐阿合、谢合顺等供，系广东海丰县人，（朱批：称广东者，明其不是贼船，可疑。）在神泉海口载盐往潮州，被风吹至该处等因。臣以即系商船遭风，何以见小艇被拿，即行逃遁，（朱批：当严究。）情迹可疑，随飭令将该犯解送内地。至今尚未解

到，俟到时讯明再奏外。至鹿耳门、鹿仔港二处，并未有贼匪在海口滋扰之事。臣又以鹿耳门之安平港，本有战船四十六号，虑贼匪逃散后，或抢掠出海，已于八月间严飭署安平协副将赵勇，此项战船除派拨巡防外，余船则将舵篷等项尽行卸下，另贮别处，毋得装配在船，以免疏虞。（朱批：好。）并移咨常青，一体飭办在案。惟是贼匪若逃窜出海，必须横洋大船，现在尚未闻有贼匪在各港口打造大船之事。贼若于各港口梗阻出入，则掠取本地小船，即可〔滋〕事，是不可不预防。（朱批：是。）臣再移咨南北各路军营，并严飭前派之叶有光、李得胜等，不特鹿耳门、鹿仔港二处，凡可出海港口，一体严密防察。如有贼匪出没，即行截杀，务使口岸肃清，不致稍有疏失。为此谨缮折复奏，伏乞皇上睿鉴。谨奏。

乾隆五十二年十月十三日。

乾隆五十二年十月二十五日奉朱批：即有旨谕。钦此。

谕钦差协办大学士福康安嘉奖普吉保等

并速奏近日战况

乾隆五十二年十月二十五日 台湾档

大学士和，字寄钦差协办大学士总督将军侯福、传谕汀州镇总兵普吉保、广东左翼镇总兵李化龙，乾隆五十二年十月二十五日奉上谕：

本日据普吉保奏，八月二十五日李化龙前抵鹿仔港，随将该处情形告知，而李化龙以曾经出师金川，即欲带兵前往，普吉保因李化龙初到，未能深悉该处情形，将各路留驻官兵交伊经理，

普吉保即带领官兵由笨港前进等语。又同日据李化龙奏到统兵前抵鹿仔港日期，及会商留驻缘由一折。均已于折内详悉批示。

普吉保、李化龙二人同系领兵大员，当此逆匪滋事，亟须剿捕之时，伊二人俱欲带领官兵亲往剿贼，均属奋勉可嘉。但普吉保在彼日久，于该处地势贼情较为熟悉，伊以李化龙甫到鹿仔港，恐未能深悉该处情形，令其带兵驻守，普吉保亲统官兵，督率前进，所办甚是。此次普吉保、李化龙奏到之折，系九月初四、初六等日拜发，而普吉保于九月十七日具奏克复笨港之折，已先行奏到，业经降旨将普吉保交部议叙，并赏给搬指荷包，以示奖励。至李化龙一抵鹿仔港，即向普吉保面询机宜，欲亲自带兵进剿。今因伊系初到，鹿仔港逼近贼巢，亦属重地，留彼驻守。而其急公勇往之心，亦堪嘉奖。李化龙着赏给大荷包一对，小荷包二对。该镇倍当奋勉，督率留驻官兵，悉力堵御，俾普吉保长驱直入，可无后顾之忧。即日福康安前抵鹿仔港，兼有添派之广西、川、黔等省兵陆续齐集，军威壮盛，克期进剿，正在需人统领。李化龙当随福康安奋勇杀贼，克期立功自效。

至普吉保折内称，笨港离诸罗县城、盐水港俱止二、三十里，若由沿海一带猝然前往，贼必闻风溃散，我兵乘势进攻，既可接应诸罗，而克复笨港后，分守粮饷铅药等项，于海道运送更便等语。所见尤合机宜，不料普吉保竟能如此！现在普吉保已将笨港收复，歼戮贼匪，焚毁附近贼庄。而该处村庄民人，一闻官兵踵至，欢声动地，正可乘胜攻剿。昨据该镇奏称，现在规贼动静，廓清后路，一面咨会柴大纪、恒瑞定期三路夹攻等语。诸罗、盐水港与笨港相距甚近，恒瑞处原带有兵丁三千，又经常青添派兵一千前往策应，兵力已壮。而诸罗密迩笨港，声势联络，柴大纪、恒瑞接到普吉保咨会后，自必督率将弁兵民，内外应令

(合)①，并力会攻，可期集事。

近日普吉保曾否剿散贼匪，直达诸罗，柴大纪、恒瑞于何日定期进兵，三路会合，打仗得胜各情形，着即迅速驰奏，以慰廑注。将此随本日六百里加紧军报，传谕普吉保、李化龙，并谕福康安知之。

钦此。遵旨寄信前来。

福建汀州镇总兵普吉保奏调集 官兵进剿诸罗折

乾隆五十二年十月二十五日批 军录

福建汀州镇总兵官奴才普吉保跪奏，为奏闻事。

窃奴才于八月二十四日恭折具奏，俟左翼镇臣李化龙统带粤兵一到鹿港，奴才即商留在港固守，拟俟各兵到齐，亲统进剿。嗣镇臣李化龙先于八月二十五日进港登岸，奴才随将北路一带贼势及一切设备防御各情形，详细告知。而镇臣李化龙以曾经出师金川，即欲带兵前往。奴才以镇臣李化龙甫经到港，一切地势贼情未能深悉，自应在鹿港固守堵御，仍将各路留驻官兵统交经理，（朱批：汝二人皆可嘉，而汝去更是。）奴才得以长驱，可免返顾之虞。其原设各营盘均关紧要，仍妥为安设，留兵五千六百余名，责令副将格绷额、穆腾额、参将福兰泰、游击裴起整、张会元、陈士份等加意防范。所有添调粤省兵三千名，自八月初六、二十二至九月初十日，始行陆续抵鹿港。内尚有兵船一只，配带兵丁七十九名，系把总郑廷斌管带，未经进口，现在飭查。

① 据《钦定平定台湾纪略》（稿本）卷四十一改正。

奴才一面酌带漳州兵二千名，广东兵二千名，又在陈兵内挑拨曾经打仗者一千五百名，并带领护理副将游击琢灵阿、参将张朝龙、游击海亮、夏承熙、叶有光，都司马勋等，分飭管领。查署理番同知黄嘉训，于事颇为熟悉，总理粮务随营办理一切。其前项未到之粤兵七十九名，系在留防各兵数内。奴才分派妥协，不敢以曾经稟请将军臣常青派委大员未到，观望延误。业已定期于本月初四日，亲率各官兵，本拟由东螺、西螺一带进攻，缘闻诸罗县城被贼围困，事在危急，奴才即遣妥人密为侦探道路。若径由东螺、西螺进攻斗六门，贼匪不无设备防范，剿洗恐稽时日。今查笨港离县城二十余里，离盐水港三十里，虽系贼匪屯踞，若大兵由沿海一带猝然骤至，贼必丧胆溃乱。（朱批：所见竟是，不料汝能此。）我兵乘势进攻，既可速解诸罗之危，而于克复笨港后，分拨官兵守御粮饷药铅等项，于海道运送更为便益。奴才一面带兵相机前进，一面密行知会柴大纪，由县城统兵接应，互相堵杀，务期打通道路，即可与将军臣常青等大兵会合，听其指示，然后进攻大里杙一带贼巢，痛加歼杀，务期根除净尽，以仰慰圣慈霄旰廑念之至意。所有带兵进剿缘由理合恭折具奏，伏乞皇上睿鉴。谨奏。

乾隆五十二年九月初六日。

乾隆五十二年十月二十五日。奉朱批：昨据汝奏攻得笨港，已交部议叙矣！勉之。钦此。

广东左翼镇总兵李化龙奏柴坑仔等处战况折

乾隆五十二年十月二十六日批 军录

署广东左翼镇总兵官奴才李化龙跪奏，为奏闻事。

窃奴才到鹿港日期，并接准汀州镇臣普吉保将留驻各营盘官兵，移交管理，业经恭折奏闻在案。奴才自镇臣普吉保带领官兵起程进剿之后，即亲往各营盘察看地势情形，谆谕将备加意防范，并传集义民首林湊、许伯达、王高等训示奖谕，令其鼓励义民保守村庄，协力堵御。

第查现在贼匪注意专攻诸罗，正可乘机进击，以分贼势。随于九月十八日密令游击穆腾额，带领官兵由番仔沟进至大肚溪一带，以作疑兵。奴才亲率游击裴起鳌、署游击陈士份、守备徐大鹏，带领弁兵义民首许伯达等引导，由八卦山直抵柴坑仔。贼匪蚁聚拒敌，即令施放枪炮，贼始渐退，随焚毁草寮二十余间。贼人恃众竟复拥至，奴才率领官兵向前截杀，枪炮打死贼匪百余名，贼即奔逃。正欲追杀，因见该处竹林丛杂，沟圳甚多，未便轻进，暂且收军。缴验割取耳记、辫子十三个，首级二颗，生擒贼匪何华、欧倚二名，夺获鸟枪二杆，器械共十九件，贼旗一枝，分别奖赏。

奴才于二十日亲率官兵义民前赴中寮地方，审察地势，侦探贼踪，猝遇贼匪数百，前来迎敌。随令施放枪炮，打死贼匪十余人，贼始退走。时日已暮，收军回营。二十二日据驻守番仔沟营盘游击穆腾额飞报，大肚溪贼匪出扰庄民，奴才随即带领官兵义勇，前往堵御，施放枪炮。自辰至午，打死贼匪约有二百余名，贼人纷纷溃散。割取辫子、耳记二十七个，首级一颗，夺获贼旗一枝，皮牌三面，长枪竹铍挑刀共三十五枝。查义民内阵亡二名，加厚恤赏。受伤八名，给与银两医治，俱可就痊。至贼匪何华、欧倚二名，奴才督同彰化县宋学灝审讯，皆属贼党，并非贼目，即在军前正法讫。所有奴才连次打仗杀贼焚庄情形，恭折由驿驰奏，伏乞皇上睿鉴。谨奏。

乾隆五十二年九月二十三日。

乾隆五十二年十月二十六日奉朱批：好，即有旨谕。钦此。

福建汀州镇总兵普吉保奏元长庄一带战况折

乾隆五十二年十月二十六日批 军录

福建汀州镇总兵官奴才普吉保跪奏，为奏闻事。

窃奴才于本月十九、二十两日打仗杀贼情形，业经恭折具奏在案，（朱批：此奏却尚未到。）一面密差妥人知会参赞将军臣恒瑞，参赞提督臣柴大纪，订期会攻。詎逆首林爽文率领伙党，又于二十二、二十四等日，在元长庄一带蜂拥前来，经奴才亲督官兵奋力杀退。贼众仍屯踞附近村庄，奴才密遣妥人侦探得实，即于二十四日夜分派官兵乡勇预为埋伏。二十五日黎明贼众由溪墘厝到云厝、土库、东庄等处前来，竟敢逼近营盘，奴才亲率官兵奋勇直杀，枪炮打死贼匪甚多，游击海亮、都司马元勋从白沙墩横冲贼阵，用连环枪炮打死贼匪一百余人，署副将琢灵阿、参将张朝龙、游击夏承熙从无底潭环攻其背，署同知黄嘉训鼓励乡勇从水磨庄堵御截杀，自卯至未，贼众大溃。共约计枪炮轰毙贼匪数百名，割获首级七十一颗，耳记发辫一百三十四个，夺获器械贼旗多件，（朱批：可嘉之至，不料汝能如此。尚觉少耳。）文武员弁甚为奋勇出力，兵丁乡勇亦有阵亡受伤者，奴才现在查明分别赏恤。（朱批：皆查明报将军议叙。）惟是贼匪经大败之后，连日不敢窥伺，未必不为胆寒。第乌合之众，仍于附近村庄啸聚实为可恨，必得设法剿洗。（朱批：仍应防范，好，勉为之。）奴才若竟带兵前进，粮道后路最关紧要，是以叠稟参赞将

军臣恒瑞、参赞提督臣柴大纪三路夹攻，方易剿洗净尽。兹于二十五日接准参赞将军臣恒瑞来札，知盐水港一带海口要道，贼匪不时出没，现在恒瑞所带之兵仅敷堵御，必俟续调府城之兵到日，方可前来。同日，并接据参赞提督臣柴大纪札称，林爽文等贼，于本月十五、十六两日，复攻诸罗败阵，闻官兵至笨港，该贼目带匪徒数千，围聚于大客庄等语。是两处均有难以轻动之势，除飞禀将军臣常青察核指示外。（朱批：想福康安率劲兵新到鹿仔港，声势愈壮，一切听其调用。勉力为之。）奴才微末旗仆，受恩深重，惟有身先士卒，时刻留心现在筹度机宜，多方密探。一俟机有可乘，即为酌留官兵防守后路，一面带领将备，鼓励弁兵奋勇前进，痛加剿洗，（朱批：好。）大兵可期会合。奴才得有指示遵循，断不敢稍存观望，致负皇上豢生成之至意。所有连日杀贼情形，合由驿六百里加紧驰奏，伏乞皇上睿鉴。谨奏。

乾隆五十二年九月二十八日。

乾隆五十二年十月二十六日奉朱批：即有旨谕。钦此。

福建汀州镇总兵普吉保奏二林地方战况片

乾隆五十二年十月二十六日批 军录

奴才普吉保跪奏。窃照二林地方，为鹿仔港沿海一带门户，前经蓝元枚派拨官兵八百名，以资防守。旋因续到漳州之兵二千名，亦经蓝元枚分拨二林，以备进攻斗六门调遣。缘原带漳州官兵，只有游击夏承熙、守备宋国兴二员，实不敷管带。适游击叶有光奉督臣李侍尧委令，管押哨船来台巡查洋面。蓝元枚见伊系

同安人，音语与漳州相通，且为人遇事奋勉，是以飭令同带漳州官兵驻扎二林，即将原驻兵丁八百名撤回鹿港。九月初九日，奴才督率官兵驻扎二林，察看形势。二林实为海口要道，且为我兵粮道后路，特令游击叶有光带兵八百名暂驻二林。一面飞咨镇臣李化龙，将原设之兵来驻二林更换。叶有光之兵俾得前进攻剿。兹于九月二十二日据游击叶有光稟称，游击管带漳州兵八百名，暂驻二林防御后路。九月二十一日突遇贼匪焚烧大城厝、莱寮等庄，来犯二林。游击率领官兵往前堵御，枪炮攻击，贼众败退。正在烧毁贼巢之杨贤庄、埔心仔等处，不意贼匪实从竹围内冲出，绕截后路，搅杀一处。游击督率官兵奋力冲杀，贼匪始行退散。查点官兵阵亡千总汤国宝，把总曾超群，外委沈扬芳，兵丁三十三名。（朱批：俱予优恤。）稟报前来，除呈报将军臣常青察核，照例咨部恤赏外，理合附片奏闻。谨奏。

乾隆五十二年九月二十八日。

乾隆五十二年十月二十六日奉朱批：已有旨了。钦此。

谕钦差协办大学士福康安等

当乘胜会合各路鼓勇直前

乾隆五十二年十月二十六日 台湾档

大学士和，字寄钦差协办大学士总督将军侯福、闽浙总督李，传谕汀州镇总兵普吉保、广东左翼镇总兵李化龙，乾隆五十二年十月二十六日奉上谕：

据普吉保奏，九月二十二、三、四等日，贼匪于元长庄一带蜂拥前来，逼近营盘。经普吉保亲率官兵，奋勇直前，用枪炮击

死贼匪数百人，贼众奔溃。割获首级七十一颗、耳记一百三十四个，夺获器械多件等语。普吉保亲带官兵克复笨港，驻扎元长庄，将贼匪击败，屡有斩获，实属奋勇出力，可嘉之至。不料普吉保竟能如此，已明降谕旨赏给普吉保蟒袍，并将在事出力员弁交部议叙，以示奖励。又同日据李化龙奏，自普吉保带兵起程之后，即亲往各营盘察看情形，加意防范。因贼匪注意专攻诸罗，正可乘机进击，于九月十八、二十等日亲率弁兵义民，由八卦山直抵柴坑仔及中寮地方，剿杀贼匪数百人，焚毁贼寮二十余间，贼人纷纷溃散等语。李化龙带兵留驻鹿仔港，并不仅以坐守为事，能侦探贼踪，乘虚进击，杀贼甚多。所办好！亦已降旨将李化龙及带兵将弁等，交部议叙矣。

至恒瑞、柴大纪两处，现据普吉保奏，差人约会夹攻，而恒瑞因所带之兵仅敷堵御，未能前进。柴大纪亦因林爽文等复攻诸罗，虽经杀败，仍有贼目带匪徒数千围聚大客庄，难以轻动。但恒瑞处已经常青添派官兵一千前往策应，而柴大纪一路贼人攻扰俱被杀败，是该二处虽未能即与普吉保定期会攻，而自守皆属有余。常青处前曾有贼匪滋扰之信，现在既能派拨总兵梁朝桂等带兵一千分援恒瑞，则府城自己保守无虞。

今笨港业经普吉保克复，屡败贼众，连日贼人不敢窥伺。而鹿仔港一路又经李化龙在柴坑仔、中寮等处乘间攻击，奋勇杀贼，贼人望风奔溃。是官军声势皆可联络，已为大振，足令贼人胆寒。计普吉保等发折时自尚未知有福康安前抵鹿仔港，想此时早经得信。现在福康安统领川、黔、广西省重兵万余，又有巴图鲁、侍卫、章京等分队带领，军威壮盛。此旨到时，福康安自早得有顺风，扬帆径渡，前抵鹿仔港。正值贼人屡经溃败之后，官军奋迅攻剿，士气百倍，自当势如破竹。福康安惟当乘此好机

会，督率将弁，会合各路，鼓勇直前，于初次打仗时，即将贼匪痛加歼戮。俾贼人闻风丧胆，无难一举扫穴擒渠，克期蕲事，伫盼捷音速到。

至普吉保在笨港一带虽屡败贼众，但据奏贼匪仍在附近村庄啸聚，该镇带兵前进，其粮饷运道后路最关紧要，仍应加意防范。又李化龙于柴坑仔、中寮等处乘机进击，以分贼势，固属奋勇，但鹿仔港系沿海重地，逼近贼巢，李化龙尤须随处留心，实力防守。不可但知锐志直前，转致附近贼匪潜出后路滋扰，此为最要。即日福康安统领劲兵前抵鹿仔港，普吉保、李化龙一切听其调度，倍加奋勇，勉奏肤功。

又据普吉保另片奏称，游击叶有光在二林地方，率领官兵烧毁贼庄，贼匪突出绕截后路，经官兵冲杀，贼匪败散。查点官兵阵亡千总汤国宝、把总曾超群、外委沈扬芳，及兵丁三十三名。此项阵亡官兵俱着查明呈报将军，咨部优恤。

再普吉保折称九月十九、二十等日打仗杀贼情形，业经恭折具奏。此折尚未据递到，想系因风阻滞。至常青处四旬以来，总无奏报，自亦系海洋风阻。盼望甚切。现在洋面风色自己顺利，一经递到，著李侍尧即行速递，毋致迟延。将此由六百里加紧谕令知之。

钦此。遵旨寄信前来。

署湖广总督舒常奏遵旨调兵二千赴闽折

乾隆五十二年十月二十六日批 军录

署湖广总督臣舒常跪奏，为遵旨派令湖南挑备官兵赴闽进

剿，并臣前赴湖南会同督办缘由，恭折具奏事。

乾隆五十二年十月十九日丑时，承准大学士和珅字寄，内开本年十月十四日奉上谕：台湾逆匪林爽文纠众不法，前经降旨，令浦霖于湖南挑选兵二千名，以备征调，等因。钦此。遵旨寄信前来。伏查前奉谕旨：湖北、湖南各挑备兵二千名，听候调拨。臣当将湖北官兵挑派齐全预备外，其湖南应备之兵二千名，亦经分飭各营，择其精壮勇锐，现有家室，并曾出师金川，及熟悉水师者，照数挑定。旋经抚臣浦霖将筹备缘由具奏在案。兹奉谕旨，令湖南挑备兵二千名，迅速赴闽。臣即飞咨抚臣，赶紧办理，一面恭录圣谕，移知提臣俞金鳌速赴镇篆，接署镇篆，并令镇臣尹德禧，遵旨作为总统，先赴总路查点带领，以专责成。查原派副将伊常阿曾经出师西路金川，其余将备，多系曾经出师之员，均经飞飭作速起程。臣即于拜折后，前赴长沙，会同抚臣浦霖督办一切军行事宜，并分地查点督催，俾各起官兵安静迅速出境，不致稍有延缓。

至湖南与江西壤地相连，前经抚臣浦霖奏明，应于长沙府属醴陵县渌口地方取齐，由江西萍乡出境，较为近捷。臣现已飞咨江西抚臣何裕城，妥为预备，总期迅抵军营，早资歼剿。所有枪炮、火药、铅弹等项，宽为预备，飭派专员解送。其沿途各项应行应付事宜，飞札藩司郭世勋妥为筹办，均期周备无误。除俟催送官兵出境后，另行奏闻外，所有遵旨督令湖南挑备官兵赴闽，及臣前赴长沙会办得缘由，谨恭折由驿驰奏，伏祈皇上睿鉴。谨奏。

乾隆五十二年十月二十日。

乾隆五十二年十月二十六日奏朱批：好。知道了。钦此。

钦差湖广总督常青奏魏大斌等

救援诸罗失利折

乾隆五十二年十月二十七日批 军录

臣常青跪奏，为钦遵谕旨恭折复奏事。

窃臣于十月初六日，奉到七月二十九日、八月初五日两折朱批，并承准廷寄奉到谕旨：柴大纪被围日久，常青尚不亲往救援，岂拥此重兵，徒以株守为耶？等因。钦此。又奉到谕旨：今看常青难望其办理剿捕完结，福康安更宜速渡台湾。常青如必须留彼，即留于军营。若留彼无用，即令来京等因。又奉谕旨：常青若不能剿捕南路贼匪，又不前赴北路应援，唯知株守则罪上加罪，恐不能当此重戾等因。又奉谕旨：常青若于前次即派蔡攀龙前往，或不致为贼截断，乃仅派魏大斌，实属错谬等因。又奉谕旨：常青有过无功，其湖广总督养廉，只应给与一半。又奉谕旨：常青咨调江西兵，如已起程，即沿途撤回。其往返资费，俱令常青罚出。如广西兵不能得力，亦著常青罚出，等因。又奉谕旨：常青折内称尚有贼目来投等语，贼目究系何人，并未续奏。柴大纪如势实难支，不可拘泥守城，当完师而出，等因。钦此。

伏念臣办理剿捕事宜，屡恳添调官兵，均荷圣恩俯准。而半载以来，未能竣事，已深惶悚。近因派兵应援诸罗，又请调江西、广西之兵，冒昧陈奏。窃意倘蒙俞允，再备咨文征调。乃臣一时糊涂焦急，先将折稿就近札寄两广督臣孙士毅阅看，虽尚未行文知会江西省，而札知粤省之处，臣于折内并未声叙。兹奉谕

旨，以臣等未带大兵往救诸罗，尚欲待广西、江西无用之兵，于两、三月后，诚何意见，谕臣明白回奏。臣自思识见昏庸，办事竭蹶，一经圣明指饬，始觉调拨派委，诸事失宜，先后缓急，无非错谬，即重谴亦难解免，实无言可以回奏。今犹沐天恩，给臣总督养廉一半，仅将广西兵支給费用，照数罚出。但臣抚躬循省，实多负疚。至臣七月二十九日折内，有闻贼目来投之语。彼时因有南路山猪毛义民首举人曾中立差人赴台湾道禀称，有贼目许光来，囑令民人黄嵩到堆探问，擒送庄大田得以免罪否？随谕以不但免罪，而且有功等语去后。尚无投到之信。臣未将贼目姓名各缘由，据实奏明，实属疏忽。现在南路已派副将丁朝雄等带兵前往东港一带攻剿，其贼首庄大田仍相机擒捕。北路自恒瑞带兵三千驻扎盐水港，又派总兵梁朝桂带兵一千协助，现又有内地调来本省兵三千，亦陆续前赴恒瑞军营。而普吉保带兵五千，驻扎元长庄应援，若柴大纪等三面合剿，定可破贼解围。万一不及会合，臣已遵旨将奉到八月二十七日谕旨一道，抄寄柴大纪。当即饬交署台湾府杨廷理，密令屡送番银至诸罗交付无误之义民前往投递，必不至于遗失。一面仍密札恒瑞、普吉保两路差探，如柴大纪有带兵透出重围之信，即各带兵接应，乘势将贼匪剿杀。官兵既得会合一处，诸罗城外之贼亦不难歼除净尽。至前据派往诸罗之总兵魏大斌，原报损失弁兵一千一百余名，以及蔡攀龙等前往，又损官兵七百九十余名。俱经饬令该镇将等查明，此次弁兵是否阵亡溃散等情。又派委盐水港军营支放粮饷之巡检邵宗尧，现仍在盐水港军营。其家丁禀报：番银被劫一节，亦经饬令道府访查各去后，均俟确切查明复到另奏外，所有接奉谕旨钦遵缘由，理合恭折复奏，伏祈皇上睿鉴。谨奏。

乾隆五十二年十月初八日。

乾隆五十二年十月二十七日奉朱批：即有旨谕。钦此。

湖广总督常青奏庄大田约林爽文

三弟同攻府城片

乾隆五十二年十月二十七日批 军录

臣常青跪奏。八月二十七日差探得贼目庄大田，复约首逆林爽文之弟林三，共纠匪众，欲来犯郡。臣一面知会郡城员弁留心防范，一面派拨江宁将军永庆，侍卫乌什哈达，总兵梁朝桂等于二十八日黎明，带领弁兵二千名前往迎击。方出营盘里许，又据报贼众已从中洲来犯大营东南二面，并分伙党约三千人先攻府城大南门、小南门外之桶盘栈，当经在城之司、道、府、副、参等员弁，率领兵民，施放枪炮，打死贼三十余人，贼即由竹箐深处窜逸。其大营东南两面约有贼五千余人，蜂拥而来。臣即亲自督率永庆、乌什哈达、梁朝桂等奋勇进剿。贼人胆敢施放枪炮，满汉官兵排开队伍，子母连环枪炮叠发并施，自辰至午，贼人败逃，官军乘势追赶，掩杀至七八里，前抵大溪河边，收兵回营。计共毙贼约二百余人，夺获大炮二门，官兵义民割献新留发之首级十一颗，发辮六个，当即奖赏注册。官兵义民并无伤损，所有本日打仗杀贼情形，合并附奏。伏乞圣鉴。谨奏。

乾隆五十二年八月二十八日。

同日^①奉朱批：览。钦此。

^① 指乾隆五十二年十月二十七日。

钦差湖广总督常青奏再派官兵

接应诸罗等情折

乾隆五十二年十月二十七日批 军录

将军湖广总督臣常青跪奏，为遵旨复奏并按据诸罗文报再派官兵接应恭折奏闻事。

窃臣于二十四日奉到谕旨：今南北两路添调官兵，自己陆续到齐。常青竟当令恒瑞捍卫府城，该将军亲自统领大兵，自南而北等因。钦此。钦遵到臣。

伏查参赞恒瑞统领满汉官兵三千名，于二十二日起程，前赴诸罗，即日奏明在案。以及前经派往之副将蔡攀龙等，虽据盐水港守备黄象新来禀，有蔡攀龙等于十九日自盐水港起行之语，但数日以来，俱尚未得抵诸罗信息。

兹于二十七日接据参赞柴大纪来咨，内称蔡攀龙等带领官兵义民，分带火药饷银，于二十日来县途次遇贼打仗，县城闻炮，随带队伍义民出赴三坎店接应。副将蔡攀龙、参将孙全谋、游击邱能成先后到县。惟副将贵林、游击杨起麟、都司杭富尚未查知下落。兵民俱有损失，带到火药饷银有限。

二十一日贼又攻县，自辰至未，始得打退，参领官宝受有枪伤。二十四日又攻鹿仔草，仍复猖獗。合将危急情形，间道飞咨等情。同日又接到恒瑞清字札称，于二十五日已到盐水港。该处及鹿仔草现尚安静，闻得诸罗甚急等语。查盐水港内多义民，协同官兵固守。今恒瑞带兵三千到彼，则该处及鹿仔草贼必不敢轻犯。但诸罗屡经官兵应援，总未将县城外拦路各贼伙尽行剿杀，

以致节次派往官兵，俱被扰截，殊堪痛恨。今恒瑞前往，务先将鹿仔草距诸罗二十余里内踞险挡路之贼，痛加剿洗。则诸罗不至围困，而往来自可常通。

现今浙粤满兵三千，俱已到齐。臣恐恒瑞兵力尚有不足，再派总兵梁朝桂带领满汉官兵一千名，于二十九日由海道速往盐水港协助恒瑞，相机进剿，与柴大纪等内外夹击，总期将诸罗城外拦阻道路之逆匪，剿洗净尽。并飞移普吉保，于新到兵内，酌抽一、二千，或进攻斗六门，或收复笨港。即可牵缀贼势，即乘便竟达诸罗，会合恒瑞、柴大纪酌筹擒拿渠逆。

至府城外大营附近之贼，自十九日臣与恒瑞在三坎店一带搜剿之后，此数日内，稍知畏避，然尚不时窥伺。现在臣营兵力虽单，于周围附郡匪伙尽可堵御，仍相机逐一搜捕。除得有诸罗捷报，星即驰奏外，缘奉谕旨，并再派官兵接应缘由理合恭折具奏。伏祈皇上睿鉴。谨奏。

乾隆五十二年八月二十八日。

乾隆五十二年十月二十七日朱批：知道了。钦此。

谕钦差湖广总督常青仍留台湾效力

恒瑞回京候旨

乾隆五十二年十月二十七日 台湾档

大学士和，字寄钦差协办大学士总督将军侯福、钦差湖广总督将军常、福建水师提督参赞柴，乾隆五十二年十月二十七日奉上谕：

据常青奏派兵接应诸罗一折，系八月二十八日拜发，想因风

阻耽搁，并非近日情形。又据十月初八日复奏节次奉到谕旨一折，内称前此折内所称贼目来投之语，系因义民首曾中立禀称，有贼目许光〔来〕囑令民人黄嵩探问，若擒送庄大田是否得以免罪，随谕以不但无罪而且有功去后，尚无投到之信。又前奏谕旨，令柴大纪酌量情形，如诸罗守御力实难支，即带兵杀出县城，另图进取。已遵照抄录，遣人密送诸罗等语。又同日据恒瑞奏，李侍尧所派兵三千尚未到齐，现在盐水港附近村庄，俱有贼人屯聚。贼中火药粮食尚多，难以前进等语。均已于折内批示。

前曾有旨以常青自驻守府城以来，未能前进尺寸，伊究系年老，留于军营无益，而恒瑞年力正壮，尚可以资驱策，是以令福康安到彼察看，将恒瑞留彼听候调遣，令常青即行回京。今日阅伊二人奏到各折，因思常青在府城驻守，虽未能前进，但一切调度尚俱妥协，又闻知诸罗、盐水港两处被贼滋扰，先后派兵接应。且伊在府城亦经屡次与贼打仗。是常青虽属年老，尚能料理军务。且福康安到鹿仔港后，由北路统兵进剿，其南路及府城一带，亦须有大员驻扎督办。常青在彼日久，于该处情形较为熟悉，应仍令其留驻府城，督率剿捕。

至恒瑞在盐水港被贼拦阻，一筹莫展，转于折内将贼匪情形张大其词，茫无主见。似此怯懦无能，即留于军营，亦属无益，著福康安于鄂辉到后，即传旨将恒瑞解任，令其自备资斧来京候旨。其福州将军员缺，即着鄂辉调补，令其统领恒瑞原带弁兵，协力剿捕盐水港一带贼匪，接应诸罗。

至常青此次复奏之折，既得有福康安到彼督办之信，该处兵民间知，如何踊跃振奋，其贼匪闻有大兵将到，情形若何，俱应于折内详晰声叙，乃并无一字奏及。且常青自经委任，不能稍著功绩。今闻简派福康安前往接办，亦应将伊在彼半年毫无出力，

愧悚难安，而已于彼处情形，自为熟谙，今福康安到彼，会晤时面告一切，并情愿留于该处，随同剿贼，以赎前愆之处，于折内叙及。即其语非出至情，而虚词敷衍，亦所应有。乃亦竟无一语。常青虽愚，亦不至此，岂于此等处皆不能见及耶？著常青自行明白回奏。

至恒瑞折内称盐水港附近左右俱有贼藏匿，明系欲俟官兵前进，将后路截断等语。恒瑞在盐水港未能打通道路，以图寸进，尚得藉口于贼匪梗阻去路乎？况既知贼人于附近处所潜匿，欲图乘间邀截，正应督率官兵，将盐水港附近左右一带藏匿贼匪，奋力搜捕，以清肘腋，俾无后顾之忧。岂有两计俱无坐待之理！即如福康安现在统兵到彼，沿途遇有贼匪，自即随处剿杀，亦断无因虑贼匪潜截后路，遂按兵不动之理。乃恒瑞惟知坐守，漫无筹划，伊究竟在彼所办何事？岂意思与贼相持，待其自毙，又将欲效魏大斌之到诸罗，徒糜廩给耶？以上指出各节，俱著福康安到彼，亲向恒瑞严加诘讯，令其逐一登答，据实具奏。

至常青所奏贼目许光〔来〕囑令民人探问擒送庄大田是否得以免罪一节，常青谕以不但无罪，且可有功，其措词尚为得当。台湾贼匪本属一时乌合，其附从伙党，见逆首尚在，负隅抗拒，自未必肯将贼首、贼目即行擒献。即日大兵云集，四路攻剿，贼首等势穷力蹙，退无所归，此等啸聚匪徒，岂真有恩信相结，其附贼伙匪，一见官兵势盛，首逆指日就擒，或希图自谋生路，竟将贼首贼目擒缚献出，乃事理之所必有。著福康安于进剿时，即先广为晓谕，其伙党内如能将贼首贼目设法擒献，不但免死，并可邀功，即不能擒献首恶，或能弃械投诚，亦可免其一死。如此剴切晓谕，使胁从之徒自相解体，彼此猜疑，则贼匪乌合之众，可期不攻自散，实于剿捕有益。

又恒瑞折内称贼匪于民人所种粮食，十分中抽取二、三分，其附贼民人，骤难解散，即安分之民，亦多心怀两端等语。现在贼匪四出滋扰，迫胁村庄民人，抽分粮食，村民等畏其戕害，自不得不勉强听从。将来福康安统兵进剿，于所过地方，尤应妥为安抚。谕以伊等因贼迫胁，致所获粮石被贼抽分，自系畏惧贼人杀害，并非出于本愿。今大兵一到，贼匪指日荡平，该民人等务宜及早悔罪归诚，各图安业，共为良善之民。既可保全身命，又可各安耕种。若执迷不悟，必致身罹诛戮，悔将何及。如此明白开导，俾附贼民人咸知速行投出，贼党日益解散，此为最要。

再，前此谕令柴大纪，如诸罗守御力实难支，不妨带兵杀出县城，另图进取，乃系因彼时诸罗被贼滋扰，情形较为紧急，各路援兵未能即至。而柴大纪系提督大员，在台湾最为出力，惟恐稍有疏虞，殊为不值，是以曲加轸念，令常青差人赍谕柴大纪，令其酌量情形，不必过拘城存与存之见。今普吉保已带兵克复笨港，与诸罗相距止二十里，声势联络，兵气已振。而柴大纪在彼堵御，屡经杀贼，是诸罗保守无虞，已逾半载，此时岂可转委之而去？且诸罗义民委之于贼，亦甚可悯。所有前降谕旨，即可毋庸给与阅看，乃常青已差人赍送前往，殊属失之拘泥。但柴大纪素有谋略，固守诸罗已经数月，当贼匪猖獗之时，尚能悉力堵御，奋勇杀贼，况今贼势日衰，伊接奉前旨，自断不肯委垂成之功而去。惟当倍加奋勉，将诸罗附近贼匪悉数开除，并力会剿，即日戴功奏绩，来京瞻觐，承受格外恩眷，岂复可量。台湾之役，柴大纪之功实为第一，先著赏戴双眼花翎，以示奖励。

计此时福康安自早得顺风，前抵鹿仔港，现在诸罗一路与笨港信息相通，已可得手。恒瑞在盐水港虽未能杀贼，而李侍尧派往之兵即日齐到，又有常青续派梁朝桂等带兵一千名，可期得

力，是盐水港亦可无虞。而常青处现据奏称，于周围附郡匪伙尽可堵御，仍行相机搜捕等语，是常青于守御亦属有余。福康安到鹿仔港后，统领新兵万余，又有巴图鲁、侍卫、章京等分队带领，福康安惟当督率将弁，激励兵民，相机进剿。谅此么磨草窃，无难一鼓歼擒，断不至如恒瑞之束手无策。朕惟有日夕伫望捷音速至而已。将此由六百里加紧谕令知之。所有朱批常青、恒瑞本日奏到各折，俱著发寄福康安阅看。仍即速行回奏，焦切待捷音之极。

钦此。遵旨寄信前来。

闽浙总督李侍尧奏台湾近况及

福康安等开洋日期折

乾隆五十二年十月二十九日批 军录

闽浙总督臣李侍尧跪奏，为奏明台湾近日情形并将军等开洋日期事。

窃臣于本月十五日，接普吉保九月十七日寄来折稿，知其已进兵抵笨港一带，约会恒瑞订期并进，赴援诸罗。又接随营支放粮饷之署同知黄嘉训禀称，普吉保往笨港时，军装粮饷俱在元长庄大营。有贼乘虚来犯，经该同知〔黄嘉训〕^①及游击夏承熙杀退。又据驻守鹿港二十五里外埔心庄之副将格绷额禀称，普吉保起程后，九月十二日有虎仔坑贼首陈泮，带领四五千贼伙下山来扰。经该副将督率官兵义民奋勇杀退等语。是贼觊知普吉保进兵，又思

^① 据《钦定平定台湾纪略》（稿本）卷四十一增补。

乘虚从后路来袭。(朱批：可恨，然贼罪大恶极，天厌之时至矣！)一则扰普吉保之粮饷，一则抚埔心庄营盘，以图牵制。则鹿港正需兵接济，而福康安以风旼不顺，未得开驾，粤兵三千亦尚停泊，臣实深焦急。兹本月十四日风势已平，将军、参赞及粤兵俱由大担放洋，如风旼平顺，不过两三日即可抵鹿港。适川省屯练第一起，已于十六日到蚶。是以臣亦即自厦星赴蚶江，料理配渡。(朱批：更好。)现皆随到随即登舟配渡。又查恒瑞、普吉保既已订期夹攻，普吉保所驻之元长庄，离诸罗仅二十余里，恒瑞所驻之盐水港，离诸罗亦仅四十里，两路齐进，计此时必与柴大纪会合。而将军、参赞、巴图鲁、侍卫等及粤兵三千，又齐抵鹿港，川兵随后继进。黔兵到来，臣亦当料理速发。兵力既盛，军声益壮，必可直捣贼巢，迅扫贼匪计日奏功矣！为此缮折驰奏，伏乞皇上睿鉴。谨奏。

乾隆五十二年十月十七日。

乾隆五十二年十月二十九日奉朱批：是，好机会，伫待捷音。钦此。

谕钦差协办大学士福康安等

抵台后即速行会攻

乾隆五十二年十月二十九日 台湾档

大学士和，字寄钦差协办大学士总督将军侯福、钦差湖广总督将军常、闽浙总督李，乾隆五十二年十月二十九日奉上谕：

李侍尧奏，福康安于十四日放洋，两三日内可抵鹿仔港。粤西兵三千，已经先到，适川省屯练第一起，于十六日已到蚶江，

李侍尧现赴该处料理配渡，随到随即登舟。并接据普吉保寄到折稿，知已进兵笨港，与恒瑞订期接应诸罗，与柴大纪会合。又据同知黄嘉训及副将格绷额禀报，元长庄、虎仔坑有贼匪滋扰，均经官兵杀退等语。此是极好机会，已于折内批示。

前因福康安在大担门守风待渡，未能即时开驾，虽稍需时日，但正可等候新调之兵，同时放洋，实属机宜凑合，预兆成功，朕心深为庆慰。今据李侍尧奏，本月十四日海洋风色顺利，福康安同海兰察及巴图鲁、侍卫、章京等，俱由大担放洋，不过两三日可抵鹿仔港。而粤西兵三千，已经早到，福康安现带领同渡。其屯练头起，业经李侍尧在蚶江料理配渡，第二、三、四起亦接续前进。又黔兵现已在途，即日可抵闽境。计福康安抵鹿仔港后，新调生力官兵，合之郑国卿原带闽兵，已共有万余。声威壮盛，足令贼人闻风胆落。又有巴图鲁、侍卫、章京等分队带领，鼓勇直前。福康安到彼后，距今已及旬余，自己督率将弁，乘锐进剿，屡次克捷。而笨港一带，先经普吉保带兵收复，诸罗、盐水港声势联络，正在与恒瑞、柴大纪订期分路夹攻。今福康安统领大兵适抵鹿仔港，普吉保等各路得此信息，自必士气百倍，即日会合，长驱直捣巢穴。谅此么膺乌合，定当指日成擒，伫望捷音速到。

至虎仔坑贼首陈泮，觐知普吉保进兵，又思乘虚潜出绕截，甚属可恨。料此等逆匪罪恶贯盈，久为天理所不容，此时大兵云集，四路攻围，断不能苟延残喘。贼匪等肆逆不法，罪不容诛，其逆首林爽文及庄大田、陈泮、吴领等，必须生擒解京，尽法处治，方足以泄神人之恨。着福康安于统兵进剿时，如逆首等胆敢亲出抗拒，被官兵临阵歼戮，固亦足以伸国法，然究不若按名生致，处以极刑，方可彰宪典而快众忿。福康安务须预为布置，设

法筹办，俾渠魁首恶，悉数生擒，更为妥善，朕心方惬也。再据李侍尧奏，驻守鹿仔港之副将格绷额，于贼首陈泮带领贼伙下山滋扰时，该副将督率兵民，将贼匪杀退，甚属奋勇。前因出有温州镇总兵一缺，谕令福康安于带兵出力之副将内，如徐鼎士、谢廷选等，保举一员，奏明升补。着将格绷额亦归入出力副将内，一并察看，比较何人最为奋勇，即行奏明补用，以示鼓励。

至李侍尧现赴蚶江料理官兵配渡事宜，所办甚好！所有屯练续到之二、三、四起，已于何时登舟放洋？黔省官兵于何时续到配渡？现在福康安正在会兵进剿之时，其续到官兵务须随到随渡，愈速愈妙。

将此由六百里加紧各谕令知之。仍着福康安将抵鹿仔港后如何定计会合攻剿，得有胜仗，擒获贼匪，及普吉保与恒瑞、柴大纪等于何时并力夹攻打仗，并常青处有无得胜各情形，即行迅速驰奏。李侍尧得有各路官兵剿贼捷音，亦即速奏，以慰宵旰廑注，伫盼捷音之至。

钦此。遵旨寄信前来。